

彌勒菩薩說
唐三藏沙門玄奘奉詔譯
韓清淨科記

瑜伽師地論科句披尋記

瑜伽師地論科句披尋記卷第四十一

彌勒菩薩說

唐三藏沙門玄奘奉詔譯

韓清淨科記

本地分中菩薩地初持瑜伽處戒品第十之二

月二、廣顯二戒所攝事相³ 盈一、標名犯等

如是菩薩安住菩薩淨戒律儀，於有違犯及無違犯，是染非染、軟中上品，應當了知。

於有違犯及無違犯等者：約諸事相，說有違犯及無違犯。約犯因緣，說染非染。約染差別，說軟等品。下自當說，名當了知。

盈二、隨類別顯² 旻一、住攝受善法戒⁶ 辰一、施漸次攝⁶ 宿一、於諸供養²

列一、供養三寶² 張一、有違犯

若諸菩薩安住菩薩淨戒律儀，於日月中，若於如來、或爲如來造制多所；若

於正法、或爲正法造經卷所，謂諸菩薩素怛纜藏、摩怛理迦；若於僧伽，謂十方界已入大地諸菩薩衆。

或爲如來造制多所者：謂爲如來所造一切若窣堵波、若龕、若臺，是名制多。

若不以其或少、或多諸供養具而爲供養，下至以身一拜禮敬，下至以語一句頌讚佛法僧真實功德，下至以心一清淨信隨念三寶真實功德。

下至以身一拜禮敬等者：此中一言，且依世俗相續道理。謂一處爲依止，於一境界事，有爾所身語意業轉及隨轉；總爾所時名爲一故。攝決擇分說：如世尊言：若有眾生於如來所，但發一心及一言說：善逝大師！善逝大師！如是發心，我尙說彼於諸善法多有所作，何況身語如其心量隨順奉行，乃至廣說。又依世俗相續道理，名發一語及發身業。（陵本五十五卷一頁⁴³⁸⁹）顯揚頌云：善逝善說妙三身，無畏無流證教法，上乘真實牟尼子，我今至誠先讚禮。（顯揚論一卷一頁）於此頌中，初句讚佛，次句讚

法，三句讚僧，是名讚佛法僧真實功德。若以淨信勝解俱心，隨念如來是正等覺者，乃至廣說，是名隨念三寶真實功德。

空度日夜，是名有犯，有所違越。

是名有犯有所違越者：有犯，謂於淨戒。違越，謂於學處。下皆準知。此中爲顯所化有情受歸依已，應時時間於三寶所勤修供養。成就此者，乃名歸依。如決擇分說。（陵本六十四卷一頁⁵⁰⁷⁵）若於三寶不供養者，是自敗壞歸依正行。即由是故，不能獲得廣大福果，不能攝受菩提廣大資糧，故佛世尊於如是事制立所犯。違逆無量菩薩所學，由是說言是名有犯，有所違越。

若不恭敬、懶惰懈怠而違犯者，是染違犯。若誤失念而違犯者，非染違犯。

若不恭敬至非染違犯者：於佛法僧無敬無憚，名不恭敬。無有羞恥，不樂所學，是名懶惰懈怠。如是違犯，皆由輕慢故起，故是染汙。若非輕慢，而住忘念暫違犯者，當知此由放逸故起，故非染汙。皆如攝事分說。（陵

本九十九卷六頁⁷⁴¹⁹）

張二、無違犯²。寒一、由心狂亂

無違犯者，謂心狂亂。

無違犯者謂心狂亂者：若心癡狂，於所犯罪起顛倒想，謂是無犯，名心狂亂。由此因緣，從初不犯說無違犯。如攝事分說。（陵本九十九卷八頁⁷⁴²⁶）

寒二、由意樂淨

若已證入淨意樂地，常無違犯。由得清淨意樂菩薩，譬如已得證淨苾芻，恆時法爾於佛法僧以勝供具承事供養。

若已證入淨意樂地至承事供養者：謂諸菩薩住極喜住，是名已入淨意樂地。於此住中，由二因緣現見諸佛；既得見已，隨力隨能興一切種恭敬供養，奉施種種上妙樂具，乃至廣說。二因緣者，謂羸淨信及正願力。如住品說。（陵本四十七卷二十四頁³⁸⁰⁹）由是此說常無違犯。若諸菩薩已能見

諦，於佛法僧所有淨信深固根本，於餘生中亦不可引；及淨尸羅，於惡不善法獲得畢竟不作律儀；如是名爲已得證淨苾芻。即四證淨，謂佛、法、僧、戒。由依淨信，設在餘生，於三寶所畢竟無轉，是故說言恆時法爾於佛法僧以勝供具承事供養。

列二、貪著供養²。張一、有違犯

若諸菩薩安住菩薩淨戒律儀，有其大欲而無喜足，於諸利養及以恭敬生著不捨，是名有犯，有所違越，是染違犯。

有其大欲至是染違犯者：此中違犯，由貪煩惱猛盛故起，故是染汙。如攝事分說。（陵本九十九卷六頁⁷⁴¹⁹）

張二、無違犯

無違犯者，謂爲斷彼，生起樂欲，發動精進攝彼對治。雖動遮遏，而爲猛利性感所蔽，數起現行。

猛利性感所蔽者：此中性感，謂俱生貪。上品現行，故言猛利。心爲蔽

抑，不自在轉，故言所蔽。此依初業說無違犯。

宿二、於隨世儀。² 列一、有違犯

若諸菩薩安住菩薩淨戒律儀，見諸耆長有德可敬同法者來，憍慢所制，懷嫌恨心、懷恚惱心，不起承迎，不推勝座。若有他來語言談論、慶慰、請問，憍慢所制，懷嫌恨心、懷恚惱心，不稱正理發言酬對。是名有犯，有所違越，是染違犯。

見諸耆長有德可敬同法者來至是染違犯者：年德俱尊，此說耆長有德可敬。於如是輩同法者來，應正奉迎，敷座延坐，敬問、禮拜、合掌、殷勤，修和敬業。年德相似，此說名他。於如是輩，應正問訊、酬對、歡慰，以軟美言共興談論，不依等慢而自格量。義如菩提分品說。（陵本四十四卷十九頁³⁶⁰⁵）若諸菩薩，於此應作而不作者，是故成犯。此犯因緣，由憍慢制，及懷嫌恨與恚惱心，當知皆是盛煩惱攝，故是染汙。

非憍慢制，無嫌恨心、無恚惱心，但由懶惰、懈怠、忘念、無記之心，是名有犯，有所違越，非染違犯。

但由懶惰懈怠忘念無記之心至非染違犯者：此中略說有四種心，謂懶惰、懈怠、忘念，及與無記。前三皆是放逸所攝，後之一種無知所攝，故非染汙。義如攝事分釋。（陵本九十九卷六頁⁷⁴¹⁸）此復云何？懶惰、懈怠是放逸果，忘念是放逸因，由此三皆放逸攝。由無覺慧、無所知故，不能記別如所應轉，名無記心。由是無記無知所攝，非約性類名無記故。不作此釋，有多相違。聖教不說懈怠、忘念通無記故，亦不別說有無記心犯所犯故。無知成犯，總有多種。謂於所犯不審聽聞、不善領悟，彼無解了、無有覺慧、無所知故，於其所犯起無犯想而犯眾罪。今於此中，唯取無有覺慧，說為無知。謂於年德俱尊、或相似者來現前時，及興言論，都無作意，不覺知故。由是因緣，雖有違犯，而非染汙。復次，此懶惰、懈怠，放逸為因，故說非染；前文所說懶惰、懈怠，輕慢為因，是故說染。染非染別，如是應知。

列二、無違犯

無違犯者，謂遭重病；或心狂亂；或自睡眠他生覺想，而來親附語言談論、慶慰、請問；或自爲他宣說諸法論議決擇；或復與餘談論、慶慰；或他說法論議決擇屬耳而聽；或有違犯說正法者，爲欲將護說法者心；或欲方便調彼、伏彼，出不善處安立善處；或護僧制；或爲將護多有情心；而不酬對，皆無違犯。

無違犯等者：初二種相，通說一切；後所餘相，唯說不酬對。如是應知。
宿三、於他延請² 列一、有違犯

若諸菩薩安住菩薩淨戒律儀，他來延請，或往居家、或往餘寺，奉施飲食及衣服等諸資生具，憍慢所制，懷嫌恨心、懷恚惱心，不至其所，不受所請，是名有犯，有所違越，是染違犯。

他來延請者：延謂招延，爲修福故。欲求果報，是故招延。請謂奉請，爲修慧故。欲求解脫，是故奉請。如攝異門分說。（陵本八十四卷二頁⁶³⁵⁴）

若由懶惰、懈怠、忘念、無記之心，不至其所，不受所請，是名有犯，有所違越，非染違犯。

列二、無違犯

無違犯者，或有疾病；或無氣力；或心狂亂；或處懸遠；或道有怖；或欲方便調彼、伏彼，出不善處安立善處；或餘先請；或爲無間修諸善法，欲護善品令無暫廢；

或爲無間修諸善法等者：此中善法，唯說定心。精勤加行，是謂無間。定資糧等，說爲善品。令不退失，是名爲護。

或爲引攝未曾有義；或爲所聞法義無退；如爲所聞法義無退，論議決擇，當知亦爾；或復知彼懷損惱心，詐來延請；或爲護他多嫌恨心；或護僧制；不至其所，不受所請，皆無違犯。

或爲引攝未曾有義者：創得現觀，見實真如，是名未曾有義。於現觀前，若以分別所攝如理作意，思惟其相修習加行，令能證得，是名引攝。

宿四、於他奉施。² 列一、有違犯

若諸菩薩安住菩薩淨戒律儀，他持種種生色可染、末尼、眞珠、琉璃等寶，及持種種衆多上妙財利供具殷勤奉施，由嫌恨心、或恚惱心，違拒不受，是名有犯，有所違越，是染違犯，捨有情故。

生色可染末尼眞珠琉璃等寶至財利供具者：寶有種種，謂末尼、眞珠、琉璃、螺貝、璧玉、珊瑚、碑磬、瑪瑙、琥珀、金銀、赤珠、右旋，如是等類。彼彼色類成就最勝清淨光瑩，可令愛染，是名生色可染。是諸世間希有難得，故得寶稱。財利供具亦有種種，謂如飲食、衣服、臥具、什物。非少非羸，是名衆多上妙。

若由懶惰、懈怠、忘念、無記之心，違拒不受，是名有犯，有所違越，非染違犯。

列二、無違犯

無違犯者，或心狂亂；或觀受已心生染著；或觀後時彼定追悔；或復知彼於施迷亂；或知施主隨捨隨受，由是因緣定當貧匱；或知此物是僧伽物、宰堵波物；或知此物劫盜他得；或知此物由是因緣多生過患，或殺、或縛、或罰、或黜、或嫌、或責；違拒不受，皆無違犯。

宿五、於來求法 列一、有違犯

若諸菩薩安住菩薩淨戒律儀，他來求法，懷嫌恨心、懷恚惱心，嫉妒變異，不施其法，是名有犯，有所違越，是染違犯。

他來求法至不施其法者：此中求法略有二種，一、求說法，二、求經典。若懷嫌恨及恚惱心而不施者，義通二種。若由嫉妒而不施者，此說不與所寫經典，嫉他得已生勝智故。若由變異而不施者，此說不爲恆說正法，或時染惱，不作義利故。

若由懶惰、懈怠、忘念、無記之心，不施其法，是名有犯，有所違越，非染違犯。

列二、無違犯

無違犯者，謂諸外道伺求過短；或有重病；或心狂亂；或欲方便調彼、伏彼，出不善處安立善處；或於是法未善通利；或復見彼不生恭敬，無有羞愧，以惡威儀而來聽受；或復知彼是鈍根性，於廣法教得法究竟深生怖畏，當生邪見，增長邪執，衰損惱壞；或復知彼，法至其手轉布非人；而不施與，皆無違犯。

無違犯者等者：此中諸事，於求說法及求經典，隨其所應，說不施與。初一句，唯於求說法者；次三句，通說於求說法及求經典者；次二句，亦唯於求說法者；後二句，唯於求經典者。如是道理隨應當知。伺求過短者，謂有求過失心而來聽聞。或於是法未善通利者，謂於如來所說法教名句文身，未能通達無礙解了。以惡威儀而來聽受者，謂如放縱一切身分，不順軌則，不端嚴住。於廣法教得法究竟深生怖畏者，謂於方廣法教所說：要經三無量劫修行難行苦行，方能證得無上菩提。心生驚懼、怯劣、怖畏，謂不出離，撥非佛說；由是邪見、邪執，獲大衰損、觸大業障。法至其手

轉布非人者，謂如欲街賣者、欲秘藏者，及諸不求勝智者，皆名非人。

宿六、於他犯戒。² 列一、有違犯。² 張一、辨染非染

若諸菩薩安住菩薩淨戒律儀，於諸暴惡犯戒有情，懷嫌恨心、懷恚惱心，由彼暴惡犯戒為緣，方便棄捨，不作饒益，是名有犯，有所違越，是染違犯。

於諸暴惡犯戒有情至不作饒益者：謂諸有情，性自成就上品不善身語意業，無少慈愍，由是因緣多起毀犯，是名暴惡犯戒有情。若諸菩薩故思加行，不欲以法攝受、調伏、成熟，及以財物種種布施而作饒益，是名方便棄捨，不作饒益。

若由懶惰懈怠棄捨，由忘念故，不作饒益，是名有犯，有所違越，非染違犯。

張二、釋犯因緣

何以故？非諸菩薩於淨持戒、身語意業寂靜現行諸有情所，起憐愍心，欲作饒益；如於暴惡犯戒有情，於諸苦因而現轉者。

於淨持戒身語意業寂靜現行諸有情所至於諸苦因而現轉者者：謂若有情其

心溫潤、其心純淨，堪忍柔和，無不善業煩惱現行，由是因緣，持戒無犯，名淨持戒、身語意業寂靜現行諸有情類。與此相違，起諸煩惱，造不善業，是名於諸苦因而現轉者。以是因緣，墮諸惡趣受諸苦故。

列二、無違犯

無違犯者，謂心狂亂；或欲方便調彼、伏彼，廣說如前；或為將護多有情心；或護僧制；方便棄捨，不作饒益，皆無違犯。

辰二、戒漸次攝⁷ 宿一、於諸遮罪² 列一、將護他行² 張一、標共聲聞

若諸菩薩安住菩薩淨戒律儀，如薄伽梵於別解脫毗奈耶中，將護他故，建立遮罪，制諸聲聞令不造作。諸有情類，未淨信者令生淨信，已淨信者令倍增長。

如薄伽梵至令倍增長者：苾芻律儀四支所攝。若諸所有軌範具足、所行具足，是名第三隨護他心支。由此制立，遮止毀犯，令諸有情未信生信，已信增長。所以者何？由此軌範具足、所行具足，不為世間之所譏毀，不為

賢良、正至、善士、諸同法者、諸持律者、諸學律者之所訶責，是故令他生淨信等。若有毀犯，當知能令無淨信者倍增不信，有淨信者心生變異。是故世尊於此建立，為將護他，名為遮罪。

於中菩薩與諸聲聞應等修學，無有差別。

張二、釋其所以

何以故？以諸聲聞自利為勝，尚不棄捨將護他行，為令有情未信者信、信者增長，學所學處，何況菩薩利他為勝。

列二、住少事等² 張一、不共聲聞³ 寒一、標

若諸菩薩安住菩薩淨戒律儀，如薄伽梵於別解脫毗奈耶中，為令聲聞少事、少業、少希望住，建立遮罪，制諸聲聞令不造作。

為令聲聞少事少業少希望住建立遮罪者：謂於沙門莊嚴功德法中，若能成就杜多功德，是名少事，由能對治飲食、衣服、敷具貪故。若能成就易養易滿，是名少業，由能對治執受金銀等寶、買賣營為、種蒔林木所作貪

故。若能成就喜足知量，是名少希望住，由能對治爲活邪命非法貪故。與此相違，當知能障遠離及障寂靜。是故世尊於此建立，令諸聲聞不障沙門，名爲遮罪。

於中菩薩與諸聲聞不應等學。

寒二、釋² 來一、簡差別

何以故？以諸聲聞自利爲勝，不顧利他，於利他中少事、少業、少希望住可名爲妙；非諸菩薩利他爲勝，不顧自利，於利他中少事、少業、少希望住得名爲妙。

來二、廣如應

如是菩薩爲利他故，從非親里長者、居士、婆羅門等及恣施家，應求百千種種衣服，觀彼有情有力無力，隨其所施，如應而受。如說求衣，求鉢亦爾。如求衣鉢，如是自求種種絲縷，令非親里爲織作衣。爲利他故，應畜種種憍世耶衣、諸坐臥具，事各至百，生色可染百千俱胝，復過是數亦應取積。

寒三、結

如是等中少事、少業、少希望住制止遮罪，菩薩不與聲聞共學。

如是菩薩爲利他故至不與聲聞共學者：此中爲簡少事、少業、少希望住，是故應求百千種種衣服，乃至亦應取積。如是等事，於諸聲聞制立遮罪。菩薩不爾，是故名爲不應等學。

張二、出有違犯

安住淨戒律儀菩薩，於利他中，懷嫌恨心、懷恚惱心，少事、少業、少希望住，是名有犯，有所違越，是染違犯。若由懶惰、懈怠、忘念、無記之心，少事、少業、少希望住，是名有犯，有所違越，非染違犯。

宿二、於諸性罪² 列一、總開無犯

若諸菩薩安住菩薩淨戒律儀，善權方便，爲利他故，於諸性罪少分現行，由是因緣，於菩薩戒無所違犯，生多功德。

善權方便至生多功德者：不善業道所攝身語諸業，名諸性罪。謂性是不

善，能為雜染損惱於他，能為雜染損惱於自。雖不遮制，但有現行便往惡趣；雖不遮制，但有現行能障沙門。如攝事分說。（陵本九十九卷五頁⁷⁴¹⁶）如是性罪，五相所攝。一、事，二、想，三、欲樂，四、煩惱，五、方便究竟。如決擇分釋。（陵本五十九卷十二頁⁴⁸²⁷）今於此中，說諸菩薩性罪現行，非由煩惱，不具一切，故說少分。又諸菩薩為利他故，作所應作，皆由愛諸有情、憐諸有情增上力故，非染汙心，是故此說由是因緣。由無染汙，說無違犯。由具憐愍，說多功德。以能修行自他利行，攝受隨與無上正等菩提果故。

列二、別釋其相。⁸ 張一、於殺生。² 寒一、出因緣。² 來一、思惟所作

謂如菩薩見劫盜賊，為貪財故，欲殺多生，或復欲害大德聲聞、獨覺、菩薩，或復欲造多無間業。

見劫盜賊至多無間業者：殺生因緣略有三種，謂貪瞋癡。此中且舉貪為因緣，起殺欲樂，說劫盜賊為貪財故，欲殺多生，乃至廣說。當知所餘

諸有情類，由其猛利瞋癡為因緣故，非無如是欲殺多生等事，略不具說。

若於一時頓殺多類，名殺多生，此由方便，殺生成重。若諸聲聞、獨覺、菩薩，由田廣大，名為大德。此有五相，如決擇分釋。（陵本六十卷十二頁⁴⁸⁸⁰）若殺害彼，此由事故，名重殺生。若業能感無間大地獄果，名無間業，此有五種，謂害母等。又有無間同分業，亦名無間業，由是種種，是故名多。菩薩於如是事現見在前，故名為見。

見是事已，發心思惟：我若斷彼惡眾生命，墮那落迦，如其不斷，無間業成，當受大苦；我寧殺彼墮那落迦，終不令其受無間苦。

來二、加行所作

如是菩薩意樂思惟，於彼眾生或以善心、或無記心，知此事已，為當來故深生慚愧，以憐愍心而斷彼命。

寒二、結無犯

由是因緣，於菩薩戒無所違犯，生多功德。

見是事已至生多功德者：世親攝論釋云：謂諸菩薩若如是知，如是品類補特伽羅，於此不善無間等事將起加行，以他心智了知彼心，無餘方便能轉彼業。如實了知彼由此業定退善趣，定往惡趣。如是知己，生如是心：我作此業，當墮惡趣，我寧自往，必當脫彼；於彼現在雖加少苦，令彼未來多受安樂。是故菩薩譬如良醫，以饒益心雖復殺之，而無少罪，多生其福。由多福故，疾證無上正等菩提。今依彼釋，正解此文。彼云他心智，此云善心、或無記心。當知他心智，即善、無記心自性；善、無記心，即他心智差別。由他心智，若定力起，名爲善心；若通力起，名無記心。文雖有別，其義是一。非餘善心、或無記心能知彼欲墮決定故。餘隨所應，一切當知。

張二、於廢黜² 寒一、出因緣

又如菩薩，見有增上增上宰官，上品暴惡，於諸有情無有慈愍，專行逼惱。菩薩見已，起憐愍心，發生利益安樂意樂，隨力所能，若廢、若黜增

上等位。

寒二、結無犯

由是因緣，於菩薩戒無所違犯，生多功德。

見有增上增上宰官等者：初一增上，謂是國王，以彼攝受一切所統僚庶，位最尊勝，得增上名。次一增上，謂彼宰官，即諸大臣。若輔相等，於宰官中位爲尊勝，故名增上宰官。由是差別，故下文說若廢、若黜增上等位。等言，等取增上宰官，不說所餘。菩薩見彼逼惱有情，由是因緣，當受長夜無義無利。無餘方便能轉彼業，作是思惟：寧自成就瞋恚業道，故惱害他，廢黜彼位，終不令其當受如是長夜無義利苦，是名起憐愍心，發生利益安樂意樂。此於瞋恚業道相似有犯，然實無犯；於其大悲相似障害，然實無害；由是說言於菩薩戒無所違犯，生多功德。又此瞋恚業道，雖非聲聞性罪所攝，然於有情能爲惱害，是諸菩薩所不應作，故次殺生說如是事。

張三、於不與取²。寒一、出因緣²。來一、於劫盜賊²。暑一、奪取盜物。又如菩薩，見劫盜賊奪他財物，若僧伽物、宰堵波物，取多物已執爲已有，縱情受用。菩薩見已，起憐愍心，於彼有情發生利益安樂意樂，隨力所能，逼而奪取，勿令受用如是財故，當受長夜無義無利。

暑二、還復所主

由此因緣，所奪財寶，若僧伽物，還復僧伽；宰堵波物，還宰堵波；若有情物，還復有情。

奪他財物等者：他謂有情。如下說言若有情物，還復有情。此可準知。

來二、於眾主等

又見眾主、或園林主，取僧伽物、宰堵波物，言是已有，縱情受用。菩薩見已，思擇彼惡，起憐愍心，勿令因此邪受用業，當受長夜無義無利，隨力所能廢其所主。

寒二、結無犯

菩薩如是雖不與取，而無違犯，生多功德。

又見眾主或園林主者：主僧伽物，名爲眾主；主宰堵波物，名園林主。

張四、於欲邪行²。寒一、明在家²。來一、出因緣

又如菩薩處在居家，見有母邑現無繫屬，習姪欲法，繼心菩薩求非梵行。菩薩見已，作意思惟：勿令心恚，多生非福，若隨其欲，便得自在，方便安處令種善根，亦當令其捨不善業。住慈愍心，行非梵行。

來二、結無犯

雖習如是穢染之法，而無所犯，生多功德。

處在居家等者：此說在家菩薩於如是事應可修學，而非出家。若有母邑非已適他，非他所攝，是名現無繫屬。習近姪欲，愛樂味著，是名習姪欲法。由此爲先，繼於菩薩生欣慕欲，期心求與行鄙穢行，是名繼心菩薩求非梵行。若諸菩薩不隨其欲，定當心生恚惱。如諸有情親近菩薩，生福無量；若令恚惱，所生非福無量亦爾。是故菩薩作是思惟：勿令心恚，多生

非福。善法種子，說名善根。無貪瞋等，亦名善根。菩薩令彼出不善處安立善處，由是說言方便安處令種善根。亦令當來永不習近欲邪行業，由是說言捨不善業。

寒二、簡出家

出家菩薩，爲護聲聞聖所教誡，令不壞滅，一切不應行非梵行。

張五、於虛妄語² 寒一、出因緣² 來一、明所爲

又如菩薩爲多有情解脫命難、囹圄縛難、刑手足難、劓鼻刖耳剜眼等難，雖諸菩薩爲自命難，亦不正知說於妄語，然爲救脫彼有情故，知而思擇，故說妄語。

來二、攝要義

以要言之，菩薩唯觀有情義利，非無義利，自無染心，唯爲饒益諸有情故，覆想正知而說異語。

寒二、結無犯

說是語時，於菩薩戒無所違犯，生多功德。

雖諸菩薩爲自命難至而說異語者：如自下文難行戒中作如是言：又諸菩薩受淨戒已，若遭急難乃至失命，於所受戒尙無少闕，何況全犯。是名菩薩第二難行戒。（陵本四十二卷一頁³⁴¹²）是故菩薩終不爲自解脫命難，覆想正知而說妄語。然於有情諸所作事，雖能正知無有乖違，然爲解脫彼彼難苦，要審思擇而作義利，故思加行說於妄語，唯爲饒益諸有情故。又此妄語，亦名異語，謂與自真實想及與正知不同分故。

張六、於離間語² 寒一、出因緣

又如菩薩，見諸有情爲惡朋友之所攝受，親愛不捨。菩薩見已，起憐愍心，發生利益安樂意樂，隨能隨力說離間語，令離惡友，捨相親愛，勿令有情由近惡友，當受長夜無義無利。

寒二、結無犯

菩薩如是以饒益心說離間語，乖離他愛，無所違犯，生多功德。

爲惡朋友之所攝受者：謂有外道，於弟子眾自立爲師，專求利養、專求恭敬、專求自利。若弟子眾爲所攝受，當受長夜無義無利，是故於此名爲惡友。由重現法，不重當來故。

張七、於麤惡語²。寒一、出因緣

又如菩薩，見諸有情爲行越路，非理而行，出麤惡語，猛利訶擯，方便令其出不善處安立善處。

寒二、結無犯

菩薩如是以饒益心，於諸有情出麤惡語，無所違犯，生多功德。

爲行越路非理而行者：若諸有情行不應行，違越世間威儀、軌則，是名爲行越路。違越世間諸有所作，是名非理而行。

張八、於諸綺語²。寒一、出因緣

又如菩薩，見諸有情信樂倡妓、吟詠、歌諷，或有信樂王、賊、飲食、姪蕩街衢無義之論，

信樂倡妓吟詠歌諷至無義之論者：此中綺語，一事所攝。謂戲笑遊樂之語，及處眾雜語。如決擇分說。（陵本五十九卷十八頁⁴⁸⁴³）初即倡妓、吟詠、歌諷，謂或依舞而發歌詞，或依作樂而發歌詞，或復俱依、或不俱依而發歌詞，皆是此類。後即王、賊、飲食、姪蕩街衢無義之論，謂若種種王論、賊論、食論、飲論、妙衣服論、姪女巷論、諸國土論、大人傳論、世間傳論、大海傳論，如是等類皆名能引無義之論。如聲聞地說。（陵本二十五卷十二頁²¹¹⁸）

菩薩於中皆悉善巧，於彼有情起憐愍心，發生利益安樂意樂，現前爲作綺語相應種種倡妓、吟詠、歌諷、王、賊、飲食、姪衢等論，令彼有情歡喜引攝，自在隨屬，方便獎導出不善處安立善處。

寒二、結無犯

菩薩如是現行綺語，無所違犯，生多功德。

令彼有情歡喜引攝自在隨屬者：謂爲菩薩之所引導及與攝受，心生歡喜，

任運自在隨順繫故。

宿三、於邪命法。² 列一、有違犯

若諸菩薩安住菩薩淨戒律儀，生起詭詐虛談現相，方便研求假利求利，味邪命法無有羞恥，堅持不捨；是名有犯，有所違越，是染違犯。

生起詭詐虛談現相至堅持不捨者：謂若方便顯已有勝功德，矯詐構集非常威儀，由是令他謂已有德，當有所施、當有所作。所謂承事，供養衣服、飲食、臥具、病緣醫藥及諸資具。是名詭詐。或復凶悖、疆口、矯傲、修飾其名、執恃種姓，乃至宣說已實有德，或復增益，是名虛談。若於他前方便現相，為求衣服，或求隨一沙門資具。或為求多，或求精妙，雖無匱乏，而現被服故弊衣裳，為令他知有所匱乏，給施眾多上妙衣服，乃至廣說。是名現相。若於他所，如其所欲不得稱遂，或彼財物有所闕乏，求不得時，即欲彊逼、研磨羸語，而苦求索，是名方便研求。若彼財物無所匱乏，得下劣時，便對施主現前毀棄所得財物，如是告言：咄哉男子！某善男子、某善女人，方汝族姓及以財寶，極為下劣，又極貧匱，而能惠施如是如是多妙悅意資產眾具；汝望於彼，族姓尊貴，財寶豐饒，何為但施如是少劣非悅意物？是名假利求利。如是等相，名邪命法。由非法故，說名邪命。如聲聞地說。（陵本二十二卷十頁¹⁹¹⁹）若於如是味邪命法現生起時，無慚無愧，不思對治，是名無有羞恥。不生樂欲速疾除遣，是名堅執不捨。

列二、無違犯

無違犯者，若為除遣生起樂欲，發動精進，煩惱熾盛蔽抑其心，時時現起。

無違犯者等者：文易可知。約初修業，故作是說。

宿四、於虧軌則。² 列一、有違犯

若諸菩薩安住菩薩淨戒律儀，為掉所動，心不寂靜，不樂寂靜，高聲嬉戲誼諱紛聒，輕躁騰躍望他歡笑；如此諸緣，是名有犯，有所違越，是染違犯。

爲掉所動等者：掉謂掉舉；令心散動，不證寂靜，是名爲掉所動，心不寂靜；即依此相立掉舉蓋。不樂遠離，樂相雜住，是名不樂寂靜。戲者，謂雙陸、擲蒲、弄珠等戲。於此處所高呼召聲、大集會聲，令意躁擾、令意不安、令意不靜，是名誼譁紛聒。習近愛樂諸所行事，謂相執持手臂髮等。或相摩觸隨一身分，或抱或鳴，或相顧盼，或作餘事，是名輕躁騰躍，由此令心誼動騰躍故。復有所餘種類歡樂。謂互相受用，受用境界，受諸快樂；或由同處，或因戲論，歡娛而住，是名爲歡。或因開論、或因合論，現齒而笑，是名爲笑。義如三摩呬多地說。（陵本十一卷七頁⁸⁶⁴）由此不樂寂靜乃至望他歡笑爲因緣故，能生掉舉，障住寂靜，依此建立名染違犯。

若忘念起，非染違犯。

列二、無違犯

無違犯者，若爲除遣生起樂欲，廣說如前；若欲方便解他所生嫌恨令息；若欲遣他所生愁惱；若他性好如上諸事，方便攝受，敬慎將護，隨彼而轉；若他有情猜阻菩薩，內懷嫌恨，惡謀憎背，外現歡顏表內清淨；如是一切，皆無違犯。

宿五、於壞大乘² 列一、出染違犯

若諸菩薩安住菩薩淨戒律儀，起如是見，立如是論：菩薩不應忻樂涅槃，應於涅槃而生厭背；於諸煩惱及隨煩惱不應怖畏而求斷滅，不應一向心生厭離；以諸菩薩三無數劫流轉生死，求大菩提。若作此說，是名有犯，有所違越，是染違犯。

起如是見立如是論等者：爲顯自心忍可欲樂當所說義，是名起如是見。爲顯授他當所說義，是名立如是論。謂諸菩薩三無數劫流轉生死，求大菩提，雖於涅槃見有微妙勝利功德，而不深願速證涅槃，是則非於涅槃不應忻樂，非於涅槃應生厭背。又於煩惱及隨煩惱，雖復棄捨雜染過失，然於生死不以無常等行深心厭離，是則非於煩惱及隨煩惱不應怖畏而求斷滅，

非於生死不應一向心生厭離。若作是說，是名正說。與此相違，是名邪說，成染違犯。

列二、釋其所以

何以故？如諸聲聞於其涅槃忻樂親近，於諸煩惱及隨煩惱深心厭離；如是菩薩於大涅槃忻樂親近，於諸煩惱及隨煩惱深心厭離，其倍過彼百千俱胝。以諸聲聞唯爲一身證得義利勤修正行，菩薩普爲一切有情證得義利勤修正行。是故菩薩當勤修集無雜染心，於有漏事隨順而行，成就勝出諸阿羅漢無雜染法。

當勤修集無雜染心等者：謂諸菩薩，於生死中棄捨煩惱及隨煩惱，修集福德、智慧資糧，是名修集無雜染心。以無染心流轉生死，不深願樂速證涅槃，是名於有漏事隨順而行。由是方便，得大菩提，生死、涅槃二俱不住，是名成就勝出諸阿羅漢無雜染法，以阿羅漢唯能成就不住生死無雜染法故。

宿六、於自謗聲² 列一、有違犯

若諸菩薩安住菩薩淨戒律儀，於自能發不信重言，所謂惡聲、惡稱、惡譽，不護不雪。其事若實而不避護，是名有犯，有所違越，是染違犯。

於自能發不信重言等者：謂自不能安住淨戒，不能守護別解律儀，軌則、所行不悉圓滿，由是令他不生淨信、不生敬重，謗聲流布，是謂於自能發不信重言。心懷厭惡，出麤惡語，是名惡聲。現前譏誚，是名惡稱。周遍誹毀，是名惡譽。此染違犯略由二種，一、由觀自過失，謂不避護；二、由觀他過失，謂不清雪。

若事不實而不清雪，是名有犯，有所違越，非染違犯。

列二、無違犯

無違犯者，若他外道；若他憎嫉；若自出家，因行乞行、因修善行，謗聲流布；若忿弊者；若心倒者；謗聲流布，皆無違犯。

若自出家因行乞行等者：捨商農等世間事業，從他乞求衣服、飲食及臥具

等，名行乞行。盡壽遮止人間諸欲及與嬉戲，名修善行。因自出家行如是行，他不同分，故有謗毀。如是謗毀知無違犯。

宿七、於障加行²。列一、有違犯

若諸菩薩安住菩薩淨戒律儀，見諸有情，應以種種辛楚加行、猛利加行而得義利，護其憂惱而不現行，是名有犯，有所違越，非染違犯。

種種辛楚加行猛利加行者：身業所作，名辛楚加行，如治罰等。語業所作，名猛利加行，如訶責等。

列二、無違犯

無違犯者，觀由此緣，於現法中少得義利，多生憂惱。

辰三、忍漸次攝⁵。宿一、於報他怨

若諸菩薩安住菩薩淨戒律儀，他罵報罵，他瞋報瞋，他打報打，他弄報弄，是名有犯，有所違越，是染違犯。

宿二、於不謝他²。列一、有違犯

若諸菩薩安住菩薩淨戒律儀，於他有情有所侵犯，或自不為彼疑侵犯，由嫌嫉心，由慢所執，不如理謝而生輕捨，是名有犯，有所違越，是染違犯。

不如理謝而生輕捨者：若不如法、不平等謝，是名不如理謝。於諸下劣形色、憶念、精進、智等，生輕懷想、生變異想，不作義利，名生輕捨。

若由懶惰、懈怠、放逸，不謝輕捨，是名有犯，有所違越，非染違犯。

若由懶惰懈怠放逸者：懶惰、懈怠是放逸果，如前已說。由是當知，此中違犯，唯說懶惰、懈怠為其因緣，即放逸攝，非離懶惰、懈怠別說放逸故。

列二、無違犯

無違犯者，若欲方便調彼、伏彼，出不善處安立善處；若是外道；若彼希望要因現行非法有罪方受悔謝；若彼有情性好鬥諍，因悔謝時倍增憤怒；若復知彼為性堪忍，體無嫌恨；若必了他因謝侵犯，深生羞恥；而不悔謝，皆無違犯。

宿三、於不受謝²。列一、有違犯

若諸菩薩安住菩薩淨戒律儀，他所侵犯，彼還如法平等悔謝。懷嫌恨心，欲損惱彼，不受其謝，是名有犯，有所違越，是染違犯。雖復於彼無嫌恨心，不欲損惱，然由稟性不能堪忍，故不受謝，亦名有犯，有所違越，是染違犯。

列二、無違犯

無違犯者，若欲方便調彼、伏彼，廣說一切如前應知；若不如法、不平等謝；不受彼謝，亦無違犯。

宿四、於他懷忿²。列一、有違犯

若諸菩薩安住菩薩淨戒律儀，於他懷忿，相續堅持，生已不捨，是名有犯，有所違越，是染違犯。

於他懷忿至是染違犯者：於他所作不饒益事，懷念其相，相續堅固意樂現行，持此意樂，不思對治，故彼生已不能棄捨。由是因緣，說染違犯。

列二、無違犯

無違犯者，爲斷彼故生起樂欲，廣說如前。

無違犯者至廣說如前者：應如有大欲而無喜足文中所說無違犯相，即此廣說一切應知。

宿五、於貪供事²。列一、有違犯

若諸菩薩安住菩薩淨戒律儀，貪著供事增上力故，以愛染心管御徒衆，是名有犯，有所違越，是染違犯。

貪著供事至是染違犯者：謂諸菩薩或是出家，便有營爲衣鉢等業；或是在家，俱有無倒商賈、營農、事王等業。由此發生種種勤苦，菩薩一切皆應忍受。若貪供事，管御徒衆，由此不能忍受自所作處種種勤苦，成染違犯。

列二、無違犯

無違犯者，不貪供侍，無愛染心管御徒衆。

辰四、精進漸次攝。² 宿一、於樂眠等。² 列一、有違犯

若諸菩薩安住菩薩淨戒律儀，懶惰懈怠，耽睡眠樂、臥樂、倚樂，非時非量，是名有犯，有所違越，是染違犯。

懶惰懈怠至非時非量者：謂寢臥時，執取睡眠爲樂，由是便爲上品昏沈睡眠纏所制伏，令於起時身無堪能應時而起，是名耽睡眠樂。偃臥爲樂，是名臥樂。脅臥爲樂，是名倚樂。不能以時修習怳寤瑜伽，是名非時。放縱其心，不知其量，是名非量。

列二、無違犯

無違犯者，若遭疾病；若無氣力；行路疲極，若爲斷彼生起樂欲；廣說一切如前應知。

宿二、於說世事。² 列一、有違犯

若諸菩薩安住菩薩淨戒律儀，懷愛染心，談說世事，虛度時日，是名有犯，有所違越，是染違犯。

懷愛染心談說世事者：謂諸王論、賊論、食論、飲論，乃至一切無義之論，是名談說世事。由是世間樂相雜住談說事故。

若由忘念，虛度時日，是名有犯，有所違越，非染違犯。

列二、無違犯

無違犯者，見他談說護彼意故安住正念須臾而聽，若事希奇，或暫問他，或答他問，無所違犯。

辰五、靜慮漸次攝。³ 宿一、不請教授。² 列一、有違犯

若諸菩薩安住菩薩淨戒律儀，爲令心住，欲定其心，心懷嫌恨，憍慢所持，不詣師所求請教授，是名有犯，有所違越，是染違犯。

爲令心住欲定其心至求請教授者：謂於九種心住中，從初內住乃至最後等持，漸次修習，證根本定。九種心住如聲聞地釋。（陵本三十卷九頁²⁵¹¹）

此說心住，通彼九種。此說定心，即彼等持。總攝一切，是故說言爲令心住欲定其心。若隨信行補特伽羅，要依止他教誡教授，方於其義得奢摩

他、毗鉢舍那，乃至廣說。如解深密經說。（三卷四頁）依此道理，說諸菩薩不詣師所求請教授，名有違犯。

懶惰懈怠而不請者，非染違犯。

列二、無違犯

無違犯者，若遇疾病；若無氣力；若知其師顛倒教授；若自多聞，自有智力能令心定；若先已得所應教授；而不請者，無所違犯。

若自多聞自有智力能令心定者：此說隨法行補特伽羅，能隨所受、所思法相，而於其義得奢摩他、毗鉢舍那。亦如解深密經說。（三卷四頁）

宿二、不捨蓋纏² 列一、舉貪欲蓋² 張一、有違犯

若諸菩薩安住菩薩淨戒律儀，起貪欲蓋，忍受不捨，是名有犯，有所違越，是染違犯。

張二、無違犯

無違犯者，若爲斷彼生起樂欲，發動精進，煩惱猛利蔽抑心故，時時現行。

列二、例瞋恚等

如貪欲蓋，如是瞋恚、惛沈睡眠、掉舉惡作，及與疑蓋，當知亦爾。

起貪欲蓋忍受不捨至當知亦爾者：謂於靜慮、等至障中，略有五蓋，將證彼時能爲障礙。覆真實義，故名爲蓋。何等爲五？一、貪欲蓋，二、瞋恚蓋，三、惛沈睡眠蓋，四、掉舉惡作蓋，五、疑蓋。如三摩呬多地釋。

（陵本十一卷三頁⁸⁴⁵）於此五蓋正現行時，忍可執受，不欲棄捨，是名忍受不捨。餘義可知。

宿三、貪味相應² 列一、有違犯

若諸菩薩安住菩薩淨戒律儀，貪味靜慮，於味靜慮見爲功德，是名有犯，有所違越，是染違犯。

貪味靜慮於味靜慮見爲功德者：謂如有一，先聞靜慮諸定功德，而不聞彼出離方便。於彼一向見勝功德，勇猛精勤；由此因緣，入初靜慮或所餘定。如是入已，後生愛味。如三摩呬多地說。（陵本十二卷二頁⁹⁶⁵）今於

此中，義可準知。

列二、無違犯

無違犯者，若爲斷彼生起樂欲，廣說如前。

辰六、慧漸次攝。⁸ 宿一、毀聲聞教² 列一、有違犯² 張一、出唯染

若諸菩薩安住菩薩淨戒律儀，起如是見，立如是論：菩薩不應聽聲聞乘相應法教，不應受持，不應修學，菩薩何用於聲聞乘相應法教聽聞、受持、精勤修學？是名有犯，有所違越，是染違犯。

不應聽聲聞乘相應法教等者：謂諸菩薩，於聲聞乘相應法教雖不愛樂，然應讀誦、受持、聽聞、思惟，及與聲聞應共學者，非不純熟修行。爲於聲聞種姓補特伽羅，如其所應令成熟故。是故不應起如是見，立如是論：不應聽聞、不應受持、不應修學，乃至廣說。

張二、釋所以

何以故？菩薩尚於外道書論精勤研究，況於佛語。

尚於外道書論精勤研究況於佛語者：此中外道書論，謂如十六異論及諸外論皆此所攝。十六異論者，如有尋有伺地釋。（陵本六卷一頁³⁹¹）菩薩於彼尚應讀誦、受持、聞思純熟，爲立論時於所立論多所作故。又外論者略有三種，一者、因論，二者、聲論，三者、醫方論。如力種性品說。（陵本三十八卷八頁³¹²¹）以諸菩薩於五明處修習善巧，尚於外論精勤研究，況於佛說聲聞相應法教。

列二、無違犯

無違犯者，爲令一向習小法者捨彼欲故，作如是說。

爲令一向習小法者捨彼欲故作如是說者：此約不定種姓，一向修習聲聞乘法補特伽羅，爲令捨彼聲聞下劣樂欲，趣向大乘廣大樂欲，而作是說。

宿二、捨菩薩藏

若諸菩薩安住菩薩淨戒律儀，於菩薩藏未精研究，於菩薩藏一切棄捨，於聲聞藏一向修學，是名有犯，有所違越，非染違犯。

於菩薩藏未精研究等者：謂於十二分教，方廣一分，唯菩薩藏；所餘諸分，有聲聞藏。如力種性品說。（陵本三十八卷八頁³¹²¹）

宿三、修學外論² 列一、有違犯

若諸菩薩安住菩薩淨戒律儀，現有佛教，於佛教中未精研究，於異道論及諸外論精勤修學，是名有犯，有所違越，是染違犯。

現有佛教等者：謂佛所說菩薩、聲聞一切法教，展轉傳來，現住世間未滅未沒，是名現有佛教。十六異論，名異道論。因論、聲論及醫方論，名諸外論。如前已釋。

列二、無違犯

無違犯者，若上聰敏；若能速受；若經久時能不忘失；若於其義能思能達；若於其義能思能達者：謂於佛教所說法義，意善尋思、見善通達。若於佛教如理觀察成就俱行無動覺者，於日月中，常以二分修學佛語，一分學外；則無違犯。

若於佛教如理觀察成就俱行無動覺者：此中覺言，謂真實義覺。一切所作智與俱行，故名俱行。所得勝解不可引奪、不從他緣，故名無動。由四尋思證如實智，由是說言如理觀察成就俱行無動覺者。

宿四、樂著外論

若諸菩薩安住菩薩淨戒律儀，越菩薩法，於異道論及諸外論研求善巧，深心寶翫、愛樂、味著，非如辛藥而習近之，是名有犯，有所違越，是染違犯。

宿五、不解甚深² 列一、有毀謗² 張一、出染違犯

若諸菩薩安住菩薩淨戒律儀，聞菩薩藏，於甚深處最勝甚深真實法義、諸佛菩薩難思神力，不生信解，憎背毀謗：不能引義、不能引法，非如來說，不能利益安樂有情。是名有犯，有所違越，是染違犯。

張二、辨謗所由

如是毀謗，或由自內非理作意，或隨順他而作是說。

於甚深處等者：甚深經典，名甚深處。於此經典所說諸法離言自性真實義

相，是名真實法義。唯是諸佛菩薩無分別智所行境界，故名最勝。有及非有二俱遠離，故名甚深。又復諸佛菩薩略有三種神變威力，一者、神境神變所攝，二者、記說神變所攝，三者、教誡神變所攝，是名諸佛菩薩神力。如是神力，超過一切尋思境相，故名難思。若有於此不能解了，誹謗毀讟，於是義中撥為非義，於是法中撥為非法，唱如是言：此非佛語，是魔所說，由是不能利益安樂有情。如決擇分廣釋其相。（陵本七十六卷十四頁⁵⁸⁴³）是名成犯。

列二、無毀謗²。張一、行無諂曲

若諸菩薩安住菩薩淨戒律儀，若聞甚深最甚深處，心不信解，菩薩爾時應彊信受，應無諂曲，應如是學：我為非善，盲無慧目，於如來眼隨所宣說，於諸如來密意語言而生誹謗。菩薩如是自處無知，仰推如來，於諸佛法無不現知等隨觀見。

張二、出無違犯

如是正行，無所違犯。雖無信解，然不誹謗。

若聞甚深最甚深處心不信解等者：謂於所聞甚深秘密言說，雖無力能如實解了，然於此法能生勝解，發清淨信，信此經典是如來說，是其甚深、顯現甚深，空性相應，難見難悟，不可尋思，非諸尋思所行境界、微細詳審聰明智者之所解了，是名應彊信受。於此經典所說義中，菩薩應無諂曲，如實顯發，自輕而住，作如是言：諸佛菩提為最甚深，諸法法性亦最甚深，唯佛如來能善了達，非是我等所能解了。佛出世已，觀待彼彼所化有情，說正法眼，名如來眼。若有於此隨所宣說甚深經典密意語言生誹謗者，是則由自盲無慧目，不能解了。如是誹謗，應獲衰損及諸業障，故說非善。菩薩如是自處無知，仰推諸佛如來為彼種種勝解有情轉正法教，諸佛如來無邊智見，由此無邊智見，於能引攝義利法聚、於能引攝非義利法聚、於能引攝非義利非非義利法聚，遍一切種現前等覺，是名於諸佛法無不現知等隨觀見。等謂等遍，遍於三聚一切種故。隨謂隨一，隨於能引有

義聚法現前覺故。是即如來一切種妙智。

宿六、自讚毀他²。列一、有違犯

若諸菩薩安住菩薩淨戒律儀，於他人所有染愛心、有瞋恚心，自讚毀他，是名有犯，有所違越，是染違犯。

於他人所至自讚毀他者：謂爲貪求利養恭敬，有其大欲而無喜足，是名有染愛心，由是自讚有勝功德。若嫉他得，不生隨喜，是名有瞋恚心，由是毀他有多過失。

列二、無違犯

無違犯者，若爲摧伏諸惡外道；若爲住持如來聖教；若欲方便調彼、伏彼，廣說如前；或欲令其未淨信者發生淨信，已淨信者倍復增長。

宿七、不往聽聞²。列一、有違犯

若諸菩薩安住菩薩淨戒律儀，聞說正法論議決擇，憍慢所制，懷嫌恨心、懷恚惱心，而不往聽，是名有犯，有所違越，是染違犯。

聞說正法論議決擇等者：此中懷嫌恨心、懷恚惱心，謂依說正法者及與論議決擇補特伽羅處所而起，說染違犯。

若爲懶惰懈怠所蔽，而不往聽，非染違犯。

列二、無違犯

無違犯者，若不覺知；若有疾病；若無氣力；若知倒說；

若知倒說者：謂若知彼說法補特伽羅，於正法教不能以相應文句、助伴、隨順、清亮、有用、相稱、應順、常委分資糧法如理宣說；由不如理，故名倒說。

若爲護彼說法者心；若正了知彼所說義，是數所聞、所持、所了；若已多聞，具足聞持，其聞積集；

若已多聞具足聞持其聞積集者：無量經典初中後分皆能聽受，故名多聞。隨所聞義皆能憶持，令不忘失，故名聞持。數習文義，令其堅住，是故說名其聞積集。

若欲無間於境住心；若勤引發菩薩勝定；

若欲無間於境住心者：謂於定境令心安住，發起樂欲，勤修加行。

若自了知上品愚鈍，其慧鈍濁，於所聞法難受難持，難於所緣攝心令定；

若自了知上品愚鈍等者：謂於所聽聞法，難可信受、難不忘失，由是自知上品愚鈍。又於所緣所知事境，難可攝心令住於定，由是自知其慧鈍濁。以是因緣，而不往聽，故無違犯。

不往聽者，皆無違犯。

宿八、輕說法師

若諸菩薩安住菩薩淨戒律儀，於說法師故思輕毀，不深恭敬，嗤笑調弄，但依於文不依於義，是名有犯，有所違越，是染違犯。

但依於文不依於義者：謂諸菩薩爲求義故，從他聽法，不爲求世藻飾文辭。菩薩求義不爲求文而聽法時，雖遇常流言音說法，但依於義，恭敬聽受。如菩提分品說。（陵本四十五卷一頁³⁶¹³）與此相違，名但依文不依於

義。

毘二、住饒益有情戒¹¹ 辰一、不爲助伴² 宿一、有違犯² 列一、總標

若諸菩薩安住菩薩淨戒律儀，於諸有情所應作事，懷嫌恨心、懷恚惱心，不爲助伴。

列二、舉類

謂於能辦所應作事，或於道路若往若來，或於正說事業加行，或於掌護所有財寶，或於和好乖離諍訟，或於吉會，或於福業，不爲助伴，是名有犯，有所違越，是染違犯。

謂於能辦所應作事等者：謂若是事是所應作，及有力能成辦彼事，是名能辦所應作事。一切種相，如前住饒益有情戒中已釋，唯前後譯文略有不同。前說無倒事業加行，此云正說事業加行。前說義會，此云吉會。譯雖不同，而事無別，其義應知。

若爲懶惰懈怠所蔽，不爲助伴，非染違犯。

宿二、無違犯

無違犯者，若有疹疾；若無氣力；若了知彼自能成辦；若知求者自有依怙；若知所作能引非義、能引非法；若欲方便調彼、伏彼，廣說如前；

無違犯者若有疹疾若無氣力等者：此簡自無力能。若了知彼自能成辦，若知求者自有依怙者，此簡非定應作。若知所作能引非義、能引非法者，此簡非所應作。餘如文知。

若先許餘爲作助伴；若轉請他有力者助；若於善品正勤修習，不欲暫廢；若性愚鈍，於所聞法難受難持，如前廣說；若爲將護多有情意；若護僧制；不爲助伴，皆無違犯。

辰二、不往供事² 宿一、舉有疾病² 列一、有違犯

若諸菩薩安住菩薩淨戒律儀，見諸有情遭重疾病，懷嫌恨心、懷恚惱心，不往供事，是名有犯，有所違越，是染違犯。若爲懶惰懈怠所蔽，不往供事，非染違犯。

列二、無違犯

無違犯者，若自有病；若無氣力；若轉請他有力隨順令往供事；若知病者有依有怙；若知病者自有勢力，能自供事；若了知彼長病所觸，堪自支持；若爲勤修廣大無上殊勝善品；若欲護持所修善品，令無間闕；若自了知上品愚鈍，其慧鈍濁，於所聞法難受難持，難於所緣攝心令定；若先許餘爲作供事。

宿二、例有苦者

如於病者，於有苦者爲作助伴，欲除其苦，當知亦爾。

辰三、不爲說法² 宿一、有違犯

若諸菩薩安住菩薩淨戒律儀，見諸有情爲求現法後法事故，廣行非理，懷嫌恨心、懷恚惱心，不爲宣說如實正理，是名有犯，有所違越，是染違犯。

見諸有情爲求現法後法事故廣行非理等者：謂若有情，於現法中不以正法追求諸欲，即爲此故樂行惡行，是名爲求現法事故，廣行非理。若求生天

及邪解脫，即爲此故樂行惡行，或修苦行，如祠祀外道、宿作因論者等是，是名爲求後法事故，廣行非理。由不如理作意相應尋伺名非理故。若由懶惰懈怠所蔽，不爲宣說，非染違犯。

宿二、無違犯

無違犯者，若自無知；若無氣力；若轉請他有力者說；若即彼人自有智力；若彼有餘善友攝受；若欲方便調彼、伏彼，廣說如前；若知爲說如實正理，起嫌恨心，若發惡言，若顛倒受，若無愛敬；

若知爲說如實正理等者：由說正理令斷惡行，不獲彼心，故起嫌恨。或心忿勃，故發惡言。或住見取，故顛倒受。或心憎背，故無愛敬。由是不能令彼出不善處安立善處，菩薩知己，故不爲說。

若復知彼性弊懽悞；不爲宣說，皆無違犯。

若復知彼性弊懽悞者：自性弊下，難令離欲。自性懽悞，難令調伏。菩薩知己，亦不爲說。

辰四、不酬有恩² 宿一、有違犯

若諸菩薩安住菩薩淨戒律儀，於先有恩諸有情所不知恩惠、不了恩惠，懷嫌恨心，不欲現前如應酬報，是名有犯，有所違越，是染違犯。

於先有恩諸有情所等者：有恩有情，如前已解。於其恩惠不如實知，是名不知；不能明記，是名不了。如前已說，暫見申敬，乃至若等若增財利供養現前酬答，非以下劣，是名現前酬報。又如前說，於彼事業應作助伴，乃至廣說，是名如應酬報。

若爲懶惰懈怠所蔽，不現酬報，非染違犯。

宿二、無違犯

無違犯者，勤加功用，無力無能不獲酬報；若欲方便調彼、伏彼，廣說如前；若欲報恩而彼不受；皆無違犯。

辰五、不解愁憂² 宿一、有違犯

若諸菩薩安住菩薩淨戒律儀，見諸有情墮在喪失財寶、眷屬、祿位、難處，

多生愁惱，懷嫌恨心，不往開解，是名有犯，有所違越，是染違犯。若爲懶惰懈怠所蔽，不往開解，非染違犯。

宿二、無違犯

無違犯者，應知如前於他事業不爲助伴。

辰六、不施資具² 宿一、有違犯

若諸菩薩安住菩薩淨戒律儀，有飲食等資生眾具，見有求者來正希求飲食等事，懷嫌恨心、懷恚惱心，而不給施，是名有犯，有所違越，是染違犯。若由懶惰、懈怠、放逸，不能施與，非染違犯。

宿二、無違犯

無違犯者，若現無有可施財物；若彼希求不如法物、所不宜物；若欲方便調彼、伏彼，廣說如前；

若彼希求不如法物所不宜物者；若彼希求屬他非同意物，是名不如法物。若有來求種種能引戲樂、能引無義所施之物，是名所不宜物。由令憍逸，

行諸惡行，墮惡趣故。若有來求罽羅、罝、菴，爲害眾生及爲習學，是名不如法物。若有病者來求非量、非宜飲食；及有性多饞嗜，更復來求珍妙飲食；是名所不宜物。如是等類，如施品中說。（陵本三十九卷四頁³¹⁸⁹）若來求者王所匪宜，將護王意；若護僧制；而不惠施，皆無違犯。

辰七、不正攝受² 宿一、有違犯

若諸菩薩安住菩薩淨戒律儀，攝受徒眾，懷嫌恨心，而不隨時無倒教授、無倒教誡；知眾匱乏，而不爲彼從諸淨信長者、居士、婆羅門等，如法追求衣服、飲食、諸坐臥具、病緣醫藥資身什物，隨時供給；是名有犯，有所違越，是染違犯。

攝受徒眾等者：菩薩攝受徒眾由二因緣。一者、以無染心正攝徒眾；二者、於自義利正教修習，非邪加行而陷逗之。然復不應於一切時攝取徒眾，亦非不攝，亦非變異，是名略說菩薩於諸有情攝取攝受。於時時間，隨入勞倦，如其所宜爲說正法；於時時間，爲令繫念於所緣境，與正教

授；是名隨時無倒教授。於他毀犯，隨時正舉令其覺悟，應時如理訶責、擯罰，是名隨時無倒教誡。於他所爲財利因緣，成就上品經營遽務，過於自事，是故爲彼追求資財眾具，隨時供給。如是等事，是諸菩薩攝受徒眾正所應作。義如攝受品說。（陵本四十八卷二十七頁³⁹⁰⁰）不作應作，成有違犯。

若由懶惰、懈怠、放逸，不往教授、不往教誡、不爲追求如法眾具，非染違犯。

宿二、無違犯

無違犯者，若欲方便調彼、伏彼，廣說如前；若護僧制；若有疹疾；若無氣力，不任加行；若轉請餘有勢力者；若知徒眾世所共知，有大福德，各自有力求衣服等資身眾具；若隨所應教授教誡，皆已無倒教授教誡；若知眾內有本外道，爲竊法故來入眾中，無所堪能，不可調伏；皆無違犯。

辰八、不隨心轉。² 宿一、有違犯

若諸菩薩安住菩薩淨戒律儀，懷嫌恨心，於他有情不隨心轉，是名有犯，有所違越，是染違犯。若由懶惰、懈怠、放逸，不隨其轉，非染違犯。

宿二、無違犯

無違犯者，若彼所愛非彼所宜；

若彼所愛非彼所宜者：謂諸菩薩，欲隨所化有情心轉，應審觀察。若於如是如是相事現行身語生他喜樂，如是喜樂令他憍逸，行諸惡行，身壞已後墮諸惡趣，於如是事不隨其轉。雖彼所愛，然非宜故。

若有疾病；若無氣力，不任加行；若護僧制；若彼所愛雖彼所宜，而於多眾非宜、非愛；若爲降伏諸惡外道；若欲方便調彼、伏彼，廣說如前；不隨心轉，皆無違犯。

若彼所愛雖彼所宜而於多眾非宜非愛者：謂於如是一有情事現行身語令生喜樂，雖彼所愛及是所宜，然餘有情非宜、非愛，於如是事，爲欲將護多有情意，亦不隨轉。如一有情，爲所應作來求助伴，菩薩爾時若應許彼，

雖彼所愛及彼所宜，然餘多眾由是因緣非宜、非愛，是故菩薩於如是事現行身語，應審思擇，令不現行。如求助伴，求飲食等一切應知。

辰九、不顯德等²。宿一、有違犯

若諸菩薩安住菩薩淨戒律儀，懷嫌恨心，他實有德不欲顯揚，他實有譽不欲稱美，他實妙說不讚善哉，是名有犯，有所違越，是染違犯。

他實有德等者：真實功德略有五種，謂信、戒、聞、捨、慧，如前已解。戒、見、軌則、正命圓滿，具足悲愍，無倒無動，由是名稱遐邇流布，名實有譽。能為有情善說正法，於諸欲中，能廣開示過患出離清淨品法，又能宣說苦等聖諦相應言論，名實妙說。是為賢聖之所稱讚，故言善哉。菩薩於此實有德等而不顯揚、稱美、讚歎，成有違犯。

若由懶惰、懈怠、放逸，不顯揚等，非染違犯。

宿二、無違犯

無違犯者，若知其人性好少欲，將護彼意；若有疾病；若無氣力；若欲方便

調彼、伏彼，廣說如前；若護僧制；若知由此顯揚等緣，起彼雜染憍舉無義，為遮此過；若知彼德雖似功德，而非實德；若知彼譽雖似善譽，而非實譽；若知彼說雖似妙說，而實非妙；若為降伏諸惡外道；若為待他言論究竟；不顯揚等，皆無違犯。

辰十、不訶責等²。宿一、有違犯

若諸菩薩安住菩薩淨戒律儀，見諸有情應可訶責、應可治罰、應可驅擯，懷染汙心而不訶責；或雖訶責，而不治罰、如法教誡；或雖治罰、如法教誡，而不驅擯；是名有犯，有所違越，是染違犯。

應可訶責應可治罰應可驅擯者：若諸有情有其過失違犯，隨下中上品類差別，如其所應而訶責之、或治罰之、或驅擯之，由是說言應可訶責、治罰、驅擯。

若由懶惰、懈怠、放逸，而不訶責乃至驅擯，非染違犯。

宿二、無違犯

無違犯者，若了知彼不可療治，不可與語，喜出麤言，多生嫌恨，故應棄捨；若觀待時；若觀因此鬥訟諍競；若觀因此令僧誼雜、令僧破壞；知彼有情不懷諂曲，成就增上猛利慚愧，疾疾還淨；而不訶責乃至驅擯，皆無違犯。

知彼有情不懷諂曲等者：此通前三所觀察事。謂觀待時，及復知彼能速還淨，具二因緣，而不訶責乃至驅擯。如是若觀因此鬥訟諍競，若觀因此令僧誼雜等，具二因緣，當知亦爾。此中不覆己惡，如實自顯，是名不懷諂曲。於所毀犯心不忍受，深生羞恥，是名成就增上猛利慚愧。如法速疾發露悔除，防護當來終不重犯，是名疾疾還淨。

辰十一、不現神通² 宿一、有違犯

若諸菩薩安住菩薩淨戒律儀，具足成就種種神通變現威力，於諸有情，應恐怖者能恐怖之，應引攝者能引攝之，避信施故，不現神通恐怖、引攝，是名有犯，有所違越，非染違犯。

具足成就種種神通等者：種種神通若變若現諸所有相，已如前釋。隨其所欲一切事成，是名威力。於樂惡行無信有情，為恐怖彼而現神通，是名應恐怖者能恐怖之。為諸有情歡喜踊躍，方便引令入佛聖教，由是示現種種神變，是名應引攝者能引攝之。若諸菩薩，為避有情於如是事生希奇想，信順於己而行奉施，不為現通恐怖、引攝，成有違犯，捨有情故。

宿二、無違犯

無違犯者，若知此中諸有情類多著僻執，是惡外道，誹謗賢聖，成就邪見，不現神通恐怖、引攝，無有違犯。

盈三、攝無違犯

又一切處無違犯者，謂若彼心增上狂亂，若重苦受之所逼切，若未曾受淨戒律儀，當知一切皆無違犯。

又一切處無違犯者：於有違犯及無違犯，是染非染，已於前文一一具說，今更總顯於一切處說無違犯，如文易知。

日三、勸修學處

復次，如所起諸事菩薩學處，佛於彼彼素怛纜中隨機散說，謂依律儀戒、攝善法戒、饒益有情戒。今於此菩薩藏摩怛理迦綜集而說，菩薩於中應起尊重，住極恭敬，專精修學。

如所起諸事菩薩學處者：如前所顯一一事相，皆依三戒開示建立，故下自釋謂依律儀戒、攝善法戒、饒益有情戒，是名諸所作事菩薩學處。

荒三、明不應犯

是諸菩薩從他正受戒律儀已，由善清淨求學意樂、菩提意樂、饒益一切有情意樂，生起最極尊重恭敬，從初專精不應違犯。

荒四、明還淨法。² 日一、標應悔除

設有違犯，即應如法疾疾悔除，令得還淨。

由善清淨求學意樂等者：此中意樂總有三種，如其次第配屬三戒，謂律儀戒、攝善法戒、饒益有情戒。菩薩自性戒中略有四德，從他正受，如前廣

說。今此更顯善淨意樂及與深敬專念無有違犯，如文可知。

日二、顯悔除法。² 月一、對他發露。² 盈一、由惡作攝

又此菩薩一切違犯當知皆是惡作所攝，應向有力於語表義能覺能受小乘、大乘補特伽羅，發露悔滅。

又此菩薩一切違犯當知皆是惡作所攝者：所犯罪聚略有五種，一者、他勝罪聚，二者、眾餘罪聚，三者、隕墜罪聚，四者、別悔罪聚，五者、惡作罪聚。如是罪聚攝一切罪，是名一切違犯。隨所犯罪心不忍受，便生惡作，是故說言皆是惡作所攝。此有五種差別，如攝事分釋應知。（陵本九十九卷九頁⁷⁴²⁷）

盈二、依犯罪別。³ 旻一、上品犯

若諸菩薩以上品纏違犯如上他勝處法，失戒律儀，應當更受。

旻二、中品犯。² 辰一、舉犯他勝

若中品纏違犯如上他勝處法，應對於三補特伽羅，或過是數，應如發露除惡

作法，先當稱述所犯事名，應作是說：長老專志！或言：大德！我如是名，違越菩薩毗奈耶法，如所稱事犯惡作罪。

以上品纏違犯如上他勝處法至犯惡作罪者：當知此中，他勝處法上品纏犯，不可還淨。以於所犯不生惡作，數數現行，無慚愧故。由是失戒律儀，應當更受，是故不說發露除惡作法。中、下品纏容可還淨，發露悔法，如文易知。

辰二、指餘違犯

餘如苾芻發露悔滅惡作罪法，應如是說。

餘如苾芻發露悔滅惡作罪法應如是說者：五罪聚中，犯眾餘罪及犯麤罪，是名為餘。若犯麤罪，應對於四補特伽羅發露悔除，是即四眾所作羯磨。若眾餘罪，應於二十眾前發露悔除，是即二十眾所作羯磨。如攝事分說。（陵本九十九卷十三頁⁷⁴⁴⁰）是名餘如苾芻發露悔滅惡作罪法。此亦如前作如是說：長老專志！乃至犯惡作罪，是名應如是說。

辰三、下品犯

若下品纏違犯如上他勝處法及餘違犯，應對於一補特伽羅，發露悔法，當知如前。

若下品纏至當知如前者：此中餘言，謂別悔罪、或隕墜罪、或惡作罪。應對於一補特伽羅發露悔除，是即二眾所作羯磨。此悔除法，當知如前，先當稱述所犯事名，乃至廣說。

月二、自誓防護

若無隨順補特伽羅可對發露，悔除所犯，爾時菩薩以淨意樂，起自誓心：我當決定防護當來終不重犯。

日三、結明還淨

如是於犯還出還淨。

若無隨順補特伽羅至終不重犯者：謂若有力於語表義能覺能受小乘、大乘補特伽羅，於自所犯，堪令除遣所生惡作，是故名為隨順補特伽羅。應對

於彼發露所犯，滅除惡作。若無彼人，應以當來無犯意樂，起自誓心，斷滅犯罪因緣，生起猛利慚愧。由是因緣，防護當來終不重犯。

洪二、由自受² 荒一、舉如法受

又諸菩薩欲受菩薩淨戒律儀，若不會遇具足功德補特伽羅，爾時應對如來像前，自受菩薩淨戒律儀。應如是受，偏袒右肩，右膝著地，或蹲、跪、坐，若不會遇具足功德補特伽羅者：謂若同法菩薩已發大願、有智有力於語表義能授能開。如是等相，是名具足功德補特伽羅。

作如是言：我如是名，仰啓十方一切如來、已入大地諸菩薩衆，我今欲於十方世界佛菩薩所，誓受一切菩薩學處，誓受一切菩薩淨戒。謂律儀戒、攝善法戒、饒益有情戒。如是學處、如是淨戒，過去一切菩薩已具，未來一切菩薩當具，普於十方現在一切菩薩今具。於是學處、於是淨戒，過去一切菩薩已學，未來一切菩薩當學，普於十方現在一切菩薩今學。第二、第三亦如是說，說已應起。

荒二、例餘一切

所餘一切如前應知。

所餘一切如前應知者：受律儀戒，已如上說。戒律儀法，應如前知。謂即四種他勝處法，乃至廣說諸事處相，是名所餘一切如前應知。

宇二、起犯差別² 宙一、釋無餘犯² 洪一、標簡

又於菩薩犯戒道中，無無餘犯。

又於菩薩犯戒道中無無餘犯者：謂如前說：善權方便，爲利他故，於諸性罪少分現行。由現行業，可名犯戒；然由方便能作他利，名菩薩道；總說彼事名犯戒道。由是菩薩正所應作，不犯他勝處法，是故說言無無餘犯。五罪聚中，四種罪聚，名有餘罪；他勝罪聚，名無餘罪故。如攝事分說。

（陵本一百卷二頁7474）

洪二、釋義² 荒一、引佛說

如世尊說：是諸菩薩多分應與瞋所起犯，非貪所起。

如世尊說至非貪所起者：此引教證成無餘犯道理。由諸菩薩，於諸有情多所作業。若以憎嫉增上力故而等起者，是名有犯。若以愛憐增上力故而等起者，應名無犯。由是說言多分應與瞋所起犯，非貪所起。此中貪言，非謂煩惱，假說愛憐名爲貪故，由是當知是密意說。

荒二、釋密意

當知此中所說密意。謂諸菩薩愛諸有情、憐諸有情增上力故，凡有所作一切皆是菩薩所作，非非所作；非作所作可得成犯。若諸菩薩憎諸有情、嫉諸有情，不能修行自他利行，作諸菩薩所不應作；作不應作可得成犯。

宙二、指釋犯品

又諸菩薩軟中上犯，如攝事分應當了知。

又諸菩薩軟中上犯等者：此說犯罪意樂貪瞋癡纏，有軟中上品類差別。若由軟品貪瞋癡纏所犯眾罪，是下品罪；若由中品，是中品罪；若由上品，是上品罪。即攝事分中調伏事攝。（陵本九十九卷七頁⁷⁴²¹）

宇三、所學差別² 宙一、舉圓滿³ 洪一、標列

如是菩薩依止一切自毗奈耶勤學所學，便得成就三種圓滿，安樂而住。一者、成就加行圓滿，二者、成就意樂圓滿，三者、成就宿因圓滿。

依止一切自毗奈耶至宿因圓滿者：菩薩自乘所攝戒藏，是名自毗奈耶。此有三種，謂律儀戒、攝善法戒、饒益有情戒，故名一切。依此三種淨戒差別勤學所學，如其次第便得成就三種圓滿。謂依律儀戒，成就加行圓滿；依攝善法戒，成就意樂圓滿；依饒益有情戒，成就宿因圓滿。由此圓滿，得安樂住。此中住言，謂善法可愛生展轉住。此由於諸善法不放逸力，能令後後往善趣生，乃至能得大般涅槃，由是故說安樂而住。

洪二、隨釋³ 荒一、加行圓滿

云何名爲加行圓滿？謂諸菩薩於淨戒中行無闕犯，於身語意清淨現行，不數毀犯發露自惡。如是名爲加行圓滿。

荒二、意樂圓滿

云何名爲意樂圓滿？謂諸菩薩爲法出家，不爲活命；求大菩提，非爲不求；爲求沙門、爲求涅槃，非爲不求。

爲求沙門爲求涅槃者：貪瞋癡等畢竟斷義，是沙門義。證惑解脫及苦解脫，是涅槃義。

如是求者，不住懈怠下劣精進，不雜衆多惡不善法、雜染後有、有諸熾然衆苦異熟、當來所有生老病死。如是名爲意樂圓滿。

不住懈怠下劣精進等者：謂爲求大菩提，故說不住懈怠下劣精進。爲求沙門及與涅槃，故說不雜衆多惡不善法乃至當來所有生老病死。此中惡不善法，即謂貪瞋癡等。衆苦異熟生老病死，即謂苦所依身。別配爲求沙門及與涅槃，其義應知。

荒三、宿因圓滿

云何名爲宿因圓滿？謂諸菩薩，昔餘生中修福修善，故於今世種種衣服、飲食、臥具、病緣醫藥資身什物自無匱乏，復能於他廣行惠施。如是名爲宿因

圓滿。

洪三、總結

菩薩如是依毗奈耶勤學所學，成就如是三種圓滿，安樂而住。

宙二、例衰損

與此相違，當知成就三種衰損，危苦而住。

地三、難行戒等² 玄一、結前生後

如是略廣宣說菩薩若在家品、若出家品一切戒已，自斯已後，即於如是一切戒中，分出所餘難行戒等差別之相，應當了知。

瑜伽師地論科句披尋記卷第四十一

瑜伽師地論科句披尋記卷第四十二

彌勒菩薩說

唐三藏沙門玄奘奉詔譯

韓清淨科記

本地分中菩薩地初持瑜伽處戒品第十之三

玄二、別辨七戒⁷ 黃一、難行戒³ 字一、徵

云何菩薩難行戒？

字二、標

當知此戒略有三種。

字三、釋³ 宙一、棄捨增上

謂諸菩薩，現在具足大財、大族自在增上，棄捨如是大財、大族自在增上，受持菩薩淨戒律儀。是名菩薩第一難行戒。

宙二、於難無虧

又諸菩薩受淨戒已，若遭急難乃至失命，於所受戒尚無少闕，何況全犯。是名菩薩第二難行戒。

宙三、恆無失念

又諸菩薩，如是如是遍於一切行住作意，恆住正念，常無放逸，乃至命終於所受戒無有誤失，尚不犯輕，何況犯重。是名菩薩第三難行戒。

如是如是遍於一切行住作意等者：如前所說五支所攝不放逸行，今唯依二而作是說。謂先時所作不放逸行、俱時隨行不放逸行。謂我定當如如所應行，如如所應住，如是如是行，如是如是住，令無所犯；乃至廣說如如所應行，如如所應住，如是如是行，如是如是住，不起毀犯。由是此說如是如是遍於一切行住作意，義應準知。

黃二、一切門戒。³ 宇一、徵起

云何菩薩一切門戒？

宇二、標列

當知此戒略有四種。一者、正受戒，二者、本性戒，三者、串習戒，四者、方便相應戒。

宇三、隨釋⁴ 宙一、正受戒

正受戒者，謂諸菩薩受先所受三種菩薩淨戒律儀。即律儀戒、攝善法戒、饒益有情戒。

宙二、本性戒

本性戒者，謂諸菩薩住種性位，本性仁賢，於相續中，身語二業恆清淨轉。

本性戒等者：謂諸菩薩六處殊勝有如是相，從無始世展轉傳來，法爾所得，是名本性住種性。於此位中，雖未串習三種淨戒，然性仁慈，於諸有情不極損惱；又性賢善，於同法者易可共住；是名本性仁賢。約所依身，名爲相續，從無始來流轉不息故。此說菩薩戒波羅蜜多種性相，如其所說，當知身語二業恆清淨轉。

宙三、串習戒

串習戒者，謂諸菩薩昔餘生中，曾串修習如先所說三種淨戒。由宿因力所任持故，於現在世一切惡法不樂現行，於諸惡法深心厭離；樂修善行，於善行中深心欣慕。

宙四、方便相應戒

方便相應戒者，謂諸菩薩依四攝事，於諸有情身語意業恆相續轉。

方便相應戒等者：約四攝事，說名方便。此復有四，一、隨攝方便，二、能攝方便，三、令入方便，四、隨轉方便。方便所攝身語意業，於諸有情能正攝受、調伏、成熟，由是故名方便相應戒。如力種性品說。（陵本三

十八卷二十二頁³¹⁷⁵）

黃三、善士戒。³ 字一、徵

云何菩薩善士戒？

字二、標

當知此戒略有五種。

字三、列

謂諸菩薩自具尸羅，勸他受戒，讚戒功德，見同法者深心歡喜，設有毀犯如法悔除。

自具尸羅等者：謂自離殺生乃至離邪見，是名自具尸羅。若以此事勸進他人，是名勸他受戒。若即於彼以無量門稱揚讚述，是名讚戒功德。若見離殺生者乃至離邪見者，深心慶悅，生大歡喜，是名見同法者深心歡喜。如決擇分說。（陵本五十三卷四頁⁴²¹⁸）此由善行所攝而受律儀，是故得名善士戒。於五種中，已說前四，餘後一種，如文易知。

黃四、一切種戒。³ 字一、徵

云何菩薩一切種戒？

字二、標

當知此戒以要言之，六種、七種，總十三種。

六種七種總十三種者：此菩薩戒，從其自性乃至清淨，總有九相；然於一

切相中分數漸增，乃至最後增爲十種，如文可知。今於此中一切種相，依次第數，增六、增七皆此所攝，是故說言六種、七種，總十三種。由是次第乃至增十，總成九相。

字三、釋² 宙一、六種

言六種者，一、迴向戒，迴向大菩提故。二、廣博戒，廣攝一切所學處故。三、無罪歡喜處戒，遠離耽著欲樂、自苦二邊行故。

三無罪歡喜處戒等者：遠離耽著歡樂行邊，由是得名無罪處戒；遠離受用自苦行邊，由是得名歡喜處戒。

四、恆常戒，雖盡壽命亦不棄捨所學處故。五、堅固戒，一切利養恭敬、他論、本隨煩惱不能伏故、不能奪故。

五堅固戒等者：謂此淨戒不爲一切之所摧伏，不爲一切之所引奪，名堅固戒。言一切者，略有三種。謂一切利養恭敬、一切外道異論、一切本隨煩惱。由堅力持，說不能伏；由具勝解，說不能奪。

六、尸羅莊嚴具相應戒，具足一切戒莊嚴故。尸羅莊嚴如聲聞地應知其相。

六尸羅莊嚴具相應戒等者：聲聞地中作如是言：問：何緣世尊宣說尸羅名莊嚴具？答：諸餘世間耳環、指環、腕釧、臂釧及以寶印、金銀、鬘華妙莊嚴具。若有成就幼稚、黑髮、少年、盛壯、姝妙形色而服飾之，少增妙好。乃至廣說戒莊嚴具，於一切類、於一切時，若有服者皆爲妙好。是故尸羅名莊嚴具。（陵本二十二卷十三頁¹⁹²⁹）

宙二、七種

言七種者，一、止息戒，遠離一切殺生等故。二、轉作戒，攝一切善故，饒益有情故。三、防護戒，隨護止息轉作戒故。四、大士相異熟戒。

四大士相異熟戒者：即大士相名爲異熟。此略有八，一者、壽量具足，二者、形色具足，三者、族姓具足，四者、自在具足，五者、信言具足，六者、大勢具足，七者、人性具足，八者、大力具足。如自他利品釋。（陵本三十六卷一頁²⁹⁰¹）由戒是此異熟之因，是故得名大士相異熟戒。

五、增上心異熟戒。

五增上心異熟戒者：由於尸羅善清淨故，便無憂悔；無憂悔故，歡喜安樂；由有樂故，心得安定。由是得名增上心異熟戒。

六、可愛趣異熟戒。

六可愛趣異熟戒者：謂由此戒增上力故，唯於可愛趣中受增上生。若在凡地，即於人中生刹帝利大富貴家，若婆羅門大富貴家，若諸長者大富貴家，若生所餘豪貴大富多諸財穀庫藏等家，乃至能生天趣所當生處。若已入地，始從第一極歡喜住，乃至第十最上成滿諸菩薩住，如其所應差別受生。如住品中廣釋。（陵本四十七卷十三頁³⁷⁷¹）由是得名可愛趣異熟戒。

七、利有情異熟戒。

七利有情異熟戒者：謂諸菩薩由戒爲先，修十一種利有情業，於諸有情有哀憐心、有悲愍心、有親愛心。即由如是串習增上力故，於今現在安住自性能利有情，由是得名利有情異熟戒。

黃五、遂求戒⁴ 字一、徵

云何菩薩遂求戒？

字二、標

當知此戒略有八種。

字三、釋² 宙一、由審思惟² 洪一、舉於自所

謂諸菩薩自諦思惟：如我希求勿彼於我現行斷命，不與而取，穢欲邪行，虛妄，離間，麤惡，綺語，手塊杖等諸非愛觸加害於我。我求是已，他若相違而現行者，我求不遂、我意不悅。

洪二、例於他所

如我希求，他亦如是。勿我於彼現行斷命，廣說乃至惡觸加害；彼求是已，我若相違而現行者，彼求不遂、彼意不悅。我之所作，若有令他所求不遂、意不悅者，何現行爲。

宙二、令不現行

菩薩如是審思惟已，命難因緣亦不於他現行八種所求不遂、不悅意事。

字四、結

如是八種，說名菩薩遂求戒。

勿彼於我現行斷命等者：謂於身語惡不善業有所造作，是名現行。此中前七不善業道，如文易知。諸非愛觸，略有八種。謂手觸觸、塊觸觸、杖觸觸、刀觸觸、冷觸觸、煖觸觸、饑觸觸、渴觸觸。如意地說。（陵本三卷十四頁²⁵⁰）今舉前三，等取所餘，故置等言。

黃六、二世樂戒⁴ 字一、徵

云何菩薩此世他世樂戒？

字二、標

當知此戒略有九種。

字三、釋² 宙一、別列二類² 洪一、四種

謂諸菩薩爲諸有情於應遮處而正遮止，於應開處而正開許，是諸有情應攝受

者正攝受之，應調伏者正調伏之，菩薩於中身語二業常清淨轉，是則名爲四種淨戒。

爲諸有情於應遮處而正遮止等者：謂諸有情，若有所作能往惡趣，或障善趣，或障如法所得利養，或障壽命，或障沙門，如是等類，如來遮制不令現行，名應遮處。與此相違，名應開處。菩薩見已，應正遮止、或正開許。若諸菩薩於諸有情增上攝受，或攝取攝受，彼諸有情如其所應，說名應攝受者。攝受品中廣釋其相。（陵本四十八卷二十六頁³⁸⁹⁸）又於所犯若有過失違犯，或應訶責、或應治罰、或應驅擯，是名應調伏者。菩薩於此諸有情類，隨攝受儀、隨菩薩儀正攝受之，以調伏法正調伏之；不行欺誑，所言誠諦，遠離一切殺縛、捶打、治罰、逼迫、斷截等事；於他毀犯雖有訶責、擯罰，然懷親愛無損惱心；由是說言身語二業常清淨轉。

洪二、五種

復有所餘施、忍、精進、靜慮、般若波羅蜜多俱行淨戒，則爲五種。

宙二、總明九種

總說名爲九種淨戒。

宇四、結

如是菩薩所有淨戒，能令自他現法後法皆得安樂，是故說名菩薩此世他世樂戒。

黃七、清淨戒⁴ 宇一、徵

云何菩薩清淨戒？

宇二、標

當知此戒略有十種。

宇三、釋¹⁰ 宙一、初善受戒

一者、初善受戒。唯爲沙門三菩提故，非爲命故。

初善受戒等者：此說菩薩意樂增上，爲法出家，不爲活命；求大菩提，非爲不求；爲求沙門、爲求涅槃，非爲不求。由是得名初善受戒，從其最初

意樂善故。言三菩提，猶云正覺，如前所說爲求大菩提故。

宙二、不沈舉戒

二者、不太沈戒。於違犯時，遠離微薄生悔愧故；及不太舉戒，遠離非處生悔愧故。

不太沈戒不太舉戒等者：沈謂昏沈，舉謂掉舉。由昏沈故，順生煩惱、壞斷加行。由掉舉故，起惡尋思，心生躁擾。由戒加行，善修治心，遠離昏掉，是故得名不太沈戒、不太舉戒。謂有毀犯，速能還淨，發起猛利惡作及慚愧故，於犯不犯能正了知，不於非處生惡作及慚愧故。

宙三、離懈怠戒

三者、離懈怠戒。於睡眠樂、倚樂、臥樂不耽著故，晝夜勤修諸善品故。

宙四、離放逸戒

四者、離諸放逸所攝受戒。修習如前所說五支不放逸故。

宙五、正願戒

五者、正願戒。遠離利養恭敬貪故，不願生天，而自要期修梵行故。

正願戒等者：謂於現在不爲貪求利養恭敬，又於未來不願往生天魔王宮受諸妙欲，唯爲要期正修梵行，由是得名正願戒。言梵行者，謂八聖支道，及與遠離非正梵行習姪欲法。如攝異門分說。（陵本八十三卷三頁6283）

宙六、具軌則戒

六者、軌則具足所攝受戒。於諸威儀所作衆事善品加行妙善圓滿，如法身語正現行故。

軌則具足所攝受戒等者：此中軌則略有三種，謂於威儀路，或於所作事，或於善品加行處所，是即律儀戒中軌則圓滿。如聲聞地說。（陵本二十二卷三頁¹⁸⁹⁵）由是軌則隨順世間，不越世間；隨順毗奈耶，不越毗奈耶。若能如所說相悉皆具足，是名如法現行身語，由是得名軌則具足所攝受戒。

宙七、具淨命戒

七者、淨命具足所攝受戒。離矯詐等一切邪命過失法故。

宙八、離二邊戒

八者、離二邊戒。遠離受用欲樂、自苦二邊法故。

宙九、永出離戒

九者、永出離戒。遠離一切外道見故。

永出離戒等者：諸外道類皆執實我，名外道見。依世間道雖能離欲，乃至上生非想非非想處，然非真實究竟能解脫故。遠離彼見，依淨尸羅，得定、修慧，能永出離，由是得名永出離戒。

宙十、無損失戒

十者、於先所受無損失戒。於先所受菩薩淨戒無闕減故，無破壞故。

於先所受無損失戒等者：戒無虧損，名無闕減。戒不棄捨，名無破壞。

字四、結

如是十種，是名菩薩清淨戒。

如是十種名菩薩清淨戒者：聲聞地說：尸羅律儀，由十因緣，當知虧損；

即此相違十因緣故，當知圓滿。云何十種虧損因緣？一者、最初惡受尸羅律儀，二者、太極沈下，三者、太極浮散，四者、放逸懈怠，五者、發起邪願，六者、軌則虧損所攝，七者、淨命虧損所攝，八者、墮在二邊，九者、不能出離，十者、所受失壞。（陵本二十二卷八頁¹⁹¹）今此十種文義正同，唯二、三、四開合有異，如文易了。當知此與聲聞共學，是故亦名菩薩清淨戒。

天二、總明藏攝² 地一、攝受當果

如是菩薩大尸羅藏，能起當來大菩提果。謂依此故，菩薩淨戒波羅蜜多得圓滿已，現證無上正等菩提。

地二、常獲五利² 玄一、標

乃至未證無上菩提，依此無量菩薩戒藏正勤修習，常能獲得五種勝利。

玄二、列

一者、常爲十方諸佛護念。二者、將捨命時，住大歡喜。

將捨命時住大歡喜者：謂自了知戒增上力，當生善趣，不往惡趣。無惡趣畏，故住歡喜。

三者、身壞已後，在所生，常與淨戒若等若增諸菩薩衆爲其同分、爲同法侶、爲善知識。

常與淨戒若等若增菩薩衆等者：等謂平等，無勝劣故。增謂增上，即勝異名。同勤修學菩提資糧，說名同分。同修六種波羅蜜多，名同法侶。於所化生能爲善友，名善知識。

四者、成就無量大功德藏，能滿淨戒波羅蜜多。五者、現法後法常得成就自性淨戒，戒成其性。

常得成就自性淨戒戒成其性者：謂諸菩薩，在在生處不捨菩薩淨戒律儀，防護淨戒令無犯，是名成就自性淨戒。若入第二增上戒住，於此住中性戒具足，極少邪惡業道所攝諸惡犯戒尙不現行，況中上品，是名戒成其性。

亥二、攝屬所作⁴ 天一、略標列

如是如上所說一切自性戒等九種尸羅，當知三種淨戒所攝。謂律儀戒、攝善法戒、饒益有情戒。

天二、舉要義

如是三種菩薩淨戒，以要言之，能為菩薩三所作事。謂律儀戒能安住其心，攝善法戒能成熟自佛法，饒益有情戒能成熟有情。

天三、攝一切

如是總攝一切菩薩所應作事。所謂欲令現法樂住安住其心，身心無倦，成熟佛法、成熟有情。

天四、結共學² 地一、顯唯爾所

如是菩薩唯有爾所菩薩淨戒，唯有爾所淨戒勝利，唯有爾所淨戒所作。除此無有若過若增。

地二、明一切共

過去菩薩求大菩提，已於中學；未來菩薩求大菩提，當於中學；普於十方無邊無際諸世界中現在菩薩求大菩提，今於中學。

本地分中菩薩地初持瑜伽處忍品第十一

酉三、忍度（即忍品）⁴ 戌一、徵

云何菩薩忍波羅蜜多？

戌二、列² 亥一、喩柁南

喩柁南曰：

自性一切難 一切門善士 一切種遂求 二世樂清淨

如是九種相 是名略說忍

亥二、長行

謂九種相忍，名為菩薩忍波羅蜜多。一、自性忍，二、一切忍，三、難行忍，四、一切門忍，五、善士忍，六、一切種忍，七、遂求忍，八、此世他世樂忍，九、清淨忍。

戌三、釋³。 亥一、自性忍³。 天一、徵

云何菩薩自性忍？

天二、釋

謂諸菩薩或思擇力爲所依止，或由自性堪忍怨害，遍於一切皆悉堪忍、普於一切皆能堪忍。由無染心，純悲愍故，能有堪忍。

天三、結

當知此則略說菩薩忍之自性。

云何菩薩自性忍等者：下說菩薩一切忍是忍種類，今說自性是其體相，隨應攝彼，其義當知。言思擇力爲所依止者，謂於一切忍。言自性堪忍怨害者，謂於耐他怨害忍。如前忍波羅蜜多種性相說。（陵本三十五卷五頁²⁸³⁸）遍於一切皆悉堪忍者，當知此由思擇力。謂一切法、一切苦、一切怨害，名爲一切。普於一切皆能堪忍者，當知此由自性、或思擇力。謂一切苦、一切怨害，名爲一切。言由無染心者，謂依思擇力。言純悲

愍者，謂由性堪忍。總攝爲一，名自性忍。

亥二、一切忍²。 天一、徵

云何菩薩一切忍？

天二、釋²。 地一、標列種類²。 玄一、二種

當知此忍略有二種。一、依在家品忍，二、依出家品忍。

玄二、三種

當知依此二種品忍各有三種。一、耐他怨害忍，二、安受衆苦忍，三、法思勝解忍。

地二、隨釋三種³。 玄一、耐他怨害忍³。 黃一、徵

云何菩薩耐他怨害忍？

黃二、釋²。 字一、辨相²。 宙一、正審思擇³。 洪一、於自所

謂諸菩薩猛利無間種種長時從他怨害所生衆苦現在前時，應如是學：如此是我自業過耳，由我先世自造種種不淨業故，今受如是種種苦果。

謂諸菩薩猛利無間種種長時等者：此顯菩薩不捨生死，流轉相續，即於其中遭怨害苦，故作是說。

我今於此無義利苦若不忍者，復爲當來大苦因處。

無義利苦者：於生死中無義無利，是名無義利苦。如說一切有情無始生死，空無義利故。

若於此大苦因法隨順轉者，便爲於己自作非愛，便爲於己自生結縛，便爲於己自興怨害，非是於他。

於此大苦因法隨順轉者：謂由不忍爲因，有生死苦，是名大苦因法。當知不忍，瞋爲自體。即於彼法若生若長安住愛樂，名隨順轉。

洪二、於自他所

又自他身所有諸行，一切皆用性苦爲體。彼無知故，於我身中性苦體上更增其苦；我既有知，何宜於彼性苦體上重加其苦。

洪三、於聲聞所

又諸聲聞多分唯修自義利行，尚不應起能生自他衆苦不忍，何況我今正爲勤修他義利行而生不忍。

宙二、勤修五想⁴ 洪一、標

菩薩如是正思擇已，勤修五想，於怨親中、劣等勝品、有樂有苦、具德具失諸有情所，能忍一切怨害之苦。

洪二、徵

云何五想？

洪三、列

一、宿生親善想，二、隨順唯法想，三、無常想，四、苦想，五、攝受想。

洪四、釋⁵ 荒一、宿生親善想² 日一、徵

云何菩薩於有怨害諸有情所，修習宿生親善之想？

日二、釋² 月一、修親善想

謂諸菩薩應如是學：非易可得少分有情，經歷長世昔餘生中，未曾爲我若

父、若母、兄弟、姊妹、親教、軌範、尊似尊等。

非易可得少分有情等者：如世尊言：我不觀見如是種類有情可得。無始世來經歷生死，長時流轉，不互相爲或父、或母、兄弟、姊妹，若軌範師，若親教師，若餘尊重，似尊重者。由是因緣，一切怨品，無不皆是我之親品。如聲聞地說。（陵本三十卷十九頁²⁵⁴⁴）與此義同。

月二、依想堪忍

如是如理正思惟故，於有怨害諸有情所捨怨憎想，住親善想。依親善想，於諸怨害悉能堪忍。

荒二、隨順唯法想² 日一、徵

云何菩薩於有怨害諸有情所，修習隨順唯法之想？

日二、釋² 月一、修唯法想

謂諸菩薩應如是學：依託衆緣，唯行唯法，此中都無我及有情、命者、生者，是其能罵、能瞋、能打、能弄、能訶，或是所罵、所瞋、所打、所弄、

所訶。

依託衆緣唯行唯法等者：如說緣性緣起所緣，謂於三世唯行、唯法、唯事、唯因、唯果，墮正道理。唯有諸法能引諸法，無有作者及以受者。是故我及有情、命者、生者，能罵、所罵、能瞋、所瞋、能打、所打、能弄、所弄、能訶、所訶，唯有音聲、唯有名字，即依此義，故說都無。

月二、依想堪忍

如是如理正思惟故，於有怨害諸有情所捨有情想，住唯法想。依唯法想，於諸怨害悉能堪忍。

荒三、無常想² 日一、徵

云何菩薩於有怨害諸有情所，修無常想？

日二、釋² 月一、修無常想

謂諸菩薩應如是學：諸有情若生若長，一切無常，皆是死法。極報怨者，謂斷彼命。是諸有情命念念斷，智者何緣復欲更斷。如是生死性無常法諸有

情上，其有智者尚不應起有染濁心，況當以手、塊杖加害，何況一切永斷其命。

尚不應起有染濁心者：謂不應起惡意分別，欲爲損害故。

月二、依想堪忍

如是如理正思惟故，捨常堅想，安住無常不堅固想。依無常想，於諸怨害悉能堪忍。

荒四、苦想² 日一、徵

云何菩薩於有怨害諸有情所，修習苦想？

日二、釋² 月一、修習苦想² 盈一、於諸有情

謂諸菩薩應如是觀：若諸有情大興盛者，尚爲三苦常所隨逐，所謂行苦、壞苦、苦苦，況諸有情住衰損者。

盈二、於苦有情

如是觀已，應如是學：我今於此苦常隨逐諸有情所，應勤方便令離衆苦，不

應於彼重加其苦。

況諸有情住衰損者者：有情自體有多衰損差別可得，謂無病衰損、壽命衰損、眷屬衰損。由是因緣，於現法中住諸苦惱，是名住衰損者。

月二、依想堪忍

如是如理正思惟故，斷滅樂想，生起苦想。依此苦想，於諸怨害悉能堪忍。

斷滅樂想生起苦想者：謂於有漏有情，如實觀察勝義唯苦，尚不見其常住安樂，何況於彼有苦有情。由是因緣，故於一切斷滅樂想，生起苦想。

荒五、攝受想² 日一、徵

云何菩薩於有怨害諸有情所，修攝受想？

日二、釋² 月一、修攝受想

謂諸菩薩應如是學：我爲一切有情之類發菩提心，攝受一切有情之類皆爲親眷，我應爲彼作諸義利。我今不應本於有情欲作義利，而當於彼不忍怨害，作非義利。

月二、依想堪忍

如是如理正思惟故，於有怨害諸有情所滅除他想，住攝受想。依攝受想，於諸怨害悉能堪忍。

滅除他想住攝受想者：由諸菩薩攝諸有情以爲自體，是故於彼滅除他想，住攝受想。

字二、釋名²。宙一、徵

云何名忍？

宙二、釋

自無憤勃，不報他怨，亦不隨眠流注恆續，故名爲忍。

黃三、結

是名菩薩耐他怨害忍。

云何名忍等者：謂諸菩薩性於他所遭不饒益，無恚害心，亦不反報，是名自無憤勃，不報他怨。若他諫謝，速能納受，終不結恨、不久懷怨，是名

亦不隨眠流注恆續。當知此約菩薩性能堪忍，說此忍名。

玄二、安受眾苦忍³。黃一、徵

云何菩薩安受眾苦忍？

黃二、釋³。字一、如理思惟²。宙一、於過去世

謂諸菩薩應如是學：我從昔來依欲行轉，常求諸欲，故意思擇爲諸苦因，追求種種苦性諸欲。於追求時，忍受無量猛利大苦。所謂種種徇利、務農、勤王等事。如是追求無義苦時，令我具受種種大苦，皆由無智思擇過失。

宙二、於現在世

我今爲求能引安樂最勝善品，尙應思擇忍受百千俱胝大苦，況少小苦而不忍受。

依欲行轉等者：謂依欲界諸行，心、意、識生，是名依欲行轉。受用欲塵爲境界故，於五妙欲恆起追求，是名常求諸欲。起不如理作意，思惟其相及與隨好，是名故意思擇。由是因緣，令心流漏，發生種種惡不善法，是

故說彼爲諸苦因。

字二、能忍眾苦⁴ 宙一、標

如是如理正思惟故，爲求菩提，悉能忍受一切事苦。

宙二、徵

云何名爲一切事苦？

宙三、列

當知此苦略有八種。一、依止處苦，二、世法處苦，三、威儀處苦，四、攝法處苦，五、乞行處苦，六、勤劬處苦，七、利他處苦，八、所作處苦。

宙四、釋。⁸ 洪一、依止處苦² 荒一、顯處

依止處苦者，依謂四依。由依此故，於善說法毗奈耶中出家受具，成苾芻分。所謂衣服、飲食、臥具、病緣醫藥供身什物。

荒二、明忍

菩薩於此若得麤弊、尠少、稽留、輕憊不敬，不生憂悒，不由此緣精進懈

廢。如是名爲菩薩忍受依止處苦。

依謂四依等者：一者、衣服，二者、飲食，三者、臥具，四者、病緣醫藥供身什物，是爲四依。於此四依得非上妙，名得麤弊。得非眾多，名得尠少。他或於此不速疾施，是名稽留。不恭敬施，是名輕憊不敬。聲聞地說：又應如是自持其心往施主家。豈有出家往詣他所，要望他施非不惠施，要望他敬非不恭敬，要多非少，要妙非麤，要當速疾而非遲緩。（陵本二十三卷十一頁¹⁹⁷⁸）由是道理，菩薩於此不生憂悒。

洪二、世法處苦² 荒一、顯處² 日一、標列

世法處苦者，當知世法略有九種。一、衰，二、毀，三、譏，四、苦，五、壞法壞，六、盡法盡，七、老法老，八、病法病，九、死法死。

日二、名苦

如是世法若總若別會遇現前，能生衆苦，此即名爲世法處苦。

荒二、明忍

菩薩觸對如是衆苦，思擇忍受，不由此緣精進懈廢，如是名爲菩薩忍受世法處苦。

當知世法略有九種等者：供養親近無量品說：依世八法，有八種苦。一、壞法壞時苦，二、盡法盡時苦，三、老法老時苦，四、病法病時苦，五、死法死時苦，六、無利苦，七、無譽苦，八、有譏苦。（陵本四十四卷十三頁³⁵⁸³）此說有九，增苦可知。初之四種，八世法攝。今說彼苦，故唯取四。次之二種，外無常攝。後之三種，內無常攝。

洪三、威儀處苦² 荒一、顯處

威儀處苦者，當知即是行住坐臥四種威儀。菩薩於中若行、若坐，晝夜恆時從諸障法淨修其心，終不非時脅著床座、草敷、葉敷。

荒二、明忍

菩薩於此疲所生苦悉能忍受，不由此緣精進懈廢，如是名爲菩薩忍受威儀處苦。

終不非時脅著床座草敷葉敷者：謂於大床、或小繩床、或草葉座端身而坐，推度時日，終不以背或以其脅，依倚大床、或小繩床、或壁、或樹、草葉座等。如聲聞地說。（陵本二十五卷二十頁²¹⁵²）此應準知。

洪四、攝法處苦² 荒一、顯處² 日一、標

攝法處苦者，當知攝法略有七種。

日二、列

一、供事三寶；二、供事尊長；三、諮受正法；四、既諮受已，廣爲他說；五、以大音聲吟詠、讚誦；六、獨處空閑，無倒思惟、稱量、觀察；七、修習瑜伽作意所攝若止、若觀。

荒二、明忍

菩薩於此七種攝法，勇猛劬勞所生衆苦悉能忍受，不由此緣精進懈廢，如是名爲菩薩忍受攝法處苦。

洪五、乞行處苦² 荒一、顯處² 日一、總標

乞行處苦者，當知此苦略有七種。

日二、列釋

一者、自誓毀形，剃鬚髮等，棄捨世俗諸相好故。二者、自誓毀色，受持改變壞色衣故。三者、進止云爲皆不縱任，遊涉世間，一切行住自兢攝故。四者、依他活命，捨商農等世間事業，從他所得而存濟故。五者、盡壽從他求衣服等，於所獲得非法珍財、久所貯積不受用故。六者、盡壽遮止人間諸欲，離非梵行姪欲法故。七者、盡壽遮止人間嬉戲，捨離觀聽、歌舞、笑戲、倡妓等故，及離與己親友同齡笑戲、歡娛、攜從等故。

荒二、明忍

如是等類，因乞求行所有艱辛所生衆苦，菩薩一切皆能忍受，不由此緣精進懈廢，如是名爲菩薩忍受乞行處苦。

當知此苦略有七種等者：修所成地說：由剃除鬚髮故，捨俗形好故，著壞色衣故，應自觀察形色異人。如是名爲觀察誓受下劣形相。於行住坐臥語默等中，不隨欲行；制伏憍慢往趣他家，審正觀察遊行乞食。如是名爲觀察誓受下劣威儀。又正觀察從他獲得無所蓄積諸供身具，如是名爲觀察誓受下劣眾具。由此五相，當知是名初處觀察。又善說法毗奈耶中，諸出家者所受尸羅，略捨二事之所顯現。一者、棄捨父母、妻子、奴婢、僕使、朋友、眷屬、財穀珍寶等所顯。二者、棄捨歌舞、倡妓、笑戲、歡娛、遊縱、掉逸、親愛聚會，種種世事之所顯現。（陵本二十卷十三頁¹⁷⁵⁵）由是當知，此初五種，誓受下劣形相、威儀、眾具所攝；後之二種，誓受禁制尸羅所攝。

洪六、勤劬處苦

勤劬處苦者，謂諸菩薩勤修善品劬勞因緣，發生種種身心疲惱悉能忍受，不由此緣精進懈廢，如是名爲菩薩忍受勤劬處苦。

洪七、利他處苦² 荒一、指事

利他處苦者，謂諸菩薩修十一種利有情業，如前應知。

荒二、明忍

由彼所生種種憂苦，菩薩一切皆能忍受，不由此緣精進懈廢，如是名爲菩薩忍受利他處苦。

修十一種利有情業等者：戒品中說：由十一相，名住一切種饒益有情戒。

（陵本四十卷八頁³²⁸⁰）如彼廣說應知。

洪八、所作處苦

所作處苦者，謂諸菩薩或是出家，便有營爲衣鉢等業；或是在家，便有無倒商賈、營農、仕王等業。由此發生種種勤苦，菩薩一切皆能忍受，不由此緣精進懈廢，如是名爲菩薩忍受所作處苦。

宇三、忍苦勝利

又諸菩薩雖觸衆苦，而於無上正等菩提，未正勤修能正勤修，已正勤修能無退轉，常勤修習，無變異意、無雜染心。

黃三、結

是名菩薩安受衆苦忍。

玄三、法思勝解忍。³ 黃一、徵

云何菩薩法思勝解忍？

黃二、釋² 宇一、依處³ 宙一、標

謂諸菩薩於一切法能正思擇，由善觀察勝覺慧故，能於八種生勝解處善安勝解。

宙二、徵

云何八種生勝解處？

宙三、列

一、三寶功德處，二、真實義處，三、諸佛菩薩大神力處，四、因處，五、果處，六、應得義處，七、自於彼義得方便處，八、一切所知、所應行處。

由善觀察勝覺慧故等者：此中覺慧，謂能簡擇俱生之慧。如攝異門分說。

（陵本八十三卷十頁⁶³⁰⁷）此中八種生勝解處，如前力種性品別釋應知。

（陵本三十八卷七頁³¹¹⁷）

字二、因緣

又此勝解由二因緣，於彼諸處能善安立。一、長時串習故；二、證善淨智故。

黃三、結

是名菩薩法思勝解忍。

由二因緣等者：力種性品亦說：由二因緣具多勝解。一者、多修勝解故；

二者、積集猛利忍故。（陵本三十八卷八頁³¹²⁰）文別義同。

亥三、難行忍等² 天一、結前生後

如是菩薩依此二品一切忍故，當知廣開難行忍等諸相差別。

天二、別釋七忍⁷ 地一、難行忍³ 玄一、徵

云何菩薩難行忍？

玄二、標

當知此忍略有三種。

玄三、釋³ 黃一、於羸劣所

謂諸菩薩，能於羸劣諸有情所，忍彼所作不饒益事。是名第一難行忍。

黃二、於臣隸所

若諸菩薩居尊貴位，於自臣隸不饒益事堪能忍受。是名第二難行忍。

黃三、於卑賤所

若諸菩薩，於其種姓卑賤有情，所作增上不饒益事堪能忍受。是名第三難行忍。

地二、一切門忍³ 玄一、徵

云何菩薩一切門忍？

玄二、標

當知此忍略有四種。

玄三、列

謂諸菩薩，於親所作不饒益事，於怨所作不饒益事，於中所作不饒益事，悉

能堪忍；及於彼三劣等勝品不饒益事皆能忍受。

及於彼三劣等勝品等者：謂親怨中三種有情所作不饒益事，有劣等勝品差別故。

地三、善士忍³。 玄一、徵

云何菩薩善士忍？

玄二、標

當知此忍略有五種。

玄三、列²。 黃一、先見勝利

謂諸菩薩，先於其忍見諸勝利。謂能堪忍補特伽羅，於當來世無多怨敵、無多乖離、有多喜樂、臨終無悔、於身壞後當生善趣天世界中。

黃二、自堪忍等

見勝利已，自能堪忍，勸他行忍，讚忍功德，見能行忍補特伽羅慰意慶喜。

當知此忍略有五種等者：謂見勝利爲一，自能堪忍爲二，勸他行忍爲三，

讚忍功德爲四，見能行忍慰意慶喜爲五。依如是義，名善士忍，如是種類

善行攝故。

地四、一切種忍³。 玄一、徵

云何菩薩一切種忍？

玄二、標

當知此忍，六種、七種，總十三種。

玄三、釋²。 黃一、六種²。 字一、徵

云何六種？

字二、釋⁶。 宙一、由怖畏

謂諸菩薩，了知不忍非愛異熟，由怖畏故，勤修行忍。

了知不忍非愛異熟者：謂知不忍爲因，當受非愛異熟果故。如前已說，我若於此大苦因法隨順轉者，便爲於己自作非愛，便爲於己自生結縛，便爲於己自興怨害。其義應知。

宙二、由親善

於諸有情有哀憐心、有悲愍心、有親愛心，由親善故，勤修行忍。

宙三、由欲樂

於其無上正等菩提猛利欲樂，爲圓滿忍波羅蜜多，由是因緣，勤修行忍。

宙四、由法受

如世尊說：夫出家者，具忍辱力。由是因緣，不應出家受具足戒而行不忍，由法受故，勤修行忍。

由法受故者：謂受具足戒時，自發期心，於律儀戒堪忍領受。由是因緣，於自相續律儀隨轉，是名法受。

宙五、由串習

種性具足，先串習忍，於今現在安住自性，故能修忍。

宙六、由諦察

知一切法遠離有情，唯見諸法無戲論性，諦察法故，能修行忍。

黃二、七種² 字一、徵起

云何七種？

字二、列釋

謂於一切不饒益忍。從一切忍。

一切不饒益忍從一切忍者：能忍劣等勝品不饒益事，名於一切不饒益忍。忍怨親中一切有情所作不饒益事，是名從一切忍。

一切處忍，謂於屏處及大眾前皆能修忍。一切時忍，謂晝初分，若晝中分，若晝後分，若夜，若日，若去來今，若病不病，若臥，若起，常能修忍。由身行忍，不捶打故。由語行忍，不出一切非愛言故。由意行忍，不憤發故，不持汗濁惡意樂故。

地五、遂求忍² 字一、徵

云何菩薩遂求忍？

字二、釋² 黃一、略標列³ 字一、列三種

當知此忍略有八種。謂諸菩薩，於諸有苦來求索者惡逼能忍。於極凶暴上品惡業諸有情所，依法大悲不損惱忍。

依法大悲者：菩薩發心，大悲爲因，名法大悲。一切所作，唯以大悲而爲上首，是名依法大悲。

於諸出家犯戒者所，依法大悲不損惱忍。

字二、列五種

復有五種耐勤苦忍。謂能堪耐除遣有苦有情衆苦所有勤苦，又能堪耐求法勤苦，又能堪耐法隨法行所有勤苦，又能堪耐即於彼法廣爲他說所有勤苦，又能堪耐於諸有情所爲、所作正與助伴所有勤苦。

字三、結八種

如是八種，名遂求忍。

黃二、釋得名

若於有情有損惱者，由忍故離；若於有情是所求者，由忍故與；是故說此名

遂求忍。

地六、二世樂忍。² 玄一、徵

云何菩薩此世他世樂忍？

玄二、釋。² 黃一、略標列

當知此忍略有九種。謂諸菩薩住不放逸，於諸善法悉能堪忍；

於諸善法悉能堪忍者：如前所說法思勝解忍應知。

於諸寒熱悉能堪忍；於諸饑渴悉能堪忍；於蚊蟲觸悉能堪忍；於諸風日悉能堪忍；於蛇蝎觸悉能堪忍；於諸劬勞所生種種若身、若心疲倦憂惱悉能堪忍；於墮生死、生老病死等苦有情，現前哀愍而修行忍。

黃二、釋得名

如是菩薩修行忍故，能令自身於現法中得安樂住，不爲一切惡不善法之所陵雜；能引後世安樂因緣；亦能令他修行種種現法後法安樂正行。是名此世他世樂忍。

地七、清淨忍⁴ 玄一、徵

云何菩薩清淨忍？

玄二、標

當知此忍略有十種。

玄三、列

謂諸菩薩遇他所作不饒益事、損惱違越，終不返報；亦不意憤；亦無怨嫌意樂相續；恆常現前，欲作饒益，先後無異，非一益已捨而不益；於有怨者自往悔謝；終不令他生疲厭已，然後受謝，恐其疲厭，纔謝便受；於不堪忍，成就增上猛利慚愧；依於堪忍，於大師所，成就增上猛利愛敬；依不損惱諸有情故，於諸有情，成就猛利哀愍愛樂；一切不忍并助伴法皆得斷故，離欲界欲。

玄四、結

由此十相，當知菩薩所修行忍清淨無垢。

當知此忍略有十種等者：謂不返報爲一，亦不意憤爲二，亦無怨嫌爲三，恆作饒益爲四，悔謝有怨爲五，速受他謝爲六，成就慚愧爲七，成就愛敬爲八，成就哀愍爲九，離欲界欲爲十。言助伴法者，謂恚、害尋伺應知，由說初靜慮地有尋有伺正能對治故。又復當知，此十清淨，決擇分中略攝爲二。謂前九種，名思擇力清淨；其第十種，名修習力清淨。思擇力清淨復有四種。一、遠離罪生清淨，二、彼不現行清淨，三、無罪生清淨，四、遠離彼因緣清淨。一種、二種、三種、三種，如其次第。（陵本七十五卷六頁⁵⁷⁶³）彼說一種，即此不返報他不饒益事，是名遠離罪生清淨。彼說二種，即此亦不意憤及無怨嫌意樂相續，是名彼不現行清淨。彼說三種，即此恆作饒益、自往謝他、速受他謝，是名無罪生清淨。復說三種，即此成就慚愧、愛敬、哀愍，是名遠離彼因緣清淨。

戊四、結

當知此中，初自性忍，廣說乃至後清淨忍，如是能生廣博無量大菩提果。忍

爲依止，是諸菩薩能圓滿忍波羅蜜多，能證無上正等菩提。

廣博無量大菩提果者：謂得大菩提果，能於無邊世界施作佛事故。

本地分中菩薩地初持瑜伽處精進品第十二

酉四、精進度（即精進品）⁴ 戌一、徵

云何菩薩精進波羅蜜多？

戌二、列² 亥一、喩柁南

喩柁南曰：

自性一切難 一切門善士 一切種遂求 二世樂清淨

如是九種相 名略說精進

亥二、長行

謂九種相精進，名爲菩薩精進波羅蜜多。一者、自性精進，二者、一切精進，三者、難行精進，四者、一切門精進，五者、善士精進，六者、一切種精進，七者、遂求精進，八者、此世他世樂精進，九者、清淨精進。

戌三、釋。 亥一、自性精進

云何菩薩自性精進？謂諸菩薩其心勇悍，堪能攝受無量善法，利益安樂一切有情，熾然無間，無有顛倒，及此所起身語意動，當知是名菩薩所行精進自性。

云何菩薩自性精進等者：此中自性，由二相顯。一、由意樂，二、由加行。言意樂者，謂心勇悍，乃至無有顛倒。由心勇悍，能熟自佛法，是故說言攝受無量善法。能熟他有情，是故說言利益安樂一切有情。言加行者，謂此所起身語意動，此即前說精進意樂。身語意三有所造作，是名爲動。

亥二、一切精進² 天一、徵

云何菩薩一切精進？

天二、釋² 地一、標列種類² 玄一、二種

謂此精進略有二種。一者、依在家品精進，二者、依出家品精進。

玄二、三種

當知依此二品精進，各有三種。一、環甲精進，二、攝善法精進，三、饒益有情精進。

地二、隨釋三種³。玄一、環甲精進²。黃一、徵

云何菩薩環甲精進？

黃二、釋²。字一、辨行相

謂諸菩薩，於發加行精進之前，其心勇悍，先環誓甲：若我爲脫一有情苦，以千大劫等一日夜，處那落迦，不在餘趣，乃至菩薩經爾所時，證得無上正等菩提；假使過此百千俱胝倍數時劫，方證無上正等菩提，我之勇悍亦無退屈，於求無上正等菩提非不進趣。既進趣已，勤勇無懈，何況所經時短苦薄。是名菩薩環甲精進。

字二、顯勝利

若有菩薩於如是相菩薩所有環甲精進，少起勝解、少生淨信，如是菩薩尙已

長養無量勇猛發動精進大菩提性，何況菩薩成就如是環甲精進。如是菩薩於求菩提、饒益有情，無有少分難行事業可生怯劣難作之心。

長養無量勇猛發動精進大菩提性者：此中大菩提性，謂即精進波羅蜜多種性應知。

玄二、攝善法精進²。黃一、徵

云何菩薩攝善法精進？

黃二、釋³。字一、標略義

謂諸菩薩所有精進，能爲施、戒、忍、精進、靜慮、慧波羅蜜多加行，能成辦施、戒、忍、精進、靜慮、慧波羅蜜多。

字二、出種類³。宙一、總標

當知此復略有七種。

宙二、列釋⁷。洪一、無動精進

一、無動精進，一切分別、種種分別、根本煩惱、少分煩惱、一切異論、一

切苦觸不傾動故。

無動精進等者：真實義品中說：於一切法離言自性如實知己，達無少法及少品類可起分別。唯取其事，唯取真如。（陵本三十六卷十二頁²⁹⁵⁰）是即此說一切分別、種種分別無動。戒品中說：又於一切犯戒因緣根本煩惱、少分煩惱忿恨等生，亦不忍受。（陵本四十卷七頁³²⁷⁶）是即此說根本煩惱、少分煩惱無動。所得大乘勝解，不可引奪、不從他緣，由是能摧一切外道異論，是名一切異論無動。他怨害苦、一切事苦皆能堪忍，是名一切苦觸無動。一切事苦，如忍品說應知。（陵本四十二卷八頁³⁴⁴⁰）

洪二、堅固精進

二、堅固精進，是殷重加行故。

洪三、無量精進

三、無量精進，能現證得一切明處故。

洪四、方便相應精進

四、方便相應精進，所應得義無顛倒道隨順而行故，平等通達故。

隨順而行等者：能引義利，名隨順行。不緩不急，殷重修作，是名平等。

無倒了知，是名通達。

洪五、無倒精進

五、無倒精進，為欲證得能引義利所應得義，願所引故。

洪六、恆常精進

六、恆常精進，是無間加行故。

洪七、離慢精進

七、離慢精進，由勤精進，離高舉故。

宙三、總結

由此七種攝善法精進勤加行故，令諸菩薩速能圓滿波羅蜜多，疾證無上正等菩提。

宇三、結最勝

由此精進，是能修證、能成菩提一切善法最勝因緣，餘則不爾。是故如來以種種門，稱讚精進能證無上正等菩提。

玄三、饒益有情精進² 黃一、徵

云何菩薩饒益有情精進？

黃二、釋² 字一、指

謂此精進有十一種，如戒品說。

字二、辨

彼說尸羅，此說精進，當知是名彼此差別。

亥三、難行精進⁴ 天一、徵起

云何菩薩難行精進？

天二、略標

謂此精進略有三種。

天三、列釋³ 地一、離一切想

若諸菩薩，無間遠離諸衣服想、諸飲食想、諸臥具想及己身想，於諸善法無間修習，曾無懈廢。是名第一難行精進。

無間遠離諸衣服想等者：此顯四種遠離希求之愛，謂衣服愛、飲食愛、臥具愛、有無有愛。聞所成地說：又諸苾芻，顧戀現法身命爲依止故，而於衣服、飲食、臥具生希求愛；顧戀後法身命爲依止故，而於愛；愚於涅槃爲依止故，而於無有生希求愛。（陵本十四卷十頁¹²¹³）今說菩薩於彼遠離，尙無有想，況希求愛。

地二、盡壽恆行

若諸菩薩如是精進，盡衆同分，於一切時曾無懈廢。是名第二難行精進。

地三、平等通達

若諸菩薩，平等通達功德相應，不緩不急，無有顛倒，能引義利精進成就。是名第三難行精進。

天四、結因

如是菩薩難精進力，當知即是緣有情悲，及與般若能攝之因。

當知即是緣有情悲等者：此顯三種難精進力，總能攝受緣有情悲及與般若，名爲彼因。

亥四、一切門精進⁴ 天一、徵

云何菩薩一切門精進？

天二、標

謂此精進略有四種。

天三、列

一、離染法精進，二、引白法精進，三、淨除業精進，四、增長智精進。

天四、釋⁴ 地一、離染法精進

離染法精進者，謂諸菩薩所有精進，能令一切結、縛、隨眠、隨煩惱、纏未生不生，已生斷滅。

地二、引白法精進

引白法精進者，謂諸菩薩所有精進，一切善法未生令生，已生令住、令不忘失、增長廣大。

地三、淨除業精進

淨除業精進者，謂諸菩薩所有精進，能令三業皆悉清淨，能攝妙善身語意業。

地四、增長智精進

增長智精進者，謂諸菩薩所有精進，能集、能增聞思修慧。

亥五、善士精進³ 天一、徵起

云何菩薩善士精進？

天二、略標

謂此精進略有五種。

天三、列釋⁵ 地一、無所棄捨精進

一、無所棄捨精進。謂諸菩薩所有精進，不捨一切欲加行故。

不捨一切欲加行故者：不捨一切有情無上正願爲所依止，起與利益安樂正

加行故。

地二、無退減精進

二、無退減精進。謂諸菩薩所有精進，如先所受若等若增，發動精進隨長養故。

地三、無下劣精進

三、無下劣精進。謂諸菩薩所有精進，勇猛、熾然、長時、無間精勤策勵，心無怯弱、無退屈故。

地四、無顛倒精進

四、無顛倒精進。謂諸菩薩所有精進，能引義利，方便善巧所攝持故。

地五、勤勇加行精進

五、勤勇加行精進。謂諸菩薩所有精進，能於無上正等菩提速進趣故。

亥六、一切種精進⁴ 天一、徵

云何菩薩一切種精進？

天二、標

謂此精進，六種、七種，總十三種。

天三、釋² 地一、六種³ 玄一、徵起

云何菩薩六種精進？

玄二、列釋。 黃一、無間精進

一、無間精進。謂一切時修加行故。

謂一切時修加行故者：時有三種，一、過去，二、未來，三、現在。如是

三種，名一切時。

黃二、殷重精進

二、殷重精進。謂能周備修加行故。

黃三、等流精進

三、等流精進。謂先因力所任持故。

謂先因力所任持故者：最初發心，是名先因。彼所等流，名所任持。

黃四、加行精進

四、加行精進。數數思擇種種善品，正加行故。

數數思擇種種善品正加行故者：依奢摩他，數數觀察淨行所緣，或善巧所緣，或淨惑所緣，是名數數思擇種種善品。於彼所緣數起勝解，數正除遣，名正加行。義如聲聞地說。（陵本三十一卷十頁²⁵⁸⁰）

黃五、無動精進

五、無動精進。一切苦觸不能動故，亦不轉成餘性分故。

一切苦觸不能動故等者：寒熱、蚊蟲等觸，是名一切苦觸。不由此緣精進懈廢，名不能動。攝事分說：有堅猛者，由寒熱、蚊蟲等所不能動精進故。（陵本八十五卷二十一頁⁶⁴⁸¹）解深密經說：若諸菩薩捨於大乘相應作意，墮在聲聞、獨覺相應諸作意中，當知是名作意散動。（解深密經三卷十五頁）與彼相違，應知無動，由是說言不轉餘分。

黃六、無喜足精進

六、無喜足精進。少分下劣差別證中不喜足故。

玄三、結名

菩薩成就如是六種一切種精進，發動精進故，所以說言：有勢、有勤、有勇、堅猛、於諸善法不捨其軛。

有勢有勤等者：攝事分說：又由五相發動精進，速證通慧。謂有勢力者，由被甲精進故。有精進者，由加行精進故。有勇悍者，由於廣大法中無法劣精進故。有堅猛者，由寒熱、蚊蟲等所不能動精進故。有不捨善軛者，由於下劣無喜足精進故。（陵本八十五卷二十一頁⁶⁴⁸¹）如是五相，能攝前說六種精進，是故舉說。

地二、七種² 玄一、徵起

云何菩薩七種精進？

玄二、列釋⁷ 黃一、與欲俱行精進

一、與欲俱行精進。謂諸菩薩所有精進，數於無上正等菩提，猛利欲願隨長

養故。

黃二、平等相應精進

二、平等相應精進。謂諸菩薩所有精進，能令隨一根本煩惱及隨煩惱，不染汙心、亦不纏心。由此精進，能令菩薩於諸善法等習而住。

平等相應精進等者：此中精進遍不定心及定心位。不定心位，由能念防護意，不令起貪、起瞋、起癡，是名能令隨一根本煩惱不染汙心。於定位中，由能取彼貪欲蓋等諸隨煩惱爲過思想，從順障法淨修其心，能令蓋纏未生不生，已生除遣，是名能令隨一彼隨煩惱亦不纏心。由是能令菩薩住正念知及平等捨，是名於諸善法等習而住。

黃三、勝進精進

三、勝進精進。謂諸菩薩，若爲隨一根本煩惱及隨煩惱染心、纏心；爲斷如是諸煩惱故，精進勇猛，如滅頭然。

黃四、勤求精進

四、勤求精進。謂諸菩薩，勇猛勤求一切明處無厭倦故。

黃五、修學精進

五、修學精進。謂諸菩薩，於所學法如應如宜，普於一切法隨法行能成辦故。

普於一切法隨法行等者：法隨法行略有五種。謂如所求、如所受法，身語意業無倒隨轉，正思、正修。力種性品廣說其相。（陵本三十八卷十
八頁³¹⁵⁸）是名一切法隨法行。

黃六、利他精進

六、利他精進。謂諸菩薩所有精進，於如前說十一種相，應知其相。

黃七、善護精進

七、善護精進。謂諸菩薩所有精進，起正加行，善自防守；若有所犯，如法悔除。

起正加行善自防守等者：如說具足成就五支所攝不放逸行。一、前際俱行不放逸行，二、後際俱行不放逸行，三、中際俱行不放逸行，四、先時所

作不放逸行，五、俱時隨行不放逸行。於戒品中別釋其相。（陵本四十卷六頁³²⁷⁰）依彼後二不放逸行，此說起正加行善自防守。依彼初三不放逸行，此說若有所犯，如法悔除。

天四、結

如是菩薩十三種精進，名一切種精進。

亥七、遂求及二世樂精進² 天一、指

菩薩所有遂求精進、此世他世樂精進，如忍應知。

天二、辨

其差別者，彼說堪忍，此說菩薩精進勇悍。

亥八、清淨精進⁴ 天一、徵

云何菩薩清淨精進？

天二、標

謂此精進略有十種。

天三、列

一、相稱精進，二、串習精進，三、無緩精進，四、善攝精進，五、應時修習精進，六、通達衆相精進，七、不退弱精進，八、不捨輓精進，九、平等精進，十、迴向大菩提精進。

天四、釋¹⁰ 地一、相稱精進³ 玄一、標

若諸菩薩，或爲彼彼諸隨煩惱極所逼切，爲斷彼彼隨煩惱故，修習種種相稱對治。

玄二、釋

謂爲對治諸貪欲故，修習不淨；爲欲對治諸瞋恚故，修習慈愍；爲欲對治諸愚癡故，修習觀察緣性緣起；爲欲對治諸尋思故，修習息念；爲欲對治諸憍慢故，修界差別。

玄三、結

如是等類，是名菩薩相稱精進。

地二、串習精進

若諸菩薩，非唯成就始業、初業所有精進；謂爲住心教授教誡，非不亦由串習加行、積習加行。是名菩薩串習精進。

非唯成就始業初業所有精進等者：聲聞地說：謂有二種初修業者。一、於作意初修業者，二、淨煩惱初修業者。云何於作意初修業者？謂初修業補特伽羅，安住一緣，勤修作意，乃至未得所修作意，未能觸證心一境性。云何淨煩惱初修業者？謂已證得所修作意，於諸煩惱欲淨其心，發起攝受正勤修習了相作意，名淨煩惱初修業者。（陵本二十八卷十三頁²³⁷¹）此說精進，於彼二種隨應當知。從他聽聞相應所緣種種方便，名爲住心教授教誡。聲聞地說：初修業者，雖於相應所緣境界勤修加行，而有諸蓋數數現行，身心羸重。由是因緣，不能令心速疾得定。（陵本三十一卷六頁²⁵⁶⁸）由是此說非不亦由串習加行、積習加行。

地三、無緩精進

若諸菩薩，亦非唯有串習加行、積習加行，爲住其心教授教誡；然此始業、初業菩薩，於此加行不緩加行、無間加行、殷重加行。是名菩薩無緩精進。於此加行不緩加行等者：聲聞地說：云何名爲不緩加行？謂無間方便、殷重方便勤修觀行，乃至廣說。（陵本三十一卷七頁²⁵⁶⁸）此應準知。謂即於此串習加行、積習加行無有緩慢故。

地四、善攝精進

若諸菩薩從師長所，或自多聞力所持故，無倒而取，爲住其心發動精進。是名菩薩善攝精進。

從師長所等者：謂如善達修瑜伽行諸瑜伽師之所開悟，即如是學，於法、於義不顛倒取，無有我慢，亦不安住自所見取，無邪僻執，是名從師長所無倒而取。義如聲聞地說。（陵本三十一卷八頁²⁵⁷¹）如說從師長所無倒而取，如是從自多聞無倒而取，當知亦爾。

地五、應時修習相應精進

若諸菩薩無倒取已，於應止時，能正修正；於應舉時，能策其心；於應捨時，能正修捨。是名菩薩應時修習相應精進。

地六、通達眾相精進

若諸菩薩，於其種種止、舉、捨相，入、住、出相，能善了知、能無忘失、能善通達，無間修作、殷重修作。是名菩薩通達眾相相應精進。

於其種種止舉捨相等者：聲聞地說：云何止相？謂有二種。一、所緣相，二、因緣相。云何舉相？謂由淨妙所緣境界，策勵其心，及彼隨順發動精進。云何捨相？謂由所緣令心上捨，及於所緣不發所有太過精進。（陵本三十一卷八頁²⁵⁷²）今說菩薩於此三相能善了知，於諸定地諸行相狀善取、善了，能入諸定，是名入相。又復善取、善了諸行相狀，隨其所欲能住於定，於三摩地無復退失，是名住相。若於入定諸行相狀不復思惟，於不定地分別體相所攝定地不同類法作意思惟，出三摩地，是名出相。義如三摩呬多地說。（陵本十三卷三頁¹⁰⁷³）今說菩薩善取彼相，能無忘失，於彼種

種證得心一境性，是名能善通達。謂通達三摩地所行影像，唯是其識故。

如解深密經說。（三卷三頁）

地七、不退弱精進

若諸菩薩聞說種種最極廣大、最極甚深、不可思議、不可度量菩薩精進，不自輕憊，心不怯弱，不於所有少分下劣差別證中而生喜足，不求上進。是名菩薩不退弱精進。

地八、不捨軌精進

若諸菩薩，於時時間密護根門、飲食知量、初夜後夜常勤修習惛寤瑜伽、正知而住。於如是類等持資糧能攝受轉，即於其中熾然修習，於能引攝無倒義利，於一切時勤加功用。是名菩薩不捨軌精進。

地九、平等精進

若諸菩薩發動精進，不緩不急，平等雙運；普於一切應作事中，亦能平等殷重修作。是名菩薩平等精進。

平等雙運者：此說奢摩他、毗鉢舍那二種和合平等俱轉，即此說名雙運轉道。聲聞地中顯示其相應知。（陵本三十一卷十六頁²⁶⁰⁰）由此成辦一切神通所作，名於一切應作事中，亦能平等殷重修作。決擇分說，此名速疾神通清淨故。（陵本七十五卷六頁⁵⁷⁶⁴）

地十、迴向大菩提精進

若諸菩薩一切精進有所爲作，無不皆爲迴向無上正等菩提。是名菩薩迴向大菩提精進。

戊四、結

如是最初自性精進，乃至最後清淨精進，皆得菩薩大菩提果。菩薩依此所有精進，圓滿精進波羅蜜多，能於無上正等菩提速疾已證、當證、今證。

瑜伽師地論科句披尋記卷第四十二

瑜伽師地論科句披尋記卷第四十三

彌勒菩薩說

唐三藏沙門玄奘奉詔譯

韓清淨科記

本地分中菩薩地初持瑜伽處靜慮品第十三

酉五、定度（即靜慮品）⁴ 戊一、徵

云何菩薩靜慮波羅蜜多？

戊二、列² 亥一、喩柁南

喩柁南曰：

自性一切難 一切門善士 一切種遂求 二世樂清淨

如是九種相 名略說靜慮

亥二、長行

謂九種相靜慮，名爲菩薩靜慮波羅蜜多。一者、自性靜慮，二者、一切靜

慮，三者、難行靜慮，四者、一切門靜慮，五者、善士靜慮，六者、一切種靜慮，七者、遂求靜慮，八者、此世他世樂靜慮，九者、清淨靜慮。

戌三、釋。⁹ 亥一、自性靜慮。³ 天一、徵

云何菩薩自性靜慮？

天二、釋

謂諸菩薩，於菩薩藏聞思爲先，所有妙善世出世間心一境性，心正安住，或奢摩他品、或毗鉢舍那品、或雙運道俱通二品。

天三、結

當知即是菩薩所有靜慮自性。

亥二、一切靜慮。³ 天一、徵

云何菩薩一切靜慮？

天二、釋。² 地一、標列種類。² 玄一、二種

謂此靜慮略有二種。一者、世間靜慮，二者、出世間靜慮。

玄二、三種

當知此二，隨其所應復有三種。一者、現法樂住靜慮，二者、能引菩薩等持功德靜慮，三者、饒益有情靜慮。

地二、隨釋三種。³ 玄一、現法樂住靜慮

若諸菩薩所有靜慮，遠離一切分別，能生身心輕安，最極寂靜，遠離憍舉，離諸愛味，泯一切相，當知是名菩薩現法樂住靜慮。

遠離一切分別等者：謂諸菩薩，依諸靜慮，觀一切事遠離一切言說自性，唯有諸法離言自性，心正安住，是名遠離一切分別。於自所證定無疑惑，是名遠離憍舉。能捨彼樂，還生欲界，是名離諸愛味。思惟無相，聖住所攝，是名泯一切相。

玄二、能引菩薩等持功德靜慮。² 黃一、釋。² 字一、能引等持

若諸菩薩所有靜慮，能引能住種種殊勝、不可思議、不可度量十力種性所攝等持。如是等持，一切聲聞及獨覺等不知其名，何況能入。

字二、能引功德

若諸菩薩所有靜慮，能引能住一切菩薩解脫、勝處、遍處、無礙解、無諍、願智等共諸聲聞所有功德。

黃二、結

當知是名能引菩薩等持功德靜慮。

玄三、饒益有情靜慮

菩薩饒益有情靜慮有十一種，如前應知。謂諸菩薩依止靜慮，於諸有情能引義利彼彼事業，與作助伴，於有苦者能為除苦；於諸有情能如理說；於有恩者知恩知惠，現前酬報；於諸怖畏能為救護；於喪失處能解愁憂；於有匱乏施與資財；於諸大眾善能匡御；於諸有情善隨心轉；於實有德讚美令喜；於諸有過能正調伏；為物現通，恐怖引攝。

天三、結

如是一切總名菩薩一切靜慮。此外無有若過若增。

亥三、難行靜慮。³ 天一、徵

云何菩薩難行靜慮？

天二、標

謂此靜慮略有三種。

天三、釋。³ 地一、捨靜慮樂還生欲界

若諸菩薩已能安住廣大、殊勝、極善成熟、多所引發諸靜慮住，隨自欲樂，捨彼最勝諸靜慮樂，愍有情故，等觀無量利有情事，為諸有情義利成熟，故意思擇還生欲界。當知是名菩薩第一難行靜慮。

極善成熟多所引發等者：謂諸靜慮，善能成熟自佛法故，是名極善成熟。引發無量神通及功德故，是名多所引發。

地二、能發起餘菩薩等持

若諸菩薩依止靜慮，能發種種無量無數不可思議，超過一切聲聞、獨覺所行境界菩薩等持。當知是名菩薩第二難行靜慮。

地三、速證無上正等菩提

若諸菩薩依止靜慮，速證無上正等菩提。當知是名菩薩第三難行靜慮。

亥四、一切門靜慮

云何菩薩一切門靜慮？謂此靜慮略有四種。一者、有尋有伺靜慮，二者、喜俱行靜慮，三者、樂俱行靜慮，四者、捨俱行靜慮。

謂此靜慮略有四種等者：初靜慮中有尋有伺，是名有尋有伺靜慮。第二靜慮喜根未斷，名喜俱行靜慮。第三靜慮樂根未斷，名樂俱行靜慮。第四靜慮捨相清淨，名捨俱行靜慮。

亥五、善士靜慮

云何菩薩善士靜慮？謂此靜慮略有五種。一者、無愛味靜慮，二者、慈俱行靜慮，三者、悲俱行靜慮，四者、喜俱行靜慮，五者、捨俱行靜慮。

謂此靜慮略有五種等者：三摩呬多地中說：有愛味相應靜慮等定。謂聞初靜慮等所有功德，於上出離不了知故，便生愛味，戀著堅住。（陵本

十二卷三頁⁹⁶）與彼相違，名無愛味靜慮。又說四無量定，即此後四靜慮應知。

亥六、一切種靜慮⁴ 天一、徵

云何菩薩一切種靜慮？

天一、標

謂此靜慮，六種、七種，總十三種。

天三、釋² 地一、六種

言六種者，一者、善靜慮，二者、無記變化靜慮，

無記變化靜慮者：決擇分說：爲引導他，或爲利益諸有情故，而起變化，當知是善。（陵本五十五卷十三頁⁴⁴⁴⁰）今爲簡彼，說餘變化，故是無記。

三者、奢摩他品靜慮，四者、毗鉢舍那品靜慮，五者、於自他利正審思惟靜慮，六者、能引神通威力功德靜慮。

地二、七種

言七種者，一者、名緣靜慮，二者、義緣靜慮，三者、止相緣靜慮，四者、舉相緣靜慮，五者、捨相緣靜慮，六者、現法樂住靜慮，七者、能饒益他靜慮。

天四、結

如是十三種，名爲菩薩一切種靜慮。

亥七、遂求靜慮

云何菩薩遂求靜慮？謂此靜慮略有八種。一者、於諸毒藥、霜雹、毒熱、鬼所魅等種種災患能息，能成咒術所依靜慮；

能成咒術所依靜慮者：謂彼咒術能息種種災患，以此靜慮爲所依止，故說靜慮能成咒術所依。此中咒術，謂即咒句、明句。發心品說：若餘眾生爲欲息滅疾疫災橫，所用無驗咒句、明句，菩薩用之尙令有驗，何況驗者。

（陵本三十五卷十五頁²⁸⁷⁹）此應準知。

二者、於界互違所生衆病能除靜慮；三者、於諸饑饉大災旱等現在前時，與

致甘雨靜慮；四者、於其種種人非人作水陸怖畏，能正拔濟靜慮；五者、於乏飲食墮在曠野諸有情類，能施飲食靜慮；六者、於乏財位所化有情，能施種種財位靜慮；七者、於十方界放逸有情，能正諫誨靜慮；八者、於諸有情隨所生起所應作事，能正造作靜慮。

亥八、二世樂靜慮

云何菩薩此世他世樂靜慮？謂此靜慮略有九種。一者、神通變現調伏有情靜慮；二者、記說變現調伏有情靜慮；三者、教誡變現調伏有情靜慮；

神通變現調伏有情靜慮等者：聲聞地說三種神變教授。一、神境神變，

二、記說神變，三、教誡神變。（陵本二十七卷二十二頁²³²¹）此說三種變

現調伏有情，如彼應釋。

四者、於造惡者示現惡趣靜慮；五者、於失辯者能施辯才靜慮；六者、於失念者能施正念靜慮；七者、制造建立無顛倒論、微妙讚頌摩怛理迦，能令正法久住靜慮；八者、於諸世間工巧業處，能引義利，饒益有情種種書算、測

度、數印、床座、傘屨，如是等類種種差別資生衆具能隨造作靜慮；九者、於生惡趣所化有情，爲欲暫時息彼衆苦，放大光明照燭靜慮。

亥九、清淨靜慮

云何菩薩清淨靜慮？謂此靜慮略有十種。一者、由世間淨，離諸愛味清淨靜慮。二者、由出世淨，無有染汙清淨靜慮。三者、由加行淨，清淨靜慮。四者、由得根本淨，清淨靜慮。五者、由根本勝進淨，清淨靜慮。六者、由入、住、出自在淨，清淨靜慮。七者、捨靜慮已，復還證入自在淨，清淨靜慮。八者、神通變現自在淨，清淨靜慮。九者、離一切見趣淨，清淨靜慮。十者、一切煩惱、所知障淨，清淨靜慮。

謂此靜慮略有十種等者：決擇分說此十清淨。一、清淨清淨，二、無漏清淨，三、根本方便清淨，四、證得根本清淨，五、自在方便清淨，六、住自在清淨，七、引發神通自在清淨，八、成熟有情自在清淨，九、降伏外道自在清淨，十、無上離繫清淨。（陵本七十五卷七頁⁵⁷⁶⁵）當知是此所說

略義。

戌四、結

如是靜慮無量無邊，能得菩薩大菩提果。菩薩依此圓滿靜慮波羅蜜多，能於無上正等菩提速疾已證、當證、今證。

本地分中菩薩地初持瑜伽處慧品第十四

酉六、慧度（即慧品）⁴ 戌一、徵

云何菩薩慧波羅蜜多？

戌二、列² 亥一、唄陀南

唄陀南曰：

自性一切難 一切門善士 一切種遂求 二世樂清淨

如是九種相 是名略說慧

亥二、長行

謂九種相慧，名爲菩薩慧波羅蜜多。一者、自性慧，二者、一切慧，三者、

難行慧，四者、一切門慧，五者、善士慧，六者、一切種慧，七者、遂求慧，八者、此世他世樂慧，九者、清淨慧。

戌三、釋。⁹ 亥一、自性慧。³ 天一、徵

云何菩薩自性慧？

天二、釋

謂能悟入一切所知及已悟入一切所知揀擇諸法，普緣一切五明處轉。一、內明處，二、因明處，三、醫方明處，四、聲明處，五、工業明處。

天三、結

當知即是菩薩一切慧之自性。

謂能悟入一切所知等者：約俱生慧，名能悟入。約引發慧，名已悟入。

亥二、一切慧。² 天一、徵

云何菩薩一切慧？

天二、釋。² 地一、標列種類。² 玄一、二種

當知此慧略有二種。一者、世間慧，二者、出世間慧。

玄二、三種

此二略說復有三種。一、能於所知真實隨覺通達慧，二、能於如所說五明處及三聚中決定善巧慧，三、能作一切有情義利慧。

地二、隨釋三種。³ 玄一、能於所知真實隨覺通達慧

若諸菩薩於離言說法無我性，或於真諦將欲覺悟、或於真諦正覺悟時、或於真諦覺悟已後所有妙慧。最勝寂靜明了現前，無有分別，離諸戲論；於一切法悟平等性，入大總相；究達一切所知邊際，遠離增益、損減二邊，順入中道。是名菩薩能於所知真實隨覺通達慧。

或於真諦將欲覺悟等者：此中妙慧，有三位別。一、於真諦將欲覺悟，此即無漏加行慧。二、於真諦正覺悟時，此即無漏慧。三、於真諦覺悟已後，此即無漏後得慧。言真諦者，謂即法無我性真實義相。又復妙慧，即是菩薩四如實智。於真諦將覺悟時，說此四如實智最勝寂靜明了現前，無

有分別，離諸戲論。以於勝解行住上忍轉時，趣現觀心有如是相故。聲聞地說：上忍生時，其心寂靜，雖似遠離，而非遠離。又於爾時，非美睡眠之所覆蓋，唯有分明無高、無下奢摩他行。（陵本三十四卷二十頁²⁷⁹²）今說菩薩上忍轉位，最勝寂靜明了現前，準彼應釋。於真諦正覺悟時，說此四如實智於一切法悟平等性，入大總相。謂入法無我時，於一切法離言自性、假說自性，平等平等如實通達故。此法無我，名大總相，遍一切法皆同一味故。於真諦覺悟以後，說此四如實智究達一切所知邊際，遠離增益、損減二邊，順入中道。住品中說：四如實智，始從勝解行住乃至有加行有功用無相住，未極清淨。（陵本四十八卷十六頁³⁸⁶⁵）由是當知，四如實智，地前、地上一切位有，是故此中作如是說。

玄二、能於五明三聚決定善巧慧。² 黃一、釋。² 字一、於五明處

若諸菩薩，於五明處決定善巧，廣說如前力種性品，應知其相。

字二、於三聚中

及於三聚中決定善巧，謂於能引義利法聚、能引非義利法聚、能引非義利非非義利法聚，皆如實知。

謂於能引義利法聚等者：此中三種法聚，如其次第，能令有情墮三聚定。

謂正性聚定、邪性聚定、不定聚定。是名能引義利，乃至能引非義利非非義利。

黃二、結

於是八處所有妙慧善巧攝受，能速圓滿廣大無上妙智資糧，速證無上正等菩提。

速證無上正等菩提者：此句下應有結文。謂如前標，應說：是名能於如所說五明處及三聚中決定善巧慧。

玄三、能作一切有情義利慧

能作一切有情義利慧有十一種，如前應知。即於彼位所有妙慧，當知是名饒益有情慧。

亥三、難行慧³。天一、徵

云何菩薩難行慧？

天二、標

當知此慧略有三種。

天三、釋³。地一、知法無我

若諸菩薩能知甚深法無我智，是名第一難行慧。

地二、調伏方便

若諸菩薩能了有情調伏方便智，是名第二難行慧。

地三、離所知障

若諸菩薩了知一切所知境界無障礙智，是名第三最難行慧。

亥四、一切門慧

云何菩薩一切門慧？當知此慧略有四種。謂於聲聞藏及菩薩藏，所有勝妙聞所成慧、思所成慧，於能思擇菩薩所應作應隨轉中，及菩薩所不應作應止息

中，思擇力所攝慧，及修習力所攝三摩呬多地無量慧。

亥五、善士慧³。天一、徵

云何菩薩善士慧？

天二、標

當知此慧略有五種。

天三、列²。地一、第一五種

一、聽聞正法所集成慧，二、內正作意俱行慧，三、自他利行方便俱行慧，自他利行方便俱行慧者：謂於一切所應作、所不應作如實了知，是名方便俱行慧。

四、於諸法住、法安立無顛倒中善決定慧，

於諸法住等者：如其法性，以無顛倒文句安立，是名法住。如有尋有伺地說應知。（陵本十卷十七頁⁸¹⁷）

五、捨煩惱慧。

地二、第二五種

復有異門。一、微細慧，悟入所知如所有性故。二、周備慧，悟入所知盡所有性故。三、俱生慧，宿智資糧所集成故。四、具教慧，能於諸佛、已入大地諸菩薩衆所聞法義具受持故。五、具證慧，從淨意樂地乃至到究竟地所攝受故。

亥六、一切種慧。³ 天一、徵

云何菩薩一切種慧？

天二、標

當知此慧，六種、七種，總十三種。

天三、列。² 地一、六種

六種慧者，謂於諸諦苦智、集智、滅智、道智，於究竟位盡智、無生智，是名六慧。

地二、七種

七種慧者，謂法智、類智、世俗智、神通智、相智、十力前行智、四道理中
正道理智。

謂法智類智等者：於內共了、現見所知諸義境界無漏之智，是名法智。於不共了、不現見所知義境無漏之智，是名類智。依世間慧，如來爲諸眾生隨其意解、隨其隨眠宣說妙法，名世俗智。如顯揚論說應知。（顯揚論二卷十六頁）言相智者，謂於法相能正了知通達之慧。法相有三，一者、遍計所執相，二者、依他起相，三者、圓成實相。解深密經一切法相品廣釋應知。（解深密經二卷一頁）十力作業，智爲前行，是名十力前行智，由是說言處非處智力乃至漏盡智力。餘文易知。

亥七、遂求慧。³ 天一、徵起

云何菩薩遂求慧？

天二、總標

當知此慧略有八種。

天三、列釋

一、依法異門智，所謂菩薩法無礙慧。二、依法相智，所謂菩薩義無礙慧。三、依法釋辭智，所謂菩薩釋辭無礙慧。四、依法品類句差別智，所謂菩薩辯才無礙慧。

依法品類句差別智者：於一切法一切盡所有性、如所有性，名法品類差別。思擇諸法四句等別，名句差別。

五、菩薩一切摧伏他論慧。六、菩薩一切成立自論慧。七、菩薩一切正訓營爲家屬家產慧。

菩薩一切正訓營爲家屬家產慧者：此中偏說在家菩薩。謂於家屬能正訓誨，及於家產能正營爲故。

八、菩薩一切善解種種王政世務慧。

善解種種王政世務慧者：此中王政，謂即事王。世務，謂餘營農、牧牛、商賈、計算、書數、雕印種種工巧業處應知。

亥八、二世樂慧。³ 天一、徵

云何菩薩此世他世樂慧？

天二、標

當知此慧略有九種。

當知此慧略有九種者：謂五明處善明淨慧爲五，及與示現、教導、讚勵、慶慰四慧，故成九種。

天三、釋² 地一、於五明處

謂諸菩薩，於內明處，能善明淨、善安住慧；於醫方明處、因明處、聲明處、世工業明處，能善明淨、非安住慧。

於醫方明處等者：此四明處，唯是世間。於彼諸相能正解了，名善明淨。然不愛樂味著，名非安住。

地二、於他所化

一切菩薩，即用如是於五明處善明淨慧以爲依止，於他愚癡、放逸、怯弱、

勤修正行所化有情，如其次第，示現、教導、讚勵、慶慰慧。

亥九、清淨慧⁴ 天一、徵起

云何菩薩清淨慧？

天二、總標

當知此慧略有十種。

天三、列釋⁵。地一、於真實義

於真實義有二種慧。謂由盡所有性及如所有性取真實義故。

地二、於流轉義

於流轉義有二種慧。謂取正因果故。

地三、於執受義

於執受義有二種慧。謂顛倒、不顛倒，如實了知故。

地四、於方便義

於方便義有二種慧。謂一切所應作、所不應作，如實了知故。

地五、於究竟義

於究竟義有二種慧。謂雜染，如實了知雜染故；清淨，如實了知清淨故。

天四、結名

如是菩薩五義十種差別淨慧，當知是名最勝淨慧。

當知此慧略有十種等者：決擇分說：慧波羅蜜多有五清淨。一、通達諸相清淨，二、通達緣起清淨，三、通達教導清淨，四、通達士用清淨，五、通達證得清淨。（陵本七十五卷七頁⁵⁷⁶⁶）此說五義，如次應知。

戌四、結

如是菩薩極善決定無量妙慧，能證菩薩大菩提果。菩薩依此，能圓滿慧波羅蜜多，速證無上正等菩提。

極善決定無量妙慧者：若諸菩薩已入大地，已善通達菩提自性，已善通達菩提方便，彼所有慧自內所證，不從他緣，名善決定。

申三、總辨² 酉一、明所攝² 戌一、攝一切種² 亥一、標

復次，如是六種波羅蜜多，世尊彼彼素怛纜中處處散說，今於此中攝在一處，略說應知。

亥二、釋² 天一、舉施

謂佛所說素怛纜中，所有施波羅蜜多乃至慧波羅蜜多，或標或釋，彼皆於此或自性施，廣說乃至或清淨施趣入攝受，如其所應皆當了知。

天二、例餘

如是所餘，如所宣說戒乃至慧趣入攝受，如其所應亦當了知。

如是所餘等者：謂如四攝事等，是名所餘。於彼趣入及與攝受，亦如波羅蜜多應知。

戌二、攝一切行² 亥一、略明依止² 天一、舉施

又諸如來爲菩薩時，所行一切菩薩行中，所有無量本生相應難行苦行，當知一切與施相應，依止於施。

天二、例餘

如說其施，如是戒、忍、精進、靜慮、慧相應，依止戒、忍、精進、靜慮、慧，當知亦爾。

亥二、辨依差別

或唯依施，廣說乃至或唯依慧，或雜依二，或雜依三，或雜依四，或雜依五，或雜依一切六波羅蜜多，皆應了知。

酉二、明最勝² 戌一、因勝

如是六種波羅蜜多，菩薩爲證無上正等菩提果故，精勤修集。是大白法溟，名大白法海；是一切有情、一切種類圓滿之因，名爲涌施大寶泉池。

是一切有情一切種類圓滿之因者：謂此六種波羅蜜多，能令無種姓一切有情皆往善趣，及令有種姓一切種類乘三乘法而得出離，由是名爲圓滿之因。隨其所應，令諸有情皆得成熟故。

戌二、果勝

又即如所集無量福智資糧，更無餘果可共相稱，唯除無上正等菩提。

本地分中菩薩地初持瑜伽處攝事品第十五

未二、四攝事³。 申一、徵

云何菩薩四種攝事？

申二、列²。 酉一、喞柁南

喞柁南曰：

自性一切難 一切門善士 一切種遂求 二世樂清淨

如是九種相 名略說攝事

酉二、長行

謂九種相攝事，名爲菩薩四種攝事。一者、自性攝事，二者、一切攝事，三者、難行攝事，四者、一切門攝事，五者、善士攝事，六者、一切種攝事，七者、遂求攝事，八者、此世他世樂攝事，九者、清淨攝事。

申三、釋³。 酉一、愛語⁹。 戌一、自性愛語³。 亥一、徵

云何菩薩自性愛語？

亥二、釋

謂諸菩薩，於諸有情常樂宣說悅可意語、諦語、法語、引攝義語。

亥三、結

當知是名略說菩薩愛語自性。

常樂宣說悅可意語等者：此顯愛語有三種相，所謂悅意、無染、唯善。令他慶悅，是名悅可意語，即悅意相。令自尸羅終無穿闕，是名諦語，即無染相。令他出不善處，安住善處，因之引攝利益安樂，是名法語、引攝義語，即唯善相。義如思所成地說。（陵本十九卷一頁¹⁶¹¹）

戌二、一切愛語³。 亥一、徵起

云何菩薩一切愛語？

亥二、總標

謂此愛語略有三種。

亥三、列釋²。 天一、別釋三種²。 地一、釋³。 玄一、慰喻語

一者、菩薩設慰喻語。由此語故，菩薩恆時對諸有情遠離顰蹙，先發善言，舒顏平視，含笑爲先，或問安隱吉祥，或問諸界調適，或問晝夜怡樂，或命前進善來，以是等相慰問有情，隨世儀轉，順觀人性。

玄二、慶悅語

二者、菩薩設慶悅語。由此語故，菩薩若見有情妻子、眷屬、財穀，其所昌盛而不自知，如應覺悟，以申慶悅。或知信、戒、聞、捨、慧增，亦復慶悅。

玄三、勝益語

三者、菩薩設勝益語。由此語故，菩薩宣說一切種德圓滿法教相應之語，利益安樂一切有情，恆常現前以勝益語而爲饒益。

地二、結

是名菩薩一切愛語差別應知。

謂此愛語略有三種等者：此中三種，如次應知三相所攝。一、慰喻語，悅

意相攝，此即悅可意語。言隨世儀轉，順觀人性者，菩提分品中說菩薩善知世間。若見年德俱尊勝者，能正奉迎，敷座延坐，敬問、禮拜、合掌、殷勤，修和敬業。若見年德俱相似者，能正問訊、酬對、歡慰，以軟美言共興談論，不依等慢而自格量。若見年德俱卑劣者，隨力隨能勸修勝德，乃至廣說。（陵本四十四卷十九頁³⁶⁰⁵）此應準釋。二、慶悅語，無染相攝，此即諦語，由慶悅他真實德故。三、勝益語，唯善相攝，此即法語、引攝義語。言一切種德圓滿法教者，謂即如來於三聚法現等正覺之所宣說。何等爲三？一者、能引有義聚法，二者、能引無義聚法，三者、非能引有義聚法、非能引無義聚法。由此相應語言，利益安樂一切有情，是故說名爲勝益語。

天二、略攝二種⁴ 地一、徵

云何略說如是菩薩一切愛語？

地二、標

當知此語略爲二種。

地三、列

一、隨世儀軌語，二、順正法教語。

地四、攝

若慰喻語、若慶悅語，當知是名隨世儀軌語；若勝益語，當知是名順正法教語。

戌三、難行愛語。³⁸⁹⁸ 亥一、徵

云何菩薩難行愛語？

亥二、標

當知此語略有三種。

亥三、釋。³⁸⁹⁹ 天一、於怨害所

若諸菩薩，於能殺害怨家惡友，以善淨心、無穢濁心，思擇爲說若慰喻語、若慶悅語、若勝益語，當知是名菩薩第一難行愛語。

以善淨心無穢濁心者：謂諸菩薩憐愍愍意樂、增上意樂，名善淨心。無惡分別，不欲惱害，是名無穢濁心。

天二、於愚鈍所

若諸菩薩，於其上品愚癡鈍根諸有情所，心無疑慮，思擇爲說種種法教，誓受疲勞，如理如法，如善攝取，當知是名菩薩第二難行愛語。

如理如法如善攝取者：依現、比、至教道理而說正法，非不依彼三量道理，是名如理。³⁹⁰⁰ 又所宣說應四聖諦，是名如法。義如力種性品說。（陵本三十八卷十七頁³¹⁵⁴）以其隨順八種教授而正教授，五種教誡而正教誡，是名如善攝取。言攝取者，謂諸菩薩正御徒眾，於彼有情攝取攝受故。義如攝受品說。（陵本四十八卷二十七頁³⁸⁹⁹）

天三、於諂誑所

若諸菩薩，於其諂詐欺誑親教、軌範、尊長真實福田行邪惡行諸有情所，無嫌恨心、無恚惱心，思擇爲說若慰喻語、若慶悅語、若勝益語，當知是名菩

薩第三難行愛語。

戌四、一切門愛語。³ 亥一、徵

云何菩薩一切門愛語？

亥二、標

當知此語略有四種。

亥三、列

一、欲斷諸蓋向善趣者，爲說先時所應作法。

爲說先時所應作法者：所謂施論、戒論、生天之論，於諸欲中，能廣開示過患出離清淨品法，是名先時所應作法。如聲聞地說應知。（陵本二十五

卷四頁²⁰⁸⁶）

二、遠離諸蓋心調善者，爲說增進四聖諦等相應正法。三、在家出家多放逸者，無倒諫誨，方便令其出離放逸行，住不放逸行。四、於諸法中多疑惑者，爲令當來離疑惑故，爲說正法論議決擇。

戌五、善士愛語⁴ 亥一、徵

云何菩薩善士愛語？

亥二、標

當知此語略有五種。

亥三、列

謂諸菩薩爲所化生，能說如來及諸菩薩有因緣法、有出離法、有所依法、有勇決法、有神變法。

亥四、釋⁵ 天一、有因緣

若所說法，得處有因，制立學處，是故此法名有因緣。

若所說法得處有因等者：謂有緣起，制立一切所學處故。如攝異門分釋。

（陵本八十三卷七頁⁶²⁹⁵）

天二、有出離

若所說法，於所受學有毀犯者，施設還淨，是故此法名有出離。

天三、有所依

若所說法，四依所攝，施設無倒法律正行，是故此法名有所依。

若所說法四依所攝等者：此中四依，所謂衣服、飲食、臥具、病緣醫藥供身什物。由依此故，於善說法毗奈耶中出家受具，成苾芻分。如忍品說。

（陵本四十二卷九頁³⁴⁴⁰）由是此說施設無倒法律正行，謂能超越一切惡戒諸毀犯故。

天四、有勇決

若所說法，能正顯示出一切苦不退還行，是故此法名有勇決。

出一切苦不退還行者：謂即道諦應知。

天五、有神變

若所說法，作三神變，一切所說終不唐捐，是故此法名有神變。

若所說法作三神變者：謂即神境神變、記說神變、教誡神變，名三神變應知。

戌六、一切種愛語⁴ 亥一、徵

云何菩薩一切種愛語？

亥二、標

當知此語，六種、七種，總十三種。

亥三、釋² 天一、六種

言六種者，一、於應聽法開聽愛語，二、於應制法遮制愛語，三、開示諸法門愛語，四、開示無倒法相愛語，五、開示無倒訓釋諸法言辭愛語，六、開示無倒法句品類差別愛語。

開示諸法門愛語等者：此中四種愛語，如其次第，當知以四無礙慧爲所依止。四無礙慧如慧品釋。（陵本四十三卷七頁³⁵⁰⁰）由此遣他展轉所生疑惑，是名開示。

天二、七種

言七種者，一、慰喻愛語；二、慶悅愛語；三、於他有情一切資具少希欲

中，一切所作及以正至少希欲中，廣恣愛語；

廣恣愛語者：恣彼所求，對彼宣說悅意語故。

四、安慰種種驚怖愛語；五、如理宣說所攝愛語；六、爲欲令他出不善處安立善處，正見聞疑舉訶愛語；

正見聞疑舉訶愛語者：舉謂諫舉，訶謂訶責。聲聞地說：謂若有餘，於增上戒毀犯尸羅，於增上軌毀犯軌則，由見聞疑能正諫舉，真實不以虛妄，應時不以非時，饒益不以衰損，柔軟不以麤獷，善友不以憎嫉。如是名爲善能諫舉。（陵本二十五卷三頁²⁰⁷⁹）又戒品說：若諸有情，有下中上過失違犯，內懷親愛無損惱心，以軟、中、上訶責而訶責之。（陵本四十卷十三頁³³⁰²）此說舉訶愛語，準彼應知。

七、請他有力饒益愛語。

亥四、結

如是菩薩十三種語，當知名爲一切種愛語。

戌七、遂求愛語⁴ 亥一、徵

云何菩薩遂求愛語？

亥二、標

當知此語略有八種。

亥三、列

謂諸菩薩依四淨語，起八聖語，是名菩薩遂求愛語。

亥四、釋² 天一、四淨語

四淨語者，謂離妄語及以離間、麤惡、綺語。

天二、八聖語

八聖語者，謂見言見，聞言聞，覺言覺，知言知，不見言不見，不聞言不聞，不覺言不覺，不知言不知。

戌八、二世樂愛語³ 亥一、徵

云何菩薩此世他世樂愛語？

亥二、標

當知此語略有九種。

亥三、列

一、說正法斷親屬難愁憂愛語，二、說正法斷財位難愁憂愛語，三、說正法斷無病難愁憂愛語，四、說正法斷淨戒難衆苦愛語，五、說正法斷正見難衆苦愛語，六、說正法讚美淨戒圓滿愛語，七、說正法讚美正見圓滿愛語，八、說正法讚美軌則圓滿愛語，九、說正法讚美正命圓滿愛語。

當知此語略有九種等者：此中前五種難，即五衰損之異名。謂眷屬衰損、財位衰損、無病衰損、淨戒衰損、正見衰損。由是因緣，住諸苦惱，故生愁憂。菩薩爲說正法，能善開解，令得遠離，說彼名斷。於戒品中，略說少分應知。（陵本四十卷十頁³²⁸⁸）

戌九、清淨愛語。³ 亥一、徵

云何菩薩清淨愛語？

亥二、標

當知此語有二十種。

亥三、指

謂二十相宣說正法，應知如前力種性品。

當知此語有二十種等者：力種性品說：菩薩說正法相略有二十。如彼應知。（陵本三十八卷十七頁³¹⁵⁸）

酉二、利行² 戌一、總標² 亥一、徵

云何菩薩利行？

亥二、釋² 天一、指共相

謂此利行廣如愛語，應知其相。

天二、明差別

於利行中餘差別義，我今當說。謂諸菩薩，由一切品差別愛語，隨說彼彼趣義利行，饒益有情，故名利行。

由一切品差別愛語者：前說愛語，略爲二種。一、隨世儀軌語，二、順正法教語，是名一切品。即於此中，若慰喻語、若慶悅語、若勝益語，名一切品差別。

戌二、別辨。亥一、自性利行。² 天一、徵

云何菩薩自性利行？

天二、釋

謂諸菩薩由彼愛語，爲諸有情示現正理，隨其所應，於諸所學隨義利行，法隨法行。如是行中，安住悲心、無愛染心，勸導、調伏、安處、建立。

天三、結

是名略說利行自性。

爲諸有情示現正理等者：聲聞地說，隨順學法略有十種，謂能對治十種違逆學法應知。（陵本二十八卷四頁²³³⁶）是名於諸所學隨義利行。身語意業無倒隨轉，正聞思修，是名於諸所學法隨法行。菩薩爲諸有情，於彼彼行

隨其所應，示現四種真實道理，謂觀待道理、作用道理、證成道理、法爾道理，是名示現正理。

亥二、一切利行。² 天一、徵

云何菩薩一切利行？

天二、釋。² 地一、標列種類。² 玄一、二種

當知此行略有二種。一、未成熟有情能成熟利行；二、已成熟有情令解脫利行。

玄二、三種

即此利行復由三門。一、於現法利勸導利行；二、於後法利勸導利行；三、於現法後法利勸導利行。

地二、隨釋三種。³ 玄一、於現法利勸導利行。² 黃一、明勸導

於現法利勸導利行者，謂正勸導，以法業德，招集、守護、增長財位，當知是名於現法利勸導利行。

黃二、釋現樂

由此能令從他獲得廣大名稱及現法樂；由資具樂，攝受安住。

以法業德招集守護增長財位者：如理尋伺，是名以法。由自勤劬，是名以業。由工巧智，是名以德。由是方便，於彼財位能令獲得，是名招集。能善防護，是名守護。能令廣大，是名增長。

玄二、於後法利勸導利行。² 黃一、明勸導

於後法利勸導利行者，謂正勸導棄捨財位，清淨出家，受乞求行以自存活，當知是名於後法利勸導利行。

黃二、釋後樂

由此能令決定獲得後法安樂，不必獲得現法安樂。

玄三、於現法後法利勸導利行。² 黃一、明勸導

於現法後法利勸導利行者，謂正勸導，令在家者、或出家者漸次修行，趣向離欲，當知是名於現法後法利勸導利行。

黃二、釋俱利

由此能令於現法中，得身輕安、得心輕安，安樂而住；於後法中，或生淨天，或無餘依涅槃界中而般涅槃。

令在家者至而般涅槃者：謂受近事律儀，名在家者。由是律儀，漸令修離惡行，遠離諸欲，名漸修行，趣向離欲。此增上力，於現法中，不造諸惡；於後法中，當生欲界清淨天果。若受苾芻律儀，名出家者。由是律儀，漸令修離惡行及離欲行，依世間道及出世道而趣離欲，名漸修行，趣向離欲。依世間道而離欲者，於現法中，得安樂住；於後法中，當生色無色界諸清淨天。依出世道而離欲者，於後法中，當於無餘依妙涅槃界而般涅槃。

亥三、難行利行。³ 天一、徵

云何菩薩難行利行？

天二、標

當知此行略有三種。

天三、釋。地一、於無善因有情所

若諸菩薩，於先未有勝善根因諸有情所，能行利行，是名第一難行利行。何以故？彼諸有情難勸導故。

地二、於極放逸有情所

若諸菩薩，於有善因現前耽著廣大財位、眾具圓滿諸有情所，能行利行，是名第二難行利行。何以故？彼於廣大極放逸跡、極放逸處耽著轉故。

地三、於著邪見有情所

若諸菩薩，於諸外道、著本異道、邪見、邪行諸有情所，能行利行，是名第三難行利行。何以故？彼於自宗愚癡執故，於正法律憎背執故。

亥四、一切門利行。天一、徵

云何菩薩一切門利行？

天二、標

當知此行略有四種。

天三、列

謂諸菩薩，不信有情，於信圓滿殷勤勸導，乃至建立；犯戒有情，於戒圓滿殷勤勸導，乃至建立；惡慧有情，於慧圓滿殷勤勸導，乃至建立；慳吝有情，於捨圓滿殷勤勸導，乃至建立。

亥五、善士利行。天一、徵

云何菩薩善士利行？

天二、標

當知此行略有五種。

天三、列

謂諸菩薩，於真實義勸導有情；於應時宜勸導有情；

於真實義勸導有情等者：謂若宣說超勝四種聖諦相應言論，是名於真實義勸導有情。又若宣說初時所作無倒言論，所謂施論、戒論、生天之論，於

諸欲中，能廣開示過患出離清淨品性，是名於應時宜勸導有情。

於能引攝勝妙義利勸導有情；於諸有情柔軟勸導；於諸有情慈心勸導。

於諸有情柔軟勸導等者：謂若諫舉罪時，言不羸獷，名於有情柔軟勸導。起憐愍心，欲作饒益，名於有情慈心勸導。

亥六、一切種利行。³ 天一、徵

云何菩薩一切種利行？

天二、標

當知此行，六種、七種，總十三種。

天三、列。² 地一、六種

云何六種？謂諸菩薩，若諸有情應攝受者，正攝受之；若諸有情應調伏者，正調伏之；若諸有情憎背聖教，除其悲惱；若諸有情處中住者，令入聖教；若諸有情已入聖教，正於三乘令其成熟；若諸有情已成熟者，令得解脫。

地二、七種。² 玄一、徵

云何七種？

玄二、釋。² 黃一、舉善資糧守護長養

謂諸菩薩，安處一分所化有情，於善資糧守護長養。所謂或依下乘出離，或復依於大乘出離。

黃二、例遠離等。² 字一、列四種

如令所化於善資糧守護長養，如是或於遠離、或於心一境性、或於清淨諸障、或於修習作意，正安處之。

字二、明安處

若有聲聞、獨覺種性，即於聲聞、獨覺乘中而正安處；若有如來種性有情，即於無上正等菩提最上乘中而正安處。

安處一分所化有情等者：謂於五處如應安立，是名安處。云何五處？一、護養定資糧處，二、遠離處，三、心一境性處，四、障清淨處，五、修作意處。聲聞地中別釋其相。（陵本三十卷五頁²⁴⁹⁸）此說於善資糧守護長

養，乃至或於修習作意，準彼應知。然此安處唯說所化有情，爲簡非化，故言一分。由彼非化無有種性，定不堪任故。

亥七、遂求利行³。天一、徵

云何菩薩遂求利行？

天二、標

當知此行略有八種。

天三、釋²。地一、舉無慚纏

謂諸菩薩，見諸有情於應慚處爲無慚纏之所纏繞，方便開解，令離彼纏。

地二、例無愧等

如無慚纏，如是見有於應愧處爲無愧纏之所纏繞，若惜沈纏、若睡眠纏、若掉舉纏、若惡作纏、嫉纏、慳纏之所纏繞，方便開解，令離彼纏。

當知此行略有八種等者：此依八纏而得建立，如文可知。

亥八、二世樂利行³。天一、徵

云何菩薩此世他世樂利行？

天二、標

當知此行略有九種。

天三、釋³。地一、依淨身業

謂諸菩薩於他有情，依淨身業，勸令遠離一切殺生；勸令遠離諸不與取；勸令遠離諸欲邪行；勸令遠離一切窠羅、若迷隸耶，及以末陀放逸處酒。

地二、依淨語業

依淨語業，勸令遠離一切妄語，勸令遠離諸離間語，勸令遠離諸麤惡語，勸令遠離一切綺語。

地三、依淨意業

依淨意業，勸令遠離一切貪欲、瞋恚、邪見。

亥九、清淨利行⁴。天一、徵

云何菩薩清淨利行？

天二、標

當知此行略有十種。謂諸菩薩於諸有情，依外清淨有五利行，依內清淨有五利行。

天三、釋² 地一、依外清淨⁴ 玄一、徵

云何菩薩於諸有情依外清淨有五利行？

玄二、列

一、無罪利行，二、不轉利行，三、漸次利行，四、遍行利行，五、如應利行。

玄三、釋⁵ 黃一、無罪利行

謂諸菩薩，於諸有情雜惡行者、先惡行者、有罪行者、雜染行者，於諸善中能正安處，是名菩薩於諸有情無罪利行。

於諸有情雜惡行者等者：造不善業，名雜惡行。即於彼業先時所作，名先惡行。生現法罪、生後法罪、生俱法罪，名有罪行。由貪瞋癡爲因緣起，

名雜染行。

黃二、不轉利行

又諸菩薩於諸有情，不於非解脫、非定清淨處，求爲真解脫、求爲定清淨者，即於其中能正勸導，是名菩薩於諸有情不轉利行。

不於非解脫非定清淨處等者：若諸有情，以正方便求真解脫及定清淨，不以非方便求，是則名爲不於非解脫、非定清淨處，求爲真解脫、求爲定清淨者。菩薩於中能正勸導，令非方便畢竟不轉，是故名爲不轉利行。

黃三、漸次利行

又諸菩薩，於諸有情先審觀察。知劣慧者爲說淺法，隨轉麤近教授教誡；知中慧者爲說中法，隨轉處中教授教誡；知廣慧者爲說深法，隨轉幽微教授教誡。令其漸次修集善品，是名菩薩於諸有情漸次利行。

黃四、遍行利行

又諸菩薩，於諸四姓乃至天人一切有情，隨力隨能行義利行、求利樂者，即

於其中隨類勸導，是名菩薩於諸有情遍行利行。

於諸四姓等者：謂諸世間刹帝利眾、婆羅門眾、吠舍眾、戌陀羅眾，是名四姓。又眾會中八眾差別，一、刹帝利眾，二、婆羅門眾，三、長者眾，四、沙門眾，五、四大天王眾，六、三十三天眾，七、焰摩天眾，八、梵天眾，是名天人一切有情。

黃五、如應利行

又諸菩薩於諸有情，若於自義諸善法品，隨下中上功能差別可勸導者，及由方便功能差別可勸導者，隨其所應，於彼、如彼方便勸導，是名菩薩於諸有情如應利行。

玄四、結

是名菩薩於諸有情依外清淨五種利行。

若於自義諸善法品等者：謂諸聲聞、獨覺、菩薩，為求自義法隨法行有多品類，名於自義諸善法品。彼諸有情，或為軟根、或為中根、或為利根，

名下中上功能差別。依彼有情種姓根行別故，建立三乘聖道，令得自義，是名方便功能差別。菩薩於彼三乘種姓有情，如彼三乘聖道方便而為勸導，是故名為如應利行。

地二、依內清淨。玄一、徵

云何菩薩於諸有情依內清淨五種利行？

玄二、釋。黃一、由悲意樂

謂諸菩薩，於諸有情起廣大悲意樂現前而行利行。

黃二、由心無倦

又諸菩薩，於諸有情所作義利，雖受一切大苦劬勞，而心無倦，深生歡喜，為諸有情而行利行。

黃三、由心謙下

又諸菩薩，雖現安處最勝第一圓滿財位，而自謙下，如奴如僕，亦如孝子、旃荼羅子，其心卑屈，離憍離慢及離我執，於諸有情而行利行。

黃四、由實哀憐

又諸菩薩，於諸有情心無愛染、無有虛偽，真實哀憐而行利行。

於諸有情心無愛染等者：決擇分說：若諸菩薩，於已有恩諸有情所，隨順恩想，相續發起親友意樂，以有染心，方便攝受欲爲朋黨，當知有罪。或於有怨諸有情所，隨順怨想，相續發起怨讎意樂，有穢濁心，當知有罪。或於無恩無怨諸有情所，相續發起中庸意樂、放捨意樂，當知有罪。（陵本七十五卷四頁⁵⁷⁵⁷）今說於諸有情心無愛染，翻彼應知。又諸菩薩，於諸有情饒益方便，於大菩提趣證方便，無顛倒智俱行勝解，是名菩薩無虛妄意樂。如增上意樂品說。（陵本四十七卷十一頁³⁷⁶⁶）此說無有虛偽，義應準知。

黃五、由畢竟慈

又諸菩薩，於諸有情生起畢竟無復退轉慈愍之心而行利行。

玄三、結

是名菩薩於諸有情依內清淨五種利行。

天四、結

如是依於內外清淨各五利行，總有十種，是名菩薩清淨利行。

酉三、同事² 戌一、徵

云何菩薩同事？

戌二、釋² 亥一、總顯略義² 天一、釋同事名

謂諸菩薩，若於是義、於是善根勸他受學，即於此義、於此善根或等或增自現受學。如是菩薩與他事同，故名同事。

若於是義者：攝異門分說：是所求事故、能引義利故，名之爲義，可愛樂故、無有罪故。（陵本八十三卷十七頁）此中義言，應準彼釋。

天二、成就所作³ 地一、標

所化有情知此菩薩所修同事，便於自己受學善根堅固決定，無有退轉。

地二、徵

何以故？

地三、釋² 玄一、令無疑慮

彼作是思：菩薩勸我所受學者，定能爲我利益安樂。由此菩薩所授我者，即於其中自現行故，無有知無利益安樂自現行者。

玄二、令無反詰

非諸菩薩如是同事勸導有情，他得詰言：汝自於善不能受學，云何以善殷勤勸導，數數教授教誡於他？汝應從他殷勤諮受、教授教誡。

亥二、四句分別² 天一、總標

有諸菩薩是他同事，而不自顯與他同事；有諸菩薩非他同事，而自顯現與他同事；有諸菩薩是他同事，亦自顯現與他同事；有諸菩薩非他同事，亦不自顯與他同事。

天二、別釋⁴ 地一、第一句

第一句者，謂有菩薩與諸菩薩功德威力皆悉平等，於菩薩道自謂爲師，功德

威力與等菩薩隱自善故，而不顯己功德威力。

於菩薩道自謂爲師等者：謂彼功德威力與等菩薩，於彼徒眾教授教誡正現前時，名於菩薩道自謂爲師。

地二、第二句

第二句者，謂諸菩薩，見有下劣信解有情，於甚深處心生怖畏，便正思擇，爲欲方便化導彼故，自現己身與其同法。所謂下於旃荼羅類乃至狗類，欲作饒益、欲除災患、欲調、欲化，故思於彼旃荼羅、狗同分中生。

地三、第三句

第三句者，謂諸菩薩，見所化者所受善根猶可搖動，爲令堅住，現與同事或等或增。

地四、第四句

第四句者，謂諸菩薩自行放逸，棄捨他事。

午二、總辨² 未一、作業² 申一、標略說

如是已說多種施、戒，廣說乃至最後同事。其中所有波羅蜜多，能自成熟一切佛法；所有攝事，能成熟他一切有情。當知略說菩薩一切善法作業。

申二、辨因緣³ 酉一、總標

又如前說多種施、戒，廣說乃至最後同事，如是衆多助菩提分無量善法，由三因緣應知現行，由二因緣應知最勝，由三因緣應知清淨。

酉二、別釋³ 戌一、現行

謂由身語意三因緣故，應知現行。

戌二、最勝² 亥一、標

彼諸善法由廣大故、無雜染故，應知最勝。亦名無上、亦名不共。

亥二、釋² 天一、由廣大² 地一、標

當知此中，由有情無別故、事無別故、時無別故，名爲廣大。

地二、釋³ 玄一、有情無別

有情無別者，謂諸菩薩，普於一切有情處所，普爲一切法界有情，修行如是

施等善根，非專爲己。

普爲一切法界有情者：謂諸有情，於法界無量中，由種種法或染或淨差別可得，是故名爲一切法界有情。

玄二、事無別

事無別者，謂諸菩薩，普於一切及一切種施等善根精勤受學。

玄三、時無別

時無別者，謂諸菩薩，恆常無間不離加行、不捨善軌，若晝若夜、現法後法，即由此因，施等善根常行無替。

天二、由無雜染³ 地一、標

當知此中，由四種相成無雜染。

地二、釋⁴ 玄一、淨歡喜俱

謂諸菩薩懷歡喜心修諸善法；由是因緣，無苦、無憂、無諸變悔。

玄二、無不平等

又諸菩薩不損惱他、不著見趣、不雜惡行修行施等無量善根。

玄三、殷重

又諸菩薩殷重遍體，於其施等無量善法唯見功德、唯見真實、唯見寂靜，極善決定，不從他緣、非餘引奪而正受學。

玄四、無依

又諸菩薩不因所修施等善法希異熟果，或轉輪王、或天帝釋、或魔、或梵；亦不於他希求返報。無所依止，不依一切利養恭敬世俗名譽，乃至不依養活身命。

地三、結

由如是相淨歡喜俱、無不平等、殷重、無依，修行施等，廣說乃至同事爲後無量善法，名無雜染。

無不平等者：此不平等，謂不善行。決擇分說：由非愛果義，名不平等行故。（陵本六十二卷四頁⁴⁹⁷⁷）此配前說不損惱他、不著見趣、不雜惡行。

戊三、清淨² 亥一、標

由熾然故、無動轉故、善清淨故，應知清淨。

亥二、釋² 天一、熾然無動² 地一、標

若諸菩薩已入清淨意樂地者，一切善根熾然無動。

地二、釋² 玄一、熾然

言熾然者，謂此菩薩意樂淨故，一切善法不由思擇，熾盛現前。

玄二、無動² 黃一、無滅

言無動者，謂此菩薩意樂淨故，隨所獲得、隨所積集所有善法皆無退轉，於當來世能無退滅。

黃二、唯增

如是菩薩，隨所經歷彼彼日夜、隨所過度彼彼自身，所有善法如明分月，唯增無減。

天二、善清淨

若諸菩薩住到究竟地、或繫屬一生最後有者，所有善法名善清淨。此上更無菩薩地攝勝淨法故。

酉三、總結

如是施等同事爲後無量善法，三因緣故應知現行，二因緣故應知最勝，三因緣故應知清淨。

未二、感果。² 申一、別辨。⁸ 酉一、一切施等

此中所有一切施、一切戒，廣說乃至一切同事，若多修習、若善清淨、若具圓滿，能感無上正等菩提金剛堅固身、正法久住果。

金剛堅固身正法久住果者：謂於金剛喻定位中，能斷二障，證得菩薩不可思議轉依，是名金剛堅固身。現等正覺，宣說正法，乃至般涅槃後，經爾所時，正行未滅、正法未隱，是名正法久住。

酉二、難行施等

此中所有難行施、難行戒，廣說乃至難行同事，若多修習、若善清淨、若具

圓滿，能感如來成就無等希奇法果。

酉三、一切門施等

此中所有一切門施、一切門戒，廣說乃至一切門同事，若多修習、若善清淨、若具圓滿，能感如來一切最勝有情天人所供養果。

酉四、善士施等

此中所有善士施、善士戒，廣說乃至善士同事，若多修習、若善清淨、若具圓滿，能感如來於諸有情無足、二足、四足、多足、有色、無色、有想、無想及以非想非非想處，於此一切有情類中最尊勝果。

酉五、一切種施等

此中所有一切種施、一切種戒，廣說乃至一切種同事，若多修習、若善清淨、若具圓滿，能感如來無量殊勝福德所攝三十有二大丈夫相、八十隨好莊嚴身果。

酉六、遂求施等

此中所有遂求施、遂求戒，廣說乃至遂求同事，若多修習、若善清淨、若具圓滿，能感如來坐菩提座，一切魔怨不能惱觸、不傾動果。

酉七、二世樂施等

此中所有此世他世樂施、此世他世樂戒，廣說乃至此世他世樂同事，若多修習、若善清淨、若具圓滿，能感如來最勝靜慮、解脫、等持、等至樂果。

酉八、清淨施等

此中所有清淨施、清淨戒，廣說乃至清淨同事，若多修習、若善清淨、若具圓滿，能感如來四一切種清淨果。謂所依淨、所緣淨、心淨、智淨。亦感如來三不護、十力、四無所畏、三念住、一切不共佛法極清淨果。

如來四一切種清淨果等者：此中四一切種清淨、三不護、十力、四無所畏、三念住，如建立品別釋其相。（陵本四十九卷十五頁³⁹⁴⁸）不共佛法總有百四十種，今說一切，是彼少分應知。

申二、總結

如是菩薩施等善法，能感無上到究竟果，當知亦感生死流轉順菩薩行所餘無量無邊可愛無罪勝果。

瑜伽師地論科句披尋記卷第四十三

瑜伽師地論科句披尋記卷第四十四

彌勒菩薩說

唐三藏沙門玄奘奉詔譯

韓清淨科記

本地分中菩薩地初持瑜伽處供養親近無量品第十六

巳二、供養親近無量品³ 午一、總徵

云何菩薩供養、親近、修習無量？

午二、喩柁南標

喩柁南曰：

供三寶 親善友 修無量 最爲後

午三、長行釋³ 未一、供三寶² 申一、別顯供養² 酉一、舉供如來⁵ 戌一、徵

云何菩薩於如來所供養如來？

戌二、標

當知供養略有十種。

戌三、列

一、設利羅供養，二、制多供養，三、現前供養，四、不現前供養，五、自作供養，六、教他供養，七、財敬供養，八、廣大供養，九、無染供養，十、正行供養。

戌四、釋。⁶ 亥一、設利羅供養

若諸菩薩，親現供養如來色身，是名設利羅供養。

亥二、制多供養

若諸菩薩，於爲如來所造一切若窣堵波、若龕、若臺、若故制多、新制多所設諸供養，是名制多供養。

亥三、現前不現前供養。² 天一、別顯種類。² 地一、現前供養。² 玄一、供一佛等

若諸菩薩，於如來身、或制多所親面對前，現矚現見而設供養，是名現前供養。

玄二、供多佛等。² 黃一、舉思惟。² 字一、明法性

若諸菩薩，於如來所、若制多所，現前施設供養具時，發起增上意樂俱心、淨信俱心，作是思惟：若一如來法性，即是去來今世一切如來法性；若一如來制多法性，即是十方無邊無際一切世界所有如來制多法性。

字二、明供養

是故我今供現如來，即是供養其餘三世一切如來；供現制多，即是供養其餘十方無邊無際一切世界若窣堵波、若龕、若臺、若故制多、若新制多。

黃二、結得名

當知是名菩薩俱供現不現前一切如來及以制多。

發起增上意樂俱心等者：謂於現不現前一切如來及以制多樂俱供養，是名增上意樂俱心。於一切如來一切功德平等平等無有差別生淨勝解，是名淨信俱心。

地二、不現前供養。² 玄一、作一切如來想

若諸菩薩，於不現前一切如來及以制多作如來想，普爲三世一切如來、一切十方如來制多施設供養，當知是名菩薩唯供不現前佛及以制多。

玄二、廣造如來像

若諸菩薩，佛涅槃後，爲如來故造立形像，若窣堵波、若龕、若臺，隨力隨能或一或二，或復衆多，乃至百千俱胝等數；如是菩薩於如來所，設不現前弘廣供養，當獲無量大福德果，攝受無量廣大梵福。菩薩由此，能於無量劫大劫中，不墮惡趣。由是因緣，非不圓滿無上正等菩提資糧。

天二、總辨福果

此中菩薩，唯供現前佛及制多，應知獲得廣大福果。若唯供養不現前佛及以制多，應知獲得大大福果。若俱供養現不現前佛及制多，應知獲得最大福果，爲無有上。

亥四、自作教他供養² 天一、別顯種類² 地一、自作供養² 玄一、唯自手作

若諸菩薩，於如來所、若制多所欲設供養，唯自手作，不使奴婢、作使、朋

友、僚庶、親屬，不依懈惰諸放逸處而設供養，是名菩薩自作供養。

玄二、兼勸他作

若諸菩薩，於如來所、若制多所欲設供養，非唯自作，亦勸父母、妻子、奴婢、作使、朋友、僚庶、親屬，及他國王、王子、大臣、長者、居士、若婆羅門、國邑聚落饒財商主，下至一切男女大小、貧匱苦厄旃荼羅等，及以親教、軌範諸師，共住、近住一切弟子，同梵行者、諸出家者、外道等衆，令於如來、若制多所，隨力隨能作諸供養，當知是名菩薩自他咸共供養。

地二、教他供養

若諸菩薩，現有少分可供財物，興悲愍心，故思施與貧苦少福無力有情，令於如來、若制多所持用供養，願彼當來多受安樂。彼得此物，供養如來及以制多，菩薩於斯自無所供，當知是名菩薩唯教他設供養。

天二、總辨福果

此中菩薩，若唯自供佛及制多，應知獲得廣大福果。若唯教他，應知獲得大

大福果。若能自他俱共供養，應知獲得最大福果，爲無有上。

亥五、財敬廣大無染供養²。天一、別顯種類³。地一、財敬供養²。玄一、別列²。黃一、敬供養。

若諸菩薩，於如來所、若制多所，以諸衣服、飲食、臥具、病緣醫藥供身什物，敬問、禮拜、奉迎、合掌，種種熏香、末香、塗香、華鬘、妓樂、幢蓋、旛燈，歌頌稱讚，五輪歸命，趨繞右旋，而爲供養。

黃二、財供養

或復奉施無盡財供，或復奉施末尼、眞珠、琉璃、螺貝、璧玉、珊瑚、磲、瑪瑙、琥珀、金銀、赤珠、右旋如是等寶，或復奉施末尼、環釧、寶璫、印等諸莊嚴具，乃至奉施種種寶鈴，或散珍奇、或纏寶縷而爲供養。

玄二、總結

是名菩薩於如來所、若制多所財敬供養。

地二、廣大供養

若諸菩薩，於如來所、若制多所，長時施設即上所陳財敬供養，若多供具、若妙供具、

若多供具若妙供具者：謂如前說，奉施無盡財供，名多供具。或復奉施末尼、眞珠，乃至或纏寶縷而爲供養，名妙供具。

若現在前、不現在前、若自造作、教他造作、若淳淨心猛利勝解現前供養；

若淳淨心猛利勝解等者：住品中說：極歡喜住菩薩，住此住中，由二因緣現見諸佛。乃至廣說既得見已，隨力隨能興一切種恭敬供養，奉施種種上妙樂具。（陵本四十七卷二十四頁³⁸⁰⁹）此說若淳淨心猛利勝解現前供養，

準彼應知。謂彼菩薩淨勝意樂，名淳淨心。彼說由二因緣者，一、由羸淨信，二、由正願力。今說猛利勝解，即彼第一因緣。謂由聽聞菩薩藏說，或由內心發起勝解，信有十方種種異名諸世界中種種異名諸佛如來，由羸淨信俱行之心，求欲現見，如是求已，如實稱遂，當知是名第一因緣。

即以如是所種善根，迴向無上正等菩提，如是七種說名菩薩廣大供養。

如是七種說名菩薩廣大供養者：謂若多供具、若妙供具爲二，若現在前、不現在前爲二，若自造作、教他造作爲二，若淳淨心猛利勝解現前供養爲一。如是一切，總成七種。

地三、無染供養

若諸菩薩，於如來所、若制多所，自手供養不懷輕慢；令他供養；不住放逸、懈惰、不敬而爲供養；不輕棄擲、不散漫心、無雜染心而爲供養；不於信佛國王、大臣、諸貴勝前，爲財敬故，詐設種種虛事供養；不雌黃塗，不酥灌洗，不以種種局崛羅香、遏迦華等餘不淨物而爲供養。如是六種說名菩薩無染供養。

如是六種說名菩薩無染供養者：謂自手供養不懷輕慢爲初，餘五供養各爲一種，是故成六。

天二、總辨一切² 地一、有財寶² 玄一、總標三種

又諸菩薩，如是財敬、廣大、無染供養如來及制多時，或自臂力所集財寶，

或從他求所獲財寶，或得衆具自在財寶，能爲如是種種供養。

玄二、別辨後一² 黃一、辨種類² 字一、敬供養³ 宙一、恭敬禮拜

已得衆具自在菩薩，化作化身，或一或二，或復衆多，乃至百千俱胝等數。此一切身皆於如來及制多所恭敬禮拜。

宙二、奉散香等

復從如是一一化身，化出多手，或百或千，或過是數。此一切手皆持無量出過諸天上妙華香、殊勝可愛種種珍寶，奉散如來及制多所。

宙三、歌頌稱讚

復從如是一切化身，化出無量上妙音聲，歌讚如來廣大甚深真實功德。

字二、財供養

復從如是一切化身，化出無量最上最妙環釧、璫印、寶莊嚴具，幢蓋、幡燈種種供具，供養如來及以制多。

黃二、明自在

如是等類，已得眾具自在菩薩所設供養，皆屬自心。

已得眾具自在菩薩者：此說菩薩於無加行無功用無相住中，若暫思惟一切食等諸資生具，悉皆成辦，一切世間工業明處，如其所欲悉能現行；乃至廣說隨於事物發起勝解，如所欲爲皆成無異。如住品說。（陵本四十八卷十七頁³⁸⁶⁷）是名已得眾具自在菩薩。

如是菩薩不更希求如來出世。何以故？由此菩薩已得證入不退轉地，一切佛土往來供養皆無礙故。

地二、無財寶²。 玄一、廣大隨喜

又諸菩薩，若無自力所集財寶，亦無從他求得財寶，及無菩薩所獲眾具自在財寶，可設供養；然於所有或瞻部洲、或四大洲、或千世界、二千世界、或復三千大千世界，乃至十方無邊無際諸世界中，下中上品供養如來一切供具，菩薩於彼以淨信俱勝解俱心，周遍思惟，一切隨喜。

週遍思惟一切隨喜者：謂於十方世界一切如來作供養想，是名週遍思惟。

於彼一切有情，以其下中上品一切供具設供養者，深心慶悅，生大歡喜，是名一切隨喜。

玄二、恆當修學

如是菩薩少用功力，而興無邊廣大供養，攝受菩提廣大資糧。菩薩於此恆常無間起真善心、起歡喜心，當勤修學。

玄六、正行供養²。 天一、辨正行²。 地一、釋²。 玄一、舉修無量及諸想等

若諸菩薩，少時少時、須臾須臾，乃至下如穀牛乳頃，普於一切蠢動有情修習慈悲喜捨俱心，於一切行修無常想、無常苦想、苦無我想，於其涅槃修勝利想，於佛法僧、波羅蜜多修習隨念；少時少時、須臾須臾，於一切法發生少分下劣忍智，信解離言法性真如，起無分別無相心住；何況於此若過若增。

玄二、例餘守護及一切學

如是守護菩薩所受尸羅律儀，於奢摩他、毗鉢舍那菩提分法精勤修學，亦於

一切波羅蜜多及諸攝事正勤修學。

地二、結

是名菩薩於如來所正行供養。

天二、讚最勝

如是供養爲最第一、最上、最勝、最妙、無上。如是供養，過前所說具一切種財敬供養，百倍、千倍，乃至鄔波尼殺曇倍。

何況於此若過若增等者：前說修四無量、修種種想、修習隨念，起無相住，名於如來所正行供養。但唯少時少時、須臾須臾，尙爲第一、最上、最勝、最妙、無上，何況於此正行供養若過若增。

戌五、結

由此十相，應知是名具一切種供養如來。

酉二、例供法僧

如供養佛，如是供養若法、若僧，隨其所應，當知亦爾。

申二、總明意樂。³ 酉一、標

如是菩薩於三寶所，由十種相興供養時，應緣如來發起六種增上意樂。

酉二、列

一者、無上大功德田，增上意樂；

無上大功德田者：謂於三寶起隨念行，能生無上大功德故。

二者、無上有大恩德，增上意樂；

無上有大恩德者：謂念：諸佛菩薩爲我等故，行於無量難行苦行，爲說正法，能令證得一切義利，是名無上有大恩德。

三者、一切無足、二足及多足等有情中尊，增上意樂；

一切無足二足及多足等有情中尊者：攝異門分說：無足有情者，如蛇等。

二足有情者，謂人等。四足有情者，如牛等。多足有情者，如百足等。

（陵本八十三卷四頁⁶²⁸⁶）又復等言，等取有色、無色有情，有想、無想、

非有想非無想有情。如來於此一切有情三種第一，謂由蠢動故、由依止

故、由心故。亦如攝異門分說，是名一切有情中尊。

四者、猶如鄔曇妙華極難值遇，增上意樂；五者、獨一出現三千大千世界，增上意樂；六者、一切世出世間功德圓滿一切義依，增上意樂。

一切世出世間功德圓滿等者：攝異門分說：言第一者，於欲行善得圓滿故。所言尊者，於色行善得圓滿故。所言勝者，無色行善得圓滿故。所言上者，超過一切三界世間善圓滿故。言無上者，出世間善得圓滿故。（陵本八十三卷四頁⁶²⁸⁵）此說一切世出世間功德圓滿，義應準知。由是能作有情一切義利，是名一切義依。

酉三、結

由是六種增上意樂，於如來所，若於如來法所、僧所，少分思惟而興供養，尚獲無量大功德果，何況其多。

未二、親善友² 申一、總徵

復次，菩薩成就幾相，能為善友？由幾種相，善友不虛？成就幾相，令善友

性作信依處？復有幾種善友菩薩，於所化生為善友事？菩薩幾種親近善友？由幾種想，於善友所聽聞正法？由幾種處，於善友所聽聞法時，於說法師不作異意？

申二、別辨⁷ 酉一、眾相圓滿² 戌一、總標

當知菩薩成就八支，能為善友眾相圓滿。

戌二、列釋⁸ 亥一、住戒

一者、住戒。於諸菩薩律儀戒中妙善安住，無闕無穿。

亥二、多聞

二者、多聞。覺慧成就。

覺慧成就者：堪能簡擇俱生之慧，是名為覺。勤修習故，即於彼義轉更明了，是名為慧。由此覺慧，於善說法能善受持，言善通利、意善尋思、見善通達，是名覺慧成就。

亥三、具證

三者、具證。得修所成隨一勝善，逮奢摩他、毗鉢舍那。

得修所成隨一勝善等者：聲聞地說能有所證，即此具證。謂能證得勝無常想、無常苦想、苦無我想，乃至廣說能善爲他現三神變教授教誡。（陵本二十五卷一頁²⁰⁷¹）是名證得隨一勝善。如是勝善修所成故，由此說言逮奢摩他、毗鉢舍那。

亥四、哀愍

四者、哀愍。內具慈悲，能捨自己現法樂住，精勤無怠饒益於他。

能捨自己現法樂住者：謂爲利他，捨靜慮樂，故意思擇還生欲界故。

亥五、無畏

五者、無畏。爲他宣說正法教時，非由恐怖忘失念辯。

非由恐怖忘失念辯者：聲聞地說無有怖畏，即此無畏。由無畏故，於一法能正憶念，辯才無盡，故作是釋。

亥六、堪忍

六者、堪忍。於他輕笑、調弄、鄙言、違拒等事，非愛言語、種種惡行皆悉能忍。

亥七、無倦

七者、無倦。其力克彊，能多思擇，處在四衆說正法時，言無蹇澀，心不疲厭。

亥八、善辭

八者、善辭。語具圓滿，不壞法性，言辭辯了。

語具圓滿等者：謂若成就最上首語、極美妙語、甚顯了語、易悟解語、樂欲聞語、無違逆語、無所依語、無邊際語，如是名爲語具圓滿。如聲聞地說。（陵本二十五卷三頁²⁰⁷⁸）於實無事離增益執，於實有事離損減執，是名不壞法性。真實義品說二種人，於佛所說法毗奈耶，俱爲失壞。（陵本三十六卷十五頁²⁹⁷²）翻彼應知此所說義。語工圓滿，是名言辭辯了。謂由文句等相應，乃至常委分資糧故，能說正法，是名語工圓滿。如攝釋分別

釋應知。(陵本八十一卷三頁⁶¹⁷¹)

酉二、所作不虛。² 戌一、標

若諸菩薩具五種相，衆德相應，能爲善友所作不虛。

戌二、列

一者、於他先欲求作利益安樂；二者、於彼利益安樂如實了知，無顛倒覺；於彼利益安樂如實了知等者：自他利品中說：菩薩念與眾生有利益品所有安樂，終不念與無利益品所有安樂。菩薩於此無利益品所有安樂，以無倒慧如實了知。乃至廣說。(陵本三十五卷二十一頁²⁸⁹⁶)此應準知。

三者、於彼善權方便順儀說法，隨衆堪受調伏事中，有能有力；

順儀說法者：力種性品說：菩薩應當安住如法威儀而爲他說，非不安住如法威儀。不爲無病處高座者而說正法，不爲坐者立說正法，不應居後爲前行者而說正法，不爲覆頭而說正法。(陵本三十八卷十六頁³¹⁵¹)此應準知。

四者、饒益心無厭倦；五者、具足平等大悲，於諸有情劣中勝品心無偏黨。

酉三、作信依處。² 戌一、總標

若諸菩薩成就五相，令善友性作信依處，令他遠聞極生淨信，何況親視。

令善友性作信依處者：前說成就八支善友衆相圓滿，名善友性。聲聞地說：八因緣故，應知一切種圓滿善友性。(陵本二十五卷一頁²⁰⁶⁹)彼八因緣，即此八支。由是令他未信生信，已信增長，名信依處。

戌二、列釋。⁵ 亥一、勝妙

一者、勝妙。威儀圓滿、威儀寂靜、威儀具足，一切支分皆無躁動。

威儀圓滿等者：聲聞地說：於威儀路成就軌則，隨順世間，不越世間；隨順毗奈耶，不越毗奈耶。(陵本二十二卷三頁¹⁸⁹⁶)是名威儀圓滿。又說成就離欲者相，謂離欲者，身業安住，諸根無動，威儀進止無有躁擾，於一威儀能經時久，不多驚懼，終不數數易脫威儀。(陵本三十三卷二十頁²⁷²⁹)是名威儀寂靜。行時、住時身所作業正知而住，一切成辦無所減少，是名

威儀具足。聲聞地說：不應搖身、搖臂、搖頭、跳躑、攜手、叉腰、竦肩入施主家，不應輒坐所不許座，不應不審觀座而坐，不應放縱一切身分，不應翹足、不應交足、不太狹足、不太廣足，端嚴而坐。（陵本二十四卷十七頁²⁰⁵⁵）於此一切所不應行不起毀犯，是名一切支分皆無躁動。

亥二、敦肅

二者、敦肅。三業現行無掉無擾。

三業現行無掉無擾者：聲聞地說離欲者相，如次顯示身語意業無掉無擾。

（陵本三十三卷二十頁²⁷²⁹）此應準釋。

亥三、無矯

三者、無矯。不為誑他，故思詐現嚴整威儀。

亥四、無嫉²。天一、無不堪忍

四者、無嫉。終不於他說法所得利養恭敬生不堪忍，而常自勵請他說法；復恆勸餘於彼廣施利養恭敬，無諂僞心。

天二、倍生歡喜

又常於他其心純淨，見彼說法及得財敬，深生隨喜。如自所獲利養恭敬，心生歡喜，見他所得利養恭敬，其心歡喜復過於是。

亥五、儉約

五者、儉約。尠儲器物，隨得隨捨。

酉四、為善友事³。戌一、標

善友菩薩由五種相，於所化生為善友事。

戌二、列

一、能諫舉，二、能令憶，三、能教授，四、能教誡，五、能說法。

戌三、指

如是諸句廣辯應知如聲聞地。教授教誡，廣說如前力種性品。

如是諸句廣辯等者：聲聞地說：善能諫舉、善作憶念、善能教授、善能教誡、善說正法。與此正同，如彼廣辯應知。（陵本二十五卷三頁²⁰⁷⁸）又諸

菩薩教授有八，教誡有五，如前力種性品廣說應知。（陵本三十八卷二十頁³¹⁶⁶）

西五、親近善友² 戌一、標

當知菩薩由四種相，方得圓滿親近善友。

戌二、列

一、於善友有病無病隨時供侍，恆常發起愛敬淨信。二、於善友隨時敬問、禮拜、奉迎、合掌、殷勤，修和敬業而為供養。三、於善友如法衣服、飲食、臥具、病緣醫藥資身什物隨時供養。四、於善友若正依止，於如法義若合若離，隨自在轉，無有傾動，如實顯發，作奉教心，隨時往詣恭敬、承事、請問、聽受。

於如法義若合若離等者：謂以善友為正依止，於其教授教誡既聽受已，如其法義，若所開許、若所遮止，身語意業無倒隨轉，於所開許無倒修證，於所遮止無倒遠離，是名於如法義若合若離，隨自在轉。不為外道異論之

所引奪，是名無有傾動。若有違犯，發露悔滅，是名如實顯發。無惱亂心，唯欲求解，是名作奉教心。如攝異門分說。（陵本八十四卷四頁⁶³⁶²）

西六、聽聞正法² 戌一、總標

若諸菩薩欲聽法時，作五種想，應從善友聽聞正法。

戌二、列釋⁵ 亥一、作寶想

一、作寶想。難得義故。

亥二、作眼想

二、作眼想。能得廣大俱生妙慧因性義故。

能得廣大俱生妙慧因性義故者：此中妙慧，謂即大菩提果。能於一切所知如實覺了，是名廣大。於當來世，無師自然成等正覺，是名俱生。

亥三、作明想

三、作明想。已得廣大俱生慧眼，於一切種如實所知等照義故。

亥四、作大果勝功德想

四、作大果勝功德想。能得涅槃及三菩提無上妙跡因性義故。

能得涅槃及三菩提等者：此中涅槃，謂斷菩提。言三菩提者，此云正覺，謂智菩提。能得此果諸菩薩道，是名無上妙跡。

亥五、作無罪大適悅想

五、作無罪大適悅想。於現法中未得涅槃及三菩提，於法如實揀擇止觀無罪大樂因性義故。

於法如實簡擇止觀無罪大樂者：此說七聖財中，由慧聖財，於勝義諦如實覺悟所生之樂。由如是樂無量無邊，無有染汙，是故說名無罪大樂。

酉七、於說法師不作異意。³ 戌一、總標

若諸菩薩欲從善友聽聞法時，於說法師由五種處不作異意，以純淨心屬耳聽法。

戌二、列釋。⁵ 亥一、於壞戒

一、於壞戒不作異意。謂不作心：此是破戒，不住律儀，我今不應從彼聽法。

亥二、於壞族

二、於壞族不作異意。謂不作心：此是卑姓，我今不應從彼聽法。

亥三、於壞色

三、於壞色不作異意。謂不作心：此是醜陋，我今不應從彼聽法。

亥四、於壞文

四、於壞文不作異意。謂不作心：此於言辭不善藻飾，我今不應從彼聽法。但依於義，不應依文。

亥五、於壞美

五、於壞美不作異意。謂不作心：此語麤惡，多懷忿恚，不以美言宣說諸法，我今不應從彼聽法。

此語麤惡多懷忿恚者：有尋有伺地說：趣涅槃宮，故名先首。文句可味，故名美妙。善釋文句，故名分明。顯然有趣，故名易可解了。攝受正法，故名可施功勞。離愛味心之所發起，故名無所依止。不過度量，故名非可

厭逆。相續廣大，故名無邊無盡。與此相翻，名羸惡語。（陵本八卷十二頁600）此說羸惡，應準彼釋。於說法時，有所訶擯，是名多懷忿恚。

戌三、總辨²。亥一、出所應

如是菩薩欲聽法時，於是五處不應作意，但應恭敬攝受正法，於說法師未嘗見過。

亥二、斥不應

若有菩薩其慧微劣，於說法師心生嫌鄙，不欲從其聽聞正法，當知此行不求自利，退失勝慧。

未三、修無量⁴。申一、徵

云何菩薩修四無量慈、悲、喜、捨？

申二、標

謂諸菩薩略有三種修四無量。

申三、列

一者、有情緣無量，二者、法緣無量，三者、無緣無量。

申四、釋²。酉一、略辨四種²。戌一、釋³。亥一、標安立

若諸菩薩，於其三聚一切有情，安立以爲無苦無樂、有苦、有樂。

亥二、釋四相⁴。天一、慈無量²。地一、顯差別³。玄一、有情緣慈

於其最初欲求樂者，發起與樂增上意樂，普緣十方，安住無倒有情勝解，修慈俱心，當知是名有情緣慈。

安住無倒有情勝解者：謂於有情或爲親品、或爲怨品、或爲中品，平等發起利益意樂，於定地中安住勝解作意故。廣如聲聞地說。（陵本二十六卷二十二頁2239）

玄二、法緣慈

若諸菩薩，住唯法想增上意樂，正觀唯法假說有情，修慈俱心，當知即此名法緣慈。

玄三、無緣慈

若諸菩薩，復於諸法遠離分別，修慈俱心，當知即此名無緣慈。

地二、例餘三

如有情緣、法緣、無緣三慈差別，悲、喜、捨三，當知亦爾。

天二、悲無量

若諸菩薩，於有苦者，發起除苦增上意樂，普緣十方修悲俱心，是名爲悲。

天三、喜無量

若諸菩薩，於有樂者，發起隨喜增上意樂，普緣十方修喜俱心，是名爲喜。

天四、捨無量

若諸菩薩，即於如是無苦無樂、有苦、有樂三種有情，隨其次第，發起遠離癡瞋貪惑增上意樂，普緣十方修捨俱心，是名爲捨。

發起遠離癡瞋貪惑者：謂於無苦無樂有情，發起遠離癡惑意樂，由說不苦不樂受無明所隨增故。於有苦有情，發起遠離瞋惑意樂，由苦受中多生憎恚，說彼瞋所隨增故。於有樂有情，發起遠離貪惑意樂，由樂受中多生染

著，說彼貪所隨增故。

亥三、總料簡² 天一、共不共

此中菩薩慈等無量有情緣者，當知其相與外道共。若法緣者，當知其相與諸聲聞及獨覺共，不共外道。若無緣者，當知其相不共一切聲聞、獨覺，及諸外道。

天二、意樂攝

又諸菩薩三種無量，應知安樂意樂所攝，謂慈、悲、喜。一種無量，應知利益意樂所攝，是謂爲捨。

戌二、結

如是菩薩一切無量，名爲哀愍。以諸菩薩成就此故，名哀愍者。

酉二、廣悲無量³ 戌一、悲所緣² 亥一、百一十苦³ 天一、總標

此中菩薩，於有情界觀見一百一十種苦，於諸有情修悲無量。何等名爲百一十苦？

天二、別列² 地一、前五十五¹⁰ 玄一、一苦

謂有一苦。依無差別流轉之苦，一切有情無不皆墮流轉苦故。

玄二、二苦

復有二苦。一、欲爲根本苦。謂可愛事若變、若壞所生之苦。

欲爲根本苦等者：欲有二種。一者、煩惱欲，二者、事欲。由有煩惱欲故，彼諸事欲若變、若壞，便有憂歎苦熱惱生，名可愛事若變、若壞所生之苦，由是說欲爲根本苦。

二、癡異熟生苦。謂若猛利體受所觸，即於自體執我我所，愚癡迷悶，生極怨嗟。由是因緣，受二箭受，謂身箭受及心箭受。

癡異熟生苦等者：於異熟自體苦受生時，愚癡迷悶，生極怨嗟，是名癡異熟生苦。言受二箭受者，謂由猛利體受所觸爲其因緣，受身箭受；愚癡迷悶，生極怨嗟爲其因緣，受心箭受。攝異門分說：云何當觀苦受如箭？謂如毒箭，乃至現前常惱壞故。（陵本八十三卷十五頁⁶³²¹）有尋有

伺地說：不靜相故，遠所隨故，名爲箭。（陵本八卷六頁⁵⁶⁷）此中箭義，應如是知。

玄三、三苦

復有三苦。一、苦苦，二、行苦，三、壞苦。

玄四、四苦

復有四苦。一、別離苦，謂愛別離所生之苦。二、斷壞苦，謂由棄捨衆同分死所生之苦。三、相續苦，謂從此後，數數死生，展轉相續所生之苦。四、畢竟苦，謂定無有般涅槃法諸有情類五取蘊苦。

玄五、五苦

復有五苦。一、貪欲纏緣苦，二、瞋恚纏緣苦，三、憎沈睡眠纏緣苦，四、掉舉惡作纏緣苦，五、疑纏緣苦。

玄六、六苦

復有六苦。一、因苦，習惡趣因故。二、果苦，生諸惡趣故。三、求財位

苦。四、勤守護苦。五、無厭足苦。六、變壞苦。如是六種總說爲苦。

如是六種總說爲苦者：此中六苦，總相宣說，非依自相與餘苦別，故作是說。

玄七、七苦

復有七苦。一、生苦，二、老苦，三、病苦，四、死苦，五、怨憎會苦，六、愛別離苦，七、雖復希求而不得苦。

復有七苦等者：此說七苦，各由五相。如決擇分釋應知。（陵本六十一卷

十四頁
4933）

玄八、八苦

復有八苦。一、寒苦。二、熱苦。三、饑苦。四、渴苦。五、不自在苦。

六、自逼惱苦，謂無繫等諸外道類。七、他逼惱苦，謂遭遇他手塊等觸、蚊蟲等觸。八、一類威儀多時住苦。

不自在苦者：謂飲食等匱乏所作俱生之苦，不自在故。

玄九、九苦

復有九苦。一、自衰損苦，二、他衰損苦，三、親屬衰損苦，四、財位衰損苦，五、無病衰損苦，六、戒衰損苦，七、見衰損苦，八、現法苦，九、後法苦。

玄十、十苦

復有十苦。一、諸食資具匱乏苦，二、諸飲資具匱乏苦，三、騎乘資具匱乏苦，四、衣服資具匱乏苦，五、莊嚴資具匱乏苦，六、器物資具匱乏苦，七、香鬢塗飾資具匱乏苦，八、歌舞妓樂資具匱乏苦，九、照明資具匱乏苦，十、男女給侍資具匱乏苦。

地二、後五十五。² 玄一、總標列

當知復有餘九種苦。一、一切苦，二、廣大苦，三、一切門苦，四、邪行苦，五、流轉苦，六、不隨欲苦，七、違害苦，八、隨逐苦，九、一切種苦。

玄二、隨別廣。⁹ 黃一、一切苦

一切苦中，復有二苦。一、宿因所生苦，二、現緣所生苦。

黃二、廣大苦

廣大苦中，復有四苦。一、長時苦，二、猛利苦，三、雜類苦，四、無間苦。

黃三、一切門苦

一切門苦中，亦有四苦。一、那落迦苦，二、傍生苦，三、鬼世界苦，四、善趣所攝苦。

黃四、邪行苦

邪行苦中，復有五苦。一、於現法中犯觸於他，他不饒益所發起苦。

於現法中犯觸於他等者：謂若於他若罵、若瞋、若打、若弄，名犯觸他。由是他罵、他瞋、他打、他弄還報於自，是名他不饒益。

二、受用種種不平等食，界不平等所發起苦。

受用種種不平等食等者：謂食極少、或食極多、或食不宜、或食不消，是名不平等食。由是因緣，令身饑羸，或生疾病，是名界不平等。

三、即由現法苦所逼切，自然造作所發起苦。

即由現法苦所逼切等者：此如宿作因論者。謂現所受苦，皆由宿作爲因。於現法中極自苦行，是故彼苦名邪行苦。

四、由多安住非理作意，所受煩惱、隨煩惱纏所起諸苦。五、由多發起諸身語意種種惡行，所受當來諸惡趣苦。

黃五、流轉苦。² 字一、標列

流轉苦中，復有六種輪轉生死不定生苦。一、自身不定，二、父母不定，三、妻子不定，四、奴婢、僕使不定，五、朋友、宰官、親屬不定，六、財位不定。

字二、隨釋。³ 宙一、自身不定

自身不定者，謂先爲主，後爲僕隸。

宙二、父母不定

父母等不定者，謂先爲父母乃至親屬，後時輪轉，反作怨害及惡知識。

宙三、財位不定

財位不定者，謂先大富貴，後極貧賤。

黃六、不隨欲苦

不隨欲苦中，復有七苦。一、欲求長壽，不隨所欲，生短壽苦。二、欲求端正，不隨所欲，生醜陋苦。三、欲生上族，不隨所欲，生下族苦。四、欲求大富，不隨所欲，生貧窮苦。五、欲求大力，不隨所欲，生羸劣苦。六、欲求了知所知境界，不隨所欲，愚癡無智現行生苦。七、欲求勝他，不隨所欲，反爲他勝而生大苦。

黃七、違害苦

違害苦中，復有八苦。一、諸在家者，妻子等事損減生苦。

妻子等事損減生苦者：此即親屬衰損苦、財位衰損苦應知。

二、諸出家者，貪等煩惱增益生苦。

貪等煩惱增益生苦者：此即貪等五蓋，及與貪等八種尋思應知。

三、饑餒逼惱之所生苦。四、怨敵逼惱之所生苦。五、曠野、險難、迫迤逼惱之所生苦。六、繫屬於他之所生苦。七、支節不具損惱生苦。八、殺縛、斫截、捶打、驅擯逼惱生苦。

黃八、隨逐苦³。字一、標

隨逐苦中，復有九苦。

字二、釋²。宙一、世法苦

依世八法，有八種苦。一、壞法壞時苦，二、盡法盡時苦，三、老法老時苦，四、病法病時苦，五、死法死時苦，六、無利苦，七、無譽苦，八、有譏苦。是名八苦。

宙二、希求苦

九、希求苦。

字三、結

如是總說名隨逐苦。

黃九、一切種苦。³ 字一、標

一切種苦中，復有十苦。

字二、釋² 宙一、五樂所治苦

謂如前說五樂所治有五種苦。一、因苦，二、受苦，三、唯無樂苦，四、受不斷苦，五、出離、遠離、寂靜、菩提樂所對治，家、欲界結、尋、異生苦。是名五苦。

前說五樂所治等者：自他利品中說：菩薩安樂種類自利利他，略說應知五樂所攝。一者、因樂，二者、受樂，三者、苦對治樂，四者、受斷樂，五者、無惱害樂。（陵本三十五卷十九頁²⁸⁹¹）今說彼五所治，有五種苦。言因苦者，謂是苦因說名為苦，此為因樂之所對治。言受苦者，即苦自性說名為苦，此為受樂之所對治。唯無樂苦者，謂由寒熱、饑渴等苦正現現時，名之為苦，此為苦對治樂之所對治。受不斷苦者，謂除滅想受定，於

餘一切受不斷位說名為苦，由依勝義，諸所有受皆說為苦故，此為受斷樂之所對治。無惱害樂復有四別，一、出離樂，二、遠離樂，三、寂靜樂，四、菩提樂。亦如自他利品中說。（陵本三十五卷二十頁²⁸⁹³）由出離樂，能治居家迫迕種種大苦。由遠離樂，能治欲界諸結之所生苦。由寂靜樂，能治欲、恚、害尋，及與出離、無恚、無害諸尋之所生苦。由菩提樂，能治異生流轉五趣之苦。如是故說五樂所治有五種苦。

宙二、逼迫等苦

復有五苦。一、逼迫苦，二、眾具匱乏苦，三、界不平等苦，四、所愛變壞苦，五、三界煩惱品麤重苦。是名五苦。

字三、結

前五此五，總十種苦，當知是名一切種苦。

天三、總結

前五十五，今五十五，總有一百一十種苦，是菩薩悲所緣境界。緣此境故，

諸菩薩悲生起、增長、修習圓滿。

生起增長修習圓滿者：悲若未生，能令生起；悲若已生，能令增長及修圓滿。

亥二、十九種苦² 天一、標

又諸菩薩於大苦蘊，緣十九苦，發起大悲。

天二、釋² 地一、出種類² 玄一、徵

何等名爲十九種苦？

玄二、列

一、愚癡異熟苦，二、行苦所攝苦，三、畢竟苦，四、因苦，五、生苦，六、自作逼惱苦，七、戒衰損苦，八、見衰損苦，九、宿因苦，十、廣大苦，十一、那落迦苦，十二、善趣所攝苦，十三、一切邪行所生苦，十四、一切流轉苦，十五、無智苦，十六、增長苦，十七、隨逐苦，十八、受苦，十九、羸重苦。

緣十九苦發起大悲等者：此十九苦，即前一百一十種苦所攝少分，隨應當知。由此苦境甚深、微細、難了，是故能發菩薩大悲。言無智苦者，謂即前說欲求了知所知境界，不隨所欲，愚癡無智現行生苦。言增長苦者，謂即前說諸出家者，貪等煩惱增益生苦。言羸重苦者，謂即前說三界煩惱品羸重苦。餘易可知。

地二、釋大悲² 玄一、總標

由四緣故，悲名大悲。

玄二、列釋⁴ 黃一、由緣甚深

一、緣甚深、微細、難了諸有情苦爲境生故。

甚深微細難了諸有情苦者：前說緣十九苦發起大悲，如是諸苦，說名甚深、微細、難了。

黃二、由長時習

二、於長時積習成故。謂諸菩薩，經於無量百千大劫積習所成。

黃三、由猛利作意

三、於所緣猛利作意而發起故。謂諸菩薩，由是作意悲所執持，為息有情眾苦因緣，尚能棄捨百千身命，況一身命及以資財。於一切種治罰大苦，為諸有情悉能堪忍。

黃四、由極清淨

四、極清淨故。謂諸菩薩已到究竟菩薩清淨，若諸如來已到佛地如來清淨。

戌二、悲修習⁴ 亥一、廣遍一切

又諸菩薩，由前所說百一十苦，於諸有情修悲心時，則為修習一切菩薩所有悲心。

亥二、能淨意樂

復能速證悲意樂淨，證入菩薩淨意樂地，於諸有情獲得菩薩極親厚心、極愛念心、欲作恩心、無厭倦心、代受苦心、調柔自在有堪能心。

亥三、超諸聲聞

諸聖聲聞，已得證入苦諦現觀，已到究竟，於苦深遠厭俱行心相續而轉，不如菩薩於諸有情悲前行心，正觀墮在百一十種極大苦蘊。

諸聖聲聞已得證入苦諦現觀等者：此中義顯，諸聖聲聞證苦現觀，或復已到究竟，唯為一身出離苦故，深心厭離純大苦蘊，不如菩薩普為一切有情出離苦故，以大悲心，正觀墮百一十種極大苦蘊。此能觀心，悲為上首，是名悲前行心。

亥四、攝諸善法

菩薩如是以所修悲熏修心故，於內外事，無有少分而不能捨；無戒律儀而不能學；無他怨害而不能忍；無有精進而不能起；無有靜慮而不能證；無有妙慧而不能入。是故如來，若有請問菩薩菩提誰所建立？皆正答言：菩薩菩提悲所建立。

戌三、悲勝利² 亥一、舉共德

如前所說一一無量，皆有無量菩薩如意圓德隨轉，皆能攝受無量愛果，皆無

量種一向妙善無罪隨轉。

皆有无量菩薩如意圓德隨轉者：此顯一一無量所修行相，勝解圓滿具足而住，故作是說。

亥二、顯差別² 天一、標

當知菩薩精勤修習如是無量，能得四種功德勝利。

天二、列

謂由修習此無量故，先得最勝現法樂住；攝受、增長無量最勝福德資糧；能於無上正等菩提意樂堅固；爲欲饒益諸有情故，於生死中，堪能忍受一切大苦。

本地分中菩薩地初持瑜伽處菩提分品第十七之一

寅三、能修學² 卯一、菩提分法（即菩提分品）³ 辰一、徵

云何菩薩菩提分法？

辰二、喩柁南標

喩柁南曰：

慚愧堅力持 無厭論世智 正依無礙解 資糧菩提分

止觀性巧便 陀羅尼正願 三摩地有三 法喩柁南四

辰三、長行釋¹⁵ 巳一、慚愧³ 午一、徵起

云何名爲菩薩慚愧？

午二、標列

當知慚愧略有二種。一者、自性，二者、依處。

午三、隨釋² 未一、自性² 申一、釋² 酉一、別辨相² 戌一、慚

言自性者，謂諸菩薩於罪現行，能正覺知我爲非法，內生羞恥，是名爲慚。

戌二、愧

即於其中能正覺知，於他敬畏，外生羞恥，是名爲愧。

酉二、明種性

菩薩羞恥，本性猛利，況復修習。

申二、結

如是應知名爲菩薩慚愧自性。

未二、依處³。申一、標

言依處者，略有四種。

申二、釋⁴。酉一、應作不作

若諸菩薩，於所應作不隨建立而生羞恥，當知是名第一依處。

於所應作不隨建立者：謂即不作應作。於所應作不爲隨順依處，不能引發後後諸勝善法，是名不隨建立。

酉二、作不應作

若諸菩薩，於不應作隨順建立而生羞恥，當知是名第二依處。

於不應作隨順建立者：謂即作不應作。於不應作爲隨順依處，引發後後勝不善法，是名隨順建立

酉三、於覆己惡

若諸菩薩，於覆己惡而生羞恥，當知是名第三依處。

酉四、於有惡作

若諸菩薩，於自所生惡作有依隨逐不捨而生羞恥，當知是名第四依處。

於自所生惡作有依等者：攝異門分說：言有依者，謂由四依，制立超越一切惡戒諸毀犯故。（陵本八十三卷七頁⁶²⁹⁵）於此有依若有毀犯，而生惡作，名自所生惡作有依。不能速疾如法悔除，是名隨逐不捨。

申三、結

如是應知名爲菩薩慚愧依處。

巳二、堅力持性³。午一、徵起

云何菩薩堅力持性？

午二、標列

當知此性略有二種。一者、自性，二者、依處。

午三、隨釋²。未一、自性²。申一、釋²。酉一、列種種

言自性者，謂能禁制染汙心性，不隨煩惱自在行性，堪忍苦性，種種衆多猛利怖畏雖現在前而正加行無傾動性。

謂能禁制染汙心性等者：種性品說：種性菩薩，乃至未爲白法相違四隨煩惱若具不具之所染汙，性與如是白法相應。若被染汙，如是白法皆不顯現。乃至廣說。何等名爲種性菩薩白法相違四隨煩惱？謂放逸者，由先串習諸煩惱故，性成猛利、長時煩惱，是名第一隨煩惱性。又愚癡者、不善巧者，依附惡友，是名第二隨煩惱性。又爲尊長、夫主、王賊及怨敵等所拘逼者，不得自在，其心迷亂，是名第三隨煩惱性。又資生具有匱乏者，顧戀身命，是名第四隨煩惱性。（陵本三十五卷七頁²⁸⁴⁵）此染汙心及與煩惱，應準彼釋。忍品中說：菩薩安受衆苦忍，名堪忍苦。怖畏有五，一、不活畏，二、惡名畏，三、死畏，四、惡趣畏，五、處衆怯畏，是名種種。即於種種復多差別，是名衆多。逼切身心，是名猛利。菩薩於此能正思擇，不由此緣精進懈廢，名正加行無有傾動。

酉二、明因緣

性勇相應，能正思擇，是故得成堅力持性。

申二、結

如是名爲堅力持性自性。

性勇相應等者：成就精進波羅蜜多種性相，是名性勇相應。成就慧波羅蜜多種性相，是名能正思擇。

未二、依處。³ 申一、標

如是菩薩堅力持性，略說應知有五依處。

申二、列

一者、會遇生死輪轉種種大苦所化有情種種邪行；二者、爲益諸有情故，誓受長時生死流轉；三者、遭遇異論朋黨諍競難詰，及處大衆宣揚法義；四者、誓受一切菩薩所應學處；五者、聽聞廣大甚深難思議法。

申三、結

是名堅力持性依處。

巳三、心無厭倦³。午一、徵

云何菩薩心無厭倦？

午二、標

當知菩薩由五因緣，普於一切正加行中，心無厭倦。

午三、列⁵。未一、由性有力

一者、菩薩性自有力，故無厭倦。

菩薩性自有力者：此說精進種性力應知。

未二、由數串習

二者、菩薩即於如是無厭倦心數數串習，故無厭倦。

未三、由勤精進

三者、菩薩方便攝受精進勇猛，能正隨觀前後所得展轉殊勝，故無厭倦。

能正隨觀前後所得展轉殊勝者：此即攝受精進勇猛方便。由觀前後所證差

別展轉殊勝，令心欣樂，勇猛精進故。

未四、由正思擇

四者、菩薩成就猛利增上妙慧正思擇力，故無厭倦。

未五、由猛利悲

五者、菩薩於諸有情猛利悲心、極哀愍心恆常現前，故無厭倦。

巳四、善知諸論²。午一、徵

云何菩薩善知諸論？

午二、釋²。未一、由聞思

謂諸菩薩，於五明處名句文身相應諸法，從他善受，言善通利。

言善通利者：謂大音聲若讀、若誦。如聲聞地說應知。（陵本二十四卷十

四頁²⁰⁴⁵）

即於如是諸法妙義，或從他所善聽善決，或自專精善擇善思，如是知法知義菩薩，於法於義爲不忘失，恆常精勤，不捨加行。

於法於義爲不忘失等者：能正憶念，名不忘失。於聞於思長時串習，是名不捨加行。

未二、由淨信

又爲了知所餘新新後後法義殊勝差別，雖復聞思已到究竟，而由此故漸次成熟，於此法義獲得淨信。由是行相，當知菩薩知諸論智無量圓滿、無有顛倒。

又爲了知所餘新新後後法義等者：修相所攝，是名所餘，望前聞思名所餘故。於修相中，觀察法義展轉殊勝，是名新新後後法義殊勝差別。菩薩爲欲了知此故，雖如前說，言善通利，聞已究竟；或復善能決擇，思已究竟；不於聞思而生喜足，由此修相，能證新新後後法義殊勝差別，漸次能令智慧成熟。於此法義證澄清性，是名淨信；當知此信，證淨所攝。

巳五、善知世間² 午一、徵

云何菩薩善知世間？

午二、釋² 未一、顯差別² 申一、如所應知² 酉一、別辨相⁴ 戌一、有情世間²
亥一、辨所知² 天一、艱險愚闇² 地一、標

謂諸菩薩，普於一切有情世間，如實了知如是世間極爲艱險，甚爲愚闇。

地二、釋

所謂雖有生老及死，數數死生，而諸有情於老死等上昇、出離不如實知。

如是世間極爲艱險等者：謂諸有情生老及死，數數死生，名極艱險。於老死等上昇、出離不如實知，名甚愚闇。言上昇者，謂依世間道趣生上界地故。言出離者，謂依出世間道出離一切界地故。

天二、有濁無濁² 地一、標列

又諸菩薩，如實了知有情世間，有諸穢濁，濁世增時；無諸穢濁，濁世減時。謂依五濁。一者、壽濁，二者、有情濁，三者、煩惱濁，四者、見濁，五者、劫濁。

地二、隨釋⁵ 玄一、壽濁

如於今時人壽短促，極長壽者不過百年，昔時不爾。是名壽濁。

玄二、有情濁

如於今時，有情多分不識父母，不識沙門、若婆羅門，不識家長可尊敬者、作義利者、作所作者，

作義利者等者：謂若教利益者、教安樂者、引利益者、引安樂者，是名作義利者。隨所生起諸事務中而為助伴，是名作所作者。

於今世罪及後世罪不見怖畏，不修惠施、不作福業、不受齋法、不受淨戒，昔時不爾。是名有情濁。

不修惠施等者：為莊嚴心、為助伴心、為資瑜伽、為得上義而行布施，名修惠施。造作能感欲界可愛生業，名作福業。受學近住律儀，名受齋法。受學苾芻、近事律儀，名受淨戒。翻彼應知此所說義。

玄三、煩惱濁

如於今時，有情多分習非法貪、不平等貪，執持刀劍、執持器仗，鬥訟諍

競，多行諂誑詐偽妄語，攝受邪法，有無量種惡不善法現可了知，昔時不爾。是名煩惱濁。

有情多分習非法貪等者：攝事分說：於諸惡行深生耽著，名非法貪。（陵本八十九卷八頁⁶⁷⁴⁴）即由此貪，不能令意正行善捨、無記捨中，是名不平等貪。言執持刀劍等者，此顯身不善業。言鬥訟諍競等者，此顯語不善業。言攝受邪法者，此顯意不善業。如是一切惡不善業，及能起彼所有煩惱差別無量，總說名無量種惡不善法。

玄四、見濁

如於今時，有情多分為壞正法、為滅正法，造立衆多像似正法，虛妄推求邪法邪義以為先故，昔時不爾。是名見濁。

造立衆多像似正法者：攝事分說：若於非法生是法想，顯示非法以為是法，令他於中生正法想，如是法教實故、諦故，非是正法，而復像似正法顯現，是故名為似教正法。乃至廣說有多差別。（陵本九十九卷十五

頁⁷⁴⁴⁴）此應準知。

玄五、劫濁

如於今時，漸次趣入饑饉中劫，現有衆多饑饉可得；漸次趣入疫病中劫，現有衆多疫病可得；漸次趣入刀兵中劫，現有衆多互相殘害刀兵可得；昔時不爾。是名劫濁。

亥二、結能知

是名菩薩如實了知有情世間。

戌二、器世間

又諸菩薩，如實了知諸器世間破壞成立，如器世間破壞成立差別而知。

如器世間破壞成立差別而知者：此如意地中說外分若壞若成應知。（陵本

二卷五頁¹²⁷）

戌三、八種觀相

又諸菩薩，於其世間，於世間集，於世間滅，於能往趣世間集行，於能往趣

世間滅行，

於其世間於世間集等者：此中世間，通說有情世間及器世間，如其次第四諦所顯。於道諦中，略復有二。一、世間道，名能往趣世間集行；二、出世道，名能往趣世間滅行。

於其世間愛味、過患及與出離皆如實知。

於其世間愛味過患等者：攝事分說：於諸行中觀察愛味時，能善通達諸行愛味所有自相。即於諸行觀察過患時，能善了知三受分位過患共相。謂於是中甚少愛味，多諸過患。如是了知愛味染著多諸過患共相應已，於所愛味一切行中，隨所生起欲貪煩惱，即能除遣、制伏、斷捨。（陵本八十五卷六頁⁶⁴³³）彼說諸行，即此世間，由說世間諸行攝故。彼說諸行愛味所有自相，當知即是欲貪煩惱。由於諸行觀察愛味、過患、出離，是故於彼皆如實知。

戌四、世間勝義³。 亥一、標言依

又諸菩薩，如實了知眼乃至意諸無色蘊，四大造色，成士夫身，唯有爾所假名人性。

亥二、釋假名。³ 天一、唯有想

於中所有想，或我、或有情，此唯有想。

天二、唯有自號言說

於中所有自號言說，我眼見色，廣說乃至我意知法，此亦唯有自號言說。

眼乃至意諸無色蘊等者：謂從眼識乃至意識，及彼相應心所有法，是名諸無色蘊。四大種色及所造色，是名色蘊。如是色無色蘊，假說以爲有情自體，是名成士夫身。

天三、唯有世俗言說

於中所有世俗語言，謂此長老有如是名、如是種類、如是族姓、如是飲食、如是領納若苦若樂、如是長壽、如是久住、如是盡其壽量邊際，此亦唯有世俗言說。

亥三、結能知

菩薩於此皆如實知。

於中所有世俗語言等者：謂於有情自體，假施設有八言說句，是名世俗語言。由此隨念六種略行。一者、呼召假名，二者、刹帝利等色類差別，三者、父母差別，四者、飲食方軌，五者、興盛衰損，六者、壽量差別。建立品中釋此差別應知。（陵本四十九卷二十頁³⁹⁶⁴）

酉二、結略義

由諸菩薩如實了知有情世間流轉差別、若器世間流轉差別、若八種相觀世間義、若諸世間所有勝義，是故說名善知世間。

申二、如所應轉。² 酉一、於身等業² 戌一、舉事² 亥一、別列相² 天一、由自

離慢³ 地一、見勝

復次，菩薩若見年德俱尊勝者，能正奉迎，敷座延坐，敬問、禮拜、合掌、殷勤，修和敬業。

地二、見等

若見年德俱相似者，能正問訊、酬對、歡慰，以軟美言共興談論，不依等慢而自格量。

不依等慢而自格量者：攝事分說：或復於等謂己爲等，令心高舉，故名爲慢。（陵本八十九卷七頁⁶⁷³⁹）此說等慢，其義應知。

地三、見劣

若見年德俱卑劣者，隨力隨能勸修勝德；顯實少德，覆實多過，終不舉發令其恥愧，亦不輕陵令心退沒；

顯實少德覆實多過等者：謂彼年德俱卑劣者，雖實少德，而能爲顯揚，終不輕陵令心退沒。雖實多過，而爲覆藏，終不舉發令其恥愧。

知有希求若財若法，終不背面，亦不輦蹙；不譏誤失，不懾退榮。

天二、由攝受他⁴ 地一、於現攝受³ 玄一、攝以財法

於是一切劣等勝品諸有情類，若見彼時，先意慰問，讚言善來，無倒安處，

能正隨力攝以財法。

玄二、不自高慢

雖處尊勝，而於有情終不乖戾，不自珍奇，亦不憍傲。

玄三、作諸饒益

所攝有情縱懷資給，有病無病，終不棄捐；

所攝有情縱懷資給者：此說菩薩如法御眾。以憐愍心現作饒益，於己以法所獲如法衣服、飲食、諸坐臥具、病緣醫藥資身什物，與眾同用故。

身業語業，無不隨順；

身業語業無不隨順者：此顯菩薩於有情心性好隨轉，故作是說。

若識不識，一切等心；爲友爲朋，無怨無隙。

地二、於作依怙

於無依怙一切有情，隨力隨能作依作怙。不託異門發他憂苦，令彼須臾住不安樂。

不託異門發他憂苦者：此顯不託餘緣。謂自不能相續饒益，方便發遣故。若有因緣須現談諶，稱理而爲，非不稱理。

地三、於恩親所

雖遇情交極相親密，年事斯等無乖隔者，亦不共談匪仁言論。

亦不共談匪仁言論者：此顯菩薩常說愛語應知。

地四、於怨謗所

終不於他久懷忿恨，設復暫起，不斥其諱。若復爲他身語訾辱，或善思擇、或依正法、或省己過而自開解，不譴於他。

亥二、顯應知

其心安靜而不輕躁，身語意業起必審詳。普能遠離十四垢業，藏隱六方，遠四惡友，攝四善友。

戌二、指說

如是一切，應知具如尸佉絡迦契經中說。

普能遠離十四垢業等者：契經中說：夫人以四事爲勞，當識知。何謂四？一、爲好殺生，二、爲好盜竊，三、爲姪邪行，四、爲喜妄語。又說：有四事或往惡道。何謂四？一、爲欲，二、爲怒，三、爲癡，四、爲畏。又說：有六患，消財入惡道，當識知。何謂六？一、爲嗜酒遊逸，二、爲不時入他房，三、爲博戲遊逸，四、爲大好伎樂，五、爲惡友，六、爲怠惰。今此總說十四垢業應知。契經又說：東面爲父母，師教宜南面，西面爲子婦，朋友位北面，奴客執事下，沙門梵志上。如彼長行廣釋其義。由有居士善生子拜謁六方，佛爲化導，故作如是密意宣說，是名藏隱六方。又四惡友、四善友，亦如經說，應知其相。彼經亦名佛說善生子經，佛爲彼說而得名故。

酉二、於現利事² 戌一、自利攝³ 亥一、平等養命

或爲現法利益事義財位相應，起策具足、守護具足，平等養命。

或爲現法利益事義等者：此說菩薩現法自利。自他利品中說：菩薩以如正

理工巧業處士夫作用積集財物，即於如是所積財物知量受用。（陵本三十卷六頁²⁹²¹）與此義同。

亥二、如法求財

於諸世間工巧業處皆得善巧，無諂無幻，性不誑他。

於諸世間工巧業處等者：此顯菩薩如現自利，能現利他，故作是說。

亥三、不毀犯戒

於罪現行深懷慚恥，正行具足，尊重正行、守護正行。

戌二、利他攝。亥一、不欺罔他

有所寄付，深可倚信；於他財物，無所規度；舉貸他物，終不違捍；分所共財，平等無矯；共知真寶，賣者不識，稱實酬價，無枉毫釐。

亥二、隨順世範

於世時務令儀軌範，爲益世間，辯正機捷。

亥三、爲作助伴

於所應作彼彼事中，他正來求，皆爲助伴；

於世時務令儀軌範等者：意地中說三種世事。一、語言談論，更相慶慰事；二、嫁娶賓主，更相飲噉事；三、於起作種種事中，更相營助事。

（陵本二卷十七頁¹⁶⁷）如是一切，名世時務。於所尊敬，應起奉迎，敷座延坐，敬問、禮拜、合掌、殷勤，修和敬業，是名令儀軌範。菩薩爲欲饒益他故，於此一切所應作事，言辭辯正，進止機捷。

敦質無動，不託餘緣；

敦質無動不託餘緣者：此顯於恩有情知恩知報。於彼來求，常行質直，不以諂誑而推謝之，故作是說。

善營事業，非爲不善。

亥四、以法治世

若爲帝王，以法治世，不以非法，不好責罰。

亥五、善御大眾

若御大衆，勸捨惡戒，令修善戒。

亥六、不誑惑他

成就八種賢聖語言。謂於所見，問答言見；於聞、覺、知，問答言知；於所不見，問答不見；於所不聞、不覺、不知，問答不知。

未二、結略義

菩薩成就如是等法，如其世間正所應知，如其世間正所應轉，於彼一切皆如實知，是故名爲善知世間。

如其世間正所應知等者：如說有情世間流轉差別，若器世間流轉差別、若八種相觀世間義、若諸世間所有勝義，是名正所應知。於勝等劣諸有情類，身語意業無倒隨轉，是名正所應轉。

瑜伽師地論科句披尋記卷第四十四

瑜伽師地論科句披尋記卷第四十五

彌勒菩薩說

唐三藏沙門玄奘奉詔譯

韓清淨科記

本地分中菩薩地初持瑜伽處菩提分品第十七之二

巳六、修正四依² 午一、徵

云何菩薩修正四依？

午二、釋² 未一、辨四相² 申一、辨⁴ 酉一、依義

謂諸菩薩爲求義故，從他聽法，不爲求世藻飾文辭。菩薩求義不爲求文而聽法時，雖遇常流言音說法，但依於義，恭敬聽受。

酉二、依法² 戌一、標簡

又諸菩薩如實了知闍說、大說；如實知己，以理爲依，不由耆長、衆所知識補特伽羅、若佛、若僧所說法故即便信受，是故不依補特伽羅。

如實了知闇說大說者：於聲聞乘不了義說，是名闇說。於大乘中了義宣說，是名大說。前說菩薩於法正思，如實了知默說、大說，譯文少別，然義實同。

戊二、釋依

如是菩薩以理爲依，補特伽羅非所依故，於真實義心不動搖，於正法中他緣匪奪。

於真實義心不動搖等者：於一切法離言自性，善正思惟、善正籌量、善正觀察。由是爲因，無惑無疑，遠離二路，逮得昇進，是名於真實義心不動搖。於佛善說法毗奈耶深生勝解，不爲外道異論之所引奪，是名於正法中他緣匪奪。

酉三、依了義經² 戌一、明不可引

又諸菩薩，於如來所深殖正信、深殖清淨，一向澄清；唯依如來了義經典，非不了義。了義經典爲所依故，於佛所說法毗奈耶不可引奪。

於如來所深殖正信等者：此顯菩薩已得證淨，故作是說。攝事分說：於能說者、於沙門義、於同法者、於能證得沙門助伴所有淨信，深固根本，於餘生中亦不可引。無虛誑故，名澄清性。（陵本九十八卷二十五頁⁷³⁹⁸）義應準知。

戊二、釋其所以

何以故？以佛所說不了義經，依種種門辯本性義，猶未決定，尙生疑惑，非了義故。若諸菩薩於了義經不決定者，於佛所說法毗奈耶猶可引奪。

依種種門辯本性義等者：謂所說法，或蘊相應、或界相應、或處相應、或緣起相應、或處非處相應、或念住相應，如是等類，名依種種門辯本性義。於如是法，或時說有、或時說空，是名猶未決定，尙生疑惑，非如了義經說非有空故。

酉四、依眞證智² 戌一、標簡

又諸菩薩，於眞證智見爲眞實，非於聞思但識法義非眞證智。

戌二、釋依

是諸菩薩如實了知修所成智所應知者，非唯聞思所成諸識所能了達。如實知已，聞如來說最極甚深所有法義，終不誹毀。

申二、結

是名菩薩修正四依。

未二、攝要義² 申一、略顯四量

依正四依善修習故，略顯四量。謂所說義、正理、大師、修所成慧真實證智。

略顯四量等者：謂義爲量，不依文故。正理爲量，不依補特伽羅故。大師爲量，不依非了義經故。修所成慧真實證智爲量，不依聞思但識法義故。

申二、明能出離

又諸菩薩一切四依爲所依止，精勤發起正加行故，於出要道明了開示，無有迷惑。

於出要道明了開示者：三摩呬多地說：六種順出離界，能超恚等諸過失

故，名爲出離。於出離時正可憑仗，故名爲依。（陵本十一卷十四頁906）

由是當知，此出要道，即彼六種順出離界。又彼地中亦說四依，與此少別，次第亦異，應勘彼知。

巳七、修四無礙² 午一、徵

云何菩薩所修菩薩四無礙解？

午二、釋² 未一、顯差別⁴ 申一、法無礙解

謂諸菩薩，於一切法一切異門，盡所有性、如所有性，依修所成無所滯礙無退轉智，是名菩薩法無礙解。

依修所成無所滯礙無退轉智者：此顯菩薩無礙解住，普於一切說法所作皆如實知。如住品說。（陵本四十八卷十八頁3871）

申二、義無礙解

又諸菩薩，於一切法一切異相，盡所有性、如所有性，依修所成無所滯礙無退轉智，是名菩薩義無礙解。

申三、辯無礙解

又諸菩薩，於一切法一切釋辭，盡所有性、如所有性，依修所成無所滯礙無退轉智，是名菩薩辭無礙解。

申四、辯無礙解

又諸菩薩，於一切法一切品別，盡所有性、如所有性，依修所成無所滯礙無退轉智，是名菩薩辯無礙解。

未二、明勝利² 申一、獲五善巧

若諸菩薩依是菩薩四無礙解，應知獲得無量最勝五處善巧。一、蘊善巧，二、界善巧，三、處善巧，四、緣起善巧，五、處非處善巧。

申二、覺諸法等

菩薩由此四種行相，於一切法自能妙善現正等覺，亦善爲他無倒開示。此上無有自能妙善現正等覺，況善爲他無倒開示。

於一切法自能妙善現正等覺者：此顯自能成熟佛法，到究竟地。增上意樂

善清淨故，是名妙善及現等覺。無上菩提，是名現正等覺。

巳八、菩提資糧³ 午一、徵起

云何菩薩菩提資糧？

午二、標列

當知如是菩提資糧略有二種。一者、福德資糧，二者、智慧資糧。

午三、略釋² 未一、指相

此二資糧廣分別義，如前所說自他利品，應知其相。

此二資糧廣分別義等者：自他利品中說：云何爲福？云何爲智？謂略說福，即是三種波羅蜜多。一、施波羅蜜多，二、戒波羅蜜多，三、忍波羅蜜多。智唯一種波羅蜜多。謂慧波羅蜜多。精進、靜慮波羅蜜多，應知通二分。一者、福分，二者、智分。乃至廣說。（陵本三十六卷五頁²⁹¹⁶）如是名二資糧廣分別義。

未二、辨品

又此福德、智慧資糧，菩薩於初無數大劫所修習者，應知名下；若於第二無數大劫所修習者，應知名中；若於第三無數大劫所修習者，應知名上。

巳九、修三十七菩提分法² 午一、徵

云何菩薩於三十七菩提分法精勤修習？

午二、釋² 未一、略顯² 申一、標不作證

謂諸菩薩，依止菩薩四無礙解，由善方便所攝妙智，於三十七菩提分法如實了知，而不作證。

由善方便所攝妙智等者：謂諸菩薩處於生死，彼彼生中修空勝解，善能成熟一切佛法及諸有情，是即能得無上正等菩提廣大方便，名善方便所攝妙智。義如真實義品中說。（陵本三十六卷十一頁²⁹⁴⁵）三十七菩提分法為遍知因，由是能得斷遍知果，是名作證。菩薩不爾，於其生死不斷生死，名於三十七菩提分法如實了知，而不作證。

申二、釋如實知

是諸菩薩，普於一切二乘理趣三十七種菩提分法皆如實知。謂於聲聞乘理趣及於大乘理趣三十七種菩提分法皆如實知。

未二、廣辨² 申一、於聲聞乘

於聲聞乘理趣三十七種菩提分法如實了知，如聲聞地，如前所說一切應知。

如聲聞地如前所說一切應知者：聲聞地說菩提分修，於三十七菩提分法廣釋修相應知。（陵本二十八卷十五頁²³⁷⁸）

申二、於菩薩乘² 酉一、徵

云何菩薩於大乘理趣三十七種菩提分法如實了知？

酉二、釋² 戌一、修念住等² 亥一、舉身念住² 天一、依勝義

謂諸菩薩，能於其身住循身觀，不於其身分別有性，亦不分別一切種類都無有性。又於其身遠離言說自性、法性如實了知，當知名依勝義理趣，能於其身住循身觀，修習念住。

不於其身分別有性等者：謂不如言分別有身自性，以彼假說自性無事無相

故。亦不分別一切都無所有，假說所依非都無故。如是於身遠離增益實無妄執，及離損減實有妄執，是名於身遠離言說自性、法性如實了知。

天二、依世俗

若諸菩薩隨順無量安立理趣妙智而轉，當知名依世俗理趣，能於其身住循身觀，修習念住。

亥二、例餘住等

如於其身住循身觀，修習念住，如是所餘一切念住、所餘一切菩提分法，當知亦爾。

當知名依世俗理趣者：世俗有三。一、世間世俗，二、道理世俗，三、證得世俗。世間世俗者，所謂安立宅舍、瓶盆、軍林、數等，又復安立我、有情等。道理世俗者，所謂安立蘊、界、處等。證得世俗者，所謂安立預流果等彼所依處。如決擇分說。（陵本六十四卷四頁⁵⁰⁸⁷）依此三種世俗理趣，說名隨順無量安立理趣。

戌二、緣諦修習² 亥一、依勝義

如是菩薩，於身等法不分別苦、不分別集、不分別此所作斷滅、不分別此得滅因道。又即於此遠離言說自性、法性，若苦法性、若集法性、若滅法性、若道法性，如實了知。當知名依勝義理趣，修菩提分爲所依止，緣諦修習。

亥二、依世俗

若諸菩薩隨順無量安立理趣妙智而轉，當知名依世俗理趣，緣諦修習。

巳十、修習止觀² 午一、別釋² 未一、自性² 申一、名止

此中菩薩即於諸法無所分別，當知名止。

申二、名觀

若於諸法勝義理趣如實眞智，及於無量安立理趣世俗妙智，當知名觀。

未二、差別² 申一、止³ 酉一、標

此中菩薩略有四行，當知名止。

酉二、列

一、勝義世俗智前行；

勝義世俗智前行者：此顯止行以毗鉢舍那而爲上首，故作是說。

二、勝義世俗智果；

勝義世俗智果者：此顯於所緣境精勤修習毗鉢舍那，而非一向。還捨觀相，復於所緣思惟止行，故作是說。由爾所時，於所緣境不捨、不取，此止行轉是彼觀果。

三、普於一切戲論想中無功用轉；四、即於如是離言唯事，由無有相無所分別，其心寂靜，趣向一切法平等性、一味實性。

西三、結

由此四行，是諸菩薩止道運轉，漸次乃至能證無上正等菩提智見圓滿。

申二、觀。酉一、標

此中菩薩略有四行，當知名觀。

酉二、列

謂即四行止道前行，

謂即四行止道前行者：此顯觀行以奢摩他而爲上首，故作是說。

於一切法遠離增益不正執邊，遠離損減不正執邊，及與隨順無量諸法，差別安立理趣妙觀。

酉三、結

由此四行，是諸菩薩觀道運轉，漸次乃至能證無上正等菩提智見圓滿。

午二、總結

是名略說菩薩止觀。

巳十一、方便善巧。午一、徵

云何菩薩方便善巧？

午二、標

當知略說有十二種。

午三、列

依內修證一切佛法，有其六種；依外成熟一切有情，亦有六種。

午四、釋² 未一、內證佛法。³ 申一、徵

云何依內修證一切佛法六種方便善巧？

申二、列

一者、菩薩於諸有情悲心俱行，願戀不捨；二者、菩薩於一切行如實遍知；於一切行如實遍知者：謂能了知若因、若果生死行故。

三者、菩薩恆於無上正等菩提所有妙智，深心欣樂；四者、菩薩願戀有情爲依止故，不捨生死；五者、菩薩於一切行如實遍知爲依止故，輪轉生死而心不染；六者、菩薩欣樂佛智爲依止故，熾然精進。

申三、結

當知是名菩薩依內修證一切佛法六種方便善巧。

未二、外熟有情。³ 申一、徵

云何依外成熟一切有情六種方便善巧？

申二、列

一者、菩薩方便善巧，能令有情以少善根感無量果；二者、菩薩方便善巧，能令有情少用功力，引攝廣大無量善根；三者、菩薩方便善巧，於佛聖教憎背有情，除其悲惱；四者、菩薩方便善巧，於佛聖教處中有情，令其趣入；五者、菩薩方便善巧，於佛聖教已趣入者，令其成熟；六者、菩薩方便善巧，於佛聖教已成熟者，令得解脫。

申三、辨。³ 酉一、令以少善感無量果。³ 戌一、徵

云何菩薩方便善巧，令諸有情以少善根感無量果？

戌二、釋

謂諸菩薩方便善巧，勸諸有情捨捨微劣物，乃至最下唯一麩團，施鄙穢田乃至蠢動傍生之類，作是施已，迴求無上正等菩提。

戌三、結

如是善根，物田雖下，由迴向力，感無量果。

施鄙穢田者：謂如下賤、貧窮、乏少財物飲食等諸有情類，名鄙穢田。

酉二、令以少力攝廣大善³。 戌一、徵

云何菩薩方便善巧，令諸有情以少功力，引攝廣大無量善根？

戌二、釋¹⁴。 亥一、說正齋戒

謂諸菩薩方便善巧，若有信解受邪齋戒，乃至一月都不食等諸有情類，爲說八支聖齋戒法，令其棄捨最極艱辛感非愛果受邪齋戒，勸令修學無極艱辛感大愛果受正齋戒。

爲說八支聖齋戒法者：一、離損害他命，二、離損壞他財，三、離非梵行，四、離妄語，五、離歌舞、伎樂、塗冠香鬢，六、離昇高大床，七、離非時飲食，八、離諸酒眾放逸處，是名八支聖齋戒法。爲欲勸彼有情修離惡行及離欲行而宣說故，此亦名爲近住律儀。義如決擇分說。（陵本五

十三卷七頁⁴²²⁸）

亥二、說中道行

若諸有情修自苦行，精勤無懈，起邪方便欲求解脫，爲說中道，令離二邊，使其趣入。

亥三、說正靜慮

若諸有情求欲生天，起邪方便，投巖、赴火、斷飲食等，爲其宣說無倒靜慮，令彼獲於現法樂住，逮得當來無諸艱苦、與喜樂俱生天勝果。

亥四、勸入聖教

若諸有情信婆羅門吠地迦咒，妄計精勤受持、讀誦得究竟淨，方便勸令於佛聖教受持、讀誦、思惟其義。

亥五、說甚深法

又正爲他如是如是宣揚開示如來所說甚深空性相應妙法，令彼發生勇決厭離猛利淨信。但由如是一剎那頃厭離淨信俱行善心，尙能攝受不可稱數廣大善根，況其相續。

亥六、勸行供養

又諸菩薩，世間所有種種上妙珍寶、香鬘、諸供養具，起淨信俱增上意樂，於佛法僧勝解供養，亦勸導他令行如是勝解供養。

亥七、勸喜供養

又於十方一切世界，一切供養佛法僧所，即以如是淨信俱行增上意樂，周匝普緣，深生隨喜，亦勸導他作是隨喜。

亥八、勸修六念

又諸菩薩，恆常修習念佛、念法，乃至念天，亦勸導他令修六念。

念佛念法乃至念天者：聞所成地說：於佛法僧隨念之行，名歸依隨念。於趣涅槃行、趣資財行、趣生天行隨念之行，名證隨念。（陵本十四卷二十頁¹²⁵⁵）是名隨念六行差別。由是能令心沒諸修行者，正策其心，令生歡喜，是故能攝廣大無量善根。

亥九、勸行意禮

又諸菩薩，意言分別禮佛法僧，乃至命終時無虛度，亦勸導他行此禮業。

意言分別禮佛法僧者：此說菩薩正行供養，義如供養親近無量品說應知。

（陵本四十四卷五頁³⁵⁵⁷）

亥十、勸喜福業

又諸菩薩，普於十方一切有情一切福業悉皆隨喜，亦勸導他作是隨喜。

亥十一、勸具悲願

又諸菩薩，普於十方一切有情，入廣大悲增上意樂，願以自身皆代彼受一切憂苦，亦勸導他興此悲願。

亥十二、勸悔所犯

又諸菩薩，過去現在一切誤失、一切違犯，以淨調柔愛樂隨順所學戒心，想對十方佛世尊所，至誠發露，悔往修來，亦勸導他令行是事。如是數數發露所犯，少用功力，一切業障皆得解脫。

亥十三、化攝福聚

又諸菩薩，已具神通得心自在，普於十方佛法僧所及有情處，化作衆多種種

化事，攝受無量大福德聚。

亥十四、勸修無量

又諸菩薩，恆常修習慈、悲、喜、捨，亦勸導他作此修習。

戌三、結

如是菩薩以少功力，引攝廣大無量善根諸勝妙果。

酉三、令除恚惱及趣入等⁴ 戌一、總徵

云何菩薩方便善巧，於佛聖教憎背有情，除其恚惱；處中住者，令其趣入；已趣入者，令其成熟；已成熟者，令得解脫？

戌二、標列

謂諸菩薩，爲欲成辦如是四種有情義利，當知略說復有六種方便善巧。一者、隨順會通方便善巧，二者、共立要契方便善巧，三者、異分意樂方便善巧，四者、逼迫所生方便善巧，五者、施恩報恩方便善巧，六者、究竟清淨方便善巧。

戌三、隨釋⁶。 亥一、隨順會通方便善巧³。 天一、徵

云何菩薩隨順會通方便善巧？

天二、釋²。 地一、隨順²。 玄一、爲說正法⁴。 黃一、先除恚惱

謂諸菩薩，於彼有情將爲說法，先當方便隨順現行軟美身語，亦復現行近施隨轉，除彼於己所生恚惱；彼恚惱除，便生愛敬。

黃二、次說正法

愛敬生已，於法起樂；然後爲其宣說正法。

亦復現行近施隨轉者：近謂親近。施謂布施。行如是事，隨彼心轉，是名現行近施隨轉。

所說正法，如其所宜，易入易解，應時漸次，無有顛倒，能引義利，堪任難擊。

所說正法如其所宜等者：謂所說法稱順眾會，名爲所宜。無亂無隱，是名易入易解。無間而說，是名應時漸次。隨順文句，或標、或釋、或廣

分別，是名無有顛倒。能生歡喜，是名能引義利。善釋妨難，是名堪任難擊。

黃三、漸令調伏

於彼有情調伏事中，成就最勝欲作饒益哀愍之心，爲現神通、記心、顯說如理正法。或勸請他，或爲化作種種衆多殊特化事，令彼有情皆悉調伏。

爲現神通記心顯說如理正法者：此顯三種神變教授，故作是說。謂神境神變、記說神變、教誡神變，如次應知。

黃四、令能受持

若引義利極略諸論，能爲廣辯；若引義利極廣諸論，能爲略說，令其受持。爲作憶念，施其問難。彼既於法能受能持，復進爲其廣開正義。

玄二、爲作教授教誡

又於趣入遍緣一切三摩地門，能爲隨順教授教誡，攝益有情令修利行。

又於趣入遍緣一切三摩地門等者：謂如有貪行者，令修不淨觀；有瞋行

者，令修慈愍觀；有癡行者，令修緣性緣起觀；有慢行者，令修界差別觀；有尋思行者，令修阿那波那念；如是名於趣入遍緣一切三摩地門，能爲隨順教授教誡。

地二、會通。³ 玄一、總標所爲

若諸有情，於佛所說甚深空性相應經典，不解如來密意義趣。於此經中，說一切法皆無自性、皆無有事、無生無滅，說一切法皆等虛空、皆如幻夢。彼聞是已，如其義趣不能解了，心生驚怖，誹謗如是一切經典，言非佛說。菩薩爲彼諸有情類，方便善巧如理會通，如是經中如來密意甚深義趣，如實和會，攝彼有情。

玄二、正會經義。² 黃一、會初說。³ 字一、無自性義

菩薩如是正會通時，爲彼說言：此經不說一切諸法都無所有，但說諸法所言自性都無所有。是故說言一切諸法皆無自性。

字二、無有事義

雖有一切所言說事，依止彼故諸言說轉，然彼所說可說自性，據第一義非其自性。是故說言一切諸法皆無有事。

字三、無生滅義

一切諸法所言自性，理既如是從本已來都無所有，當何所生、當何所滅。是故說言一切諸法無生無滅。

如實和會攝彼有情者：由彼有情不解義故，於佛聖教心生憎背，菩薩爲彼無倒宣說，義無乖諍，是名如實和會。由是能除彼有情類所有恚惱，令處中信，是名攝彼有情。

黃二、會後說²。字一、如虛空義²。宙一、舉虛空相²。洪一、容受

譬如空中有衆多色、色業可得，容受一切諸色、色業。

有衆多色色業可得等者：顯色、形色品類非一，名衆多色。表色動轉，是名色業。下皆準知。

謂虛空中，現有種種若往、若來、若住，起墮屈伸等事。

若往若來若住等者：此中種種，隨應配釋諸色、色業應知。

洪二、清淨

若於爾時，諸色、色業皆悉除遣；即於爾時，唯無色性清淨虛空其相顯現。

宙二、喻離言事²。洪一、言說所行

如是即於相似虛空離言說事，有其種種言說所作邪想分別隨戲論著，似色業轉。又即如是一切言說邪想分別隨戲論著似衆色業，皆是似空離言說事之容受。

相似虛空離言說事等者：此中以彼虛空，喻顯離言說事，是名相似虛空離言說事。以彼色業，喻顯邪想分別隨戲論著，是名似色業轉。復以虛空容受色業，喻顯離言說事爲分別戲論之所塗染，是名似空離言說事之所容受。

洪二、聖智所行

若時菩薩以妙聖智，遣除一切言說所起邪想分別隨戲論著；爾時菩薩最勝聖

者，以妙聖智證得諸法離言說事，唯有一切言說自性非性所顯，譬如虛空清淨相現。亦非過此有餘自性應更尋求。是故宣說一切諸法皆等虛空。

字二、如幻夢義² 宙一、釋² 洪一、舉如幻夢

又如幻夢，非如顯現如實是有，亦非一切幻夢形質都無所有。

洪二、喻一切法

如是諸法，非如愚夫言說串習勢力所現如實是有，亦非一切諸法勝義離言自性都無所有。

宙二、結

由此方便悟入道理，一切諸法非有非無，猶如幻夢，其性無二。是故宣說一切諸法皆如幻夢。

玄三、結顯正知

如是菩薩，普於一切諸法法界不取少分、不捨少分、不作損減、不作增益、無所失壞。若法實有，知爲實有；若法實無，知爲實無；如其所知，如是開

示。

天三、結

當知是名菩薩隨順會通方便善巧。

不取少分不捨少分等者：於實無事離有相取，是名不取少分。於實有事成無相取，是名不捨少分。不於實有起損減執，是名不作損減。不於實無起增益執，是名不作增益。遠離增減所有過失，是名無有失壞。真實義品廣顯彼失壞相應知。（陵本三十六卷十五頁²⁹⁷²）

亥二、共立要契方便善巧³ 天一、徵

云何菩薩共立要契方便善巧？

天二、釋⁶ 地一、於施資具

謂諸菩薩，若見有情求飲食等十資身具，即便共彼立要契言：汝等若能知父母恩，恭敬供養，及諸沙門婆羅門等，

及諸沙門婆羅門等者：等言，等取家長可尊敬者、作義利者、作所作者。

如前善知世間中說。（陵本四十四卷十八頁³⁶⁰⁰）
廣說如前，乃至若能受持淨戒；如是我當隨汝所欲，施飲食等諸資身具，如其不能，我不施汝。

廣說如前等者：有尋有伺地說：於今世、後世所作罪中，見大怖畏；行施作福，受齋持戒。（陵本五卷十五頁³⁸¹）此中廣說，如彼應知。

地二、於施田等及作助伴

如是菩薩，若見有情來求種種田事、宅事、諸闡闡事、王事、域事、財事、穀事，或有來求諸工業處及諸明處，或有來求共為朋友，或有來求共結婚媾，或有來求共作邑會，或有來求助營事業，菩薩共彼立要契言：汝等若能知父母恩，恭敬供養，如前廣說；如是我當施汝田宅，廣說乃至助營事業。

地三、於脫厄難

又諸菩薩，若見有情有諸愆犯，或被舉訟；或作種種不饒益事，為他所拘，將欲刑縛、斷截、搥打、毀辱、迫脅、驅擯、流移；或他所執，欲捶、縛、

賣。菩薩爾時隨能隨力立要契言：汝等若能知父母恩，恭敬供養，如前廣說；如是我當方便救汝，令脫斯難。

地四、於救怖畏

又諸菩薩，若見有情遭遇種種王賊、水火、人及非人、不活、惡名諸怖畏等，爾時菩薩立要契言：汝等若能知父母恩，恭敬供養，如前廣說；如是我當方便救汝，令免斯畏。

地五、於遂求願

又諸菩薩，若見有情欲所愛會，求非愛離，爾時菩薩立要契言：汝等若能知父母恩，恭敬供養，如前廣說；如是我當遂汝所願，令所愛會及非愛離。

地六、於救病苦

又諸菩薩，若見有情為疾所苦，立要契言：汝等若能知父母恩，恭敬供養，如前廣說；如是我當救汝病苦，令得安樂。

天三、結

彼諸有情，既爲菩薩如是立要，於諸善品速疾受學，於諸惡品速疾除斷，菩薩皆能遂其所願。當知是名菩薩共立要契方便善巧。

亥三、異分意樂方便善巧³。天一、徵

云何菩薩異分意樂方便善巧？

天二、釋²。地一、於立要契諸有情所²。玄一、別現異相²。黃一、不施所求

謂諸菩薩與諸有情立要契已，彼諸有情於上所說彼彼事中，不如所欲速疾修行，菩薩爾時於如上說彼所求事，皆不施與。唯爲利益彼有情故，非餘意樂而不施彼。

黃二、不救難等

如是於其諸厄難處、諸怖畏處、欲所愛會、求非愛離、病苦所惱諸有情類，權時棄捨。唯爲利益彼有情故，非異意樂而棄捨之、非異意樂而不救拔。

玄二、總明方便

如是菩薩，於諸有情方便現行剛捍業時，唯爲利益，非餘意樂。漸令餘時如

其所欲，斷除諸惡，修學諸善，是故方便權時棄捨。

地二、於先親厚諸有情所²。玄一、隨宜勸導

若諸有情於菩薩所，雖無所求，亦無衆難，廣說乃至無諸病苦，而與菩薩先爲親厚。菩薩於彼隨宜勸導，斷諸惡法，修諸善法。所謂令彼知父母恩，恭敬供養，廣說乃至於淨尸羅隨順受學。

玄二、現異分相

若彼有情雖蒙菩薩如是勸導，故肆輕躁而不奉行，菩薩爾時自現憤責，唯欲利益，非憤意樂。於諸所作悉現乖背，唯爲利益，非背意樂。或於一類，現於世間不饒益事，唯爲利益，非損意樂。

或於一類現於世間不饒益事等者：戒品中說：菩薩見有增上增上宰官，上品暴惡，於諸有情無有慈愍，專行逼惱。菩薩見已，起憐愍心，發生利益安樂意樂，隨力所能，若廢、若黜增上上位。由是因緣，於菩薩戒無所違犯，生多功德。又說：菩薩見劫盜賊奪他財物，若僧伽物、窣堵波物，取

多物已執爲己有，縱情受用。菩薩見已，起憐愍心，於彼有情發生利益安樂意樂，隨力所能，逼而奪取。（陵本四十一卷六頁³³⁵⁶）由是當知此所說義。

天三、結

如是菩薩，於諸有情現外所作，與內意樂相不同分；由是因緣，方便安處，令彼有情漸斷諸惡、漸修諸善。是故菩薩如是調伏有情方便，名爲菩薩異分意樂方便善巧。

亥四、逼迫所生方便善巧。³ 天一、徵

云何菩薩逼迫所生方便善巧？

天二、釋。² 地一、如應告誡

謂諸菩薩，或爲家主、或作國王，得增上力，於自親屬、於自臣民能正教誡。如應告言：諸我親屬、諸我臣民，若於父母不知恩報，廣說乃至毀犯戒者，我當斷其常所給賜衣服、飲食，或當捶罰，或我親屬當與乖離，或我臣

民當永驅擯。

地二、方便伺察

立一善巧機捷士夫，於彼事業常令伺察。

天三、結

由是因故，彼諸有情怖畏治罰，勤斷諸惡，勤修諸善。彼於修善雖無樂欲，由是方便，彊逼令修。是故名爲逼迫所生方便善巧。

亥五、施恩報恩方便善巧。³ 天一、徵

云何菩薩施恩報恩方便善巧？

天二、釋

謂諸菩薩，先於有情隨力多少施作恩惠；或施所須，或濟厄難，或除恐怖，或會所愛，或離非愛，或療病苦，令得安樂。彼諸有情深知恩惠，欲報德者，菩薩爾時勸令修善，以受報恩。告言：汝等非餘世財來相酬遺，爲大報恩；汝等若能知父母恩，恭敬供養，廣說乃至受持淨戒，如是乃名大報

恩德。

天三、結

菩薩如是於諸有情先施恩惠，勸讚修善名大報恩；由此方便，令他於善精勤修學。是故名爲施恩報恩方便善巧。

或施所須等者：此中種種，如前共立要契方便善巧中說。

亥六、究竟清淨方便善巧。³ 天一、徵

云何菩薩究竟清淨方便善巧？

天二、釋。⁶ 地一、現生觀史多天

謂諸菩薩，安住菩薩到究竟地，於菩薩道已善清淨，先現往生觀史多天衆同分中。無量有情如是念言：某名菩薩，今已生處觀史多天衆同分中，不久當下生贍部洲，證得無上正等菩提。願令我等當得值遇，非不值遇，隨是菩薩所生之處，願令我等亦當往生。如是爲令無量有情生正欲樂，爲多修習此欲樂故。

地二、現生王家出家

又是菩薩，從觀史多天衆中沒，來下人間，生於高貴、或族望家。所謂王家、若國師家。棄捨世間上妙欲樂，無所顧戀，清淨出家。令諸有情起尊敬故。

地三、現受難行苦行

又現誓受難行苦行。爲令信解苦行有情捨所樂故。

地四、現證無上菩提

又證無上正等菩提。令餘有情，於所同趣菩提解脫欣殊勝故。

地五、現待梵王請說

又證無上正等覺已，未爲有情即說正法，待梵天王躬來啓請。爲諸有情於正法所起尊敬故。作是念言：當所說法定應殊妙，故今梵王希望世尊說是法故，躬自來請。

地六、現以大悲觀察

又以佛眼觀察世間，勿使有情作如是謗；但由梵王躬來啓請，敬梵王故，宣說正法，非於有情自起悲心；乃是爲他之所激發，非自能了機宜可否。爲欲壞彼一類有情如是邪執，

又以佛眼觀察世間者：菩提品說：如來晝夜六時，晝三、夜三，常以佛眼觀察世間誰增、誰減，我應令誰未起善根而種善根，廣說乃至我應令誰建立最勝阿羅漢果。（陵本三十八卷三頁³¹⁰⁴）其義應知。

先以佛眼觀察世間，然後爲轉無上法輪，一切世間所未曾轉。

然後爲轉無上法輪者：攝事分說：由五種相轉法輪者，當知名爲善轉法輪。乃至廣說世尊轉所解法，置於阿若憍陳身中，此復隨轉置餘身中，彼復隨轉置餘身中。以是展轉、隨轉義故，說名爲輪。正見等法所成性故，說名法輪。（陵本九十五卷十頁⁷¹⁵²）其義應知。

如是更復宣說正法，制立學處。

天三、結

是名菩薩究竟清淨方便善巧。由此所說方便善巧，更無有餘方便善巧，在於此上若過若妙，是故說名究竟清淨。

宣說正法制立學處者：此中正法，謂即十二分教。學處，謂即三無漏學應知。

戊四、總結

如是菩薩所說六種若略若廣方便善巧，能除憎背聖教有情所有悲惱；處中住者，令其趣入；已趣入者，令其成熟；已成熟者，令得解脫。除此無有若過若增。

午五、結

是名菩薩方便善巧。

巳十二、妙陀羅尼⁴ 午一、徵

云何菩薩妙陀羅尼？

午二、標

當知如是妙陀羅尼略有四種。

午三、列

一者、法陀羅尼，二者、義陀羅尼，三者、咒陀羅尼，四者、能得菩薩忍陀羅尼。

午四、釋² 未一、別辨相⁴ 申一、法陀羅尼³ 酉一、徵

云何菩薩法陀羅尼？

酉二、釋

謂諸菩薩獲得如是念慧力持，由此力持，聞未曾聞，言未溫習、未善通利，名句文身之所攝錄，次第錯縱、次第結集無量經典，經無量時能持不忘。

酉三、結

是名菩薩法陀羅尼。

申二、義陀羅尼³ 酉一、徵

云何菩薩義陀羅尼？

酉二、釋² 戌一、指前說

謂如前說。

戌二、簡差別

此差別者，即於彼法無量義趣，心未溫習、未善通利，經無量時能持不忘。

酉三、結

是名菩薩義陀羅尼。

云何菩薩法陀羅尼等者：顯揚論說：若欲略說法陀羅尼相者，謂諸菩薩成就字類通達，於名句文身如意自在，得如是種類念持之力。由念力故，隨一字中，而能顯示、分別、開演一切種染淨之義。（顯揚論三卷五頁）此說法陀羅尼及與義陀羅尼，應準此釋。

申三、咒陀羅尼³ 酉一、徵

云何菩薩咒陀羅尼？

酉二、釋

謂諸菩薩獲得如是等持自在，由此自在加被能除有情災患諸咒章句，令彼章句悉皆神驗，第一神驗，無所唐捐，能除非一種種災患。

酉三、結

是名菩薩咒陀羅尼。

申四、能得菩薩忍陀羅尼。³ 酉一、徵

云何菩薩能得菩薩忍陀羅尼？

酉二、釋。³ 戌一、標能得因

謂諸菩薩成就自然堅固因行，具足妙慧。

成就自然堅固因行等者：此顯勝解行補特伽羅，於勝解行住中經初無數大劫修行圓滿，故作是說。攝大乘論頌云：清淨增上力，堅固心昇進，名菩薩初修，無數三大劫。世親釋云：堅固心昇進者，謂發牢固心，起增進行。牢固心者，應知所發大菩提心，諸惡友力不能令捨。增進行者，應知現在及生生中，善法常增，終無退減。（攝論世親釋七卷二十三頁）此說

成就自然堅固因行，義應準知。四如實智無闕現前，是名具足妙慧。

獨處空閑，寂無言說，曾無有物，見路而行。

獨處空閑等者：此中為顯得第一義，內心寂靜，是故作如是說。不樂雜住，居遠離處，是名獨處空閑。為除定難，不多言論，是名寂無言說。於求財者深修厭毀；於諸城邑交遊等處，了知其初、了知過患、了知出離，亦能了知趣出離行；如是能得內心寂靜。如思所成地說。（陵本十八卷十四頁¹⁵⁷⁵）由是此說曾無有物，見路而行。

知量而食，不雜穢食，一類而食。常極靜慮，於夜分中少眠多寤。於佛所說得菩薩忍諸咒章句，能諦思惟。

戌二、正顯通達。² 亥一、於咒章句。² 天一、舉其咒詞

其咒詞曰：

壹胝 密胝 吉胝毗 羸底_反理 鉢陀膩 莎訶

天二、通達咒義

即於如是咒章句義，審諦思惟、籌量、觀察。彼於如是咒章句義如是正行，不從他聞，自然通達；了知如是諸咒章句都無有義，是圓成實，但唯無義；如實了知此章句義，所謂無義。是故過此，不求餘義，齊此名爲妙善通達咒章句義。

亥二、於一切法。² 天一、標隨無義

彼於如是咒章句義正通達已，即隨此義，不從他聞，自正通達一切法義。

天二、釋離言性

謂於此義如是通達，一切言說所說諸法自性之義皆不成實，唯有諸法離言自性是自性義。彼於諸法此自性義正通達已，過此更無餘義可求。

如是諸咒章句都無有義等者：謂此章句都無有義可起分別，但唯無義即是彼句圓成實相，此約證成道理名圓成實。義如解深密經說。（五卷五頁）通達此故，隨順通達一切言說所說諸法自性之義皆不成實，唯有諸法離言自性是自性義；亦如諸咒章句都無有義，但唯無義是圓成實。

由於此義善通達故，獲得最勝廣大歡喜。

獲得最勝廣大歡喜者：此說證入極歡喜住應知。

戌三、明已得忍

由是菩薩得陀羅尼，當言已得此陀羅尼章句所立菩薩勝忍。得此忍故，是諸菩薩不久當得淨勝意樂，已依上品勝解行地勝忍而轉。

酉三、結

當知是名菩薩所有能得菩薩忍陀羅尼。

不久當得淨勝意樂等者：極歡喜住菩薩住時，一切勝解諸隨煩惱皆悉永斷，離隨煩惱淨勝解轉，即此名爲淨勝意樂。勝解行住菩薩，雖依上品勝解而轉，而未得名淨勝意樂。由是說言不久當得。

未二、總料簡。² 申一、所得差別。² 酉一、前三陀羅尼。² 戌一、舉法義二陀羅尼

此中菩薩法陀羅尼、義陀羅尼，若過第一無數大劫，已入清淨勝意樂地，所得決定堅住廣大。從此以下，或以願力、或依靜慮，雖有獲得，而不決定，

亦不堅住、亦不廣大。

或以願力等者：謂由願力，常值諸善知識，從他聽聞一切法義，名以願力。攝大乘論頌云：清淨增上力。此即彼一分攝，如世親釋應知。修習止觀，自正審思一切法義，名依靜慮。

戌二、例咒陀羅尼

如說法義二陀羅尼，咒陀羅尼，當知亦爾。

酉二、後一陀羅尼

能得菩薩忍陀羅尼，如前所釋，即如是得。

如前所釋即如是得者：通達諸法離言自性是自性義，過此更無餘義可求，是名如前所釋。由是菩薩得陀羅尼，當言已得此陀羅尼章句所立菩薩勝忍，是名即如是得。

申二、能得功德。³ 酉一、標

若諸菩薩具四功德，方獲如是諸陀羅尼，非隨闕一。

酉二、徵

何等名爲四種功德？

酉三、列

一者、於諸欲中，無所貪著。二者、於他勝事不生妒忌，不嫉他榮。三者、一切所求等施無悔。四者、於正法中，深生忻樂；忻樂法者，於菩薩藏及菩薩藏摩怛理迦深心愛樂。

於菩薩藏及菩薩藏摩怛理迦者：十二分教，方廣一分，名菩薩藏。即此論議，名菩薩藏摩怛理迦。

巳十三、所修正願⁴ 午一、徵

云何菩薩所修正願？

午二、標

當知此願略有五種。

午三、列

一者、發心願，二者、受生願，三者、所行願，四者、正願，五者、大願。
午四、釋⁵ 未一、發心願

若諸菩薩，於其無上正等菩提最初發心，是名發心願。

未二、受生願

若諸菩薩，願於當來往生隨順饒益有情諸善趣中，是名受生願。

未三、所行願

若諸菩薩，願能無倒思擇諸法，願於境界修無量等殊勝善法，是名所行願。

願能無倒思擇諸法等者：於一切法，信解離言法性真如，起無分別無相心住，是名無倒思擇諸法。普於一切蠢動有情修習慈悲喜捨俱心，於一切行修無常想、無常苦想、苦無我想，於其涅槃修勝利想，於佛法僧、波羅蜜多修習隨念，是名修無量等殊勝善法。

未四、正願

若諸菩薩，願於當來攝受一切菩薩善法，攝受一切所有功德，若總若別所有

正願，是名正願。

攝受一切菩薩善法等者：菩薩為欲熟自佛法，是故攝受一切菩薩善法。欲熟他有情，是故攝受一切所有功德。戒品中說攝受善法戒、饒益有情戒，如彼廣釋應知。

未五、大願² 申一、標

菩薩大願，當知即從正願所出。此復十種。

申二、釋¹⁰ 酉一、供養諸佛

若諸菩薩，願於當來以一切種上妙供具，供養無量無邊如來，當知是名第一大願。

酉二、護持正法

若諸菩薩，願於當來攝受防護諸佛世尊所有正法，傳持法眼令無斷壞，當知是名第二大願。

酉三、示現出世

若諸菩薩，願於當來從觀史多天宮降下，如前乃至入大涅槃，當知是名第三大願。

從觀史多天宮降下等者：此顯諸佛菩薩俱生威力，故作是說。威力品中廣釋其相應知。（陵本三十七卷十六頁³⁰⁶⁴）

酉四、攝受善法

若諸菩薩，願於當來行一切種菩薩正行，當知是名第四大願。

行一切種菩薩正行者：行品中說：菩薩始從勝解行地，乃至最後到究竟地，於此一切菩薩地中，當知略有四菩薩行。何等爲四？一者、波羅蜜多行，二者、菩提分法行，三者、神通行，四者、成熟有情行。（陵本四十九卷四頁³⁹¹⁷）此應準知。

酉五、成熟有情

若諸菩薩，願於當來普能成熟一切有情，當知是名第五大願。

普能成熟一切有情者：成熟品說：所成熟補特伽羅略有四種。一者、住聲聞種性，於聲聞乘應可成熟補特伽羅；二者、住獨覺種性，於獨覺乘應可成熟補特伽羅；三者、住佛種性，於無上乘應可成熟補特伽羅；四者、住無種性，於往善趣應可成熟補特伽羅。（陵本三十七卷二十頁³⁰⁷⁶）此應準知。

酉六、遍作佛事

若諸菩薩，願於當來一切世界皆能示現，當知是名第六大願。

一切世界皆能示現者：諸佛世尊有四種化，遍十方界功能無礙，是名一切世界皆能示現。四種化者，一、未成熟有情令成熟故，作菩薩行化。二、已成熟有情令解脫故，於三千大千世界百拘胝瞻部洲中，同於一時方便攝受如來之化。三、即爲彼所化有情作聲聞化。四、即爲彼所化有情作獨覺化。如決擇分說應知。（陵本七十四卷十一頁⁵⁷⁰⁶）

酉七、淨修佛土

若諸菩薩，願於當來普能淨修一切佛土，當知是名第七大願。

普能淨修一切佛土者：佛有三身，謂自性身、受用身、變化身。由是佛土亦有三別，謂法性土、受用土、變化土，是名一切佛土。

酉八、同趣大乘

若諸菩薩，願於當來一切菩薩，皆同一種意樂加行趣入大乘，當知是名第八大願。

酉九、功不唐捐

若諸菩薩，願於當來所有一切無倒加行皆不唐捐，當知是名第九大願。

酉十、速證菩提

若諸菩薩，願於當來速證無上正等菩提，當知是名第十大願。

巳十四、三三摩地² 午一、別辨相³ 未一、空三摩地³ 申一、徵

云何菩薩空三摩地？

申二、釋

謂諸菩薩觀一切事，遠離一切言說自性，唯有諸法離言自性，心正安住。

申三、結

是名菩薩空三摩地。

未二、無願三摩地³ 申一、徵

云何菩薩無願三摩地？

申二、釋

謂諸菩薩，即等隨觀離言自性所有諸事，由邪分別所起煩惱，及以衆苦所攝受故，皆爲無量過失所汙；於當來世不願爲先，心正安住。

申三、結

是名菩薩無願三摩地。

由邪分別所起煩惱等者：真實義品中說：又諸愚夫，由於如是所顯真如不了知故，從是因緣，八分別轉，能生三事，能起一切有情世間及器世間。

乃至廣說。（陵本三十六卷二十頁²⁹⁹¹）隨應當知此所說義。

未三、無相三摩地³ 申一、徵

云何菩薩無相三摩地？

申二、釋

謂諸菩薩，即正思惟離言自性所有諸事，一切分別戲論衆相永滅寂靜，如實了知，心正安住。

申三、結

是名菩薩無相三摩地。

午二、總料簡² 未一、明建立² 申一、問

問：何故唯立三三摩地，無過無增？

申二、答² 酉一、總標法

答：法有二種，謂有、非有。有爲、無爲名之爲有，我及我所名爲非有。

酉二、別配依³ 戌一、無願三摩地

於有爲中，有無願故，可厭逆故，當知依此建立無願三摩地。

戌二、無相三摩地

於無爲中，願涅槃故，正樂攝故，當知依此建立無相三摩地。

戌三、空三摩地

於非有事，菩薩不願，亦無無願。然於非有，菩薩如實見爲非有。依此見故，當知建立空三摩地。

未二、辨了知² 申一、於自乘

如是菩薩於此三種三摩地中精勤修學，於是建立如實了知。

申二、於餘乘

於餘行相三三摩地如實悟入，安立理趣如實悟入，修習理趣如實了知。謂於其中，諸聲聞衆精勤修學及圓滿證。

於餘行相三三摩地等者：諸聲聞衆所修所證三三摩地與菩薩別，名餘行相三三摩地。彼之行相、安立理趣、修習理趣，如三摩呬多地中廣釋其相，隨應當知。（陵本十二卷八頁⁹⁹⁷）

瑜伽師地論科句披尋記卷第四十五

瑜伽師地論科句披尋記卷第四十六

彌勒菩薩說

唐三藏沙門玄奘奉詔譯

韓清淨科記

本地分中菩薩地初持瑜伽處菩提分品第十七之三

已十五、四種法唄陀南⁴ 午一、標

復有四種法唄陀南，諸佛菩薩欲令有情清淨故說。

午二、徵

何等爲四？

午三、列

一切諸行皆是無常，是名第一法唄陀南。一切諸行皆悉是苦，是名第二法唄陀南。一切諸法皆無有我，是名第三法唄陀南。涅槃寂靜，是名第四法唄陀南。

午四、釋² 未一、名唄柁南³ 申一、第一義

諸佛菩薩多爲有情宣說如是法相應義，是故說名法唄柁南。

申二、第二義

又從曩昔，其心寂靜諸牟尼尊，於一切時展轉宣說，是故說此名唄柁南。

其心寂靜諸牟尼尊者：諸牟尼尊，一切煩惱戲論永滅，證大涅槃，是名其心寂靜。

申三、第三義

又此行跡能趣大生，亦復能趣出第一有，是故說此名唄柁南。

未二、辨四種法⁴ 申一、諸行無常³ 酉一、徵

云何菩薩等隨觀察一切諸行皆是無常？

酉二、釋² 戌一、以正觀察² 亥一、總觀無常² 天一、無性無常

謂諸菩薩，觀一切行言說自性，於一切時常無所有。如是諸行常不可得，故名無常。

天二、生滅無常

又即觀彼離言說事，由不了知彼真實故；無知爲因，生滅可得。如是諸行離言自性有生有滅，故名無常。

又即觀彼離言說事等者：諸有爲法離言自性，是名離言說事。由不了知此唯事故，起邪分別；由是因緣，墮諸世間生死相續，是名無知爲因，生滅可得。

亥二、別觀四相² 天一、依三世觀³ 地一、過去

又諸菩薩，觀過去行已生已滅，由彼諸行無因可得，亦無自性，是故觀彼因性、自性皆無所有。

觀過去行已生已滅等者：由已生故，因已受盡，是故說言無因可得。由已滅故，自性受用已盡，是故說言亦無自性。

地二、現在

觀現在行已生未滅，由彼諸行因不可得，已與果故；自性可得，猶未滅故；

是故觀彼自性是有，而無有因。

觀現在行已生未滅等者：由已生故，因已受用，是故說言因不可得。自性受用未盡，是故說言自性可得。

地三、未來

觀未來行未生未滅，由彼諸行有因可得，未與果故；無有自性，猶未生故；是故觀彼唯有因性，而無自性。

觀未來行未生未滅等者：由未生故，因未受用，是故說言有因可得。既未有生，亦未有滅，由此未滅自性未受，是故說言無有自性。

天二、依剎那觀² 地一、別辨相³ 玄一、標

菩薩如是見三世中分段諸行相續轉已，等隨觀見一一剎那有爲諸行，皆有三種有爲之相。於剎那後，復有第四有爲之相。

玄二、釋² 黃一、正觀四相

即於此中，前剎那行自性滅壞。無間非先諸行剎那自性生起，正觀爲生；諸

行生已，即時未壞，正觀爲住；此已生行，望前已滅諸行剎那自性別異，正觀爲老；從此諸行生剎那後，即此已生諸行剎那自性滅壞，正觀爲滅。

黃二、觀唯諸行

菩薩觀此已生剎那諸行自性，即是生住老之自性，不見生等別有自性。如實觀見生剎那後，即此生等諸行剎那自性滅壞，無別有性。

玄三、結

如是四種有爲之相，總攝諸行。

前剎那行自性滅壞等者：諸行生滅，唯一剎那，以彼纔生無間滅故。然於中間前後相續新新生起，愚夫不了，妄執實有生住異滅，或復妄執離諸行外別有自性。菩薩正觀則不如是。於此剎那行續前剎那生正觀爲生，由是了知生無常義。即此剎那生有諸行自性可得正觀爲住，由是了知住唯假說非實有義。若此剎那生望前剎那諸行自性變異正觀爲老，由是了知老觀待有假施設義。即此剎那生無間諸行自性滅正觀爲滅，由是了知滅無常義。

又復正觀生住老滅，唯是諸行分位差別，非離諸行別有自性。由是應知，諸佛菩薩唯於諸行說無常義。

地二、出要義² 玄一、標列

以要言之，二分所顯。一者、有分所顯，二者、無分所顯。

玄二、隨釋

此中世尊依於有分，建立一種有爲之相；依於無分，建立第二有爲之相。住、異二種，俱是諸行有分所顯，建立第三有爲之相。

建立第三有爲之相者：住、異二種總合爲一，建立第三有爲之相，以俱有分所顯故，由是應知餘處說三有爲相義。

戊二、決擇所觀² 玄一、依自他教² 天一、顯自³ 地一、標

此中菩薩，觀一切時唯有諸行，除此更無生住老滅恆有實物自性成就。

地二、徵

何以故？

地三、釋

諸行生時，唯即如是諸行可得，無別有餘生住老滅。如是諸行住老滅時，唯即如是諸行可得，無別有餘生住老滅。

諸行生時等者：雖諸行生生相可得，住老滅相亦復可得，然唯諸行自性所顯，是故說言唯即如是諸行可得。除此更無生住老滅恆有實物自性成就，是故說言無別有餘生住老滅。如說諸行生時理既如是，諸行住老滅時，當知亦爾。

天二、簡他² 地一、標義

又諸菩薩以理推求生等實物亦不可得。

地二、舉難² 玄一、略辨四相² 黃一、舉生相² 宇一、二生難

是推求不可得者，謂若離彼色等諸行別有生法，是即應如色等諸行自體有生，如是此生亦應有生。如是即應有二種生，一者、行生，二者、生生。
宇二、一異難

如是行生與彼生生爲一爲異？若言一者，計生實有即爲唐捐。言別有生是實物有，不應道理。若言異者，如是即應非行生生；是行生生，不應道理。

如是即應非行生生等者：謂若生相與行異者，是則生相應非從諸行生；然
是行生，故不應理。

黃二、例住等

如說生相，如是廣說住老滅相，當知亦爾。

玄二、別廣滅相³。黃一、標義

謂若滅法別有自性，是實成就；即應此滅有生有滅。

黃二、設難²。字一、有生難

若滅生時，一切諸行皆應同滅。如是即應少用功力，如入滅定，諸心心所一切皆滅。

字二、有滅難

若滅滅時，一切諸行雖皆已滅，復應還生，以滅無故。

黃三、結非

是故言滅有生有滅，不應道理。

亥二、依修厭等

又善男子、或善女人，於一切時恆有實物自性成就，觀爲假有，而能修厭、離欲、解脫，不應道理。與此相違，是應道理。

於一切時恆有實物自性成就等者：此說生住老滅應知。

酉三、結

由此行相，是諸菩薩如實了知一切諸行皆是無常。

申二、諸行皆苦³。酉一、標

又諸菩薩，觀無常行相續轉時，能爲三種苦所依止。

酉二、列

一者、行苦，二者、壞苦，三者、苦苦。

酉三、結

如是菩薩如實了知一切諸行皆悉是苦。

申三、諸法無我⁴ 酉一、標

又諸菩薩，如實了知有爲、無爲一切諸法二無我性。

酉二、列

一者、補特伽羅無我性，二者、法無我性。

酉三、釋² 戌一、補特伽羅無我性

於諸法中補特伽羅無我性者，謂非即有法，是真實有補特伽羅；亦非離有法，別有真實補特伽羅。

謂非即有法等者：有尋有伺地說：若即於蘊施設我者，是我與蘊無有差別；而計有我諦實常住，不應道理。又說：若蘊外餘處者，汝所計我應是無爲，不應道理。若不屬蘊者，我一切時應無染汙，又我與身不應相屬，此不應理。（陵本六卷十一頁436）由彼所破，應知此所說義。

戌二、法無我性

於諸法中法無我性者，謂於一切言說事中，一切言說自性諸法都無所有。

酉四、結

如是菩薩如實了知一切諸法皆無有我。

申四、涅槃寂靜² 酉一、標相² 戌一、於真實

又諸菩薩，觀一切行先因永斷，後無餘滅，其餘畢竟不起不生，說名涅槃。

當知涅槃其體寂靜，一切衆苦畢竟息故，一切煩惱究竟滅故。

戌二、於勝解

如是未得清淨增上意樂菩薩，未見聖諦諸聲聞乘，雖於涅槃發起勝解，如是說言涅槃寂靜；而於涅槃未如實解，未能如實正智見轉，然彼亦有如理作意。

酉二、舉喻² 戌一、車喻² 亥一、舉事³ 天一、第一時

譬如王子、或長者子，生育已來，未出王宮、長者內室；王及長者，各爲幼童假作種種諸戲樂具，鹿車、牛車、馬車、象車而賜與之。爾時王子及長者

子，用爲嬉戲，歡娛遊佚，即於如是假所造作鹿、牛、馬、象，發起真實鹿想、牛想、馬想、象想。

天二、第二時

後於一時，王及長者各知其子漸已長大，諸根成熟，讚說真實鹿、牛、馬、象。爾時王子及長者子聞父讚說，作是念言：今者父王及父長者，將非讚說我等所有鹿、牛、馬、象四種車耶？

天三、第三時

復於後時，王及長者知子轉大，從內宮室引出外遊，示其真實鹿、牛、馬、象。時彼見已，內自發生如實慧解，此爲實義鹿車、牛車、馬車、象車。父於長夜嘗爲我等讚說斯事，然唯我等以無智故，於不如實唯彼相似、唯彼影像發起真實鹿等勝解。由是因緣，於先勝解追起羞愧。

亥二、合法。³ 天一、於初所說

如是宮室，喻於生死。其所生育諸幼童子，喻未證得清淨增上意樂菩薩，及

未見諦諸聲聞乘。父喻諸佛及已證入大地菩薩。先爲假作鹿、牛等車，喻爲宣說涅槃麤相。

天二、於次所說

次爲讚說真實鹿等，喻佛菩薩自現證見真實涅槃，如其所見，於彼菩薩及聲聞前，讚說涅槃真實功德。所餘，喻彼既聞是已，但用隨順音聲覺慧，於涅槃德長夜勝解。

天三、於後所說

若於是時資糧成熟，漸次增長，成淨增上意樂菩薩、見諦聲聞，於眞涅槃生現證智；即於爾時發生自內如實慧解，如是涅槃，一切聲聞、獨覺所證，諸佛菩薩先所讚說，我等先以愚夫覺慧，於不如實唯彼相似、唯彼影像發起眞實涅槃勝解。由是因緣，於先勝解追生羞愧，依止於後如實勝解。

戌二、藥喻。² 亥一、出有病者。² 天一、舉喻。³ 地一、不了藥病

又如病者往大醫所，爲除病故，求隨順藥，得已常服。彼於是藥深生勝解、

深生愛樂、唯見爲實。由是因緣，先病除愈，復起餘病，應服餘藥。

先病除愈等者：此中先病，喻煩惱障。此除斷已，猶有所知障在，喻如餘病。應依大乘方能出離，由是喻言應服餘藥。

地二、不聽勸捨

爾時大醫知先病愈，後病復生，更須餘藥；勸捨前藥，令服餘藥。時彼病者愚癡無識，於前所服深生勝解，起所宜想，不肯棄捨。

地三、不信醫言

時大良醫爲其宣說前後藥性，於現所病前藥匪宜，後藥爲勝。時有病者雖聞是語，不生勝解，猶未深信良醫所言。

天二、合法

如是病者，喻諸凡夫菩薩、聲聞，爲煩惱病之所執持。

爲煩惱病之所執持者：法執無明，名煩惱病。能礙所知，名所執持。此中通說凡夫菩薩及不定性聲聞，於大菩提性有堪能，未斷彼障，故作是說。

大良醫者，喻諸如來。其良藥等，喻爲宣說若上上勝及以上極，若深深勝及以深極，若劣、若勝及以勝極，法教正教教授教誡。彼雖聞已，不能悟入，不生勝解，不能修行法隨法行。

若上上勝及以上極等者：十二分教，是名正教。於中方廣一分菩薩法教，唯爲菩薩發心者說。齊至第一無數大劫，望聲聞乘，名上、名深，上根攝故，難可知故。齊至第二無數大劫，說名上勝及以深勝。齊至第三無數大劫，說名上極及以深極。菩薩學處，依諸善友教授教誡。戒定慧三，如次說名若劣、若勝及以勝極。

亥二、結有淨信

諸有淨信菩薩、聲聞，於佛所說不生疑惑；

諸有淨信菩薩聲聞者：此中淨信，謂即淨信意樂應知。

乘佛所說喻如一切支具圓滿妙莊嚴車無上法乘，

一切支具圓滿妙莊嚴車無上法乘者：攝事分說：處所圓滿、教導圓滿、正

行圓滿、資糧圓滿爲所依止，應知建立人天四輪。乃至廣說如是四種天上諸天、人中諸人所有止觀勝妙車輪，隨有所闕，其車不轉。（陵本九十九卷二十一頁⁷⁴⁶⁰）此說一切支具圓滿妙莊嚴車，如彼四圓滿義應知。

如善御者，隨所行地、隨所應到，疾疾進趣，無所稽留。

隨所行地等者：菩薩行中安立十地，於地地中漸次進趣，乃至究竟，是名隨所行地、隨所應到。於其中間無有厭倦，不生喜足，是名疾疾進趣，無所稽留。

本地分中菩薩地初持瑜伽處菩薩功德品第十八

卯二、菩薩功德（即功德品）² 辰一、徵

云何菩薩所有功德？

辰二、釋⁴ 巳一、初唵柁南攝² 午一、唵柁南攝

唵柁南曰：

希奇不希奇 平等心饒益 報恩與欣讚 不虛加行性

午二、長行釋⁷ 未一、甚希奇法⁴ 申一、標

謂諸菩薩，於其無上正等覺乘勤修學時，應知有五甚希奇法。

申二、徵

何等爲五？

申三、列

一者、於諸有情非有因緣而生親愛；二者、唯爲饒益諸有情故，常處生死，忍無量苦；三者、於多煩惱難伏有情，善能解了調伏方便；四者、於極難解真實義理，能隨悟入；五者、具不思議大威神力。

申四、結

如是五種菩薩所有甚希奇法，不與一切餘有情共。

不與一切餘有情共者：除此菩薩，所餘一切若凡若聖諸有情類皆非共有，是故說名甚希奇法。

未二、不希奇法³ 申一、標

又諸菩薩成就五種不希奇法，而名成就甚希奇法。

申二、徵

何等爲五？

申三、釋⁵ 酉一、樂利他苦

謂諸菩薩，以因利他苦，即爲自己樂；是故菩薩恆遍受行因利他苦。是名菩薩成就第一不希奇法，而名成就甚希奇法。

以因利他苦者：謂諸菩薩修十一種利有情業，由彼所生種種憂苦，是名因利他苦。義如忍品中說。（陵本四十二卷十頁³⁴⁴⁵）

酉二、樂受生死

又諸菩薩，雖善了知生死過失、涅槃功德，而樂普令有情清淨，即爲己樂；是故菩薩爲淨有情增上力故，誓受生死。是名菩薩成就第二不希奇法，而名成就甚希奇法。

酉三、樂說正法

又諸菩薩，雖善了知默然樂味，而樂普令有情清淨，即爲己樂；是故菩薩爲淨有情增上力故，恆勤方便爲說正法。是名菩薩成就第三不希奇法，而名成就甚希奇法。

雖善了知默然樂味等者：此說無礙解住菩薩應知。謂於甚深寂靜解脫不生喜足入勝進故，於諸法中起智加行宣說法故。如住品說。（陵本四十八卷十九頁³⁸⁷¹）

酉四、樂行淨施

又諸菩薩，雖積集六波羅蜜多所有善根，而樂普令有情清淨，即爲己樂；是故菩薩爲淨有情增上力故，以淨意樂施諸有情，然不希求施果異熟。是名菩薩成就第四不希奇法，而名成就甚希奇法。

以淨意樂施諸有情者：迴向無上菩提意樂，名淨意樂。即以如是意樂行四攝事，令諸有情能種善根，是名施諸有情。

酉五、恆現利他

又諸菩薩，以利他事爲自利事；是故菩薩恆現受行一切有情利益之事。是名菩薩成就第五不希奇法，而名成就甚希奇法。

未三、其心平等⁴ 申一、標

又諸菩薩由五種相，當知普於一切有情其心平等。

申二、徵

何等爲五？

申三、列

一者、菩薩最初發心，願大菩提，如是亦爲利益一切諸有情故，起平等心。

菩薩最初發心等者：謂諸菩薩起正願心求菩提時，發如是心，說如是言：願我決定當證無上正等菩提，能作有情一切義利，畢竟安處究竟涅槃及以如來廣大智中。如發心品說。（陵本三十五卷九頁²⁸⁵¹）此即願自及他同證無上菩提，名平等心。

二者、菩薩於諸有情住哀愍俱平等之心。

於諸有情住哀愍俱平等之心者：此顯菩薩於其無苦無樂、有苦、有樂一切有情，修四無量慈、悲、喜、捨，故作是說。如供養親近無量品廣釋應知。（陵本四十四卷九頁³⁵⁷²）

三者、菩薩於諸有情，深心發起一子愛俱平等之心。四者、菩薩於從衆緣已生諸行，知是所想有情事已，知一有情所有法性，即是一切有情法性；以法平等俱行之心，於諸有情住平等心。

知一有情所有法性等者：有情法性，唯是諸行，此說菩薩法緣慈等無量應知。

五者、菩薩如於一有情行利益行，於一切有情行利益行，亦復如是。以利俱心，於諸有情住平等心。

於一有情行利益行等者：此說菩薩住慈愍觀，遍於親怨中三品一切有情，平等平等行利益行應知。

申四、結

由此五相，是諸菩薩於諸有情其心平等。

未四、能作饒益。³ 申一、標

又諸菩薩由五種相，於諸有情能作一切饒益之事。

申二、徵

何等爲五？

申三、列

一者、說授正命以爲饒益；

說授正命以爲饒益者：謂授淨戒，遠離非法貪求利養，以聖慧命清淨自活，名授正命。此有五種勝利之相，如有尋有伺地說。（陵本五卷

三頁325）

二者、於不隨順能引義利所作事業，說授隨順以爲饒益；三者、無依無怙、有苦有貧，善能爲彼作依怙等以爲饒益；四者、說授能往善趣之道以爲饒益；五者、說授三乘以爲饒益。

未五、現報他恩。³ 申一、標

又諸菩薩由五種相，於其有恩諸有情所現前酬報。

申二、徵

何等爲五？

申三、列

一者、安處有情，令學已德；

安處有情令學已德者：此顯菩薩同事攝事，故作是說。

二者、方便安處，令學他德；

方便安處令學他德者：謂彼有情若有聲聞、獨覺種姓，即於聲聞、獨覺乘中而正安處。若有如來種姓，即於無上正等菩提最上乘中而正安處故。

三者、無依無怙、有苦有貧，隨力隨能作依怙等；四者、勸令供養諸佛如來；五者、令於如來所說正法受持、讀誦、書寫、供養。

未六、常欣讚處。³ 申一、標

又諸菩薩，於五種處常當欣讚。

申二、徵

何等爲五？

申三、列

一者、值佛出世，常得承事；二者、於諸佛所，常聞六種波羅蜜多菩薩藏法；三者、於一切種成熟有情，常有勢力；

於一切種成熟有情等者：成熟方便有二十七，名一切種。由此方便，令諸有情六種成熟差別圓滿，名有勢力。成熟品中廣釋其相。（陵本三十七卷

二十一頁³⁰⁷⁹）

四者、能於無上正等菩提堪任速證；五者、證菩提已，諸弟子衆常和無諍。

未七、不虛加行³ 申一、標

又諸菩薩由五因緣，於諸有情能作不虛饒益加行。

申二、徵

何等爲五？

申三、列² 酉一、舉初二

謂諸菩薩，於諸有情先欲求作利益安樂，於諸有情利益安樂如實了知，無顛倒覺。

酉二、指餘三

如是一切，如前供養親近無量品中所說，應知其相。

能作不虛饒益加行等者：供養親近無量品說：若諸菩薩具五種相，眾德相應，能爲善友所作不虛。與此義同。此中且舉初二，略無後三，故指前說，應知其相。（陵本四十四卷七頁³⁵⁶⁴）

巳二、第二喞柁南攝² 午一、喞柁南攝

復次，喞柁南曰：

無顛倒加行 退墮與勝進 相似實功德 善調伏有情

午二、長行釋⁶ 未一、無倒加行⁵ 申一、標

謂諸菩薩有五加行，當知普攝一切菩薩無倒加行。

申二、徵

何等爲五？

申三、列

一、隨護加行，二、無罪加行，三、思擇力加行，四、清淨增上意樂加行，五、墮決定加行。

申四、釋⁵。酉一、隨護加行³。戌一、徵起

云何菩薩隨護加行？

戌二、略標

當知此復略有五種。

戌三、列釋⁵。亥一、隨護聰叡

一者、隨護聰叡。謂由俱生智速疾攝法。

隨護聰叡等者：聰明叡哲，是名聰叡。攝異門分說：言聰明者，謂與引發

慧相應故。言叡哲者，謂與俱生慧相應故。或復翻此。（陵本八十三卷六頁⁶²⁹²）今於此中，且約俱生慧相應，釋名聰叡，是故說言由俱生智速疾攝法。

亥二、隨護正念

二者、隨護正念。謂由此正念，隨所攝法持令不忘。

亥三、隨護正智

三者、隨護正智。謂由此正智，於所持法善觀察義，正慧通達。遠離隨順聰叡正念覺慧退分諸因緣故，習近隨順住分、勝分諸因緣故。

遠離隨順聰叡正念覺慧退分等者：謂由聰叡及與正念相應所有覺慧，說名聰叡正念覺慧。若有隨順彼慧退分因緣，由此正智能令遠離。若有隨順彼慧住分、勝分因緣，由此正智能令習近。此中退分及與勝分因緣，如下自說順退分法、順勝分法應知。

亥四、隨護自心

四者、隨護自心。能善防守諸根門故。

亥五、隨護他心

五者、隨護他心。能於他心正隨轉故。

酉二、無罪加行

云何菩薩無罪加行？謂諸菩薩，於諸善法無倒熾然，無量無間迴向菩提。

酉三、思擇力加行

云何菩薩思擇力加行？謂諸菩薩，即此一切在勝解行地，應知其相。

酉四、清淨增上意樂加行

云何菩薩清淨增上意樂加行？謂諸菩薩，即此一切在淨勝意樂地及行正行地，應知其相。

淨勝意樂地及行正行地者：極歡喜住，名淨勝意樂地；增上戒住、增上心住、三種增上慧住、有加行有功用無相住，名行正行地。如地品說。（陵

本四十九卷一頁³⁹¹⁰）

酉五、墮決定加行

云何菩薩墮決定加行？謂諸菩薩，即此一切在決定地、決定行地、到究竟地，應知其相。

決定地決定行地到究竟地者：無加行無功用無相住，名決定地，此地菩薩墮在第三決定中故；無礙解住，名決定行地；最上成滿菩薩住，名到究竟地。亦如地品中說。

申五、結

如是五種菩薩加行，普攝一切無倒加行。

未二、順退分法。³ 申一、標

諸菩薩順退分法，當知有五。

申二、徵

何等爲五？

申三、列

一者、不敬正法及說法師。二者、放逸懈怠。三者、於諸煩惱親近執著。四者、於諸惡行親近執著。五者、與餘菩薩校量勝劣，起增上慢；及於法顛倒，起增上慢。

未三、順勝分法。申一、標

又諸菩薩順勝分法，當知有五。

申二、徵

何等爲五？

申三、指

謂與前五黑品諸法次第相違，應知其相。

未四、相似功德。申一、標

又諸菩薩略有五種相似功德，當知實是菩薩過失。

申二、徵

何等爲五？

申三、列

一者、於其暴惡毀犯淨戒諸有情所，由是因緣作不饒益；

於其暴惡毀犯淨戒諸有情所等者：戒品中說：於諸暴惡犯戒有情，懷嫌恨心、懷恚惱心，由彼暴惡犯戒爲緣，方便棄捨，不作饒益，是名有犯，有所違越，是染違犯。（陵本四十一卷四頁³³⁴⁹）其義應知。

二者、詐現種種具足威儀；

詐現種種具足威儀者：謂爲誑他，恆常詐現諸根無掉、諸根無動、諸根寂靜，由是令他謂其有德，當有所施、當有所作。如聲聞地說應知。（陵本二十二卷十頁¹⁹¹⁹）

三者、於順世間文辭、咒術、外道書論相應法中，得預智者、聰叡者數；四者、修行有罪施等善行；五者、宣說建立像似正法，廣令流布。

未五、真實功德。申一、標

又諸菩薩略有五種真實功德。

申二、徵

何等爲五？

申三、列

一者、於其暴惡毀犯淨戒諸有情所，由是因緣起勝悲心；二者、本性成就具足威儀；三者、於佛所說淨妙真實若教若證，得預智者、聰叡者數；

於佛所說淨妙真實等者：聞所成地說：云何淨？謂三清淨性。一、自體清淨性，二、境界清淨性，三、分位清淨性。云何妙？謂佛法僧寶名最微妙，墮最第一施設中故。云何真實？謂真如及四聖諦。（陵本十三卷十七頁¹¹³⁹）此應準知。

四者、修行無罪施等善行；五者、開示正法，遮滅一切像似正法。

未六、無倒調伏所化有情。³ 申一、標

又諸菩薩略於十處，無倒調伏所化有情。

申二、徵

何等十處？

申三、列

一者、遠離惡行處；二者、遠離諸欲處；

遠離惡行處等者：施設遠離不善業道，是名遠離惡行處。施設遠離習非梵行及與歌舞、伎樂等事，是名遠離諸欲處。

三者、專精無犯，犯已能出處；四者、密護一切諸根門處；五者、正知住處；六者、離憤鬧處；七者、於遠離處，遠離一切惡尋思處；八者、遠離障處；

遠離障處者：障有二種，一者、依內，二者、依外。聲聞地中廣辯其相。（陵本二十五卷十頁²¹¹²）施設無障，是名遠離障處。

九者、遠離一切煩惱纏處；十者、遠離一切諸煩惱品諸麤重處。

已三、第三盟柁南攝² 午一、盟柁南標

復次，盟柁南曰：

諸菩薩受記 墮於決定中 定作常應作 最勝最爲後

午二、長行釋⁵。未一、授菩提記³。申一、標

謂諸菩薩略由六相，蒙諸如來於其無上正等菩提授與記別。

申二、徵

何等爲六？

申三、列

一者、安住種性未發心位；二者、已發心位；三者、現在前位；四者、不現前位；

現在前位等者：蒙諸如來親面對前而爲授記，是名現在前位。與此相違，是名不現前位。

五者、有定時限，謂爾所時當證無上正等菩提；六者、無定時限，謂不宣說決定時限，而與授記。

未二、墮決定數⁵。申一、標

又諸菩薩略有三種墮於決定。

申二、徵

何等爲三？

申三、列

一者、安住種性墮於決定，二者、發菩提心墮於決定，三者、不虛修行墮於決定。

申四、釋³。酉一、種性

安住種性墮決定者，謂諸菩薩住種性位，便名爲墮決定菩薩。何以故？由此菩薩若遇勝緣，必定堪任證於無上正等覺故。

酉二、發心

發菩提心墮決定者，謂有一類諸菩薩衆，已於無上正等菩提起決定心，此後乃至證於無上正等菩提，無復退轉。

發菩提心墮決定者等者：此中發菩提心，謂證法性發心，非依世俗發心。

顯揚論說：證法性發心者，謂如有一，已過第一劫阿僧企耶，已證菩薩初極喜地，已入菩薩定無生位，已如實知無上菩提及菩提方便，已悟自身將近、等近大菩提果，證解自他悉平等故，得大我意，已至不住流轉寂滅菩薩道故，得廣大意。由如是故，於大菩提願不退轉，是謂證法性發心。

（顯揚論二卷二十頁）此義正同。

酉三、修行

不虛修行墮決定者，謂諸菩薩已得自在，普於一切利有情行，如其所欲，隨所造修終無空過。

不虛修行墮決定者等者：此說決定地、決定行地，名墮決定。由決定地菩薩，蒙佛覺悟勸導，引發無量分身妙智，得十自在，是故此說已得自在。又決定行地菩薩，一切有情利益安樂意樂清淨，是故此說普利有情。

申五、結

於此三種墮決定中，依於最後墮決定位，諸佛如來授諸菩薩墮決定記。

未三、定所應作³。申一、標

又諸菩薩略有五處定所應作。若不作已，終不堪任證於無上正等菩提。

申二、徵

何等爲五？

申三、列

一者、發菩提心，

發菩提心者：此說菩薩最初發心。由此發心，爲諸菩薩行加行持。如種性品說應知。（陵本三十五卷一頁²⁸²⁶）

二者、於諸有情深生哀愍，

於諸有情深生哀愍者：此說菩薩修習大悲。由如來說菩薩菩提，悲所建立故。

三者、熾然精進，四者、於諸明處方便修習，五者、無有厭倦。

未四、常所應作⁴。申一、標

又諸菩薩於其五處常所應作。

申二、徵

何等爲五？

申三、列

一者、於不放逸常所應作；二者、無依無怙、有苦有貧諸有情所，常應爲作依怙等事；三者、於諸如來常應供養；四者、常應遍知有失、無失；

常應遍知有失無失者：謂諸菩薩，於攝善法戒勤修習時，略於六心應善觀察；及於饒益有情戒中，當正觀察六處攝行。決擇分中廣辯其相。（陵本

七十五卷一頁⁵⁷⁴⁶）有失、無失，如彼應知。

五者、一切所作若行、若住諸作意中，大菩提心恆爲導首。

申四、結

如是五種，是諸菩薩常所應作。

未五、建立最勝³。申一、標

又諸菩薩有十種法，一切菩薩許爲最勝，特爲第一，建立在於最上法中。

申二、徵

何等爲十？

申三、列¹⁰ 酉一、菩薩種性勝

一者、菩薩種性，諸種性中最爲殊勝；

酉二、最初發心勝

二者、最初發心，於諸正願最爲殊勝；

酉三、精進般若勝

三者、精進、般若，普於一切波羅蜜多最爲殊勝；

酉四、愛語攝事勝

四者、愛語攝事，於諸攝事最爲殊勝；

酉五、如來世尊勝

五者、如來世尊，於諸有情最爲殊勝；

酉六、悲無量定勝

六者、悲愍有情，於諸無量最爲殊勝；

酉七、第四靜慮勝

七者、第四靜慮，於諸靜慮最爲殊勝；

酉八、空三摩地勝

八者、空三摩地，於三等持最爲殊勝；

酉九、滅盡等至勝

九者、滅盡等至，於諸等至最爲殊勝；

酉十、清淨方便善巧勝

十者、如前所說所有清淨方便善巧，普於一切方便善巧最爲殊勝。

巳四、第四第五唵柁南攝² 午一、唵柁南攝

復次，唵柁南曰：

諸施設建立 一切法尋思 及如實遍智 如是諸無量

說法果勝利 大乘性與攝 菩薩十應知 建立諸名號

午二、長行釋。⁹ 未一、施設建立⁵。 申一、標

謂諸菩薩略有四種施設建立，唯有如來及諸菩薩能正施設、能正建立，非餘

一切若天、若人、若諸沙門、若婆羅門，唯除聞已。

申二、徵

何等爲四？

申三、列

一者、法施設建立，二者、諦施設建立，三者、理施設建立，四者、乘施設建立。

申四、釋⁴ 酉一、法施設建立

云何名法施設建立？謂佛所說素怛纜等十二分教，次第結集、次第安置、次第制立，是名爲法施設建立。

次第結集等者：名句文身無倒安立，是名次第結集。聞思修慧無倒成就，

是名次第安置。戒定慧學無倒依止，是名次第制立。

酉二、諦施設建立⁴ 戌一、徵

云何名諦施設建立？

戌二、標

謂無量種。

戌三、列¹⁰ 亥一、一諦

或立一諦。謂不虛妄義，唯有一諦，無第二故。

或立一諦等者：此說非安立諦應知。謂諸法真如名不虛妄義故。

亥二、二諦

或立二諦。一、世俗諦，二、勝義諦。

亥三、三諦

或立三諦。一、相諦，二、語諦，三、用諦。

或立三諦等者：大乘五事中，相即相諦，名即語諦，分別、正智即此用

諦。

亥四、四諦

或立四諦。一、苦諦，二、集諦，三、滅諦，四、道諦。

亥五、五諦

或立五諦。一、因諦，二、果諦，三、智諦，四、境諦，五、勝諦。

或立五諦等者：集諦、道諦，是名因諦。苦諦、滅諦，是名果諦。彼能知智，是名智諦。彼所知境，是名境諦。諸聖所證及其能證，是名勝諦。

亥六、六諦

或立六諦。一、諦諦，二、妄諦，三、應遍知諦，四、應永斷諦，五、應作證諦，六、應修習諦。

或立六諦等者：滅、道二諦，是名諦諦。苦、集二諦，是名妄諦。苦應遍知，是名應遍知諦。集應永斷，是名應永斷諦。滅應作證，是名應作證諦。道應修習，是名應修習諦。

亥七、七諦

或立七諦。一、愛味諦，二、過患諦，三、出離諦，四、法性諦，五、勝解諦，六、聖諦，七、非聖諦。

或立七諦等者：施設諸行雜染因緣，名愛味諦。施設諸行清淨因緣，名過患諦。諸行清淨，名出離諦。如實正知彼彼法性，名法性諦。於彼觀察而生勝解，名勝解諦。已見諦者，如其法性證無乖諍，是名聖諦。世間愚夫，於彼諸法覺無乖諍，名非聖諦。

亥八、八諦

或立八諦。一、行苦性諦，二、壞苦性諦，三、苦苦性諦，四、流轉諦，五、還滅諦，六、雜染諦，七、清淨諦，八、正加行諦。

或立八諦等者：前三可知。三苦爲依，流轉三界，名流轉諦。此永滅已，畢竟出離，名還滅諦。三苦流轉，名雜染諦。三苦還滅，名清淨諦。清淨方便，是名正加行諦。

亥九、九諦

或立九諦。一、無常諦，二、苦諦，三、空諦，四、無我諦，五、有愛諦，六、無有愛諦，七、彼斷方便諦，八、有餘依涅槃諦，九、無餘依涅槃諦。

有愛諦無有愛諦等者：求可愛生，造諸福行，名有愛諦。依無有愛，造諸福行、或不動行，是名無有愛諦。義如分別緣起初勝法門經說。斷彼有愛及無有愛二種無明決定勝道，名彼斷方便諦。

亥十、十諦

或立十諦。一、逼切苦諦，二、財位匱乏苦諦，三、界不平和苦諦，四、所愛變壞苦諦，五、羸重苦諦，六、業諦，七、煩惱諦，八、聽聞正法、如理作意諦，九、正見諦，十、正見果諦。

或立十諦等者：此約諸緣起支，中際生已，或趣流轉，或趣清淨究竟，是故建立成此十種。前之七種趣流轉攝，後之三種趣清淨攝。趣流轉中，前之五種，苦道所攝，皆名苦諦；第六，業道所攝，是名業諦；第七，煩惱

道攝，名煩惱諦。

戊四、結

如是等類，名菩薩諦施設建立，若廣分別當知無量。

酉三、理施設建立

云何名理施設建立？謂四道理。此廣分別如前應知。

謂四道理等者：一、觀待道理，二、作用道理，三、證成道理，四、法爾

道理，名四道理。此廣分別，如聲聞地應知。（陵本二十五卷九頁²¹⁰⁵）

酉四、乘施設建立² 戌一、徵

云何名乘施設建立？

戌二、釋² 亥一、略標

謂聲聞乘及獨覺乘、無上大乘。如是三種，一一各由七種行相施設建立，是名爲乘施設建立。

亥二、廣辨² 天一、聲聞等乘² 地一、舉聲聞乘

初聲聞乘七行相者，一、於四聖諦無顛倒慧，二、此慧所依，三、此慧所緣，四、此慧伴類，五、此慧作業，六、此慧資糧，七、此慧得果。當知由此七種行相施設建立，諸聲聞乘無不周備。

此慧所依此慧所緣等者：聲聞種姓，名慧所依。四聖諦教，名慧所緣。菩提分法，名慧伴類。斷諸煩惱，名慧作業。聽聞正法、思惟、修習，名慧資糧。四沙門果，名慧得果。

地二、例獨覺乘

如聲聞乘七種行相施設建立，其獨覺乘，當知亦爾。

天二、無上大乘

無上大乘七行相者，一、緣離言說事，一切法中所有眞如，無分別平等性出離慧；二、此慧所依；三、此慧所緣；四、此慧伴類；五、此慧作業；六、此慧資糧；七、此慧得果。當知由此七種行相施設建立，無上大乘無不周備。

緣離言說事等者：諸法無我，名一切法所有真如。性離言說，亦名離言說事。緣此所生法無我智，於一切法離言自性、假說自性，平等平等不起分別，從所知障而得解脫，名無分別平等性出離慧。大乘種姓，名慧所依。方廣法教，名慧所緣。諸覺分法，名慧伴類。能斷二障，名慧作業。多聞思修，名慧資糧。無上菩提，名慧得果。

申五、結

過去、未來、現在諸佛及諸菩薩所有無倒施設建立，若曾所作、若當所作、若今所作，一切皆由如是四事，除此無有若過若增。

未二、四尋思⁴ 申一、標

又諸菩薩爲得四種如實遍智，於一切法起四尋思。

申二、徵

何等爲四？

申三、列

一、名尋思，二、事尋思，三、自性假立尋思，四、差別假立尋思。

申四、指

如是四種若廣分別，應知如前真實義品。

未三、四如實智³ 申一、標

又諸菩薩略有四種，於一切法如實遍智。

申二、列

一、名尋思所引如實遍智，二、事尋思所引如實遍智，三、自性假立尋所引如實遍智，四、差別假立尋思所引如實遍智。

申三、指

如是四種若廣分別，應知如前真實義品。

未四、五無量⁵ 申一、標

又諸菩薩，於五無量能起一切善巧作用。

申二、徵

何等爲五？

申三、列

一、有情界無量，二、世界無量，三、法界無量，四、所調伏界無量，五、調伏方便界無量。

能起一切善巧作用者：成熟有情方便善巧總有六種，如前菩薩方便善巧中說，是名一切善巧作用。

申四、釋² 酉一、別辨相⁵ 戌一、有情界無量

云何有情界無量？謂六十二諸有情衆，名有情界。如前意地已具條列。若依相續，差別無邊。

如前意地已具條列等者：有情種類有六十二，此如意地中說。（陵本二卷十八頁¹⁶⁹）依有情身一一相續，應知彼彼差別無邊。

戌二、世界無量

云何世界無量？謂於十方無量世界、無量名號各各差別。如此世界名曰索

訶，此界梵王名索訶主。如是一切皆當了知。

戌三、法界無量

云何法界無量？謂善、不善、無記諸法，如是等類差別道理，應知無量。

戌四、所調伏界無量² 亥一、徵

云何所調伏界無量？

亥二、釋² 天一、列種類² 地一、列¹⁰ 玄一、一種

謂或有一種所調伏界。一切有情可調伏者，同一類故。
玄二、二種

或有二種所調伏界。一、具縛，二、不具縛。

具縛不具縛者：一切異生，是名具縛。從預流果乃至阿羅漢向有學聖者，名不具縛。如顯揚論說。（三卷十四頁）

玄三、三種

或有三種所調伏界。一、鈍根，二、中根，三、利根。

玄四、四種

或有四種所調伏界。一、剎帝利，二、婆羅門，三、吠舍，四、戍達羅。

玄五、五種

或有五種所調伏界。一、貪行，二、瞋行，三、癡行，四、慢行，五、尋思行。

五種所調伏界等者：此中五種補特伽羅，聲聞地中廣顯其相應知。（陵本二十六卷八頁₂₁₉₃）

玄六、六種

或有六種所調伏界。一、在家，二、出家，三、未成熟，四、已成熟，五、未解脫，六、已解脫。

在家出家等者：處家白衣受用五欲，營構俗業以自活命，是名在家。若持出家威儀相貌，棄捨俗境，受持禁戒，如法乞求，清淨自活，是名出家。如顯揚論說。（三卷十三頁）未得善根資心相續，不能現法證見諦理。不

得現法下中上乘所證寂滅，名未成熟。與此相違，名已成熟。亦如顯揚論說。（三卷十四頁）

玄七、七種₂ 黃一、總標列

或有七種所調伏界。一、輕毀，二、中庸，三、廣顯智，四、略開智，五、現所調伏，六、當所調伏，七、緣引調伏。

黃二、隨難釋

謂遇如是如是緣，即如是如是轉變。

輕毀中庸等者：於佛聖教憎背有情，是名輕毀。於佛聖教處中有情，是名中庸。若彼所化，廣說方解，名廣顯智。略聞即解，名略開智。

玄八、八種

或有八種所調伏界。謂八部衆，從剎帝利乃至梵衆。

玄九、九種

或有九種所調伏界。一、如來所化，二、聲聞、獨覺所化，三、菩薩所化。

如來所化等者：決擇分說有四種化。一、未成熟有情令成熟故，作菩薩行化。二、已成熟有情令解脫故，於三千大千世界百拘胝瞻部洲中，同於一時方便攝受如來之化。三、即為彼所化有情作聲聞化。四、即為彼所化有情作獨覺化。（陵本七十四卷十一頁⁵⁷⁰⁶）此說三種所化，準彼應知。

四、難調伏，五、易調伏，六、軟語調伏，七、訶擯調伏，八、遠調伏，九、近調伏。

遠調伏近調伏者：聲聞地說遠補特伽羅、近補特伽羅，如彼別釋應知。

（陵本二十一卷十四頁¹⁸⁵⁹）

玄十、十種

或有十種所調伏界。一、那落迦，二、傍生，三、琰摩世界，四、欲界天人，五、中有，六、有色，七、無色，八、有想，九、無想，十、非想非非想。

地二、結

如是略說品類差別有五十五，若依相續差別道理，當知無量。

天二、簡差別² 地一、問

問：有情界無量、所調伏界無量有何差別？

地二、答

答：一切有情，若住種性、不住種性，無有差別，總名有情界無量；唯住種性，彼彼位轉，乃得名為所調伏界無量。

戊五、調伏方便界無量

云何調伏方便界無量？謂如前說，當知此中亦有無量品類差別。

謂如前說等者：如前已說所調伏界，若依相續差別道理，當知無量，此亦應爾。又所調伏界有多品類差別，調伏方便亦有眾多品類可得。如顯揚論具顯應知。（三卷八頁）

西二、辨次第² 戌一、問

問：何故總說此五無量如是次第？

戌二、答⁵。亥一、最初說

答：以諸菩薩專精修習饒益有情，是故最初說有情界無量。

亥二、第二說

是諸有情依於處所可得受化，是故第二說世界無量。

亥三、第三說

是諸有情在彼彼界，由種種法或染、或淨差別可得，是故第三說法界無量。

亥四、第四說

即觀如是有情界中，有諸有情有所堪任、有大勢力，堪能究竟解脫衆苦，是故第四說所調伏界無量。

亥五、第五說

要由如是方便善巧，令諸有情究竟解脫，是故第五說調伏方便界無量。

申五、結

是故說言菩薩於此五種無量，能起一切善巧作用。

未五、說法果利⁴。申一、標

諸佛菩薩爲諸有情宣說正法，當知有五大果勝利。

申二、徵

何等爲五？

申三、列

一者、一類有情聞佛菩薩說正法時，遠塵離垢，於諸法中法眼生起；

遠塵離垢等者：攝異門分說：塵謂已生未究竟智，能障現觀有間、無間我慢現轉；垢謂彼品及見斷品所有羸重。今永無故，名遠塵離垢。又復塵者，所謂我慢，及見所斷一切煩惱；垢謂二品所有羸重。於諸法中者，謂於自相、共相所住法中。言法眼者，謂如實現證唯有法慧。（陵本八十三卷十四頁⁶³¹⁶）此應準釋。

二者、一類有情聞佛菩薩說正法時，得盡諸漏；三者、一類有情聞佛菩薩說正法時，便於無上正等菩提發正願心；四者、一類有情聞佛菩薩說正法時，

證得菩薩最勝法忍；

證得菩薩最勝法忍者：此說上品勝解行地勝忍應知。由能通達一切言說所說諸法自性之義皆不成實，唯有諸法離言自性是自性義。此通達已，過此更無餘義可求，是故說名最勝法忍。

五者、一類有情聞佛菩薩說正法已，受持讀誦，修習正行，展轉方便令正法眼久住不滅。

申四、結

如是五種，當知名爲諸佛菩薩所說正法大果勝利。

未六、七大乘性⁴ 申一、總標

諸菩薩乘與七大性共相應故，說名大乘。

申二、徵問

何等爲七？

申三、列釋⁷ 酉一、法大性

一者、法大性。謂十二分教中，菩薩藏攝方廣之教。

酉二、發心大性

二者、發心大性。謂有一類，於其無上正等菩提發正願心。

酉三、勝解大性

三者、勝解大性。謂有一類，於法大性生勝信解。

酉四、增上意樂大性

四者、增上意樂大性。謂有一類，已過勝解行地，證入淨勝意樂地。

酉五、資糧大性

五者、資糧大性。謂福德資糧、智慧資糧修習圓滿，能證無上正等菩提。

酉六、時大性

六者、時大性。謂經於三無數大劫，方證無上正等菩提。

酉七、圓證大性

七者、圓證大性。謂即所證無上菩提，由此圓證菩提自體，比餘圓證功德自

體尚無與等，何況得有若過若增。

申四、料簡

當知此中，若法大性、若發心大性、若勝解大性、若增上意樂大性、若資糧大性、若時大性，如是六種皆是圓證大性之因。圓證大性，是前六種大性之果。

未七、具攝大乘。³ 申一、標

有八種法，能具足攝一切大乘。

申二、列

一者、菩薩藏教；二者、即於如是菩薩藏中，顯示諸法真實義教；

顯示諸法真實義教者：如真實義品廣說應知。

三者、即於如是菩薩藏中，顯示一切諸佛菩薩不可思議、最勝廣大威力之教；

不可思議最勝廣大威力之教者：如威力品廣說應知。

四者、於上所說，如理聽聞；五者、如理思爲先，趣勝意樂；

趣勝意樂者：增上意樂，名勝意樂。當知此中，淨信爲先、擇法爲先，於諸佛法所有勝解印解決定，是名菩薩增上意樂。如增上意樂品說。（陵本

四十七卷十頁³⁷⁶³）

六者、趣勝意樂爲先，入修行相；七者、入修行相爲先，修果成滿；八者、即由如是修果成滿，究竟出離。

申三、結

如是菩薩勤修學已，能證無上正等菩提。

入修行相等者：住品中說：又諸菩薩勝解行住，於菩薩無相修，當知發趣。極歡喜住、增上戒住、增上心住、增上慧住，於菩薩無相修，當知獲得。初無相住，於菩薩無相修，當知圓證。第二無相住，於菩薩無相修，當知清淨。無礙解住、最上成滿菩薩住，於菩薩無相修果，當知領受。

（陵本四十七卷十七頁³⁷⁸¹）當知此中，從初發趣乃至清淨，是名入修行相。最後領受，是名修果成滿。

未八、十種菩薩。^{申一、徵}

何等菩薩勤修學已，能證無上正等菩提？

^{申二、標}

當知菩薩略有十種。

^{申三、列}

一、住種性，二、已趣入，三、未淨意樂，四、已淨意樂，五、未成熟，六、已成熟，七、未墮決定，八、已墮決定，九、一生所繫，十、住最後有。

^{申四、釋。} 酉一、已趣入

此中即住種性菩薩發心修學，名已趣入。

^{酉二、未淨意樂}

即已趣入，乃至未入淨意樂地，名未淨意樂。

^{酉三、已淨意樂}

若已得入，名已淨意樂。

^{酉四、未成熟}

即淨意樂，乃至未入到究竟地，名未成熟。

^{酉五、已成熟}

若已得入，名已成熟。

^{酉六、未墮決定}

未成熟中，乃至未得入決定地、決定行地，名未決定。

^{酉七、已墮決定}

若已得入，名已決定。

^{酉八、一生所繫}

已成熟中，復有二種。一者、一生所繫。謂此生無間，當證無上正等菩提。

^{酉九、住最後有}

二、住最後有。謂即住此生，能證無上正等菩提。

申五、結

如是如說從初種性，廣說乃至能證無上正等菩提十種菩薩，於菩薩學能正修學。此上更無能正修學、若於中學、若如是學。非如所說諸菩薩上更有菩薩，於菩薩學能正修學。

若於中學若如是學者：自他利等七所學處，名於中學。如前自他利品乃至菩提品廣說應知。最初定應具多勝解，乃至應住無倒教授、教誡，方便所攝身語意業，名如是學。如力種性品說應知。（陵本三十八卷六頁³¹¹⁷）

未九、建立名號² 申一、明建立² 酉一、舉無別名² 戌一、標

如是所說一切菩薩，當知復有如是等類無有差別隨德假名。

戌二、列

所謂名為菩提薩埵、摩訶薩埵、成就覺慧、最上照明、最勝眞子、最勝住持、普能降伏、最勝萌芽，亦名勇健，亦名最聖，亦名商主，亦名大稱，亦名憐愍，亦名大福，亦名自在，亦名法師。

酉二、例廣別號

如是十方無邊無際諸世界中無邊菩薩，當知乃有內德各別無量無邊假立想號。

無有差別隨德假名等者：此中種種假名，通說一切等類菩薩。隨彼彼德立彼彼名，非依內德各別建立，由是說言無有差別。

申二、辨眞似² 酉一、相似

若諸菩薩現前自稱我是菩薩，於菩薩學不正修行，當知是名相似菩薩，非眞菩薩。

酉二、眞實

若諸菩薩現前自稱我是菩薩，於菩薩學能正修行，當知是名眞實菩薩。

瑜伽師地論科句披尋記卷第四十六

瑜伽師地論科句披尋記卷第四十七

彌勒菩薩說

唐三藏沙門玄奘奉詔譯

韓清淨科記

本地分中菩薩地第二持隨法瑜伽處菩薩相品第一

辛二、次相等攝。⁸ 壬一、真實諸菩薩相（即相品）⁴ 癸一、徵起

云何真實諸菩薩相？

癸二、標列² 子一、喞柁南

喞柁南曰：

真實諸菩薩 五種相應知 自性依處果 次第攝五轉

子二、長行² 丑一、五相

謂諸菩薩有五真實菩薩之相，若成就者墮菩薩數。何等爲五？一者、哀愍，二者、愛語，三者、勇猛，四者、舒手惠施，五者、能解甚深義理密意。

丑二、五轉

如是五法，當知一一各有五轉。一者、自性，二者、依處，三者、果利，四者、次第，五者、相攝。

癸三、隨釋⁵。子一、自性⁵。丑一、哀愍³。寅一、標

應知此中，哀愍自性略有二種。

寅二、列

一、在意樂，二、在正行。

寅三、釋²。卯一、在意樂

在意樂者，謂諸菩薩，於諸有情利益意樂、安樂意樂，是名哀愍。

卯二、在正行

在正行者，謂諸菩薩，於諸有情如所意樂，隨力隨能身語饒益，是名哀愍。

丑二、愛語

愛語自性，謂如前說若慰喻語、若慶悅語、若勝益語，當知如前攝事品說。

丑三、勇猛

勇猛自性，謂諸菩薩剛決堅固，無所怯劣，有大勢力。

丑四、舒手惠施

若諸菩薩廣大施性、無染施性，是名舒手惠施自性。

丑五、能解甚深義理密意

若諸菩薩四無礙解，及即於彼無倒引發正加行智，是名能解甚深義理密意自性。

若諸菩薩四無礙解等者：菩薩所修菩薩四無礙解，菩提分品已說其相。

（陵本四十五卷二頁³⁶¹⁷）由此善能宣說正法，於諸法中起智加行，名即於

彼無倒引發正加行智。

子二、依處。⁵丑一、哀愍。⁵寅一、標

當知菩薩哀愍依處，略有五種。

寅二、徵

何等爲五？

寅三、列

一、有苦有情，二、惡行有情，三、放逸有情，四、邪行有情，五、煩惱隨眠有情。

寅四、釋⁵ 卯一、有苦有情

那落迦等所有有情，皆爲苦受連綿相續逼切而轉，如是名爲有苦有情。

卯二、惡行有情

或復有情雖非定苦，而多現行諸身惡行、諸語惡行、諸意惡行，於諸惡中喜樂安住。所謂屠養羊豬雞等不律儀輩。如是名爲惡行有情。

卯三、放逸有情

或復有情雖非定苦及行惡行，而於諸欲耽著受用，常樂安住種種俳優、歌舞、笑睇，以自娛樂。所謂一類受欲塵者。如是名爲放逸有情。

卯四、邪行有情

或復有情雖非定苦、行惡、放逸，而依妄見修行種種苦解脫行。謂捨諸欲，於惡說法毗奈耶中而出家者。如是名爲邪行有情。

卯五、煩惱隨眠有情

或復有情雖非定苦，廣說乃至非修邪行，而或具縛、或不具縛，爲諸煩惱之所隨眠。謂正修行賢善異生及諸有學。是名煩惱隨眠有情。

謂正修行賢善異生等者：謂隨信行、或隨法行補特伽羅，趣向諦觀，而未見諦，名正修行賢善異生。從預流果乃至阿羅漢向，名諸有學。如次釋前具縛、或不具縛應知。

寅五、結

是名菩薩所有哀愍五種依處，由此依處、由此所緣，哀愍而轉。除此無有若過若增。

丑二、愛語⁵ 寅一、標

當知菩薩愛語依處，亦有五種。

寅二、徵

何等爲五？

寅三、列

一、正言論語，二、正慶悅語，三、正安慰語，四、正廣恣語，五、如理說語。

寅四、指

如是廣辯，應知如前攝事品說。

正言論語等者：開示諸法法門愛語，開示無倒法相愛語，開示無倒訓釋諸法言辭愛語，開示無倒法句品類差別愛語，是名正言論語。菩薩若見有情妻子、眷屬、財穀，其所昌盛而不自知，如應覺悟，以申慶悅；或知信、戒、聞、捨、慧增，亦復慶悅；是名正慶悅語。安慰種種驚怖愛語，是名正安慰語。於他有情一切資具少希欲中，一切所作及以正至少希欲中，廣恣愛語，是名正廣恣語。如理宣說所攝愛語，是名如理說語。如是一切，

皆如攝事品說。

寅五、結

是名菩薩所有愛語五種依處，由此依處、由此所緣，愛語而轉。除此無有若過若增。

丑三、勇猛⁴ 寅一、標

當知菩薩勇猛依處，亦有五種。

寅二、徵

何等爲五？

寅三、指

謂即如前菩提分品所說菩薩堅力持性五種依處，當知此是菩薩勇猛五種依處。

寅四、結

由此依處、由此所緣，勇猛而轉。除此無有若過若增。

丑四、舒手惠施⁵ 寅一、標

當知菩薩舒手惠施，亦五依處。

寅二、徵

何等爲五？

寅三、列

一、數數惠施，二、歡喜惠施，三、殷重惠施，四、無染惠施，五、無依惠施。

寅四、指

如是五種，如前施品廣辯應知。

數數惠施等者：隨有所得即隨惠施，無所吝惜，不於長時漸漸積集眾多財物，然後頓施，是名數數惠施。施前意悅，施時心淨，施後無悔，是名歡喜惠施。應時而施，不以非時；自他淨施，非不清淨；合儀而施，不以非儀；無亂心施，不以散亂；是名殷重惠施。不以異意、不以憤怒撓濁之心，而行惠施；又復不由惡見妄有執取而行惠施；是名無染惠施。不依世

間名聲讚頌而行布施，不依於他反報恩德而行布施，不依帝釋、魔王、輪王、自在等果而行布施，是名無依惠施。如是諸義，如施品說應知。

寅五、結

由此依處、由此所緣，菩薩舒手惠施而轉。除此無有若過若增。

丑五、能解甚深義理密意⁴ 寅一、標

當知菩薩能解甚深義理密意，亦五依處。

寅二、徵

何等爲五？

寅三、列⁵ 卯一、於契經

謂於如來所說契經，隨順甚深甚深顯現空性相應、緣性緣起，應知是名第一依處。

隨順甚深甚深顯現等者：甚深有二，一、空性甚深，二、緣起甚深。空性甚深者，謂空自相非定有無，是名甚深空性相應。緣起甚深者，謂緣起支

雖實無常、苦、空、無我，而有常、我等相相似顯現。有尋有伺地廣辯應知。（陵本十卷十六頁⁸¹²）是名甚深顯現緣性緣起。

卯二、於毗奈耶

於毗奈耶毀犯善巧、還淨善巧，當知是名第二依處。

於毗奈耶毀犯善巧等者：謂於毀犯、還淨能正了知，是名善巧。

卯三、於摩怛理迦

於摩怛理迦，施設、建立無倒法相，當知是名第三依處。

卯四、於密言義

能正顯除意趣難解諸法相義，當知是名第四依處。

能正顯除意趣難解諸法相義者：一切如來密意言義，是名意趣難解諸法相義。即於此義能正顯了，能正除遣所化有情隨所生起一切疑惑。義如真實

義品中說。（陵本三十六卷二十五頁³⁰¹⁴）

卯五、於無礙解

於一切法，法、義、釋辭、品類差別，當知是名第五依處。

寅四、結

由此依處、由此所緣，菩薩能解甚深義理密意而轉。除此無有若過若增。

子三、果利² 丑一、釋⁴ 寅一、哀愍² 卯一、釋² 辰一、正辨相

菩薩哀愍，於諸有情，最初能斷怨害嫌恨。菩薩哀愍，普於一切利有情事皆能修作，心無怯劣。於此加行嘗無厭倦，多住哀愍，能攝無罪現法樂住及饒益他。

多住哀愍者：此說四無量定應知。

辰二、引教說

又如世尊所說修慈所得勝利，謂於現身毒藥、刀杖不加害等。如是一切菩薩哀愍，皆當了知。

卯二、結

是名菩薩哀愍果利。

如是一切菩薩哀愍者：前舉修慈，此例修悲、喜、捨，是名一切菩薩哀愍。

寅二、愛語² 卯一、釋² 辰一、現法攝² 巳一、能斷語過

菩薩愛語，於現法中斷語四過。所謂妄語、離間、麤惡，及以綺語。

巳二、能益自他

由此愛語，於現法中能自攝受、能攝受他，安隱而轉。

辰二、後法攝

菩薩愛語，於當來世其言敦肅，言必信用。

卯二、結

是名菩薩愛語果利。

能自攝受等者：不為自害，攝受饒益，是名能自攝受。不為他害，而為饒益，是名能攝受他。不受彼不善業所生身心憂苦，是名安隱而轉。

寅三、勇猛² 卯一、釋² 辰一、現法攝

菩薩勇猛，於現法中能離一切懶惰懈怠，心常歡喜；能受菩薩淨戒律儀，受已終無毀犯、退屈；能正堪忍，攝受自他。

辰二、後法攝

於當來世一切菩薩所起事業，稟性堅固，凡所造修若未成辦，終無懈退。

卯二、結

是名菩薩勇猛果利。

寅四、後二種² 卯一、指

當知菩薩舒手惠施、能解甚深義理密意所得果利，如威力品惠施威力、般若威力差別應知。

卯二、結

是名菩薩舒手惠施、能解甚深義理密意二種果利。

如威力品惠施威力等者：威力品說布施四相，般若四相，是名差別應知。

丑二、結

是名菩薩五相果利。

子四、次第³。 丑一、徵

云何五相如是次第？

丑二、釋⁴。 寅一、哀愍

謂諸菩薩，先修哀愍攝受有情，於彼顧念，欲作饒益。

寅二、愛語

次修愛語，爲彼有情出不善處安立善處，宣說正理，攝受教誨。

寅三、勇猛

次修勇猛，於已趣入諸有情類，若諸有情起諸邪行，種種煩惱變異事中皆能堪忍，爲不棄捨安住種種正行、邪行諸有情故。

寅四、後二

是諸菩薩修勇猛已，一類有情以財攝受，能令成熟；一類有情以法攝受，能令成熟；一類有情以財、以法二種攝受，能令成熟。是故菩薩次後修習舒手

惠施、能解甚深義理密意。

起諸邪行等者：謂如暴惡毀犯淨戒，是名起諸邪行。如是邪行，當知種種煩惱變異所作，令改本性，由是菩薩深生憐愍，故能堪忍，爲不棄捨彼有情故。由彼有情於佛聖教已正趣入，說名安住種種正行，然於一時煩惱所媚，暫起毀犯，復名邪行。

丑三、結

當知是名菩薩五相前後次第。

子五、相攝²。 丑一、問

問：菩薩五相，六到彼岸，何到彼岸攝何等相？

丑二、答

答：菩薩哀愍，當知靜慮到彼岸攝；

菩薩哀愍當知靜慮到彼岸攝者：由四無量名爲哀愍，故說靜慮到彼岸攝。

菩薩愛語，尸羅、般若到彼岸攝；

菩薩愛語尸羅般若到彼岸攝者：依慰喻語、若慶悅語，故說尸羅到彼岸攝。依勝益語，故說般若到彼岸攝。

菩薩勇猛，進、忍、般若到彼岸攝；菩薩所有舒手惠施，當知即施到彼岸攝；菩薩所有能解甚深義理密意，靜慮、般若到彼岸攝。

菩薩勇猛進忍般若到彼岸攝者：由有力思擇，故說般若到彼岸攝。餘文易知。

癸四、總結

如是真實菩薩五相，當知一一皆有五轉。所謂自性、依處、果利、次第、相攝。已廣分別，應如實知。

本地分中菩薩地第二持隨法瑜伽處分品第二

壬二、在家出家分（即分品）³ 癸一、徵起

在家、出家二分菩薩，有幾種法正修學時，速證無上正等菩提？

癸二、標列² 子一、嗚柁南

嗚柁南曰：

二分諸菩薩 初事業善修 善巧饒益他 迴向最爲後

子二、長行³ 丑一、標

謂諸菩薩，或在家分、或出家分差別轉時，略有四法，當知令此在家、出家二分菩薩正勤修學，速證無上正等菩提。

丑二、徵

何等爲四？

丑三、列

一者、善修事業，二者、方便善巧，三者、饒益於他，四者、無倒迴向。

癸三、隨釋 子一、別辨其相 丑一、善修事業 寅一、徵

云何菩薩善修事業？

寅二、標

謂諸菩薩，於六波羅蜜多決定修作、委悉修作、恆常修作、無罪修作。

寅三、釋² 卯一、舉施度² 辰一、辨⁴ 巳一、決定修作² 午一、徵

云何菩薩於施波羅蜜多決定修作？

午二、釋

謂諸菩薩，現有種種可施財法，諸乞求者正現在前，有恩、無恩、有德、有失無有差別，要當施與。若人非人、若諸沙門、若婆羅門及餘世間，無有如法能令施心有所傾動。

若人非人等者：謂生人趣，得人種類，是名爲人。若生餘趣，那落迦、傍生，及與鬼趣、天、龍、藥叉、阿素洛、揭路荼、緊捺洛、牟呼洛迦等，是名非人。如顯揚論說。（三卷十四頁）生在人中，希求魔梵而修行者，是名沙門、若婆羅門。若魔、若梵，名餘世間。如攝異門分說。（陵本八十三卷十七頁⁶³²⁷）

巳二、委悉修作² 午一、徵

云何菩薩於施波羅蜜多委悉修作？

午二、釋

謂諸菩薩，現有種種可施財法，諸乞求者正現在前，一切施與，無有少物於諸有情而不能捨。於內身命尚能惠施，何況外物。

巳三、恆常修作² 午一、徵

云何菩薩於施波羅蜜多恆常修作？

午二、釋

謂諸菩薩，於修惠施無有厭倦，恆常無間，於一切時，隨有所得即隨惠施，無所吝惜。

巳四、無罪修作² 午一、徵

云何菩薩於施波羅蜜多無罪修作？

午二、釋

謂諸菩薩遠離如前施品所說諸雜染施，修行所餘無雜染施。

遠離如前施品所說諸雜染施等者：施品中說：菩薩若知種種內外施物，於

彼眾生唯令安樂、不作利益，或復於彼不作安樂、不作利益，便不施與。若知種種內外施物，於彼眾生定作利益、不定安樂，或復於彼定作利益、定作安樂，即便施與。（陵本三十九卷二頁³¹⁸⁵）是名略說菩薩應施、不應施義。此說雜染及無雜染，如應當知。

辰二、結

如是菩薩於施波羅蜜多能善修作。

卯二、例餘度

如於施波羅蜜多能善修作，如是於戒、忍、精進、靜慮、慧波羅蜜多，如其所應，當知亦爾。

寅四、結

是名菩薩由四行相，於其六種波羅蜜多決定修作、委悉修作、恆常修作、無罪修作。

丑二、方便善巧² 寅一、徵

云何菩薩方便善巧？

寅二、釋² 卯一、舉種類⁴ 辰一、標

當知如是方便善巧，略有十種。

辰二、徵

何等爲十？

辰三、列

一者、憎背聖教有情，除其恚惱方便善巧；二者、處中有情，令其趣入方便善巧；三者、已趣入者，令其成熟方便善巧；四者、已成熟者，令得解脫方便善巧；五者、於諸世間一切異論方便善巧；六者、於諸菩薩淨戒律儀受持、毀犯，能正觀察方便善巧；七者、於諸正願方便善巧；八者、於聲聞乘方便善巧；九者、於獨覺乘方便善巧；十者、於其大乘方便善巧。

辰四、指

如是一切方便善巧，如前即此菩薩地中，隨彼彼處已廣分別，如應當知。

隨彼彼處已廣分別如應當知者：此中前四方便善巧，如前菩提分品，說有六種成熟有情方便應知。（陵本四十五卷五頁³⁶²⁶）又說善知諸論。（陵本四十四卷十七頁³⁵⁹⁷）即此第五方便善巧。又戒品說菩薩戒波羅蜜多。（陵本四十卷一頁³²³⁵）即此第六方便善巧。又菩提分品中說菩薩所修正願。（陵本四十五卷十六頁³⁶⁵⁷）即此第七方便善巧。功德品說乘施設建立。（陵本四十六卷十四頁³⁷¹²）即此後三方方便善巧。

卯二、明作業。³ 辰一、標

如是十種菩薩所有方便善巧，能作五事。

辰二、釋。⁵ 巳一、由前四種善巧

謂由前四種方便善巧，令諸菩薩能正安立所化有情於自義利。

巳二、由第五種善巧

由於世間一切異論方便善巧，令諸菩薩善能摧伏一切異論。

巳三、由第六種善巧

由於菩薩淨戒律儀受持、毀犯，能正觀察方便善巧，令諸菩薩不犯所犯，犯已速疾如法悔除，於善清淨菩薩所受淨戒律儀，能善修瑩。

於善清淨等者：善淨意樂，名善清淨。此說菩薩堪能受戒自性功德，由此

堪受菩薩所受淨戒律儀。今說由彼方便善巧，令戒清淨，名善修瑩。

巳四、由第七種善巧

由於正願方便善巧，令諸菩薩能證當來一切所愛事義圓滿。

能證當來一切所愛事義圓滿者：謂自證得無上菩提，能作有情一切義利，是名一切所愛事義圓滿。

巳五、由後三種善巧

由於三乘方便善巧，令諸菩薩於諸有情，隨其種性、根及勝解，說相稱法、說順正理。

辰三、結

是名十種方便善巧，令諸菩薩能作五事。由此五事，能令菩薩現法當來一切

事義皆得究竟。

丑三、饒益於他。³ 寅一、徵

云何菩薩饒益於他？

寅二、釋

謂諸菩薩依四攝事，即布施、愛語、利行、同事，能與一分有情利益，能與一分有情安樂，能與一分所化有情利益安樂，是名略說菩薩所有饒益於他。

寅三、指

廣說如前自他利品，應知其相。

能與一分有情利益等者：此中初二有情，但言一分，不言所化，當知此說不住種姓有情，與下一分所化有情有別。前說所調伏界無量，當知此名所化有情。於彼一切授與善法，名與利益；授與饒益，名與安樂。

丑四、無倒迴向。² 寅一、徵

云何菩薩無倒迴向？

寅二、釋

謂諸菩薩三門積集所有善根，即善修事業、方便善巧、饒益於他。去來今世一切攝取，以淳一味妙淨信心，迴求無上正等菩提。終不用此所集善根，希求世間餘果異熟，唯除無上正等菩提。

去來今世一切攝取者：謂一切時，於彼善根攝受、增長、串習成性故。

子二、明攝一切。³ 丑一、標所應學

世尊所有爲在家分、或出家分諸菩薩說所應學法，當知一切此四所攝。謂善修事業、方便善巧、饒益於他、無倒迴向。

丑二、近證大果

是故如是善修事業、方便善巧、饒益於他、無倒迴向諸菩薩衆，親近、鄰逼難得難證無上菩提。

丑三、結無過增

當知過去、未來、現在所有菩薩，或在家分、或出家分，精勤修學，於其無

上正等菩提曾當現證，一切皆由如是四法。除此無有若過若增。

子三、校量勝劣⁴ 丑一、標

又諸菩薩，或在家分、或出家分，雖復同於如是四法正勤修學，而出家者於在家者，甚大殊異、甚大高勝。

丑二、徵

所以者何？

丑三、釋⁵ 寅一、於攝受眷屬

當知一切出家菩薩，於其父母、妻子、親屬攝受過患皆得解脫，在家菩薩則不如是。

寅二、於遽務憂苦

又復一切出家菩薩，於爲攝受父母、親屬，營農、商賈、事王業等種種艱辛遽務憂苦皆得解脫，在家菩薩則不如是。

寅三、於鉤鎖梵行

又復一切出家菩薩，一向能行鉤鎖梵行，在家菩薩則不如是。

寅四、於菩提分法

又復一切出家菩薩，普於一切菩提分法速證通慧，隨所造修彼彼善法，皆能疾疾到於究竟，在家菩薩則不如是。

寅五、於安住律儀

又復一切出家菩薩，安住決定清淨律儀，凡所發言衆咸信奉，在家菩薩則不如是。

安住決定清淨律儀者：於戒波羅蜜多決定修作、無罪修作，是名決定及與清淨。

丑四、結

如是等類無量善法，當知一切出家菩薩於在家者，甚大殊異、甚大高勝。

本地分中菩薩地第二持隨法瑜伽處增上意樂品第三

壬三、增上意樂（即增上意樂品）² 癸一、徵

云何菩薩增上意樂？

癸二、釋² 子一、唵柁南標

唵柁南曰：

智者於有情 有七相憐愍 十五勝意樂 作十事應知

子二、長行釋² 丑一、七相憐愍⁵ 寅一、標

謂諸菩薩，於諸有情深心發起七相憐愍。以諸菩薩具憐愍故，名善意樂、極善意樂。

名善意樂極善意樂者：此中意樂，通說勝解行地，乃至到究竟地。由是差別，名善、極善。

寅二、徵

何等名爲七相憐愍？

寅三、列

一者、無畏憐愍，二者、如理憐愍，三者、無倦憐愍，四者、無求憐愍，五

者、無染憐愍，六者、廣大憐愍，七者、平等憐愍。

寅四、釋⁷ 卯一、無畏憐愍

謂諸菩薩，於諸有情非怖畏故而起憐愍，現行隨順身語意業，適可其心利益安樂，是名菩薩無畏憐愍。

卯二、如理憐愍

又諸菩薩，於諸有情非不如理憐愍而轉，謂終不以非法、非律、非賢善行，及以非處勸授有情，是名菩薩如理憐愍。

不以非法非律等者：惡說法毗奈耶，是名非法非律。遠離顰蹙，舒顏平視，含笑先言，常爲愛語，性多攝受善法朋侶，身心澄淨，是名賢善。如聲聞地說。（陵本二十五卷二十三頁²¹⁶¹）與此相違，是名非賢善行。於彼彼事理有相違，是名非處。

卯三、無倦憐愍

又諸菩薩，於諸有情如是憐愍，隨其所宜發起一切饒益事業，曾無厭倦，是

名菩薩無倦憐愍。

卯四、無求憐愍

又諸菩薩，於諸有情不待求請，自起憐愍，爲作饒益，是名菩薩無求憐愍。

卯五、無染憐愍

又諸菩薩，於諸有情無愛染心而起憐愍，謂饒益他，不祈恩報，亦不希望當來可愛諸果異熟，是名菩薩無染憐愍，亦名菩薩無緣憐愍。

卯六、廣大憐愍

又諸菩薩，於諸有情所起憐愍，唯是廣大而非狹小。言廣大者，謂於一切諸有情所，雖遭一切不饒益事，而不棄捨；菩薩自身寧受非愛，終不以惡欲加於彼。是名菩薩廣大憐愍。

卯七、平等憐愍

又諸菩薩，如是相狀、如是功德相應憐愍，普於一切諸有情類平等平等，於有情界無有分限，是名菩薩平等憐愍。

寅五、結

菩薩與此七種行相憐愍相應，名善意樂、極善意樂。

丑二、十五意樂。寅一、標

當知此中，淨信爲先、擇法爲先，於諸佛法所有勝解印解決定，是名菩薩增上意樂。

於諸佛法所有勝解等者：此中佛法，謂即無上菩提及與菩提方便。信他諸佛菩薩而行，是名印解。自內了知真實，是名決定。

如是菩薩增上意樂，當知略說有十五種。

寅二、徵

何等十五？

寅三、列

一、最上意樂，二、遮止意樂，三、波羅蜜多意樂，四、真實義意樂，五、威力意樂，六、利益意樂，七、安樂意樂，八、解脫意樂，九、堅固意樂，

十、無虛妄意樂，十一、不清淨意樂，十二、清淨意樂，十三、善清淨意樂，十四、應調伏意樂，十五、俱生意樂。

寅四、釋³ 卯一、辨十五相¹⁵ 辰一、最上意樂

謂諸菩薩，於佛法僧最上真實起勝意樂，是名菩薩最上意樂。

於佛法僧最上真實者：謂佛法僧真實功德，映蔽一切世間外道，說名最上。

辰二、遮止意樂

又諸菩薩，於所受持淨戒律儀起勝意樂，是名菩薩遮止意樂。

辰三、波羅蜜多意樂

又諸菩薩，於所修證施、忍、精進、靜慮、般若起勝意樂，是名菩薩波羅蜜多意樂。

辰四、真實義意樂

又諸菩薩，於法無我、補特伽羅無我、甚深勝義諸法真如起勝意樂，是名菩

薩真實義意樂。

辰五、威力意樂

又諸菩薩，於佛菩薩不可思議神通威力、或俱生威力起勝意樂，是名菩薩威力意樂。

辰六、利益意樂

又諸菩薩，於諸有情欲以善法而授與之，是名菩薩利益意樂。

辰七、安樂意樂

又諸菩薩，於諸有情欲以饒益而授與之，是名菩薩安樂意樂。

辰八、解脫意樂

又諸菩薩，即於如是諸有情所無愛染心，又於當來可愛異熟其心無繫，是名菩薩解脫意樂。

即於如是諸有情所無愛染心者：謂於有情欲與利益安樂，非由心有愛染故。

辰九、堅固意樂

又諸菩薩，於其無上正等菩提，其心專注，曾無變易，是名菩薩堅固意樂。

辰十、無虛妄意樂

又諸菩薩，於諸有情饒益方便，於大菩提趣證方便，無顛倒智俱行勝解，是名菩薩無虛妄意樂。

辰十一、不清淨意樂

又諸菩薩，勝解行地所有一切增上意樂，是名菩薩不清淨意樂。

辰十二、清淨意樂

又諸菩薩，從淨勝意樂地乃至決定行地所有一切增上意樂，是名菩薩清淨意樂。

辰十三、善清淨意樂

又諸菩薩，到究竟地所有一切增上意樂，是名菩薩善清淨意樂。

辰十四、應調伏意樂

又諸菩薩不清淨意樂，是則名爲應調伏意樂，由此意樂應思擇故。

辰十五、俱生意樂

又諸菩薩清淨意樂、善清淨意樂，是則名爲俱生意樂，由此意樂性成就故，於所依中善安立故。

由此意樂性成就故等者：不由思擇，習所成性，名性成就。云何習所成性？謂由數習諸善法故，於自所依異熟識中，積集諸善，堅住、不忘、成滿究竟，即由此義，名善安立。

卯二、能作十事。³ 辰一、標

如是菩薩十五妙善增上意樂，隨一切地，以要言之，能作十事。

隨一切地者：謂諸菩薩勝解行地、淨勝意樂地、行正行地、決定地、決定行地、到究竟地，名一切地。彼菩薩眾所有意樂能作所作，隨應當知。

辰二、徵

何等爲十？

辰三、釋² 巳一、舉依十二¹⁰ 午一、依最上意樂

謂諸菩薩最上意樂，能於三寶修一切種最勝供養，普於一切菩提資糧爲最第一。

午二、依遮止意樂

又諸菩薩遮止意樂，能於所受淨戒律儀，命難因緣，亦不故思犯於所犯；設有所犯，疾疾悔除。

午三、依波羅蜜多意樂

又諸菩薩波羅蜜多意樂，能於善法常勤修習無放逸住，常住最勝無放逸住。

午四、依真實義意樂

又諸菩薩真實義意樂，能爲有情以無染心流轉生死，不入涅槃增上意樂。

以無染心流轉生死等者：由諸菩薩於其生死如實了知，故無染心流轉生死。由於涅槃不多願樂，故不速疾入般涅槃。義如真實義品中說。（陵本三十六卷十一頁²⁹⁴⁵）

午五、依威力意樂

又諸菩薩威力意樂，能於聖教覺受淳淨上妙法味。

能於聖教覺受淳淨上妙法味者：三摩呬多地說：有四正法，攝持正教。何等爲四？一者、遠離，二者、修習，三者、修果，四者、於聖教中無有乖諍。乃至廣說。（陵本十三卷十一頁¹¹¹²）此中聖教，應準彼釋。由修奢摩他、毗鉢舍那，如實通達聖教法義，無有乖諍，名能覺受淳淨上妙法味。復能於修起堅固想，欣樂多住，不唯聞思便生喜足。

於修起堅固想欣樂多住者：謂作是思：修習定心，得定自在，能正對治一切漏有漏法，不爲漏有漏法之所勝伏。是名於修起堅固想，由是於修欣樂多住。

午六、依利益安樂解脫意樂

又諸菩薩利益意樂、安樂意樂、解脫意樂，能於一切饒益有情所作事業精勤修習，雖常修習而無厭倦。

午七、依堅固意樂

又諸菩薩堅固意樂，能於種種熾然精進、廣大精進，發起安住無緩加行、無斷加行。

午八、依無虛妄意樂

又諸菩薩無虛妄意樂，能於所引彼彼善法速證通慧，不於少分下劣薄弱差別證中而生喜足。

午九、依應調伏意樂

又諸菩薩應調伏意樂，能引俱生意樂。

午十、依俱生意樂

又諸菩薩俱生意樂，能於無上正等菩提速疾趣證，能與天人作諸義利利益安樂。

巳二、略不說三

應調伏意樂即不清淨意樂，俱生意樂即清淨意樂、善清淨意樂，故不別說。

卯三、遍攝一切

世尊所有為諸菩薩，於彼彼處種種宣說、施設、開示增上意樂，當知一切即此十五意樂所攝，是故過去、未來、現在妙善意樂諸菩薩衆，於其無上正等菩提曾當現證，一切皆由如是所說十五意樂。除此無有若過若增。

寅五、結

如是菩薩十五意樂，能得最大菩提果利，是故菩薩依此意樂，速證無上正等菩提。

本地分中菩薩地第二持隨法瑜伽處住品第四之一

壬四、十三住（即住品）⁴ 癸一、標² 子一、菩薩住

如是始從種性具足，廣說乃至於如所說菩薩所學，正勤修學；於如所說菩薩諸相，正等顯現；於諸菩薩分加行中，正勤修學；於如所說菩薩意樂，能淨修治。諸菩薩衆略有菩薩十二種住，由此菩薩十二種住，普攝一切諸菩薩住，普攝一切諸菩薩行。

普攝一切諸菩薩住等者：菩薩修作一切事業，有二時別。一者、行時，二者、住時。如說菩薩修不放逸，如如所應行，如如所應住，如是如是行，如是如是住，無有毀犯。如是行住，略攝菩薩一切作業。依此安立菩薩十二種住，說彼普攝一切行住。

子二、如來住

復有如來第十三住，由此住故，現前等覺廣大菩提，名無上住。

癸二、徵

云何菩薩十二住等？

癸三、列² 子一、唵陀南

唵陀南曰：

種性勝解行 極喜增上戒 增上心三慧 無相有功用

無相無功用 及以無礙解 最上菩薩住 最極如來住

子二、長行² 丑一、列名

謂菩薩種性住、勝解行住、極歡喜住、增上戒住、增上心住。增上慧住復有三種。一、覺分相應增上慧住，二、諸諦相應增上慧住，三、緣起流轉止息相應增上慧住。謂諸菩薩如實了知能觀真實、所觀真實，及於真實諸有情類，由無智故衆苦流轉，由有智故衆苦止息。如是菩薩，由於三門以慧觀察，故有三種增上慧住。及有加行有功用無間闕道運轉無相住、無加行無功用無間闕道運轉無相住、無礙解住、最上成滿菩薩住。是名菩薩十二種住。

丑二、結攝

如是菩薩十二種住，普攝一切諸菩薩住，普攝一切諸菩薩行。

癸四、釋² 子一、別辨相² 丑一、如來住

如來住者，謂過一切諸菩薩住，現前等覺大菩提住。此中最後如來住者，於後究竟瑜伽處最後建立品，當具演說。

丑二、菩薩住² 寅一、總標當說

菩薩所有十二種住，如所安立，我今當說。

寅二、別顯十二² 卯一、略釋² 辰一、初二住² 巳一、顯其自相² 午一、種性住⁴
未一、徵

云何菩薩種性住？云何菩薩住種性住？

云何菩薩種性住等者：此中雙徵。一、徵住位安立，二、徵彼所有相，是故說別。

未二、釋³ 申一、性自仁賢

謂諸菩薩住種性住，性自仁賢，性自成就菩薩功德；菩薩所應衆多善法，於彼現行亦有顯現。由性仁賢逼遣方便，令於善轉，非由思擇有所制約、有所防護。

性自仁賢等者：謂諸菩薩本性成就，其心溫潤、其心純淨，恚心、害心不久相續，隨生隨捨，起賢善心，是名性自仁賢。種性爲依，有所堪任、有大勢力，能斷煩惱、所知二障，證得無上正等菩提，是故性自成就菩薩功德。有六波羅蜜多種性相，由此相故，令他了知真是菩薩，是名菩薩所應

衆多善法，於彼現行亦有顯現。

申二、具足佛種

若諸菩薩住種性住，任持一切佛法種子，於自體中、於所依中，已具足有一切佛法一切種子。

任持一切佛法種子等者：自乘種性堪能證得諸佛所證無上菩提，是名一切佛法種子。從無始世展轉傳來，法爾所得，是名任持。附在所依，成就十力種姓差別，是名於自體中、於所依中，已具足有一切佛法一切種子。

申三、性離麤垢

又諸菩薩住種性住，性離麤垢，不能現起上煩惱纏。由此纏故，造無間業，或斷善根。

未三、指

如種性品所說種種住種性相，於此菩薩種性住中，亦應廣說，應如實知。

未四、結

是名菩薩種性住。

午二、勝解行住

云何菩薩勝解行住？謂諸菩薩，從初發心乃至未得清淨意樂，所有一切諸菩薩行，當知皆名勝解行住。

巳二、廣展轉別² 午一、菩薩住² 未一、舉前四住⁴ 申一、種性住

又諸菩薩種性住中，於餘十一諸菩薩住及如來住唯有因轉，攝受彼因。於餘所有諸菩薩住尚未發趣、未得、未淨，況如來住。

申二、勝解行住

若諸菩薩勝解行住，普於一切餘菩薩住及如來住，皆名發趣，未得、未淨。即於如是勝解行住，亦名發趣、亦名爲得，爲令清淨而修正行。

申三、極歡喜住

勝解行住既清淨已，極歡喜住先已發趣，今復名得，爲令清淨而修正行。

申四、增上戒住

極歡喜住既清淨已，增上戒住先已發趣，今復名得，爲令清淨而修正行。

未二、例後八住

如是廣說，展轉乃至最上成滿菩薩住。

午二、如來住² 未一、明頓得淨

即此最上成滿菩薩住既清淨已，從此無間，其如來住先已發趣，當知於今頓得、頓淨。

未二、結其差別

是如來住於菩薩住，當知此中如是差別。

頓得頓淨者：最上成滿菩薩住中，修果成滿，於如來住無間獲得，於煩惱障及所知障無間清淨，由爾所時無復修作，是故說名頓得、頓淨。此與前菩薩住一一住中漸得、漸淨有別，如是應知。

辰二、後十住² 巳一、顯其自相¹⁰ 午一、極歡喜住

云何菩薩極歡喜住？謂諸菩薩淨勝意樂住。

午二、增上戒住

云何菩薩增上戒住？謂諸菩薩，淨勝意樂爲緣，所得性戒相應住。

淨勝意樂爲緣等者：如下自說：極歡喜住，由十種心意樂，已得意樂清淨。乃至廣說即由如是十種意樂成上品故，極圓滿故，是諸菩薩入證第二增上戒住。於此住中，性戒具足。極少邪惡業道所攝諸惡犯戒尙不現行，況中上品。又於十種圓滿業道，自性顯現。（陵本四十八卷一頁³⁸¹⁵）此應準釋。

午三、增上心住

云何菩薩增上心住？謂諸菩薩，增上戒住清淨爲緣，所得世間靜慮、等持、等至住。

午四、覺分相應增上慧住

云何菩薩覺分相應增上慧住？謂諸菩薩，以世間淨智所依等持爲所依止，爲覺諸諦，於正念住等三十七菩提分法妙揀擇住。

午五、諸諦相應增上慧住

云何菩薩諸諦相應增上慧住？謂諸菩薩，覺分揀擇爲所依止，於諸諦中如實覺住。

午六、緣起流轉止息相應增上慧住

云何菩薩緣起流轉止息相應增上慧住？謂諸菩薩，於諦能覺增上力故，揀擇顯示由無智故，苦及因起；揀擇顯示由有智故，苦及因滅住。

由無智故苦及因起等者：此中無智，所謂無明。苦謂生及老死。餘緣起支能生苦故，苦胎藏故，皆名爲因。義如有尋有伺地說。（陵本十卷十四頁⁸⁰⁰）是名緣起流轉。與此相違，名由有智。苦及因滅，是名緣起止息。

午七、有加行有功用無相住

云何菩薩有加行有功用無相住？謂諸菩薩，即由三種增上慧住增上力故，有加行、有功用、無闕無間，於一切法真如無分別慧修俱行住。

於一切法真如等者：諸法無我，名一切法真如。由此爲緣，達無少法及少

品類可起分別，於一切法平等平等如實觀察，是名無分別慧。由此住中，於加行行修圓滿故，是名修俱行住。

午八、無加行無功用無相住

云何菩薩無加行無功用無相住？謂諸菩薩，即於前無相住多修習已，任運自然、無闕無間運轉道隨行住。

午九、無礙解住

云何菩薩無礙解住？謂諸菩薩，即以善清淨無動慧等持爲所依止，得廣大慧，爲他說法；無上爲依，能於諸法異門、義趣、釋詞、差別妙揀擇住。

得廣大慧等者：謂於諸法起智加行，能爲他說一切種法，普於一切說法所作皆如實知，是名得廣大慧，爲他說法。獲得無量陀羅尼門，於一切種音詞支具剖析善巧，辯才無盡，是名無上爲依，乃至妙揀擇住。

午十、最上成滿菩薩住

云何菩薩最上成滿菩薩住？謂諸菩薩安住於此，於菩薩道已到究竟，於阿耨

多羅三藐三菩提已得大法灌頂，或一生所繫，或居最後有。從此住無間，即於爾時證覺無上正等菩提，能作一切佛所作事。

巳二、廣修得別² 午一、於修所作³ 未一、狹小等

又諸菩薩勝解行住，於菩薩修所作狹小、所作有闕、所作不定，所得有退。

於菩薩修者：此說六波羅蜜多應知。

未二、廣大等

極歡喜住，於菩薩修所作廣大、所作無闕、所作決定，隨所獲得無復退轉。

如極歡喜住，乃至三種增上慧住，應知亦爾。

未三、無量等

從初無相住乃至最上成滿菩薩住，於菩薩修所作無量、所作無闕、所作決定，隨所獲得終無退轉。

午二、於無相修⁵ 未一、發趣

又諸菩薩勝解行住，於菩薩無相修，當知發趣。

於菩薩無相修者：此說諸法離言自性。真實義相名爲無相應知。

未二、獲得

極歡喜住、增上戒住、增上心住、增上慧住，於菩薩無相修，當知獲得。

未三、圓證

初無相住，於菩薩無相修，當知圓證。

未四、清淨

第二無相住，於菩薩無相修，當知清淨。

未五、領受

無礙解住、最上成滿菩薩住，於菩薩無相修果，當知領受。

卯二、廣辨¹¹ 辰一、勝解行住² 巳一、舉行狀相³ 午一、問

問：勝解行住菩薩轉時，應知何行、何狀、何相？

應知何行何狀何相者：行謂發趣，狀謂獲得，相謂等流。如下說言：諸行能入，說名爲行；若正入時，說名爲得；入已果利成辦圓證，說名等流。

如是次第配釋應知。下皆準釋。

午二、答² 未一、顯修得³ 申一、狹小有闕² 酉一、在正行² 戌一、於自佛法²

亥一、未得自在

答：勝解行住菩薩轉時，思擇力勝；於諸菩薩所作加行，以分別慧數數思擇方能修作，未能任性成辦所作。

亥二、未得勝修² 天一、舉其修因

未得堅固相續無退菩薩勝修。

未得堅固相續無退菩薩勝修者：所作決定，是名堅固。所作無闕，是名相續。隨所獲得無復退轉，是名無退。極歡喜住有此修相，故名勝修。勝解行住未能現前，故名未得。

天二、例修果等² 地一、功德攝

如於勝修，於勝修果種種無礙、勝解、神通、解脫、等持、等至，亦未能得。地二、勝利攝

未能超越五種怖畏。謂不活畏、惡名畏、死畏、惡趣畏、處眾怯畏。

戌二、於他有情

於所應作利有情事，策勵思惟方能修作，未能任性哀愍愛念。或於一時，於諸有情，由身語意發起邪行；或於一時，於諸境界發起貪著；或於一時，於資生具現有慳吝。

酉二、在意樂² 戌一、別辨相² 亥一、於三寶等² 天一、自內無知² 地一、標

信他諸佛菩薩而行，未能自內了知真實。

地二、釋

謂於如來、或法、或僧、或真實義、或有情事、或佛菩薩神通威力、或因、或果、或應得義、或得方便、或於所行皆隨他信。成就狹小聞所成智、思所成智，而非無量。

謂於如來或法或僧等者：力種性品說：菩薩具多勝解，有其八種勝解依處。一者、於三寶功德勝解依處，二者、於佛菩薩威力勝解依處，三者、

於真實義勝解依處，四者、於因勝解依處，五者、於果勝解依處，六者、於應得義勝解依處，七者、於得方便勝解依處，八者、於善言、善語、善說勝解依處。（陵本三十八卷七頁³¹¹⁷）今此所說，隨應當釋。彼說善言、善語、善說勝解依處，即此所行，以一切所知為所應行故。又成熟有情，名有情事。如成熟品說應知。（陵本三十七卷二十頁³⁰⁷⁶）

天二、或時失念

又即於此或時忘失，有忘失法。

亥二、於大菩提

成就菩薩苦遲通行，於大菩提無猛利樂欲，無熾然精進，無有甚深牢固淨信。

於大菩提無猛利樂欲等者：成熟品說：若時菩薩住中品成熟，爾時便有中品欲樂、中品加行。此盡第二無數劫邊際，熾然、無動覺品善法已得相應。即於此中，性淳厚故，極猛盛故，能有上品廣大果故，大勝利故，名為熾然。不轉還故，不退墮故，常勝進故，名為無動。（陵本三十七卷二

十六頁³⁰⁹³）今勝解行住菩薩住下品成熟，唯有下品欲樂、下品加行。由是說無猛利樂欲、熾然精進。有轉還故，有退墮故，非爲無動，由是說無甚深牢固淨信。

戌二、隨難釋。³ 亥一、標

於其三處有忘失念。

亥二、列

一、於境界可意、不可意色聲香味觸法中，或於一時其心顛倒，忘失正念；
二、於受生彼彼身中，既受生已，忘失前生；三、於所受、所持諸法，久作久說，或於一時有所忘失。

亥三、結

於是三處有忘失念。

申二、所作不定。³ 酉一、或具聰慧

或於一時具足聰慧，於其諸法能受、能持，於其義理堪能悟入，或於一時則

不如是。

酉二、或具憶念

或於一時具足憶念，或於一時成忘念類。

酉三、勉爲他說

於諸有情未能了知如實調伏善巧方便，於自佛法亦未了知如實引發善巧方便。爲他說法教授教誡，勉勵而轉；勉勵轉故，不如實知，或時虛棄、或不虛棄。如闇中射，或中不中，隨欲成故。

隨欲成故者：由彼意樂未清淨故，致有斯失應知。

申三、所得有退。⁶ 酉一、退已發心

或於一時，於大菩提雖已發心，而復退捨。

酉二、捨先受戒

或於一時，棄捨菩薩先所受學淨戒律儀，不能受學。

酉三、厭利有情

或於一時，雖勤修習利有情事，而於中間生厭倦故，復還棄捨利有情事。由意樂故，欲令自樂；由思擇故，欲令他樂。

酉四、數犯淨戒

於諸菩薩所有違犯，多分遍知，非數遍知、無餘永斷，由於毀犯數現行故。

酉五、退怖大乘

或於一時，於菩薩藏法毗奈耶他所引奪。或於一時，聞說甚深廣大法教而生驚怖，其心搖動、猶豫、疑惑。

酉六、遠離大悲

於諸有情，遠離一切現行大悲。於諸有情，少分現前利益安樂，未能廣大、未能無量。

未二、辨學等² 申一、指上說

於如上說一切圓滿菩薩學中，未能普學。於如上說一切圓滿菩薩諸相，未皆成就。於如上說一切圓滿二分菩薩正加行中，未等顯現。於如上說菩薩意

樂，猶未清淨。

申二、隨難釋

於其無上正等菩提，自謂爲遠，未於涅槃增上意樂安立深固。如於生死長時流轉，於其熾然、無動、妙善菩提分法，未能成就。

午三、結

如是等類，當知是名勝解行住菩薩轉時，諸行狀相。

如於生死長時流轉等者：由彼菩薩猶往惡趣，是故說言長時流轉。如是熾然、無動、極善清淨覺品善法，當知一切皆未相應。如成熟品說。（陵本三十七卷二十六頁³⁰⁹³）此應準知。

巳二、辨其差別² 午一、於自三品

是諸菩薩勝解行住，下忍轉時，如上所說諸行狀相，當知上品；中忍轉時，如上所說諸行狀相，當知中品；上忍轉時，如上所說，當知下品，其性微薄。

午二、於極喜住。³ 未一、無間入心別

即於如是上忍轉時，於上所說諸行狀相，漸次能令無餘永斷，從此無間，當知菩薩入極喜住。

未二、染淨相違別

由得方便極喜住中，勝解行住所說諸法皆無所有，與彼相違所有一切白品諸法皆悉顯現。由諸菩薩成就此故，轉得名爲淨勝意樂。

未三、淨勝意樂別。² 申一、標簡

勝解行住菩薩轉時，雖有少分軟中上品方便展轉清淨勝解，而未得名淨勝意樂。

申二、釋因

何以故？由此勝解爲彼多種諸隨煩惱染汙而轉。

爲彼多種諸隨煩惱染汙而轉者：種性品說：有四隨煩惱與白法相違，是名多種諸隨煩惱。若具不具，爲所染汙，名染汙轉。四隨煩惱如彼條列應

知。（陵本三十五卷七頁²⁸⁴⁵）

極歡喜住菩薩住時，一切勝解諸隨煩惱皆悉永斷，離隨煩惱淨勝解轉。

辰二、極歡喜住。² 巳一、問

問：極歡喜住菩薩轉時，應知何行何狀何相？

巳二、答。² 午一、略說。² 未一、別辨相。³ 申一、善決定願。³ 酉一、簡前住

答：若諸菩薩，從勝解行住入極歡喜住，先於無上正等菩提菩薩弘願，未善通達菩提自性，未善通達菩提方便，多分隨順他緣而轉，不善決定。

酉二、顯六相。³ 戌一、初三相攝

除捨彼故，發起六相新善決定、內證修性菩薩大願。

發起六相新善決定內證修性菩薩大願者：於此住中，由證法性發菩提心，是名內證修性。菩薩大願初無漏生真實智攝，是名新善決定。齊此名爲已入初地，非勝解行地攝故。十地經論說：此善決定有六種。一者、觀相善決定。真如觀一味相故，如經無雜故。二者、真實善決定。非一切世間境

界，出世間故，如經不可見故。三者、勝善決定。大法界故，一切佛根本故，如經廣大如法界故。四者、因善決定。有二種。一、成無常愛果因善決定。是因如虛空，依是生諸色，色不盡故，如經究竟如虛空故。二、常果因善決定。得涅槃道，如經盡未來際故。五者、大善決定。隨順作利益他行，如經覆護一切眾生界故。六者、不怯弱善決定。入一切諸佛智地不怯弱故，如經佛子是諸菩薩乃至入現在諸佛智地故。此說六相，如彼應釋。又復此中，新善決定，當知即彼觀相善決定攝；內證修性，當知即彼真實善決定攝；菩薩大願，當知即彼勝善決定攝。如所說義，配釋可了。

戌二、次二相攝

超過一切餘白淨願；無等不共，果是世間，超過一切世間境界；隨救一切有情苦故，不共一切聲聞、獨覺；雖一剎那生起此願，法性自爾能得菩薩無量白法可愛之果；

超過一切餘白淨願等者：爲利他故，不捨生死、不染生死，修行六種波羅蜜多正行，是名一切餘白淨願。望證法性發心，名爲餘故。餘白淨願，感可愛果，雖是世間，而非一切世間境界。由無染汙，一切世間不可見故，即依此義釋名無等。常處生死，隨救一切有情苦故，不共一切聲聞、獨覺，即依此義釋名不共。今此證法性發心，雖一剎那生起，法爾能得無量可愛之果，以此發心，普能攝受餘白淨願，即依此義釋名超過。由此義顯，因善決定中，成無常愛果因善決定，及大善決定應知。

戌三、後一相攝

又此大願無變無盡自性得已，無異因緣令其退轉、變異可得；

又此大願無變無盡等者：此中義顯，因善決定中，常果因善決定應知。依彼常果，說名無變無盡自性。由證此已，得涅槃道，盡未來際願善決定，是故說言無異因緣令其退轉、變異可得。

又是勝分，墮後邊際極大菩提。

酉三、結異名

如此菩薩善決定願，亦名發心。

又是勝分等者：此中義顯不怯弱善決定應知。能入一切諸佛智地，是故說言墮後邊際極大菩提。

申二、四相發心。³ 酉一、標

又即如是菩薩發心，略有四相應當了知。

酉二、徵

何等爲四？

酉三、釋² 戌一、列相

一者、何相菩薩發心？二者、發心何所緣慮？三者、發心何狀、何相、何自性起？四者、發心有何勝利？由此四相，應當了知菩薩發心。

戌二、辨義⁴ 亥一、因相

謂諸菩薩勝解行住，已善積集一切善根，於菩薩行已正超出。略說是相菩薩發心。

一切善根等者：十地經論中，略以十句分別依何身生如是心，即此何相菩薩發心。彼說厚集善根爲初，現大慈悲爲後。十句差別中，初句是總，即此已善積集一切善根。餘句是別，即此於菩薩行已正超出。言超出者，謂能任性成辦所作，非如勝解行住，以分別慧數數思擇，方能修作故。

亥二、緣慮

又諸菩薩，緣當來世無倒速疾一切菩提資糧圓滿，一切菩薩利有情事圓滿，無上正等菩提一切種一切佛法圓滿，

一切種一切佛法圓滿者：此說如來一切種妙智。謂於能引有義聚法、能引無義聚法、能引非有義非無義聚法，皆現等正覺故。如是三聚，名一切種。即於其中所有諸法，說名一切佛法應知。

諸佛所作事業圓滿。略說緣慮如是發心。

諸佛所作事業圓滿者：十地經論中，略以十句分別爲何義生如是心，即此略說緣慮如是發心一分所攝。彼說十句，爲得佛智爲初，乃至爲得轉大法

輪無畏爲後。於中佛智者，謂無上智，知斷證修，故此佛智有九種業差別。爲求彼故，生如是心，乃至廣說。當知佛智，即此前說無上正等菩提一切種一切佛法圓滿。九業差別，即此所說諸佛所作事業圓滿。

亥三、狀相

又諸菩薩，無倒速疾發起一切菩提資糧，隨順於諸有情一切菩薩所作，隨順獲得無上正等菩提無師自然妙智，隨順遍一切種諸佛所作事業，隨順廣大願心。

無倒速疾發起一切菩提資糧等者：此釋前說發心何狀、何相、何自性起。十地經論中，略以十句分別以何因生如是心，即此所顯。彼說十句，以大悲爲首，乃至究竟如虛空盡未來際爲後。由是當知，大悲爲首，即是發心生起自性；所餘諸句，皆其狀相。彼說智慧增上，即此無倒速疾發起一切菩提資糧。彼說方便善巧所攝、直心深心淳至、如來力無量、善決定眾生力智力，即此隨順於諸有情一切菩薩所作。彼說隨順自然智，即此隨順獲

得無上正等菩提無師自然妙智。彼說能受一切佛法以智慧教化，即此隨順遍一切種諸佛所作事業。彼說廣大如法界、究竟如虛空盡未來際，即此隨順廣大願心。

亥四、勝利² 天一、超過凡地

又諸菩薩發是心已，超過菩薩凡異生地，證入菩薩正性離生，生如來家，成佛真子，決定趣向正等菩提，決定紹繼如來聖種。

超過菩薩凡異生地等者：自下釋前發心有何勝利。十地經論中，略以種種分別心生時相，即此所顯。謂過凡夫地是總，即此超過菩薩凡異生地。過有八種是別，謂入位過爲初，畢定過爲後。彼云：一者、入位過，初成出世間心，如始住胎相似法故，如經入菩薩位故。即此證入菩薩正性離生。彼云：二者、家過，家生相似法故，如經生在佛家故。即此生如來家。彼云：三者、種姓過，子相似法大乘行生故，如經種姓尊貴無可譏嫌故。即此成佛真子。彼云：四者、道過，世間出世間道不攝攝故，異道生相似法

故，如經過一切世間道入出世間道故。即此決定趣向正等菩提。彼云：八者、畢定過，佛種不斷究竟涅槃道成就相似法故，如經如來種中畢定究竟阿耨多羅三藐三菩提故。即此決定紹繼如來聖種。彼云：五者、法體過，六者、處過，七者、業過。今於此中略不具說。

天二、極多歡喜²。地一、辨。玄一、由得證淨

又正獲得如實證淨，極多歡喜。

又正獲得如實證淨等者：信敬三寶多歡喜故，十地經論中敬歡喜攝。

玄二、由離瞋恚

於他有情遠離多分忿、害、鬥諍。

遠離多分忿害鬥諍者：見諸眾生不如說修行、威儀不正時，忍不瞋故，名遠離忿，十地經論中不瞋歡喜攝。教化他、攝取眾生時，慈悲調柔，名遠離害，十地經論中不惱歡喜攝。自心調伏、論義解說時，心不擾動，名遠離鬥諍，十地經論中不壞歡喜攝。如是遠離言多分者，由經中說，多不瞋

恨、多不惱眾生、多不壞他義故。

玄三、由離憍慢

於一切種菩薩所作利衆生事，於一切種菩提資糧圓滿，於一切種無上菩提一切佛法，於一切種佛所作事，以淨增上意樂，攀緣勝解趣入。於是諸法速疾圓證，自觀己身能正隨順，如是解了，極多歡喜。

自觀己身能正隨順等者：謂由自見至菩提近故，十地經論中堪受歡喜攝。

玄四、由離貪喜

又自觀見妙善廣大，能引出離，無染無等，攝受饒益身心歡喜，於此無量熾然善法皆悉成就。

又自觀見妙善廣大等者：十地經論說：有愛歡喜，樂觀真如法故。即此妙善廣大，能引出離，無染無等。又說：調柔歡喜，謂自身心遍益成就；踊躍歡喜，謂自身心遍益增上滿足。即此攝受饒益身心歡喜。又說：慶歡喜，自覺所證校量勝故。即此無量熾然善法皆悉成就。

玄五、由離驚怖

又自了知：我於無上正等菩提，今已鄰近，於大菩提我勝意樂已得清淨，我今已離一切怖畏。由是因緣，極多歡喜。

玄六、由離怖畏² 黃一、標

由諸菩薩已能發起善決定心，於五怖畏皆悉除斷。

黃二、釋⁵ 字一、無不活畏

由善修習無我妙智，分別我想尚不復轉，況當得有分別我愛、或資生愛。由是因緣，無不活畏。

字二、無惡名畏

由於他所無所希望，常自發起如是欲樂：我當饒益一切有情，非於有情有所求覓。由是因緣，無惡名畏。

字三、無有死畏

由離我見，於我無有失壞想轉，故無死畏。

字四、無惡趣畏

自知死後，於當來世決定值遇諸佛菩薩，由此決定無惡趣畏。

字五、無處眾畏

由意樂見一切世間，尚無有一與我齊等，何況殊勝，是故無有處眾怯畏。

由意樂見一切世間等者：由自了知：於大菩提我勝意樂已得清淨故。見一切世間皆無齊等。

地二、結

菩薩如是遠離一切五種怖畏，遠離一切聞說甚深正法驚怖，遠離一切高慢憍傲，遠離一切他不饒益種種邪行所起瞋恚，遠離一切世財貪喜。無染汙故，無所憎背；有熾然故，無俗意樂；能圓滿證一切善法。

菩薩如是遠離一切五種怖畏等者：此中隨應結前所說。於五怖畏皆悉除斷，是即遠離一切五種怖畏。於大菩提如實證淨，已離一切怖畏，是即遠離一切聞說甚深正法驚怖。於一切種能正隨順解了，是即遠離一切高慢憍

傲。於他有情遠離忿、害、鬥諍，是即遠離一切他不饒益種種邪行所起瞋恚。能引出離，無染無等，攝受饒益身心歡喜，是即遠離一切世財貪喜。如是別別結前說已，復總結顯生歡喜相，是故說無染汙及有熾然，由是能圓滿證一切善法。此結歡喜，說名勝利。

申三、引發正願。³ 酉一、標

又現法中，能起菩薩一切精進，信增上力為前導故。於當來世，如前所說菩提分品十種大願，今即於此極歡喜住能具引發，由得清淨勝意樂故。

於當來世如前所說菩提分品十種大願者：菩提分品中說：菩薩大願，當知即從正願所出。此復十種，乃至廣說。（陵本四十五卷十七頁³⁶⁵⁹）由彼正願，願於當來攝受一切菩薩善法，攝受一切所有功德。十種大願從彼所出，是故說言於當來世。

酉二、釋² 戌一、別辨相² 亥一、就事起願¹⁰ 天一、為供養佛

為欲供養最勝有情真實福田大師法主，是故引發第一大願。

天二、為受持法

為欲受持彼所宣說無上正法，是故引發第二大願。

天三、為轉法輪

為欲勸請轉未曾有妙正法輪，是故引發第三大願。

天四、為順正行

為欲順彼行菩薩行，是故引發第四大願。

為欲順彼行菩薩行者：十種波羅蜜多，名菩薩行。此是一切菩薩之所應行，為欲順彼，故發大願。

天五、為熟有情

為欲成熟彼器有情，是故引發第五大願。

為欲成熟彼器有情者：無量所調伏界，是名彼器有情。由住種姓堪受正法，是器義故。隨其所應為說正法，於三菩提令得趣入，究竟出離，是名成熟。

天六、爲遍示現

爲欲往趣諸佛國土，奉見如來，承事供養，聽受正法，是故引發第六大願。

天七、爲淨自土

爲淨修治自佛國土，是故引發第七大願。

爲淨修治自佛國土者：十地經論說：淨佛國土有七種相。一者、同體淨，二者、自在淨，三者、莊嚴淨，四者、受用淨，五者、住處眾生淨，六者、因淨，七者、果淨。如彼應釋。

天八、爲同一趣

爲於一切在所生處，常不遠離諸佛菩薩，與諸菩薩常同一味意樂加行，是故引發第八大願。

天九、爲恆利他

常爲利益一切有情，曾不空過，是故引發第九大願。

天十、爲作佛事

爲證無上正等菩提，作諸佛事，是故引發第十大願。

亥二、就願起願

作是願言：如有情界展轉相續，終無斷盡；亦如世道展轉相續，終無斷盡；我此大願生生相續，乃至究竟菩提邊際，常不遠離、常不忘失、常不乖離。如是自誓，心發正願。

戌二、顯略義

當知此中，前就所應願事起願，後即就願以起於願。

酉三、結

如是菩薩十種大願以爲上首，能生無數百千正願。如是菩薩，於當來世具諸大願，於現法中發大精進。

前就所應願事起願等者：前說十種大願，名就所應願事起願。後說願無斷盡，名即就願以起於願。

申四、淨修住法。 酉一、標十法

復有十種淨修住法，由是能令極歡喜住速得清淨。

酉二、別列相¹⁰ 戌一、淨信

一者、於諸佛法深生淨信。

戌二、大悲

二者、觀諸有情緣起道理，證得唯有純大苦蘊，發起大悲。

戌三、大慈

三者、觀見彼已，自誓願言：我當令彼諸有情類，解脫如是純大苦蘊，得第一樂，發起大慈。

戌四、惠施

四者、爲欲救拔一切憂苦，自無顧戀；無顧戀故，能捨內外一切身財，於諸有情而行惠施。

戌五、無有厭倦

五者、爲欲利益諸有情故，從他勤求世出世法，曾無厭倦。

戌六、善知諸論

六者、無厭倦故，證得一切論智清淨，善知諸論。

戌七、善解世間

七者、善知論故，於劣中勝諸有情所，如應如宜而修正行，善解世間。

戌八、修習慚愧

八者、即於如是正加行中，依應時分量等正行，而修慚愧。

依應時分量等正行者：聲聞地中正知而住作如是說：若於是事、是處、是時，如量、如理、如其品類所應作者，即於此事、此處、此時，如量、如理、如其品類正知而作。（陵本二十四卷二十頁²⁰⁶⁶）此說依應時分量等，等取彼所餘相應知。

戌九、堅力持性

九者、即於如是正加行中，得無退轉堅力持性。

戌十、供養如來

十者、以諸上妙利養恭敬及與正行，供養如來。

酉三、結略義

是名十種淨修住法。由此能令極歡喜住速得清淨。所謂淨信、悲、慈、惠捨、無有厭倦、善知諸論、善解世間、修習慚愧、堅力持性、供養如來。

申五、開曉餘住² 酉一、善取其相

又諸菩薩，於此十法受學、隨轉、多修習已，復於餘九增上戒等諸菩薩住，從佛菩薩專精訪求一切種道功德、過失，及神通樂、無失壞道，善取其行、得、等流相，於一切住自然昇進，證大菩提，爲大導師，率領一切有情商侶，超度生死曠野嶮道。

一切種道功德過失等者：隨諸地中所有方便，是名一切種道。能治諸障，是名功德。彼所治障，是名過失。威力神變，隨欲自在，名神通樂。是道非道如實了知，不墮生死曠野嶮道，是名無失壞道。

酉二、釋行等名

當知此中，諸行能入，說名爲行；若正入時，說名爲得；入已果利成辦圓證，說名等流。

申六、修治善根² 酉一、舉淨緣² 戌一、明一切³ 亥一、供養三寶³ 天一、於

諸佛² 地一、現見因緣² 玄一、標

又諸菩薩住此住中，由二因緣現見諸佛。

玄二、釋² 黃一、由麤淨信

或由聽聞菩薩藏說，或由內心發起勝解，信有十方種種異名諸世界中，種種異名諸佛如來，由麤淨信俱行之心，求欲現見。如是求已，如實稱遂。當知是名第一因緣。

黃二、由正願力

又心發起如是正願：隨於彼彼諸世界中，有佛出現，我當往生。如是願已，如實稱遂。當知是名第二因緣。

地二、隨興供養

菩薩如是由羸淨信現見諸佛，由正願力現見諸佛；既得見已，隨力隨能興一切種恭敬供養，奉施種種上妙樂具。

天二、於僧眾

及於僧眾恭敬供養。

天三、於正法

於如來所聽聞正法，無倒受持，精進修行法隨法行。

亥二、成熟有情

以四攝事成熟有情。

亥三、迴向善提

一切善根悉皆迴向無上菩提。

戌二、出略義

由是三種清淨因緣，彼諸善根倍復明淨。謂於佛僧法供養攝受故，以四種攝事成熟有情故，以一切善根迴向善提故。如是乃至無量俱胝那庾多百千

大劫。

酉二、以喻顯

譬如世間點慧工匠，以鑛性金置於火中，如如燒鍊，如是如是轉得明淨。如是淨勝意樂菩薩所有善根，由是三種清淨因緣，轉復明淨，當知亦爾。

申七、受生² 酉一、多作輪王

又住於此，在在生處多作輪王，王贍部洲，得大自在。遠離一切所有慳垢，威被有情，調伏慳吝。

酉二、恆發正願

諸四攝事所作業中，一切不離佛法僧寶，證一切種菩提作意。

諸四攝事所作業中等者：四種攝事方便所攝身語意業，是名諸四攝事之所作業。即於如是一切所作業中，念佛法僧，住大恭敬，除諸妄想，依此一切所作皆願迴向無上菩提，是名一切不離佛法僧寶，證一切種菩提作意。恆發願言：我當一切有情中尊，作諸有情一切義利所依止處。

申八、威力² 酉一、由精進力

若樂發起如是精進，棄捨一切家屬、財位，歸佛聖教，淨信出家。一刹那頃，瞬息須臾能證菩薩百三摩地。以淨天眼，能於種種諸佛國土見百如來。又即於彼變化住持、菩薩住持皆能解了。

變化住持菩薩住持者：謂變化土、受用土如次應知。

以神通力動百世界，身亦能往。放大光明周匝遍照，普令他見。化爲百類，成熟百種所化有情。若欲留命，能住百劫。於前後際各百劫事，智見能入。蘊、界、處等諸法門中，於百法門能正思擇。化作百身，身身皆能現百菩薩眷屬圍繞。

酉二、由正願力

自茲以去，是諸菩薩由願力故，當知無量威力神變，安住如是極歡喜住諸菩薩衆願力增上，能引無量殊勝正願所作神變。如是正願，乃至俱胝那庾多百千大劫，不易可數。

由願力故當知無量威力神變者：謂諸菩薩，若由願力自在增上，所作神變，過於前數不可數知，故言無量。

未二、結略義

當知是名略說菩薩極歡喜住。謂善決定故，四相發心故，發起精進引發正願故，淨修住法故，開曉餘住故，修治善根故，受生故，威力故。

午二、廣指² 未一、指配所說

若廣宣說，如十地經極喜地說。彼十地經廣所宣說菩薩十地，即是此中菩薩藏攝摩怛理迦略所宣說菩薩十住。如其次第，從極歡喜住，乃至最上成滿菩薩住。

未二、釋地住名

應知此中，由能攝持菩薩義故，說名爲地；能爲受用居處義故，說名爲住。

瑜伽師地論科句披尋記卷第四十七

瑜伽師地論科句披尋記卷第四十八

彌勒菩薩說

唐三藏沙門玄奘奉詔譯

韓清淨科記

本地分中菩薩地第二持隨法瑜伽處住品第四之二

辰三、增上戒住² 巳一、問

問：增上戒住菩薩轉時，當知何行、何狀、何相？

巳二、答² 午一、略說² 未一、別辨相⁹ 申一、意樂清淨² 酉一、出意樂³ 戌一、標

答：若諸菩薩，先於極歡喜住，由十種心意樂，已得意樂清淨。

戌二、徵

何等爲十？

戌三、列

一者、於一切師長尊重福田，不行虛誑意樂；二者、於同法菩薩忍辱柔和，易可共住意樂；三者、勝伏一切煩惱及隨煩惱衆魔事業，心自在轉意樂；四者、於一切行深見過失意樂；五者、於大涅槃深見勝立意樂；六者、於諸妙善菩提分法，常勤修習意樂；七者、即於彼修爲隨順故，樂處遠離意樂；八者、於諸世間有染尊位利養恭敬，無所顧戀意樂；九者、遠離下乘，趣證大乘意樂；十者、欲作一切有情一切義利意樂。

酉二、明清淨

如是十種無倒意樂依心而轉，是故說爲意樂清淨。

如是十種無倒意樂等者：十地經說：若菩薩已具足初地，欲得第二地者，當生十種直心。何等爲十？一、直心，二、柔軟心，三、調柔心，四、善心，五、寂滅心，六、真心，七、不雜心，八、不希望心，九、勝心，十、大心。菩薩生是十心，得入第二菩薩離垢地。此中十種無倒意樂，如次應知。

申二、性戒具足

即由如是十種意樂成上品故，極圓滿故，是諸菩薩入證第二增上戒住。於此住中，性戒具足。

申三、離一切犯

極少邪惡業道所攝諸惡犯戒尚不現行，況中上品。又於十種圓滿業道，自性顯現。

性戒具足至自性顯現者：此說律儀戒淨應知。遠離殺生乃至遠離邪見，是名十種圓滿業道。於此業道清淨現行，不由思擇，是名自性顯現。

申四、了知因果業道² 酉一、於因果

菩薩如是性戒具足，能以妙慧，於染不染、惡趣善趣，及諸乘中諸業現行、若因若果、修證安立，如實了知。

酉二、於業道

於異熟果及等流果如是諸業，如實了知。

申五、受行淨業。² 酉一、自能受

自能現斷諸不善業，自能現受一切善業。

酉二、樂勸他

即於其中樂勸導他，能正勸導。

能以妙慧至能正勸導者：此說攝善戒淨應知。言若因者，謂不染。言若果者，謂惡善趣。言修證者，謂於諸乘。言安立者，謂即於彼四諦差別。於此一切皆如實知。又於能與異熟、等流果業，亦如實知。自能遠離不善業道，安住諸善業道；亦令他人能正遠離，能正安住；是故於中樂勸導他，能正勸導。

申六、照愍眾苦

於其種種不平等業現行過失之所染汙諸有情界，若興若衰，等無差別，一切皆墮第一義苦，并住艱辛，種種艱辛之所逼切，甚可哀愍。於彼獲得廣大哀愍，如實觀照。

於其種種不平等業至如實觀照者：此說饒益有情戒淨應知。五取蘊苦，是名第一義苦。生艱辛苦無量差別，如有尋有伺地說。（陵本九卷十一頁677）依彼當知，種種艱辛之所逼切。

申七、善根清淨。² 酉一、指同前

是諸菩薩安住如是增上戒住，廣見諸佛、善根清淨，如前應知。

酉二、喻差別

此差別者，謂如世間善巧工匠，以所鍊金置迦肆娑，置於火中數數燒鍊，轉更明淨。如是菩薩善根清淨，當知亦爾。

申八、受生

於此住中，淨心意樂成滿趣入。在所生處多作輪王，王四大洲。以自在力，令多有情止息犯戒不善業道，勸彼受行諸善業道。

申九、威力

當知威力過前十倍。

未二、結略義

當知是名略說菩薩增上戒住。謂意樂淨故；性戒具足故；離一切種毀犯戒垢故；一切業道、一切因果了知通達故；於諸淨業能自受行，亦樂勸他令其受行故；於有情界諸業所生衆苦艱辛，得大哀愍，如實觀照故；善根清淨故；受生故；威力故。

午二、廣指² 未一、指

若廣宣說，如十地經離垢地說。

未二、配

遠離一切犯戒垢故，名離垢地。由離一切犯戒垢故，即此名爲增上戒住。彼離垢地，當知即此增上戒住。

辰四、增上心住² 巳一、問

問：增上心住菩薩轉時，當知何行、何狀、何相？

巳二、答² 午一、略說² 未一、別辨相⁹ 申一、淨心思惟成滿趣入⁴ 酉一、標

答：若諸菩薩，先於增上戒住，已得十種清淨意樂，作意思惟解了通達。復由餘十淨心意樂作意思惟成上品故，極圓滿故，過增上戒住，入增上心住。

酉二、徵

何等爲十？

酉三、列

一者、作意思惟：我於十種淨心意樂已得清淨；二者、作意思惟：我於十種淨心意樂已清淨故，能不退失；三者、作意思惟：我於一切漏有漏法心不趣入，於違背中能正安住；四者、作意思惟：我能於彼修對治中，識正安住；五者、作意思惟：我能於彼所修對治，不復退失；六者、作意思惟：我於如是堅固對治，不爲一切漏有漏法、一切魔軍之所勝伏；七者、作意思惟：我今能於一切佛法，其心無有怯劣而轉；八者、作意思惟：我今能於一切苦行，無有怯弱；九者、作意思惟：我心一向於大乘中深生信解，終不愛樂餘下劣乘；十者、作意思惟：我於一切利有情事，深心愛樂。

酉四、結

由此十種淨心意樂作意思惟，能入菩薩增上心住。

復由餘十淨心意樂等者：十地經說：菩薩善清淨心行第二地已，欲得第三菩薩地，當起十種深念心。何等爲十？一、淨心，二、不動心，三、厭心，四、離欲心，五、不退心，六、堅心，七、明盛心，八、淳厚心，九、快心，十、大心。菩薩以是十種深念心，得入第三地，十地經論一別釋。此說十種淨心意樂，如次應知。

申二、通達諸行佛智及有情界² 酉一、正通達³ 戌一、於諸行

菩薩安住增上心住，能以種種過患行相壞一切行，於彼諸行深心厭離。

種種過患行相者：十地經說：正觀有爲法，一切行無常、苦、不淨，無常敗壞不久住，念念生滅，不從前際來，不去至後際，現在不住。如是正觀一切諸行，此應準釋。

戌二、於佛智

於佛妙智，能以種種勝利行相，見大勝利。又於其中，能以淳淨一味欲樂，深生愛慕。

種種勝利行相者：十地經說：是菩薩見如來智慧不可思議，無等、無量、難得、無雜、無惱、無憂，能至無畏安隱大城，不復轉還，見能救無量苦惱眾生。此應準釋。

戌三、於有情

於有情界，能以種種苦惱行相，觀爲有苦；於諸有情興悲戀心，生依義心。

種種苦惱行相等者：十地經說：見一切有爲行無量苦惱，復於一切眾生轉生殊勝十心。所謂眾生可愍、孤獨、無救，生殊勝心；恆常貧窮，生殊勝心；三毒之火熾然不息，生殊勝心；閉在三有牢固之獄，生殊勝心；常爲煩惱諸惡稠林所覆，生殊勝心；無正觀力，生殊勝心；遠離善法心無喜樂，生殊勝心；失諸佛妙法，生殊勝心；而常隨順世間水流，生殊勝心；失涅槃方便，生殊勝心；是名生殊勝十心。此應準釋。

酉二、明所作

於一切行無有放逸，爲大菩提熾然精進，於諸有情能起廣大悲愍意樂。

於一切行無有放逸等者：此顯正通達已，能正所作。由於諸行深厭離欲，是故於彼無有放逸。由於佛智見勝利故，深愛慕故，是故爲彼熾然精進。

由於有情觀有苦故，是故於彼能起廣大悲愍意樂。

申三、推求有情脫苦方便

觀諸有情解脫衆苦究竟方便，唯是一切煩惱諸纏無障礙智；觀彼解脫能圓證者，唯於法界一切分別現行雜染生起對治無分別慧；觀能成辦彼智光明，唯是無倒勝三摩地；觀所引發一切靜慮、等持、等至，皆菩薩藏聽聞爲先，皆聞正法以爲緣起。

申四、恭敬正法訪求無倦³ 酉一、發大精進

觀見是已，發大精進訪求多聞。爲聞正法，不惜身命，無有資財內外愛物而不能捨，無有師長不誓承事，無有尊教不誓奉行，無有身苦而不誓受。

酉二、歡喜踊躍

若聞佛法一四句頌，歡喜踊躍，勝得三千大千世界充滿其中大珍寶聚。聞一句法是佛所說，能引正等覺，能淨菩薩行，歡喜踊躍，勝得一切釋、梵、護世轉輪王等極尊貴位。

酉三、堪忍大苦² 戌一、設告言

設有告言：善男子聽！我有一句佛所說法，能引正等覺，能淨菩薩行，汝欲聞不？汝今若能投大火坑受大苦者，當爲汝說。

戌二、如應答

菩薩聞已，歡喜踊躍，答言：我能！我若得聞如前所說一句法義，正使火坑量等三千大千世界滿中熾火，我從梵天尙投身入，況小火坑。爲求佛法，尙應久處大那落迦受大苦惱，況餘小苦而不應受。

申五、能正修行及得安住² 酉一、如實思惟

菩薩發起如是精進，求正法已；復能如實如理思惟，要正修行法隨法行，方

得名爲隨順佛法，非但聽聞文字、音聲而得清淨。

酉二、依聞修習

如是知己，即依所聞正緣法相，遠離諸欲惡不善法，廣說乃至能得世俗四種靜慮、四無色定，及四無量、五種神通具足安住。

申六、隨願受生² 酉一、觀爲義利

既多住已，復還棄捨諸靜慮等、等持、等至，願自在力還來欲界。觀彼彼處，若爲有情能作義利，若能圓滿菩提分法，即便往生。非但自在而生彼處。

酉二、明斷諸縛

如是菩薩離欲貪故，名斷欲縛；棄捨靜慮、等持、等至故，名斷有縛。菩薩先從勝解行地，於法眞如修勝解故，已斷見縛，邪貪恚癡畢竟不轉。

如是菩薩離欲貪故至畢竟不轉者：此釋前說願自在力因緣應知。

申七、善根清淨² 酉一、指同前

廣見諸佛、善根清淨，如前應知。

酉二、喻差別

此差別者，謂如世間善巧工匠，先所燒鍊手中眞金垢穢斯盡，稱量等住。如菩薩善根清淨，當知亦爾。

申八、受生

受生多分作釋天帝，善化有情，令離欲貪。

申九、威力

所有威力，於前住中已說千數，當知此中有百千數。

未二、結略義

當知是名略說菩薩增上心住。謂心意樂作意思惟成滿趣入故；於一切行諸有情界及大菩提，能正通達故；於諸有情脫苦方便，能正推求故；於正法中起大恭敬，訪求無倦故；能正修行法隨法行，於其世俗諸靜慮等、等持、等至、無量神通，能引能住故；棄捨於彼，願自在力隨樂受生故；善根清淨

故；受生故；威力故。

午二、廣指²。未一、指配

若廣宣說，如十地經發光地說。由發聞行正法光明、等持光明之所顯示，是故此地名發光地。由內心淨能發光明，是故說名增上心住。

未二、釋名

由此義故，名發光地；即由此義，當知復名增上心住。

辰五、覺分相應增上慧住²。巳一、問

云何菩薩覺分相應增上慧住？

巳二、答²。午一、略說²。未一、別辨相¹³。申一、由法明入成滿得入²。酉一、明趣入

謂諸菩薩，先於增上心住，以求多聞增上力故，已得十法明入。由此十法明入成上品故，極圓滿故，超過增上心住，入初增上慧住。

酉二、釋略義

如是十法明入文辭，如契經說，應知其相。

如是十法明入文辭等者：謂依智明，能入如來所說法中，名法明入。十地經說：若菩薩得第三菩薩地，具足清淨明已，欲得第四菩薩地者，當以十法明入，得入第四地。何等爲十？一、思量眾生界明入，二、思量世界明入，三、思量法界明入，四、思量虛空界明入，五、思量識界明入，六、思量欲界明入，七、思量色界明入，八、思量無色界明入，九、思量勝心決定信界明入，十、思量大心決定信界明入。菩薩以此十法明入，得入第四地。今指彼經，故說應知。

謂若彼假設；若於中假設；若由此假設；若平等勝義；若染惱故、清淨故，成染成淨；若由繫縛煩惱所染；若由無上清淨所淨。當知是名十法明入略所說義。

若彼假設等者：如經思量眾生界明入，名彼假設，思量分別眾生界假名差別故。如經思量世界明入，名於中假設，思量分別依處假名差別故。如經思量法界明入，由此假設，思量分別善不善等諸法差別故。如經思量虛空

界明入，即此平等勝義，思量虛空無盡相故。如經思量識界明入，即此成染成淨，識爲染淨所依止故。如經思量欲、色、無色界明入，即此繫縛煩惱所染。如經思量勝心、大心決定信界明入，即此無上清淨所淨。煩惱不染，名爲勝心。不捨有情，名爲大心。

申二、得熟智法

是諸菩薩住此住中，如契經說：不壞意樂而爲上首，所有十種能成熟智、智成熟法皆悉成就。長如來家，得彼體法。

如契經說不壞意樂而爲上首等者：十地經說：以十種法智教化成熟。一、不退轉心故；二、於三寶中決定恭敬，畢竟盡故；三、分別觀生滅行故；四、分別觀諸法自性不生故；五、分別觀世間成壞故；六、分別觀業有生故；七、分別觀世間涅槃故；八、分別觀眾生世界業差別故；九、分別觀前際後際差別故；十、分別觀無所有盡故。諸佛子！菩薩如是十種法智教化成熟，即於如來家轉有勢力，得彼內法故。此說十種能成熟智、智成熟

法，如彼應釋。當知此中，唯取經意，名如經說。菩薩十法明入，說名能成熟智，由能成熟他有情故。要以十法爲依，方能令彼智得成熟，是故復說智成熟法。即此十種法中，不退轉心爲初，是故說言不壞意樂而爲上首。於如來家轉有勢力，是名長如來家。得如來身所有諸法，是名得彼體法。謂即十種法智，教化成熟有情故。

申三、修習菩提分法

觀一切種菩提薩埵增上力故，修四念住而爲上首三十七種菩提分法。

觀一切種菩提薩埵增上力故者：謂觀一切種菩提及與薩埵，能令對治修增長，名增上力。如經觀一切智智故，不捨一切眾生心故。

申四、斷微細見執著動亂

如契經說：由於此法方便攝受勤修習故，最極微細薩迦耶見，執著一切蘊、界、處等一切動亂，皆得畢竟不現行斷。

最極微細薩迦耶見等者：此中薩迦耶見與身俱生，由是說言最極微細。

此爲根本，能生一切餘見及與我慢，是名執著一切蘊、界、處等一切亂動。如是一切皆悉斷滅，是名畢竟不現行斷。當知此即煩惱對治修行增長之果。

申五、制業開業遠離習近

由彼斷故，一切如來所訶毀業皆不現行，一切如來所讚美業如實隨轉。

一切如來所訶毀業等者：此說業對治修行增長之果。若業爲諸煩惱所染，是不應作，此即如來所訶毀業。若順諸菩薩行，是所應作，此即如來所讚美業。

申六、心轉調柔及善清淨

既如是已，其心轉復滋潤、柔和，有所堪能；其心轉復種種行相皆善清淨。

其心轉復滋潤柔和等者：十地經說：如是如是成潤益心、軟心、調心、安隱樂心、不染心、轉求上上勝行心、轉求勝智心、救一切世間心、恭敬諸師隨順受教心、隨所聞法修行心。此說轉復滋潤，即彼成潤益心。此說柔

和，即彼軟心。此說有所堪能，即彼調心。此說種種行相皆善清淨，即彼安隱樂心，乃至隨所聞法修行心。以彼諸心皆是離過對治所顯，故此總說種種行相。

申七、隨順意樂功德隆盛

又善知恩、知報恩等隨順意樂，種種白法皆悉成就。

又善知恩等者：十地經說：是菩薩如是成知恩心，知報恩心，轉柔和，同止安樂，直心、軟心，無稠林行、無有諂曲、無有我慢，善受教誨，得說者意，如是善心成就，如是寂滅心成就，如是善寂滅心成就。此應準釋。彼說善心、寂滅心，及善寂滅心，即此種種白法應知。

申八、尋求上業發大精進

尋求上地能修治業，發大精進，逮得安住。

申九、修淨意樂勝解界性

由此因緣，所有意樂、增上意樂勝解界性，皆得圓滿。

所有意樂增上意樂等者：增上意樂品說：菩薩於諸有情深心發起七相憐愍，名善意樂、極善意樂。（陵本四十七卷九頁³⁷⁶⁰）是即此中所有意樂。又說：當知此中，淨信爲先、擇法爲先，於諸佛法所有勝解信解決定，是名菩薩增上意樂。（陵本四十七卷十頁³⁷⁶³）如是所有意樂、增上意樂，由勝解故，習所成性，是名勝解界性。此由前說發大精進爲其因緣，故得圓滿。

申十、魔怨無動

由是因緣，一切外道、種種魔軍、聖教怨敵，不能映奪、不能傾動。

一切外道種種魔軍等者：此由前說勝解界性圓滿爲其因緣，故彼一切不能映奪、不能傾動。

申十一、善根清淨² 酉一、總辨善根² 戌一、指同前

廣見諸佛、善根清淨，廣說如前，應知其相。

戌二、喻差別

此差別者，謂如世間善巧工匠，以所鍊金作莊嚴具，非餘未作莊嚴具金之所映奪。如是此中菩薩善根，非餘安住凡住菩薩所有善根所能映奪。

酉二、別喻慧根

如末尼寶所放光明，非餘寶珠所能映奪，一切世間風水雨等，不能斷滅所放光明。如是此中菩薩所有智慧光明，一切聲聞及獨覺等不能映奪，一切魔怨不能斷滅。

申十二、受生

受生多作蘇夜摩天王，善化有情，令其除滅薩迦耶見。

申十三、威力

所有威力，於前住中說百千數，當知此中說俱胝數。

未二、結略義

當知是名略說菩薩覺分相應增上慧住。謂法明入成滿得入故；成熟智故；修習菩提分法故；薩迦耶見等一切執著動亂斷故；制業、開業遠離習近故；由

是因緣心調柔故；隨順功德皆隆盛故；依所尋求修治地業發大精進故；由是因緣，所有意樂、增上意樂勝解界性淨修治故；由是因緣，一切聖教所有怨敵不能映奪及傾動故；善根清淨故；受生故；威力故。

午二、廣指³。未一、指

若廣宣說，如十地經焰慧地說。

未二、釋

於此地中，菩提分法如實智焰，能成正法教慧照明，是故此地名焰慧地。

未三、配

又即彼地，此中說名覺分相應增上慧住。

辰六、諸諦相應增上慧住²。巳一、問

云何菩薩諸諦相應增上慧住？

巳二、答²。午一、略說²。未一、別辨相¹⁰。申一、平等意樂成滿得入³。酉一、明證入

謂諸菩薩，先於覺分相應增上慧住，已得十種平等清淨意樂。由彼平等清淨

意樂成上品故，極圓滿故，超過第一增上慧住，證入第二增上慧住。

酉二、指經說

十種平等清淨意樂所有文辭，如契經說，應知其相。

十種平等清淨意樂所有文辭等者：十地經說：若菩薩得第四菩薩地，善滿諸行已，欲入第五菩薩地，當以十平等深淨心，得入第五地。何等爲十？一、過去佛法平等深淨心故；二、未來佛法平等深淨心故；三、現在佛法平等深淨心故；四、戒淨平等深淨心故；五、心淨平等深淨心故；六、除見疑悔淨平等深淨心故；七、道非道智淨平等深淨心故；八、行斷智淨平等深淨心故；九、思量一切菩提分法上上淨平等深淨心故；十、化度一切眾生淨平等深淨心故。諸佛子！菩薩以是十種平等深淨心，得入第五菩薩地。今指彼經，故說應知。

酉三、明略義

謂無等覺與諸覺等，超過所餘諸有情界及以諸法，如其平等。當知是名十種

平等清淨意樂略所說義。

謂無等覺等者：經說：過去、未來、現在佛法平等深淨心故，即此無等覺義。經說：所餘戒淨、心淨，乃至化度一切眾生淨平等深淨心故，即此無諸覺等義。由彼諸心隨順諸佛法故，總攝一切，名諸覺等。於諸等覺及諸覺等不起分別，說名為無，由是超過補特伽羅我慢及法我慢。於彼有情及以諸法，如實通達無有增減，是名如其平等，此即釋彼清淨意樂名平等義。

申二、善巧方便觀察諸諦。² 酉一、指經說

如是菩薩住此住中，多分希求智殊勝性。於四聖諦，由十行相如實了知。一切文辭，如契經說，應知其相。

於四聖諦由十行相如實了知等者：十地經說：是菩薩如實知是苦聖諦、是苦集諦、是苦滅諦，如實知是至滅苦道聖諦，是菩薩善知世諦、善知第一義諦、善知相諦、善知差別諦、善知說成諦、善知事諦、善知生諦、善知盡無生智諦、善知令入道智諦、善知一切菩薩地次第成就諦及善知集如來智諦。此四聖諦，即彼經說是苦聖諦，乃至是道聖諦。此十行相，即彼經說世諦爲初，乃至一切菩薩地次第成就諦及集如來智諦爲後應知。

酉二、明略義

謂依曉悟他、依自內智、依俱處所，名爲此說。依於契經、調伏、本母，名由此說。依於現在衆苦自性、依於未來苦因生性、依於因盡彼盡無生性、依於修習彼斷方便性，名如此說。當知是名十種行相四聖諦智所有略義。

謂依曉悟他等者：此中略義，非說四聖諦智十種行相，然是彼智所有略義。言依曉悟他者，是即十種行相略義，由此一切能熟他故。言依自內智者，是即四聖諦智略義，於彼一切如實知故。言依俱處所者，是即總說十相四聖諦智略義，依他、依自而生起故。爲此一切，是故宣說名爲此說。言契經、調伏、本母者，此顯佛教由事施設建立相，以此三事總攝一切諸佛言教故。由此三事而有所說，名由此說。言依於現在衆苦自性等者，以

此爲依，如次建立四諦差別。如其自性而宣說故，名如此說。

申三、毀壞諸行悲愍有情

如是於諦善巧菩薩，於一切行以慧正毀，於有情界增悲意樂，於前後際愚癡有情所有邪行能正通達。

於前後際愚癡有情所有邪行者：謂如前際無知、後際無知、前後際無知諸有情類，於彼諸行起不如理分別，或執爲斷、或執爲常，名彼所有邪行。

申四、發願攝受福智資糧

爲欲令彼得解脫故，攝受廣大福智資糧，心發正願。

申五、念慧行等功德增盛

及即於彼意樂引攝正念慧行而爲上首，所有衆多殊勝功德皆悉增盛。

申六、無餘作意勤熟有情

諸餘作意皆悉遠離。以其種種成熟方便成熟有情。

諸餘作意皆悉遠離者：一切聲聞、獨覺下劣作意，名餘作意，捨有情故。

申七、引發世間工業明處² 酉一、標所爲

如契經說：所有種種能益有情世俗書論、印算計等工業明處，於是一切皆能引發；

世俗書論等者：因論聲論及醫方論，是名世俗書論。工業明處有十二種，印算計外，餘置等言。

於諸有情深悲愍故，漸次乃至方便安立妙菩提故。

於諸有情深悲愍故等者：此顯爲欲引發一切所由，拔生死苦，名深悲愍。

先以種種作諸饒益，隨順攝取，是名方便。於妙菩提未信入者，漸令信入，是名安立。

酉二、明略義

隨順世間言說事故；爲欲方便壞貧窮故；爲令世間諸界錯亂、人非人等所起災患皆息滅故；爲施無罪諸戲樂具，除彼非法諸戲樂故；諸有希求種種居處資生具者，爲少用功皆能施與種種居處資生具故；爲欲拔濟諸王賊等逼惱事

故；爲欲開制是處非處諸加行故；爲欲安立吉非吉事，令取捨故；爲正勸獎，於現法中令其展轉不相謀掠，及爲宣說當來無倒勝生道故。當知是名能益有情工業明處略所說義。

隨順世間言說事故等者：自下爲顯一切工業明處能益有情略義。世俗書論，是名世間言說。印算計等一切工業，名世間事。此句是總，皆爲隨順彼有情故。餘句是別，隨其品類差別說故。

申八、善根清淨² 酉一、總辨善根² 戌一、指同前

其餘一切，如前應知。

其餘一切如前應知者：廣見諸佛、善根清淨，是名其餘一切。如前極歡喜住廣說應知。

戌二、喻差別

此差別者，謂如世間善巧工匠，以所鍊金作莊嚴具，牟娑羅寶瑩飾廁鈿，所有餘金無與等故，不能映奪。如是此中菩薩善根，一切聲聞及諸獨覺、餘地

菩薩不能映奪。

酉二、別喻慧根

又如日月諸宿光明，一切風輪不能映奪，然其迴轉共彼風同。如是此中菩薩妙慧，一切聲聞、諸獨覺等不能映奪，然其所作與世共同。

申九、受生

受生多作觀史多天王，善化有情，令捨一切外道邪法。

申十、威力

所有威力，當知此說千俱胝數。

未二、結略義

當知是名略說菩薩諸諦相應增上慧住。謂十平等清淨意樂成滿得入故；善巧方便觀察諸諦漸增長故；毀壞諸行、悲愍有情漸增長故；即爲是義，長養廣大福智資糧，心發正願勤加行故；念慧行等德增長故；無餘作意，以一切種成熟有情勤加行故；引發世間工巧業故；善根清淨故；受生故；威力故。

午二、廣指³。未一、指

若廣宣說，如十地經極難勝地。

未二、釋

今此地中，顯示菩薩於諸聖諦決定妙智極難可勝，是故此地名極難勝。

未三、配

即由此義，應知此中諸諦相應增上慧住。

辰七、緣起相應增上慧住²。巳一、問

云何菩薩緣起相應增上慧住？

巳二、答²。午一、略說²。未一、別辨相¹¹。申一、十法平等性成滿得入³。酉一、

指經說

謂諸菩薩，先於諸諦相應增上慧住，已得十種法平等性，當知文辭如經廣說。

已得十種法平等性等者：十地經說：若菩薩已善具足第五地道，欲入第六菩薩地，當以十平等法，得入第六地。何等爲十？一者、一切法無相平等

故；二者、一切法無想平等故；三者、一切法無生平等故；四、一切法無成平等故；五、一切法寂靜平等故；六、一切法本淨平等故；七、一切法無戲論平等故；八、一切法無取捨平等故；九、一切法如幻、夢、影、響、水中月、鏡中像、焰、化平等故；十、一切法有無不二平等故。論一
一釋，此應準知。

酉二、明得入

如是十種法平等性成上品故，極圓滿故，超過前住得入此住。

酉三、釋略義

謂於一切法，由有勝義自性無相平等性故；言說造作影像無相平等性故；即由此相自然不生平等性故；因亦不生平等性故；自然與因皆不生故，畢竟本寂平等性故；現有體事能取正智，離諸戲論平等性故；遠離一切取捨造作平等性故；即此煩惱衆苦雜染離繫解脫平等性故；分別所執境界自性如幻化等平等性故；無分別智所行自性有無無二平等性故。當知是名此中十種法平等

性略分別義。

由有勝義自性無相平等性故等者：如次配釋十種法平等性應知。於中，即此煩惱眾苦雜染離繫解脫平等性故者，當知此即釋前遠離一切取捨造作，名平等性。謂即煩惱眾苦雜染名之爲取，離繫解脫名爲捨故。此即經說一切法無取捨平等略分別義。餘如文知。

申二、覺悟緣起生解脫門

如是菩薩住此住中，於諸有情增長悲愍；於大菩提生起猛利欲樂希求；於諸世間合散生滅，以一切種緣起正觀觀察了知。依緣起智，能引發空、無相、無願三解脫門。

於諸世間合散生滅等者：有情自體，是名世間。煩惱繫縛眾緣和合，是名爲合，合故有生。若彼煩惱眾緣斷壞，是名爲散，散故永滅。於此一切，依緣起支順逆觀察，得如實智，名以一切種緣起正觀觀察了知。由觀緣起二無我性，是故能引空解脫門。觀彼有支一一還滅，是故能引無相解脫

門。觀彼流轉不生願樂，唯除大悲不捨眾生，是故能引無願解脫門。此解脫門唯出世攝，如顯揚論別釋其相應知。（二卷十六頁）

申三、一切邪想皆不現行

由是因緣，所有自他、作者、受者、有無等想，皆不復轉。

由是因緣等者：經說菩薩修行三解脫門，離彼我相，離作者、受者相，離有無相。如是離三種相，如其次第，三解脫門爲其因緣，是故此中亦作是說。

申四、顧念有情攝受生死

菩薩如是善於勝義顧念有情，

善於勝義顧念有情者：此顯菩薩不染生死、不捨生死，智悲增上，故作是說。

如理通達煩惱繫故，緣和合故，有爲諸法自性羸劣。離我我所無量過失汙染而轉；非離一切煩惱繫縛，衆緣和合。

有爲諸法自性羸劣等者：色非色蘊，是名有爲諸法。各別生因，名彼自性。自不能生，待緣方生，是名羸劣。又復諸識，自性不能染他，然爲他染，故名羸劣。由是當知，有爲諸法無量過失汙染而轉，唯由一切煩惱繫縛、眾緣和合，不由我及我而有所作，以我我所性無實故。

是故我今爲自防護，應令一切煩惱繫縛、眾緣和合皆悉斷壞；爲益有情，不應永滅一切有爲。

申五、無著般若智住現前² 酉一、標名

如是菩薩住此住中，智悲隨逐，名無著智現前、般若波羅蜜多住現前。

名無著智現前者：謂於生死、涅槃平等，證得無二智故。

酉二、釋相³ 戌一、不染世間

由此住故，於一切世間行無染而行。

戌二、有猛利忍

又即此住有猛利忍。於第七地有加行行邊際菩薩忍，當知是彼隨順忍攝。

戌三、不住二邊

又此無著智現前、般若波羅蜜多住現前，能引能引菩提眾緣，於諸世間有爲諸行住而不住；雖於寂滅見寂靜德，而亦不住。

能引能引菩提眾緣者：菩提分法能滿大菩提果，是名能引菩提眾緣。今此無著智現前、般若波羅蜜多住現前，能引一切菩提分法，是故說言能引能引菩提眾緣。

申六、證無量定² 酉一、舉空三摩地

如是菩薩方便般若智所隨逐，能入空三摩地，令十百千上首三摩地門皆現在前。

酉二、例無願無相

如空三摩地，如無願、無相三摩地，當知亦爾。

令十百千上首三摩地門等者：經說十種空三摩地門爲其上首，百千萬空三摩地門皆現在前。準彼應釋。下說無相、無願各復有十爲其上首，如經應

知。

申七、證不壞意樂

由此上首三摩地門現在前故，意樂不壞。

意樂不壞者：謂彼意樂堅固不退，是名不壞。此有九種差別，如經應知。

申八、魔怨無奪

於一切種諸佛聖教，一切外道及諸魔軍、聖教怨敵，不能引奪。

申九、善根清淨。² 酉一、總辨善根。² 戌一、指同前

餘如前說。

戌二、喻差別

此差別者，謂如世間善巧工匠，以所鍊金作莊嚴具，琉璃寶珠瑩飾廁鈿，一切餘金不能映奪。如是此中菩薩善根清淨殊勝，如先所說不能映奪。

酉二、別喻慧根

又如月光，於有情身能令悅豫，非四風輪所能斷壞。如是此中菩薩慧光，一

切有情煩惱鬱蒸皆能息滅，一切外道、魔軍、怨敵不能斷壞。

申十、受生

受生多作妙化天王，善化有情，令除一切增上慢等。

申十一、威力

所有威力，當知此中說百千俱胝數。

未二、結略義

當知是名略說菩薩緣起相應增上慧住。謂十法平等性成滿得入故；覺悟緣起生解脫門故；一切邪想不現行故；方便攝受生死故；無著智現前、般若波羅蜜多住現在前故；證得無量三摩地故；證得不壞意樂故；於佛聖教不可引奪故；廣見諸佛、善根清淨故；受生故；威力故。

午二、廣指。³ 未一、指

若廣宣說，如十地經現前地說。

未二、釋

由此地中，無著智現前、般若波羅蜜多住現在前故，名現前地。

未三、配

即由此義，當知亦名緣起相應增上慧住。

辰八、有加行有功用無相住² 巳一、問

云何菩薩有加行有功用無相住？

巳二、答² 午一、略說² 未一、別辨相¹² 申一、不共勝行成滿得入² 酉一、明得入

謂諸菩薩，於前第六緣起相應增上慧住，已得十種妙方便慧

已得十種妙方便慧者：十地經說：若菩薩善具足六地行已，欲入第七菩薩地者，是菩薩當以十種方便智，發起殊勝行入。何等爲十？所謂善修空、無相、無願，而集大功德助道。入諸法無我、無壽命、無眾生，而不捨起四無量。起功德法，作增上波羅蜜行，而無法可取。得遠離三界，而能應化起莊嚴三界行。畢竟寂滅諸煩惱焰，而能爲一切眾生起滅貪瞋癡煩惱焰行。隨順幻、夢、影、響、化、水中月、鏡中像，自性不二，而起作業無

量差別心。善知一切國土道如虛空，而起莊嚴淨佛國土行。知諸佛法身自性無身，而起色身相好莊嚴行。知諸佛音聲無聲，本來寂滅，不可說相，而隨一切眾生起種種差別莊嚴音聲行。入諸佛於一念頃通達三世事，而能分別種種相劫數修行，隨一眾生心差別觀故。論一一釋，如彼應知。

所引世間不共一切有情，而共一切世間進道勝行。

所引世間不共一切有情等者：如下自說：彼由如是妙方便智之所引發增上力故，能行一切有情不共菩薩妙行。雖與世間相似顯現，而非彼性。此說趣入，義應準知。由與世間相似顯現，名共世間。然非彼性，說名不共。後後勝進加行究竟，故名進道勝行。

即由如是妙方便慧所引不共進道勝行成上品故，極圓滿故，超過第六住，得入第七住。

酉二、指略義

如是文辭，如經廣說，應知其相。謂依能起世間興盛攝受福德；依於有情利

益安樂增上意樂；依爲菩提，福德資糧、菩提分法後勝進；依不共聲聞；依不共獨覺；依有情界；依諸法界；依諸世界；依諸如來身語心智。當知是名妙方便慧所引不共進道勝行處所略義。

依能起世間興盛攝受福德等者：十地經論說：此勝行有四功德。今攝彼義，正釋此文。一、財及身勝。隨其所須，自在能取故，即此名依能起世間興盛攝受福德。二、護惡行勝。不捨眾生，起四無量故，即此名依利益安樂增上意樂。三、護善根勝。勤修正行，不取少法故，即此名依福德資糧、菩提分法後勝進。四、攝眾生勝。此復多別。隨願受生，爲不捨有情故，即此名依不共聲聞、獨覺。又復善說正法，爲令一切眾生永滅煩惱行故，即此名爲依有情界。又復唯滅雜染，不滅有爲，作業無量故，即此名爲依諸法界。又復莊嚴一切佛土，爲於大法眾會集故，即此名爲依諸世界。又復了知如來無相、無聲、無諸分別，然有種種相似示現，爲彼有情見聞、親近、供養、修行，生福德故，及爲轉法輪故，隨彼所問善記別

故，即此名爲依諸如來身語心智。當知妙方便慧所引勝行以此爲依，是故名彼處所略義。

申二、通達佛境起勤加行

菩薩與彼共相應故，便能通達無量無數如來境界，及爲彼起無功用、無相、無分別、無異分別觀無量佛境界，起無間無闕精勤修學一切威儀行住作意，一切分位不遠離道。

申三、一一剎那圓證覺支² 酉一、標簡

彼於一一心剎那中，十波羅蜜多而爲上首，一切菩提分法圓滿殊勝。諸餘下住則不如是。

酉二、辨釋

謂於第一極歡喜住，正以大願爲勝所緣；於第二住，正能除遣毀犯戒垢；於第三住，正願增長，得法光明；於第四住，正趣入道；於第五住，正入一切世間事業；於第六住，正入甚深緣起道理；今即於此第七住中，具足發起一

切佛法覺支圓滿。

申四、有加行行圓滿所攝

此住菩薩加行行圓滿所攝故；妙智神通行清淨，能入第八住故；由是菩薩此住無間，能入第八極清淨住。

申五、安立染汙及不染汙² 酉一、望第八住

彼第八住一向清淨，此第七住猶名爲雜。與清淨住爲前導故，當言此住名不染汙；猶未得故，當言此住墮雜染行。

酉二、唯約自住

今此住中，一切貪等上首煩惱皆悉除斷。當知此住非有煩惱，非離煩惱。一切煩惱不現行故，希求佛智猶未得故。

希求佛智猶未得故者：此釋前說非離煩惱。由有加行、有功用，猶未證得清淨無相故。

申六、淨業工巧皆得圓滿

如是行者，增上意樂已得清淨，無量身語意業隨轉，於諸如來所讚毀業，如前廣說，於第五住所引世間工巧業智轉得圓滿。三千世界共許爲師，唯除安住上住菩薩及諸如來，意樂加行無與等者。

申七、得三摩地無量不共³ 酉一、辨得相

於一切靜慮等菩提分法皆能現前，由修行相現在前故，非由安住異熟分位，如第八住。

由修行相現在前故等者：謂有加行、有功用，令現在前，名由修相。非無加行、無功用、任運現前，說彼非由安住異熟。

酉二、顯無量

此諸菩薩如是方便，能善思擇諸三摩地，引發菩薩三摩地上首十百千種三摩地門。

酉三、明不共² 戌一、於三摩地

由得如是三摩地故，超過一切聲聞、獨覺三摩地境。

戌二、於諸境界²。 亥一、辨所行境

菩薩如是一切煩惱皆悉遠離；難可了知一切分別現行隨逐身語意業皆悉安住；而不捨離尋求勝進勇猛加行，顧念有情。

難可了知一切分別等者：此顯遠離一切羸相。唯彼最極微細一切分別現行，是名難可了知。隨逐身語意業，令其隨轉，名悉安住。

爲大菩提速圓滿故，離一切相無量身語意業隨轉，妙善修治無生法忍之所顯發。

亥二、料簡差別

於此住中，由自覺慧境界故，超過一切聲聞、獨覺境界；

由自覺慧境界故者：謂由加行圓滿，具自智力，能成所作故。

餘六住中，但由佛法增上所緣故，超過一切聲聞、獨覺境界。

但由佛法增上所緣故者：謂即已證法性發心，以大菩提及諸有情一切義利爲所緣境故。

申八、剎那剎那能入滅定

又諸菩薩第六住中所入滅定，今此住中念念能入。然此菩薩甚希奇業不可思議。謂常安住實際住中，而於寂滅能不作證。

第六住中所入滅定等者：經說：菩薩從第六地來，能入寂滅定，今住第七菩薩地，於念念中能入寂滅定，而不證寂滅定，是菩薩畢竟成就不可思議身口意業。此應準知。

申九、現行一切不共妙行²。 酉一、標彼相

彼由如是妙方便智之所引發增上力故，能行一切有情不共菩薩妙行。雖與世間相似顯現，而非彼性。

酉二、釋經義

如經廣說。此中總義，謂依福業事攝受種種親屬徒衆，求生差別，發起勝進三解脫住，信解劣乘方便調伏，受用諸欲，求欲差別，轉諸外道，隨他心轉，隨大衆轉。

申十、善根清淨²。酉一、總辨善根²。戌一、指同前

餘如前說。

如經廣說等者：此中略引經義，釋前菩薩不共妙行，隨順世間，非世間性。一、攝受有情行。二、願力受生行。三、勝進解脫行。四、調伏劣乘行。如文易知。五、受用諸欲行，受用飲食睡夢等境界故。六、求欲差別行，示老病死魔境界故。七、轉行，此復有三，一、轉外道，二、隨他心，三、隨眾轉。此中大眾，謂天龍等。是即經中所有總義。

戌二、喻差別

此差別者，謂如世間善巧工匠，以所鍊金作莊嚴具，諸末尼寶瑩飾廁鈿，甚爲光麗，餘瞻部洲一切金寶不能映奪。如是此中菩薩善根轉復清淨，一切聲聞、獨覺善根，及餘下住菩薩善根，不能映奪。

酉二、別喻慧根

又如日光，多分乾竭瞻部洲中所有穢濕，餘一切光不能映奪。如是此中菩薩

慧光，多分乾竭一切有情煩惱諸毒，如前所說諸聲聞等所有智光不能映奪。

申十一、受生

受生多作他化自在天王，於能授與一切聲聞、獨覺現觀方便善巧。

於能授與一切聲聞獨覺現觀方便善巧者：謂彼所作自在，能令一切聲聞、獨覺獲得現觀故。

申十二、威力

所有威力，當知此說俱抵百千數。

未二、結略義

當知是名略說菩薩有加行有功用無相住。謂妙方便慧所引世間進道勝行成滿得入故；通達如來佛境界，起無間無闕勤加行故；一一剎那圓證一切菩提分法故；有加行行圓滿攝故；安立染汙不染汙故；依於意樂清淨業轉，一切世間工巧業等皆圓滿故；逮得無量不共一切聲聞、獨覺三摩地故；剎那剎那入滅定故；現行一切有情不共世間行故；善根清淨故；受生故；威力故。

午二、廣指。³ 未一、指

若廣宣說，如十地經遠行地說。

未二、釋

此地菩薩有加行行圓滿攝故，名遠行地。

未三、配

即由此義，當知亦名有加行有功用無相住。

辰九、無加行無功用無相住。² 巳一、問

云何菩薩無加行無功用無相住？

巳二、答。² 午一、略說。² 未一、別辨相。⁸ 申一、第一義智成滿得入。³ 酉一、標經說

謂諸菩薩，於初無相住中，已得十種入一切法第一義智，如經廣說。

已得十種入一切法第一義智等者：十地經說：若菩薩於七地中，善集慧方便，善清淨諸行，善集助道法，善起大願力，善加如來力加自善根力得力故，常念隨順如來力、無畏、不共佛法故，善淨深心覺故，成就福德智力

故，大慈悲等不捨一切眾生行故，通達無量智道故。是名十種入一切法第一義智。論一一釋，如彼應知。

酉二、舉略義

謂依三世，如其所應，本來無生、無起、無相；

謂依三世等者：三世諸行，本來無生、無起、無相，然義有別，是故說言如其所應。過去、未來性非實有，是故無生、無起、無相。現在諸行性雖實有，然如幻像，生無自性，是故亦說無生、無起、無相。當知此依相無自性，故作是說。約彼自體，說無生起。約彼自相，說名無相。

依餘因性無成、無壞；

依餘因性無成無壞者：諸行自種，名餘因性，望彼體相名為餘故。由種子識無有實隨轉性，是故說言無成、無壞。勝義伽他頌云：現在速壞滅，過去住無方，未來依眾緣，而復心隨轉。長行釋云：若心與彼諸行相應，或不相應；非此與彼或時不相應，或時非不相應。如是由勝義故，心隨轉性

不得成就。（陵本十六卷十三頁¹⁴¹¹）今說因性無成、無壞，準彼應釋。熏習彼種，名之爲成。彼種斷滅，名之爲壞。然約勝義，心與諸行或時相應、或不相應非畢竟故，由是說言無成、無壞。

依第一義畢竟離言諸自性事，言說造作影像自性，由體相故及因性故，都無所有；即由如是雜染體性，無流轉性；無止息性；依此無智邪執爲因，於彼離言諸有體事，初中後位一切時分，染平等性；依於眞如，無倒證入無有分別平等性故，能除雜染。是名此中略所說義。

酉三、明得入

如是十種入一切法第一義智成上品故，極圓滿故，超過第七雜清淨住，得入第八純清淨住。

申二、於無生法得清淨忍。⁵ 酉一、標

住此住中，於無生法，證得菩薩第一最勝極清淨忍。

酉二、徵

此復云何？

酉三、釋。² 戌一、明方便

謂諸菩薩由四尋思，於一切法正尋思已，若時獲得四如實智，如實了知一切諸法，爾時一切邪分別執皆悉遠離。

戌二、明正觀

觀一切法，於現法中隨順一切雜染無生；觀彼先時一切所有邪分別執因所生法，於當來世一切無餘永不復生。

酉四、指

此四尋思、四如實智，廣說如前眞實義品。

酉五、結

此如實智，始從勝解行住乃至有加行有功用無相住，未極清淨；今此住中已極清淨，是故說言：於無生法，證得菩薩第一最勝極清淨忍。

申三、除斷災患得甚深住。³ 酉一、標

是諸菩薩得此忍故，得甚深住。先於第一無相住中，四種災患今悉除斷。

酉二、列

一者、除斷於無相中有加行有功用事；二者、除斷於上清淨住精勤思慕；三者、除斷於一切種利有情事有大堪能精勤思慕；四者、除斷有微細想現在前行。

酉三、結

是故此住名極清淨。

申四、蒙佛悟導授妙智等

又此菩薩於甚深住極生愛樂，即於如是法門流中，蒙諸如來覺悟勸導，授與無量引發門智神通事業。

於甚深住極生愛樂等者：此甚深住寂靜解脫，是故菩薩於此住中，極生愛樂。如是愛樂，從彼寂靜解脫平等所流，名法門流。即於如是法門流中，如來爲欲除彼由愛樂此不欲利生障故，覺悟勸導，令其愍念未能解脫一切

眾生，授與無量如來妙智。由此妙智，能引一切神通所作事業。由此事業，能辦眾生一切義利。

申五、悟入分身妙智及得自在² 酉一、指經說

如是蒙佛覺悟勸導，引發無量分身妙智，得十自在。如經廣說，應知其相。

酉二、辨自在

得自在故，隨所欲住，如意能住；隨樂安住靜慮、解脫等諸心住，如意能住；若暫思惟一切食等諸資生具，悉皆成辦，一切世間工業明處，如其所欲悉能現行；普於一切能感生業，及於一切受生處所，皆隨所欲自在往生；隨所愛樂，一切神通所作事業皆能起作；一切妙願，隨其所欲皆得稱遂；隨於事物發起勝解，如所欲爲皆成無異；隨所欲知所知境界皆如實知；普於一切名句文身得隨所欲；於一切法正安立中皆得善巧。

得十自在等者：十地經說：得命自在、得心自在、得物自在、得業自在、得生自在、得願自在、得信解自在、得如意自在、得法自在、得智自在、

是名得十自在。今此中說，隨所欲住，如意能住者，即命自在。隨樂安住靜慮、解脫等諸心住，如意能住者，即心自在。若暫思惟至悉能現行者，即物自在。普於一切能感生業至自在往生者，即生自在。隨所愛樂至皆能起作者，即業自在。一切妙願至皆得稱遂者，即願自在。隨於事物至皆成無異者，即信解自在。隨所欲知所知境界皆如實知者，即如意自在。普於一切名句文身得隨所欲者，即法自在。於一切法正安立中皆得善巧者，即智自在。

申六、領受所得自在勝利

如是菩薩獲得自在，從是已去，所得自在所作勝利，廣說如經，應知其相。

所得自在所作勝利等者：十地經說：是菩薩得是菩薩十自在已，即時名爲不可思議智者、無量智者、廣智者、不可壞智者，乃至廣說是菩薩得如是智力，示一切所作，一切事中無有過咎故。此應準知。

申七、善根清淨。² 酉一、舉因緣

又能棄捨麤見諸佛，恆常無間不離見佛。

酉二、指經喻

其餘所有善根清淨，金喻、光喻，如經應知。

金喻光喻如經應知者：十地經說：譬如本真金，善巧金師作莊嚴具已，繫在閻浮提王若頸、若頂，閻浮提人餘寶莊嚴具無能奪者。如是佛子！菩薩住此不動地，彼諸善根，一切聲聞、辟支佛，乃至七地菩薩所不能壞。菩薩得是地，大智光明滅諸眾生煩惱闇障，以善分別智門故。佛子！譬如千世界主大梵天王，能於一時流布慈心滿千世界，亦能放光遍照其中。如是佛子！菩薩住此菩薩不動地中，能放身光照十千萬三千大千世界微塵數世界眾生，漸能除滅諸煩惱火，令得清涼。

申八、受生威力

此住菩薩受生、威力諸殊勝事，皆如經說，應知其相。

受生威力諸殊勝事皆如經說者：十地經說：菩薩住是地中，多作大梵天

王，諸千世界，自在最勝，乃至廣說。如是應知彼受生相。又說：以精進力，於一念間得百萬三千大千世界微塵數三昧，乃至廣說能變身為百萬三千大千世界微塵數，於一一身能示百萬三千大千世界微塵數菩薩以為眷屬。如是應知彼威力相。

未二、結略義

當知是名略說菩薩無加行無功用無相住。謂入一切法第一義智成滿得入故；得無生法忍故；除斷一切災患故；逮得菩薩甚深住故；於法門流，蒙佛授與無量引發門智神通事業故；悟入無量分身智故；得自在故；領受所得自在勝利故；善根清淨故；受生故；威力故。

午二、廣指。³ 未一、指

若廣宣說，如十地經不動地說。

未二、釋

於此地中，捨先所有有加行、有功用道，其心昇上無加行、無功用、任運而

轉不動勝道，是故此地名不動地。

未三、配

即由此義，當知說名無加行無功用無相住。

辰十、無礙解住。² 巳一、問

云何菩薩無礙解住？

巳二、答。² 午一、略說。² 未一、別辨相。⁵ 申一、於殊勝智愛樂隨入

謂諸菩薩，於甚深住不生喜足，復於增上智殊勝性愛樂隨入。

增上智殊勝性者：如來妙智，名增上智。能利自他究竟所作，名殊勝性。

申二、起智加行宣說諸法

是諸菩薩於諸法中起智加行，應為他說一切種法。

申三、如實了知說法所作

普於一切說法所作皆如實知。當知此中說法所作，謂於一切近稠林行，如此雜染、如此清淨，由此雜染、由此清淨，若所雜染、若所清淨，若非一向、

若是一向、若通二種，如是一切皆如實知。

謂於一切近稠林行等者：十地經說：心行稠林、煩惱行稠林、業行稠林、根行稠林、信行稠林、性行稠林、深心行稠林、使行稠林、生行稠林、習氣行稠林、三聚差別行稠林，是名一切近稠林行。言稠林者，眾多義故，難知義故，如十地經論釋。如此雜染、如此清淨者，謂染淨法。由此雜染、由此清淨者，謂染淨因。所雜染、所清淨者，謂染淨識，染法相應、不相應故。若染淨法墮不決定，名非一向。若墮決定，名是一向。亦染亦淨，名通二種。如是一切稠林行攝，隨應應知。

申四、成大法師² 酉一、明領受

如是菩薩，於說法中方便善巧，於說所作方便善巧，於一切種成大法師，獲得無量陀羅尼門，於一切種音詞支具剖析善巧，辯才無盡。

酉二、顯堪能³ 戌一、標

成就如是法陀羅尼領受堪能菩薩，由此勝無礙解引發言辭，能坐如是微妙法

座。

於一切種音詞支具等者：謂佛宣說相應、助伴、隨順、清亮、有用、相稱、應順名句文身所有言論，是名一切種音詞。成就最上首語、極美妙語、甚顯了語、易悟解語、樂欲聞語、無違逆語、無所依語、無邊際語，是名一切種支具。於此一切，由已獲得無量陀羅尼故，聞已不忘，善解法義，由是說言剖析善巧。能以無量差別門爲人演說，由是說言辯才無盡。即由是義，名爲成就法陀羅尼領受堪能菩薩應知。

戌二、列

若於是中、若於是處宣說正法盡所有門，若由此故，於諸有情勸導、慰喻、安處事業，此等堪能皆悉成就。

戌三、指

如是一切，廣說如經，應知其相。

若於是中等者：依無礙解，名於是中。於彼彼處理無相違，名於是處。十

地經中廣說四無礙解所有作業，是名盡所有門。

申五、善根清淨等

善根清淨、受生、威力諸殊勝事，亦廣如經，應知其相。

善根清淨等者：十地經說：譬如本真金，作莊嚴具已，繫在轉輪聖王若頸、若頂，一切小王、四天下人所有一切諸莊嚴具無能及者。如是菩薩住此菩薩善慧地中，彼諸善根轉勝明淨，一切聲聞、辟支佛，及下地菩薩所不能壞，乃至廣說。如是應知善根清淨。又說：菩薩住此地中，多作大梵天王，得大勢力，主二千世界，於自在中而得自在。如是應知彼受生相。又說：以精進力故，於一念間得十阿僧祇百千佛國土微塵數三昧，乃至廣說能變身為十阿僧祇百千佛國土微塵數，於一身能示十阿僧祇百千佛國土微塵數菩薩以為眷屬。如是應知彼威力相。

未二、結略義

當知是名略說菩薩無礙解住。謂於甚深寂靜解脫不生喜足入勝進故；於諸法

中起智加行宣說法故；此所作事如實知故；得不思議大法師故；善根清淨故；受生故；威力故。

午二、廣指³ 未一、指

若廣宣說，如十地經善慧地說。

未二、釋

由此地中，一切有情利益安樂意樂清淨，逮得菩薩無礙解慧，由此善能宣說正法，是故此地名善慧地。

未三、配

即由此義，當知復名無礙解住。

辰十一、最上成滿菩薩住² 巳一、問

云何菩薩最上成滿菩薩住？

巳二、答² 午一、略說² 未一、釋³ 申一、無礙解住成滿得入

謂諸菩薩，無礙解住一切行相遍清淨已，堪為法王受法灌頂。

申二、得三摩地及受灌頂

得離垢等無量無數勝三摩地，

得離垢等無量無數勝三摩地者：十地經說：離垢三昧有多差別，謂入法界差別三昧爲初，乃至一切智智受勝位菩薩三昧爲後。此應準知。

作彼所作一切智智殊勝灌頂後三摩地現在前故，

作彼所作一切智智殊勝灌頂等者：此中一切智智殊勝灌頂後三摩地，即是經說最後一切智智受勝位菩薩三昧。此三摩地最爲後邊，故名爲後。離垢所得，名彼所作。不由功力自然現前，名現在前。

得一切佛相稱妙座、身諸眷屬，

得一切佛相稱妙座身諸眷屬者：大寶蓮華，名一切佛相稱妙座。菩薩昇此座時，其身殊妙，稱可華座。復有滿千三千大千世界微塵數等蓮華以爲眷屬，一一菩薩坐於其上，圍繞瞻仰此受勝位菩薩，是名身諸眷屬。

得大光明，往來普照一切行相，

得大光明往來普照一切行相者：十地經說：是菩薩昇大寶蓮華王座，及眷屬菩薩坐蓮華座，入三昧已，爾時十方一切世界皆大震動，一切惡道皆悉休息，光明普照一切法界，一切世界皆悉嚴淨，皆得見聞一切諸佛大會。此應準知。

一切智智灌灑其頂。

一切智智灌灑其頂者：十地經說：譬如轉輪聖王長子，女寶所生，具足王相，轉輪聖王令子在白象寶閻浮檀金座上，取四大海水，上張羅網，寶蓋、旛華、寶幢種種莊嚴，手執金鐘香水，灌子頂上，即名灌頂。刹利王數，具足轉十善業道，故得名轉輪聖王。如是佛子！彼菩薩從諸如來得受位已，名得智位，具足十力，墮在佛數。此應準知。

申三、得不思議諸殊勝事

既灌頂已，普能引導所化有情。於彼解脫方便佛事得如實智，逮得無量無邊解脫、陀羅尼門、大神通力，

逮得無量無邊等者：此說三種無量無邊。一、謂解脫，二、謂陀羅尼門，三、謂大神通力。

及此增上大念、大智增上引發訓辭安立，及大神通增上引發。

及此增上大念大智等者：此中大念、大智及大神通，由得無量無邊解脫、陀羅尼門、大神通力爲其增上，名此增上。又此大念、大智，普於一切名句文身得隨所欲，於一切法正安立中皆得善巧，是名大念、大智增上引發訓辭安立。又大神通，隨於一切神通所作事業皆能起作，名大神通增上引發。此於無加行無功用無相住中已得自在，今此住中轉更增上、轉復微妙，故作此說。

善根清淨、受生、威力諸殊勝事，一切如經，應知其相。

善根清淨等者：十地經說：譬如善巧金師，善治此金爲莊嚴具，以無上末尼寶珠間錯其中，繫在自在天王若頸、若頂，其餘天人莊嚴之具無能及者。如是菩薩住此第十菩薩法雲地中，彼菩薩不可思議智行，一切衆生，

一切聲聞、辟支佛，從初地乃至住第九地菩薩所不能及，乃至廣說。如是應知善根清淨。又說：菩薩住此地中，多作摩醯首羅天王，具足自在，善授衆生聲聞、辟支佛、菩薩波羅蜜行，乃至廣說。如是應知彼受生相。又說：以精進力故，於一念間得十不可說百千萬億那由他佛世界微塵數三昧，乃至廣說能變身爲十不可說百千萬億那由他佛世界微塵數身，於一身示十不可說百千萬億那由他佛世界微塵數菩薩以爲眷屬。如是應知彼威力相。

未二、結

當知是名略說最上成滿菩薩住。

午二、廣指³ 未一、指

若廣宣說，如十地經法雲地說。

未二、釋² 申一、顯相² 酉一、喻能領受

是諸菩薩住此地中，諸菩薩道皆得圓滿，菩提資糧極善周備。從諸如來大法

雲所，堪能領受其餘一切有情之類難可領受最極廣大微妙法雨。

酉二、喻能化導

又此菩薩，自如大雲，未現等覺無上菩提。若現等覺無上菩提，能爲無量無邊有情等雨無比微妙法雨，殄息一切煩惱塵埃，能令種種善根稼穡生長、成熟。

申二、結名

故此地名法雲地。

未三、配

即由此義，當知復名最上成滿菩薩住。

子二、總料簡。² 丑一、功德

如是所說後後住中支分功德，非前前往一切都無，然下品故不墮其數。當知即彼展轉修習成中上品，於餘後地證得成滿，方乃建立。

後後住中支分功德等者：謂極歡喜住爲初，最上成滿菩薩住爲後。一一住

中所有功德，前能引後，後能淨前，故作是說。彼行狀相差別建立，如前已說，其義應知。

丑二、劫量。² 寅一、總標

又即於此一一住中，經多俱胝百千大劫，或過是數方乃證得及與成滿。然一切住總經於三無數大劫，方得圓證。

寅二、別釋。² 卯一、明證得。³ 辰一、第一劫

謂經第一無數大劫，方乃超過勝解行住，次第證得極歡喜住。此就恆常勇猛精進，非不勇猛勤精進者。

辰二、第二劫

復經第二無數大劫，方乃超過極歡喜住，乃至有加行有功用無相住，次第證得無加行無功用無相住。此即決定，以是菩薩得淨意樂，決定勇猛勤精進故。

辰三、第三劫

復經第三無數大劫，方乃超過無加行無功用無相住及無礙解住，證得最上成滿菩薩住。

卯二、辨差別² 辰一、標列

當知此中，略有二種無數大劫。一者、日夜月半月等算數方便，時無量故，亦說名爲無數大劫。二者、大劫算數方便，超過一切算數之量，亦說名爲無數大劫。

辰二、料簡² 巳一、前說

若就前說無數大劫，要由無量無數大劫，方證無上正等菩提。

巳二、後說² 午一、明不過量

若就後說無數大劫，但經於三無數大劫，便證無上正等菩提，不過此量。

午二、明轉不轉

若正修行最上上品勇猛精進，或有能轉衆多中劫，或有乃至轉多大劫，當知定無有能轉無數大劫。

丑三、修斷² 寅一、總標

又由如是所說十二諸菩薩住，經三無數大劫時量，能斷一切煩惱障品所有麤重，及斷一切所知障品所有麤重。

寅二、別顯² 卯一、正斷麤重² 辰一、煩惱障品² 巳一、標

於三住中，當知能斷煩惱障品所有麤重。

巳二、釋³ 午一、於極歡喜住

謂於極歡喜住中，一切惡趣諸煩惱品所有麤重皆悉永斷，一切上中諸煩惱品皆不現行。

午二、於無加行無功用無相住

於無加行無功用無相住中，一切能障一向清淨無生法忍諸煩惱品所有麤重皆悉永斷，一切煩惱皆不現前。

一切能障一向清淨無生法忍諸煩惱品所有麤重者：前說有加行有功用無相住中，非有煩惱，非離煩惱。一切煩惱不現行故，希求佛智猶未得故，由

是能障一向清淨無生法忍。今即說彼諸煩惱品所有麤重應知。

午三、於最上成滿菩薩住

於最上成滿菩薩住中，當知一切煩惱習氣隨眠障礙皆悉永斷，入如來住。

辰二、所知障品³ 巳一、標

當知一切所知障品所有麤重，亦有三種。

巳二、列

一者、在皮麤重，二者、在膚麤重，三者、在肉麤重。

巳三、釋

當知此中，在皮麤重，極歡喜住皆悉已斷；在膚麤重，無加行無功用無相住皆悉已斷；在肉麤重，如來住中皆悉已斷，得一切障極清淨智。

卯二、修斷資糧

於三住中，煩惱、所知二障永斷；所餘諸住，如其次第，修斷資糧。

丑四、清淨² 寅一、標

即於如是十三住中，當知略有十一清淨。

寅二、列¹¹ 卯一、種性清淨

謂於第一種性住中，種性清淨。

卯二、信解清淨

於其第二勝解行住，信勝解淨。

卯三、意樂清淨

於其第三極歡喜住，勝意樂淨。

卯四、增上戒清淨

於其第四增上戒住，增上戒淨。

卯五、增上心清淨

於其第五增上心住，增上心淨。

卯六、無倒智清淨

於其第六、第七、第八增上慧住，無顛倒智發起清淨。

卯七、有加行圓滿清淨

於其第九有加行有功用無相住，有加行行圓滿清淨。

卯八、眞智神通引發清淨

於其第十無加行無功用無相住，眞智神通引發清淨。

卯九、無礙解清淨

於第十一無礙解住，能正爲他宣說法義無礙解淨。

卯十、妙智清淨

於第十二最上成滿菩薩住中，入一切種一切所知妙智清淨。

卯十一、究竟清淨

於第十三如來住中，一切煩惱及所知障并諸習氣究竟清淨。

丑五、相攝² 寅一、標指

如前菩薩功德品中所說八法能攝大乘，當知在此十三住攝。

寅二、配釋⁵ 卯一、初二住攝

謂於第一、第二住中，於菩薩藏生信、勝解、聽受、思惟；

於菩薩藏生信勝解等者：此於八法攝其前四應知。

卯二、第三住攝

第三住中，得勝意樂，趣向前行勝修行相；

趣向前行勝修行相者：此攝第五應知。

卯三、次六住攝

於餘一切乃至有加行有功用無相住中，得修廣大；

得修廣大者：此攝第六應知。

卯四、次三住攝

於上三種淨行所攝菩薩住中，修果成滿；

修果成滿者：此攝第七應知。從無加行無功用無相住，乃至最上成滿菩薩住，名上三種菩薩住。望餘下住，名爲上故。

卯五、如來住攝

如來住中，當知獲得究竟出離。

究竟出離者：此攝第八應知。

丑六、類聲聞住² 寅一、標

當知菩薩十二種住，隨其次第類聲聞住。

寅二、配¹⁰ 卯一、初住

如諸聲聞，自種性住，當知菩薩初住亦爾。

卯二、第二住

如諸聲聞，趣入正性離生加行住，當知菩薩第二住亦爾。

卯三、第三住

如諸聲聞，已入正性離生住，當知菩薩第三住亦爾。

卯四、第四住

如諸聲聞，已得證淨聖所愛味，爲盡上漏增上戒學住，當知菩薩第四住亦爾。

卯五、第五住

如諸聲聞，依增上戒學引發增上心學住，當知菩薩第五住亦爾。

卯六、第六七八住

如諸聲聞，如其所得諸聖諦智增上慧學住，當知菩薩第六、第七、第八住亦爾。

卯七、第九住

如諸聲聞，善觀察所知無相三摩地加行住，當知菩薩第九住亦爾。

卯八、第十住

如諸聲聞，成滿無相住，當知菩薩第十住亦爾。

卯九、第十一住

如諸聲聞，從此出已，入解脫處住，當知菩薩第十一住亦爾。

入解脫處住者：謂證慧解脫、心解脫故。

卯十、第十二住

如諸聲聞，具一切相阿羅漢住，當知菩薩第十二住亦爾。

具一切相阿羅漢住者：謂證極清淨道及果功德故。

本地分中菩薩地第三持究竟瑜伽處生品第一

壬五、生品⁵ 癸一、標

諸菩薩生略有五種，攝一切生。於一切住一切菩薩受無罪生，利益安樂一切有情。

癸二、徵

何等爲五？

癸三、列

一者、除災生，二者、隨類生，三者、大勢生，四者、增上生，五者、最後生。

癸四、釋⁵ 子一、除災生² 丑一、徵

云何菩薩除災生？

丑二、釋² 寅一、略說² 卯一、舉事⁶ 辰一、濟饑饉

謂諸菩薩，或大願力、或自在力，於諸饑饉厄難曠野正現前時，爲令衆生少用功力而得存濟，於大魚等種類中生；身形廣大，隨所生處，以自身肉普給一切饑餓衆生，皆令飽滿。

辰二、除疾疫

於諸有情衆多疾疫正現前時，以大願力得自在力，持有神驗諸明咒力，攝受廣大良藥王身，息除一切有情疾疫。

辰三、息戰爭

於諸有情鄰國戰爭互相逼惱正現前時，以大願力得自在力，作大地主，具大勢力，以法正治方便善巧，息除鄰國戰爭逼惱。

辰四、除怨結

於諸有情互相違諍正現前時，以大願力得自在力，發誠信言，往返和好除其怨結。

辰五、息逼惱

於諸衆生遭遇惡王非理縛錄、治罰、逼迫身心擾亂正現前時，以大願力得自在力，生彼王家，作如法王，哀愍衆生，息除一切逼惱苦事。

辰六、斷邪惡

若諸有情起諸邪見，造諸惡行，隨一天處深生信解；哀愍彼故，以大願力得自在力，生彼天處，方便斷除邪見惡行。

生彼天處方便斷除邪見惡行者：此如前說增上心住菩薩，受生多分作釋天帝，善化有情，令離欲貪。如是餘住菩薩，受生皆爲善化有情，令斷邪見，其類應知。

卯二、結名

是名略說菩薩除災生。

寅二、例廣

若廣宣說，以大願力得自在力，哀愍爲先，於彼彼處受種種生，當知無量。

子二、隨類生² 丑一、徵

云何菩薩隨類生？

丑二、釋² 寅一、略說² 卯一、辨相² 辰一、舉類

謂諸菩薩，以大願力得自在力，生於種種傍生趣類天、龍、藥叉、阿素洛等展轉謀害違諍類中，或生邪見婆羅門中，或生樂行惡行類中，或生喜樂邪命類中，或生最極耽著諸欲、信解諸欲有情類中。

辰二、示導

爲欲除彼諸過失故，往彼有情同分中生而爲上首。爲上首已，方便化導。彼所行惡，菩薩不行；彼不行善，菩薩現行。爲欲令彼現行善故，爲說正法。由是菩薩與彼現行不同分故，說正法故，方便善巧除彼有情所有過失。

卯二、結名

是名略說菩薩隨類生。

寅二、例廣

廣說如前，當知無量。

廣說如前當知無量者：謂如前說，以大願力得自在力，哀愍爲先，於彼彼類受種種生故。

子三、大勢生² 丑一、徵

云何菩薩大勢生？

丑二、釋² 寅一、略說

謂諸菩薩稟性生時，所感壽量、形色、族姓、自在、富等諸異熟果，一切世間最爲殊勝。此異熟果所作事業，自他利品已廣宣說。是名略說菩薩大勢生。

寅二、例廣

若廣宣說，彼彼類中受大勢生，當知無量。

子四、增上生² 丑一、徵

云何菩薩增上生？

丑二、釋² 寅一、略說³ 卯一、標

謂諸菩薩，始從第一極歡喜住，乃至第十最上成滿諸菩薩住，如前所說差別受生，今於此中名增上生。

卯二、釋

謂最初住作轉輪王，王瞻部洲，得大自在；乃至第十最上成滿諸菩薩住，作大自在，過色究竟，一切生處最爲殊勝，唯有已得最上成滿諸菩薩住摩訶薩衆得生其中。

卯三、結

彼諸菩薩，即由此業增上所感，是名略說菩薩增上生。

寅二、例廣

若廣宣說，當知無量。

子五、最後生² 丑一、徵

云何菩薩最後生？

丑二、釋² 寅一、略說

謂諸菩薩於此生中，菩提資糧已極圓滿，或生婆羅門大國師家，或生刹帝利大國王家，能現等覺阿耨多羅三藐三菩提，廣作一切佛所作事，是名略說菩薩最後生。

寅二、例廣

若廣宣說，當知無量。

癸五、攝² 子一、標簡

若諸菩薩，於去來今清淨仁賢妙善生處曾當現生，一切皆此五生所攝。除此無有若過若增。唯除凡地菩薩受生。

子二、徵釋

何以故？此中意取有智菩薩，諸所受生爲五生故。如是諸生，大菩提果之所依止，令諸菩薩疾證無上正等菩提。

本地分中菩薩地第三持究竟瑜伽處攝受品第二

壬六、攝受品⁴ 癸一、標

於一切住菩薩行中，當知菩薩略有六種於諸有情無倒攝受。

癸二、徵

何等爲六？

癸三、列

一者、頓普攝受，二者、增上攝受，三者、攝取攝受，四者、長時攝受，五者、短時攝受，六者、最後攝受。

癸四、釋² 子一、明攝受相² 丑一、別顯⁶ 寅一、頓普攝受³ 卯一、徵

云何菩薩於諸有情頓普攝受？

卯二、釋

謂諸菩薩初發心時，攝受一切諸有情界皆爲眷屬。作是思惟：我當於彼隨能隨力，作一切種利益安樂饒益之事。隨所思惟，皆如是作。

卯三、結

是名菩薩於諸有情頓普攝受。

寅二、增上攝受。³ 卯一、徵

云何菩薩於諸有情增上攝受？

卯二、釋。² 辰一、總標

謂諸菩薩或爲家主，攝受父母、妻子、奴婢、僮僕、作使；或爲國王，攝受一切所統僚庶。菩薩如是發起增上攝受想已，於所攝受，隨攝受儀、隨菩薩儀業用而轉。

隨攝受儀隨菩薩儀者：作諸饒益，是名隨攝受儀。作諸義利，是名隨菩薩儀。如下舉事，隨應當知。

辰二、別廣。² 巳一、於爲家主

若爲家主，於其父母，種種方便勸修諸善；隨時供養，曾無懈廢；善識其恩，善知酬報；於父母心善能隨順；於法於義隨自在轉。

於法於義隨自在轉者：謂於是法是義所應作事，恆持自身繫屬隨順，是名隨自在轉。

於其妻子、奴婢等類，隨時恣與如法衣食；於諸事業終不逼切；雖有違犯，而能堪忍；彼若疾病，正能瞻療；於諸善事勸令修習；隨時賜與殊勝財物，愛語慰喻；不生奴婢、作使等想，瞻敬養育其若自身。

巳二、於爲國王

若爲國王，不行黜罰，不用刀杖，而能正化；以法以財用作饒益；依本土田而自食用，不以凶力侵掠他境；隨能隨力於諸有情勸止諸惡，教修諸善；視諸衆生，如父於子；於他有情尙好等施，況自親屬而不均濟；不行欺誑，所言誠諦；遠離一切殺縛、捶打、治罰、逼迫、斷截等事。

卯三、結

是名菩薩於諸有情增上攝受。

寅三、攝取攝受。³ 卯一、徵

云何菩薩於諸有情攝取攝受？

卯二、釋。³ 辰一、略說

謂諸菩薩正御徒衆，當知是名略說菩薩於諸有情攝取攝受。

辰二、廣說²。 巳一、攝受因緣³。 午一、標

若廣說者，由二因緣正攝徒衆，說名菩薩於諸有情攝取攝受。

午二、徵

何等爲二？

午三、列

一者、以無染心正攝徒衆；二者、於自義利正教修習，非邪加行而陷逗之。

以無染心正攝徒衆等者：此二因緣如下自釋，一一應知。

巳二、應攝受相²。 午一、初因緣攝²。 未一、無染

又於一切應攝受中，其心平等，不墮偏黨；亦不於彼慳吝正法，不作師拳；不於彼所希求承事恭敬供養；彼樂善故，自求作者，亦不遮止，爲欲令其福德資糧得增長故；或遇餘時，亦於彼所承事供養。

或遇餘時亦於彼所承事供養者：當知此說別供事行。謂看病行，給施如法

衣服、飲食、諸坐臥具、病緣醫藥資生具行，除遣憂愁及惡作行，除遣煩惱、隨煩惱行。如是等類，當知皆名別供事行。如成熟品說。（陵本三十

七卷二十四頁³⁰⁸⁶）此應準釋。

未二、正攝

若於其義未解了者，開悟令解；已解了者，轉令明淨。生起疑惑，隨爲除斷。若生惡作，善爲開解。甚深義句，以慧通達，於時時間正爲開顯。於苦於樂與彼共同。

於苦於樂與彼共同者：戒品中說：於己以法所獲如法衣服、飲食、臥具、病緣醫藥資生什物，與眾同用，自無隱費。（陵本四十卷十頁³²⁹²）其義應知。

於他所爲財利因緣，成就上品經營遽務，過於自事。於他毀犯，隨時正舉令其覺悟，應時如理訶責、擯罰。彼有疹疾，或有愁憂，終不棄捨，善權方便救療疹疾、開解愁憂。於諸下劣形色、憶念、精進、智等，終不輕陵。於時

時間，隨入勞倦，如其所宜爲說正法。

於時時間隨入勞倦等者：謂住勇猛增上精進，身疲、心倦映蔽其心，是名隨入勞倦。菩薩爲說正法，令生歡喜，心無厭倦故。

於時時間，爲令繫念於所緣境，與正教授。堪忍問難，不生憤發。

午二、次因緣攝。未一、舉自義利

於彼戒行或等或增，終無減劣；亦不希求利養恭敬；具足悲愍；無掉無動；戒、見、軌則、正命圓滿；舒顏平視，遠離顰蹙，柔和善語，先言問訊，含笑爲先；於諸善品恆常修習，不行放逸，離諸懈怠。

未二、正教修習

即以是事教習徒衆，亦令自行轉更勝進。

辰三、料簡

菩薩不應於一切時攝取徒衆，亦非不攝，亦非變異。

亦非變異者：發心品說：攝眷屬過有其二種。謂於眷屬饒益損減、染汙

違順。如是二事，菩薩皆無。（陵本三十五卷十四頁²⁸⁷³）由是當知非變

異義。

卯三、結

是名菩薩於諸有情攝取攝受。

寅四、長時攝受

云何菩薩於諸有情長時攝受？謂諸菩薩，於住下品成熟有情攝受饒益，當知說名長時攝受，以經久時方堪淨故。

寅五、短時攝受

云何菩薩於諸有情短時攝受？謂諸菩薩，於住中品成熟有情攝受饒益，當知說名短時攝受，非經久時方堪淨故。

寅六、最後攝受

云何菩薩於諸有情最後攝受？謂諸菩薩，於住上品成熟有情攝受饒益，當知說名最後攝受，即於此生堪任淨故。

丑二、總結

是名菩薩於諸有情略有六種無倒攝受。由此攝受，過去、未來、現在菩薩，於諸有情曾正攝受、當正攝受、現正攝受。除此無有若過若增。

子二、辨艱難事² 丑一、別舉其事³ 寅一、標

菩薩如是於諸有情六種攝受無倒轉時，當知遭遇略十二種艱難之事，聰叡菩薩於彼十二艱難之事當正覺了。

寅二、徵

何等十二？

寅三、列

一者、於多安住違犯有情，若罰、若捨，是名菩薩遭艱難事。二者、於惡有情爲調伏故，方便現行辛楚加行，防自意樂不生煩惱，是名菩薩遭艱難事。三者、現可施物極爲尠少，現來求者其數彌多，是名菩薩遭艱難事。四者、唯有一身，衆多有情種種事業并現在前，同時來請共爲助伴，是名菩薩遭艱

難事。五者、居放逸處，若住世間可愛妙定，若生天上樂世界中，令心調善，是名菩薩遭艱難事。

居放逸處等者：此中略說於三處所令心調善。一、謂居放逸處，二、謂住可愛定，三、謂生樂世界。言居放逸處者，謂生貴家，財寶具足故。

六者、常求遍作利有情事，而於此事無力無能，是名菩薩遭艱難事。七者、於其愚癡、詔詐、剛彊諸有情所，若爲說法、若復棄捨，是名菩薩遭艱難事。

於其愚癡詔詐剛彊諸有情所者：無力解了善說、惡說所有法義，是名愚癡。不如聖教而正修行，不如真實而自顯發，是名詔詐。其性慵悞，難可調伏，是名剛彊。

八者、常於生死見大過失，爲度有情而不棄捨，是名菩薩遭艱難事。九者、未證清淨增上意樂，多分慮恐失念命終，是名菩薩遭艱難事。

多分慮恐失念命終者：住品中說：勝解行住菩薩，於其三處有忘失念。

一、於境界可意、不可意色聲香味觸法中，或於一時其心顛倒，忘失正念；二、於受生彼彼身中，既受生已，忘失前生；三、於所受、所持諸法，久作久說，或於一時有所忘失。於是三處有忘失念。（陵本四十七卷十八頁³⁷⁸⁶）又說未能超越死畏，今說慮恐，其義應知。

十者、未證清淨增上意樂，他來求乞第一最勝所可愛物，是名菩薩遭艱難事。十一者、種種異見、種種勝解諸有情類，若別教誨、若總棄捨，是名菩薩遭艱難事。十二者、常行最極不放逸行，而不應斷一切煩惱，是名菩薩遭艱難事。

丑二、總明善巧

若諸菩薩遭遇如是諸艱難事，或於其中，應觀輕重，如其所應而作方便；或於其中，應審揀擇補特伽羅；或於其中，攀緣勇猛攝受因轉，若發正願；或於其中，制御其心，不令流散；或於其中，安住其心猛利思擇，不生厭倦而自安忍；或於其中，而行放捨；或於其中，發動精進，熾然無懈；或於其中，善巧方便而正修行。菩薩如是於正對治方便善巧，雖遭一切諸艱難事正現在前，而無怯弱，自正能免。

若諸菩薩遭遇如是諸艱難事等者：此中種種方便善巧，隨應對治前說諸艱難事。應觀輕重，如其所應而作方便，此正對治初艱難事。應審揀擇補特伽羅，此正對治第七、第十一艱難事。攀緣勇猛攝受因轉，若發正願，此正對治第三、第四、第六諸艱難事。制御其心，不令流散，此正對治第二、第五諸艱難事。安住其心猛利思擇，不生厭倦而自安忍，此正對治第八艱難事。而行放捨，此正對治第十艱難事。發動精進，熾然無懈，此正對治第九艱難事。善巧方便而正修行，此正對治第十二艱難事。

瑜伽師地論科句披尋記卷第四十八

瑜伽師地論科句披尋記卷第四十九

彌勒菩薩說

唐三藏沙門玄奘奉詔譯

韓清淨科記

本地分中菩薩地第三持究竟瑜伽處地品第三

壬七、地品。³ 癸一、總名建立⁴ 子一、標

如前所說十三住中，應知隨彼建立七地。前之六種，唯菩薩地；第七一種，菩薩、如來雜立爲地。

子二、徵

何等爲七？

子三、列

一、種性地，二、勝解行地，三、淨勝意樂地，四、行正行地，五、決定地，六、決定行地，七、到究竟地。

子四、釋。³ 丑一、出名雜地

如是七種菩薩地中，最後一種名為雜地。

丑二、配菩薩地

前種性住，名種性地；勝解行住，名勝解行地；極歡喜住，名淨勝意樂地；增上戒住、增上心住、三種增上慧住、有加行有功用無相住，名行正行地；無加行無功用無相住，名決定地，此地菩薩墮在第三決定中故；

墮在第三決定中故者：功德品說：菩薩略有三種墮於決定。何等爲三？一者、安住種性墮於決定，二者、發菩提心墮於決定，三者、不虛修行墮於決定。（陵本四十六卷十一頁³⁷⁰¹）此說決定，唯取第三不虛修行，故作是說。

無礙解住，名決定行地；最上成滿菩薩住及如來住，名到究竟地。

丑三、指如來地

如來住地，於後建立佛法品中，當廣演說。

癸二、隨釋疑難² 子一、問

問：菩薩從勝解行地隨入淨勝意樂地時，云何超過諸惡趣等？

子二、答² 丑一、辨修習³ 寅一、修習哀愍

答：是諸菩薩依止世間清淨靜慮，於勝解行地已善積集菩提資糧；於如前說百一十苦諸有情類修習哀愍，無餘思惟。

百一十苦諸有情類等者：百一十苦，如前供養親近無量品說。（陵本四十

四卷十一頁³⁵⁷⁵）觀唯是苦，修悲無量，由是說言修習哀愍，無餘思惟。

寅二、得悲意樂

由此修習爲因緣故，於彼色類諸有情所，得哀愍意樂及悲意樂。

寅三、心發正願

由是因緣，爲利惡趣諸有情故，誓居惡趣如己舍宅。作是誓言：我若唯住如是處所，能證無上正等菩提，亦能忍受。爲除一切有情苦故，一切有情諸惡趣業，以淨意樂，悉願自身代彼領受苦異熟果。爲令畢竟一切惡業永不現

行，一切善業常現行故，心發正願。

以淨意樂等者：於諸眾生發起利益安樂意樂，善故名淨，非由無漏世間清淨靜慮攝故。

丑二、明超越³。寅一、斷麤重

彼由修習如是世間清淨靜慮悲願力故，一切惡趣諸煩惱品所有麤重，於自所依皆得除遣。

寅二、獲轉依

由此斷故，菩薩不久獲得轉依，於諸惡趣所有惡業畢竟不作，於諸惡趣決定不往。

寅三、結異名

齊此菩薩，說名超過一切惡趣，亦名超過勝解行地，亦名已入淨勝意樂地。

癸三、顯淨治法³。子一、總標

如前住品所說信等能淨修治諸住十法，今於此中，當知亦能淨修治地。如是

十法所有安立所治、能治略義次第，皆應了知。

子二、別釋³。丑一、安立⁴。寅一、標

謂彼十種淨修地法，能對治彼所對治法，故得安立。

如前住品所說信等能淨修治諸住十法等者：前說十法，所謂淨信、悲、慈、惠捨、無有厭倦、善知諸論、善解世間、修習慚愧、堅力持性、供養如來，與此正同。然彼修治唯說地上，今於此中偏說地前，由是說義有差別。如下安立所治、能治略義次第，皆約種姓地、勝解行地爲論，不通所餘一切上地，由彼上地於前住品已釋其相，是故略不具說。

寅二、徵

何等爲十？

寅三、釋¹⁰。卯一、信

謂一切種全未發心，全未受持菩薩學處，是名爲信所對治法；對治彼故，安立於信。

卯二、悲

於諸有情有損害心，是名爲悲所對治法；對治彼故，安立於悲。

卯三、慈

於諸有情有瞋恚心，是名爲慈所對治法；對治彼故，安立於慈。

卯四、捨

於身命財有所顧戀，是名爲捨所對治法；對治彼故，安立於捨。

卯五、無倦

於諸有情希求報恩，見彼邪行貪著利養多有所作，是無厭倦所對治法；對治彼故，安立無倦。

於諸有情希求報恩等者：由希報恩，於彼有情多有所作。或見彼邪行，而復貪著利養爲因緣故，多有所作。於利他事能爲障礙，令不究竟，由是說彼是無厭倦所對治法。

卯六、善知諸論

無有方便善巧加行，是善知論所對治法；對治彼故，立善知論。

卯七、善知世間

性不柔和，不於他心隨順而轉，是名善知一切世間所對治法；對治彼故，安立善知一切世間。

卯八、慚愧

於修善法放逸懈怠，是名慚愧所對治法；對治彼故，安立慚愧。

卯九、堅力持性

於其長時種種猛利無間無斷生死大苦深生怯弱，當知是名堅力持性所對治法；對治彼故，所以安立堅力持性。

卯十、供養如來

於大師所猶豫疑惑，當知是名供養如來所對治法；對治彼故，所以安立供養如來。

寅四、結

如是且說所治、能治安立十法。

丑二、略義⁴ 寅一、徵

云何復名如是略義？

寅二、標

謂此十法略顯二義。

寅三、列

一者、顯示意樂清淨，二者、顯示加行清淨。

寅四、配

當知前三，顯示菩薩意樂清淨；其餘七種，顯示菩薩加行清淨。

丑三、次第³ 寅一、徵

如是十法次第云何？

寅二、釋

謂諸菩薩，於大菩提先深淨信。次於有苦諸有情類，發起悲愍。起悲愍時，

如是誓願：我應拔濟一切有情，令其安樂，而起慈心。起慈心已，一切能捨，於身命財無所顧戀。無顧戀已，即為彼義精勤加行，無有厭倦。無厭倦已，善知諸論。善知論已，如世間轉即如是知。知世間已，若自煩惱率爾現行，深生慚愧。生慚愧已，不隨煩惱自在而行，便能獲得堅力持性。由正獲得堅力持性，於正加行能無退轉，無量善法運運增長，能於如來奉獻上妙正行供養、財敬供養，是故最後供養如來。

寅三、結

是名十法次第修證。

子三、總結

當知如是十種善法，於一切地能淨修治。

本地分中菩薩地第三持究竟瑜伽處行品第四

壬八、行品² 癸一、略舉四行⁴ 子一、標

菩薩始從勝解行地，乃至最後到究竟地，於此一切菩薩地中，當知略有四菩

薩行。

子二、徵

何等爲四？

子三、列

一者、波羅蜜多行，二者、菩提分法行，三者、神通行，四者、成熟有情行。

子四、釋² 丑一、別辨四行² 寅一、辨⁴ 卯一、波羅蜜多行² 辰一、標十種

前說六種波羅蜜多，及方便善巧波羅蜜多、願波羅蜜多、力波羅蜜多、智波羅蜜多，如是十種波羅蜜多，總名波羅蜜多行。

辰二、釋後四² 巳一、第一義⁴ 午一、方便善巧

如前所說十二行相方便善巧，當知說名方便善巧波羅蜜多。

如前所說十二行相方便善巧者：如前菩提分品中說應知。（陵本四十五卷

四頁³⁶²⁵）

午二、願

如前所說五種大願，當知名願波羅蜜多。

如前所說五種大願者：如前菩提分品中說應知。（陵本四十五卷十六頁³⁶⁵⁷）

午三、力

所有十力加行清淨，當知名力波羅蜜多。

所有十力加行清淨者：力種性品說：菩薩於是內明所顯正因果相如實知已，精進修習，令處非處智力種性漸得清淨、漸得增長。（陵本三十八卷十四頁³¹⁴¹）又說：菩薩於是內明所顯已作不失、未作不得相如實知已，精勤修習，令其自業智力種性漸得清淨、漸得增長。又說：菩薩或由從他得正教授，或由施他無倒教授，能令所餘八力種性漸得清淨、漸得增長。

（陵本三十八卷二十一頁³¹⁷¹）此應準知。

午四、智² 未一、釋自性

於一切法如實安立清淨妙智，當知名智波羅蜜多。

未二、簡差別

今於此中，能取勝義無分別轉清淨妙慧，當知名慧波羅蜜多。能取世俗有分別轉清淨妙智，當知名智波羅蜜多。如是名爲二種差別。

於一切法如實安立清淨妙智者：功德品說：菩薩略有四種施設建立，唯有如來及諸菩薩能正施設、能正建立，非餘一切若天、若人、若諸沙門、若婆羅門，唯除聞已。何等爲四？一者、法施設建立，二者、諦施設建立，三者、理施設建立，四者、乘施設建立。（陵本四十六卷十三頁³⁷⁰⁷）此說於一切法如實安立，如彼應釋。

巳二、第二義⁴ 午一、方便善巧

復有異門。謂無量智，當知說名方便善巧波羅蜜多。

謂無量智者：此說五種無量應知。由諸菩薩，於五無量能起一切善巧作用故。此五無量，如功德品別釋其相。（陵本四十六卷十五頁³⁷¹⁵）

午二、願

希求後後智殊勝性，當知名願波羅蜜多。

午三、力

一切魔怨不壞道性，當知名力波羅蜜多。

午四、智

如實覺了所知境性，當知名智波羅蜜多。

卯二、菩提分法行

四念住等所有一切三十七種菩提分法、四種尋思、四如實智，皆如前說，總名菩薩菩提分法行。

卯三、神通行

如前所說威力品中，菩薩所有六種神通，是名神通行。

卯四、成熟有情行

如前所說二種無量。一、所調伏界無量，二、調伏方便界無量。及成熟品中所說一切成熟有情，總名菩薩成熟有情行。

寅二、結

如是四種菩薩妙行，當知普攝一切菩薩所行善行。

丑二、廣明施等²。寅一、釋其度名。

應知此中，施等十法，經三大劫阿僧企耶，長時修習乃圓證故；自性清淨體殊勝故；

自性清淨體殊勝者：前說菩薩次第圓滿六波羅蜜多已，能證無上正等菩提。於彼一一波羅蜜多別釋自性，應知彼體清淨殊勝。

過餘一切世間聲聞、獨覺善根，攝受最勝菩提果故。如是十法最極長時乃能圓證，自性最極清淨殊勝，能得最極菩提妙果，是故說名波羅蜜多。

寅二、顯建立義²。卯一、明因緣⁴。辰一、標。

應知如是波羅蜜多，由三因緣次第建立。

辰二、徵。

何等爲三？

辰三、列。

一、由對治故；二、由生起故；三、由異熟果故。

辰四、釋³。巳一、由對治³。午一、徵。

云何如是波羅蜜多，由對治故，次第建立？

午二、釋²。未一、舉前六。

謂慳、惡行、於諸有情怨恨逼惱、懈怠、散亂、闇鈍愚癡，如是六法能障菩提；施等六法能爲對治，如其所應，建立六種波羅蜜多。

未二、攝所餘。

當知所餘波羅蜜多即此所攝。

午三、結。

如是名爲由對治故，次第建立。

巳二、由生起³。午一、徵。

云何如是波羅蜜多，由生起故，次第建立？

午二、釋。

謂諸菩薩，先於財位無所顧戀，棄家諸欲，受淨尸羅。敬重戒故，能忍他惱，不惱於他。受持淨戒修習忍已，戒淨無動，無間無斷，於諸善品勤修加行。如是修習勤精進故，離諸放逸，能觸妙善心一境性。心得定故，如實了知，觀見一切所知境界。

午三、結

當知是名由生起故，次第建立。

巳三、由異熟果³ 午一、徵

云何如是波羅蜜多，由異熟果，次第建立？

午二、釋² 未一、外事圓滿

謂諸菩薩於現法中，精勤修學施等善法；由是因緣，於當來世獲得種種外妙珍財無不圓滿，當知是施波羅蜜多因力所作。

未二、內事圓滿³ 申一、標

獲得內五自體圓滿，是餘戒等波羅蜜多因力所作。

申二、徵

云何內五自體圓滿？

申三、釋⁵ 酉一、壽等殊勝

謂善趣攝若天若人，於餘有情壽等殊勝，當知是名第一圓滿。

酉二、性能堪忍

若有俱生於善加行常無厭倦，堪忍他惱，不樂惱他，當知是名第二圓滿。

酉三、性勇相應

若有俱生普於一切所作事業堅固勇猛，當知是名第三圓滿。

酉四、性薄煩惱

若有俱生性薄塵穢，於其自心能自在轉，心有堪能於一切義速證通慧，當知是名第四圓滿。

酉五、性具聰敏

若有俱生於一切義其慧廣大聰敏捷利，當知是名第五圓滿。

午三、結

應知是名由異熟果，如是六種波羅蜜多次第建立。

卯二、唯六數²。辰一、別配三學

由前四種波羅蜜多資糧、自性、眷屬、守護，當知圓滿修諸菩薩增上戒學；

資糧自性眷屬守護者：謂施波羅蜜多是戒資糧，戒波羅蜜多是戒自性，忍波羅蜜多是戒眷屬，精進波羅蜜多是戒守護。如是次第圓滿戒學應知。

由其靜慮波羅蜜多，當知圓滿修諸菩薩增上心學；由其般若波羅蜜多，當知圓滿修諸菩薩增上慧學。

辰二、結無過增

過此三上，更無菩薩學道可得，是故此三普攝一切菩薩學道。由此建立波羅蜜多唯有六種，除此無有若過若增。

癸二、明四應作⁴。子一、標

又諸菩薩略有四種所應作事，由是普攝一切所作。

子二、徵

何等爲四？

子三、列

一者、爲證菩提修諸善行；二者、由此爲先達真實義；三者、圓證威力；四者、成熟有情。

子四、配

如是四種菩薩所作，當知是先所說四行，如其次第所爲所立。是故過此，更不建立有諸餘行。

當知是先所說四行者：謂如前說四菩薩行。一者、波羅蜜多行，二者、菩提分法行，三者、神通行，四者、成熟有情行應知。

本地分中菩薩地第三持究竟瑜伽處建立品第五之一

辛三、後建立攝³。壬一、標

依如來住及依如來到究竟地，諸佛世尊有百四十不共佛法。

壬二、列

謂諸如來三十二大丈夫相、八十隨好、四一切種清淨、十力、四無所畏、三念住、三不護、大悲、無忘失法、永害習氣，及一切種妙智。

壬三、釋² 癸一、別顯¹⁰ 子一、諸相隨好² 丑一、果攝² 寅一、列相好² 卯

一、三十二相² 辰一、徵

云何如來三十二種大丈夫相？

辰二、列

一者、具大丈夫足善安住等案地相，是大丈夫大丈夫相。二者、於雙足下現千輻輪，轂輞衆相無不圓滿。三者、具大丈夫纖長指相。四者、足跟趺長。五者、手足細軟。六者、手足網縵。七者、立手摩膝。八者、暨泥耶瞞。九者、身不僂曲。十者、勢峰藏密。十一者、身相圓滿如諾瞿陀。十二者、常光一尋。十三者、身毛上分。十四者、身諸毛孔一一毛生，如紺青色螺文右旋。十五者、身皮金色。十六者、身皮細滑，塵垢不著。十七者、於其身上

兩手、兩足、兩肩及項七處皆滿。十八者、其身上半如師子王。十九者、肩善圓滿。二十者、膊間充實。二十一者、身分洪直。二十二者、具四十齒，皆悉齊平。二十三者、其齒無隙。二十四者、其齒鮮白。二十五者、頷如師子。二十六者、其舌廣薄，若從口出，普覆面輪及髮邊際。二十七者、於諸味中得最上味。二十八者、得大梵音，言辭哀雅能悅衆意，譬若羯羅頻迦之音，其聲雷震猶如天鼓。二十九者、其目紺青。三十者、睫如牛王。三十一者、其頂上現烏瑟膩沙。三十二者、眉間毫相其色光白，螺文右旋，是大丈夫大丈夫相。

卯二、八十隨好³ 辰一、徵

云何如來八十隨好？

辰二、列² 巳一、於下身分六十隨好

謂兩手足具二十指及以節爪并皆殊妙，是即名爲二十隨好。兩手、兩足表裏八處，手四、足四并皆殊妙，是即名爲八種隨好。兩踝、膝、股六處殊妙，

是即名為六種隨好。兩臂、肘、腕六處殊妙，是即名為六種隨好。腰、縫殊妙，各一隨好。兩核殊妙，為二隨好。陰藏殊妙，為一隨好。兩臀殊妙，為二隨好。臙、臙、臙三并皆殊妙，各一隨好。兩脅、腋、乳并皆殊妙，為六隨好。腹、胸、項、脊，各一隨好。如是所說，除頸已上，於下身分六十隨好。

於下身分六十隨好者：前說腰、縫殊妙，為二隨好；腹、胸、項、脊，為四隨好。并餘所說，故成六十。

巳二、從頸以下二十隨好

上下齒鬢并皆殊妙，為二隨好。齟齬殊妙，為一隨好。兩唇眷屬并皆殊妙，為二隨好。頤善圓滿，為一隨好。兩頰圓滿善安其所，為二隨好。兩目眷屬并皆殊妙，為二隨好。兩眉殊妙，為二隨好。其鼻二孔并皆殊妙，為二隨好。其額殊妙，為一隨好。角鬢、兩耳并皆殊妙，為四隨好。頭髮殊妙，為一隨好。如是所說，從頸已上二十隨好。

辰三、結

前有六十，後有二十，總合說為八十隨好。

寅二、簡差別² 卯一、辨已得等⁴ 辰一、初獲異熟

如是諸相及諸隨好，若諸菩薩始入淨勝意樂地時，已得異熟。

辰二、殊勝清淨

從此已上，諸相隨好，展轉獲得殊勝清淨。

已得異熟等者：相及隨好，菩薩始入地時，創初獲得，名得異熟。由是菩薩異熟相故，如下自說。如是相好，菩薩若在種性地中，唯有種子依身而住。菩薩若在勝解行地，始能修彼能得方便。菩薩若在清淨增上意樂地中，乃名為得。菩薩若在諸餘上地，如是相好轉勝清淨。此應準知。

辰三、一切圓滿

當知乃至坐菩提座，方乃證得其餘所有四一切種妙清淨等不共佛法，善淨圓滿。

四一切種妙清淨等不共佛法等者：謂一切種所依清淨、一切種所緣清淨、一切種心清淨、一切種智清淨，是名四一切種清淨。等言，等取十力等不共佛法。此中義顯，相好及餘一切不共佛法，於佛果位，說名善淨圓滿。如下自說，若在如來到究竟地，當知相好善淨無上故。先菩薩時亦已成就，然是下劣，故不建立。

辰四、下劣成就

若下劣者，先菩薩時亦已成就。

卯二、辨其資糧² 辰一、無差別

始從清淨勝意樂地，一切所有菩提資糧無有差別，能感一切相及隨好。

辰二、有差別² 巳一、標

又此一切菩提資糧略有二種，謂去菩提若遠、若近。

巳二、釋² 午一、遠

此中遠者，謂未獲得諸相、隨好異熟果時。

午二、近

所言近者，謂初獲得諸相、隨好異熟果時，或從此上，展轉獲得殊勝清淨。

丑二、因攝³ 寅一、出由業因² 卯一、廣相似業³ 辰一、標

又薄伽梵由所化力，爲衆宣說造種種業，感得如是相、隨好果。

辰二、徵

何以故？

辰三、釋³ 巳一、總說因緣

所化有情於其種種惡業現行深生喜樂。如是種種現行惡業是所對治，感相、隨好種種善業是能對治。彼聞如是種種殊勝大果勝利，便於如是大果勝利深生愛樂；由是因緣，當離諸惡，當修諸善，是故爲說。

巳二、別廣諸相² 午一、指

廣如諸相素怛纜說。

午二、列²⁷ 未一、足下善安住相

謂諸菩薩，於戒禁忍及惠捨中善安住故，感得足下善安住相。

未二、足下千輻輪相

於其父母種種供養，於諸有情諸苦惱事種種救護，由往來等動轉業故，感得足下千輻輪相。

未三、纖長指相

於他有情遠離損害及不與取；於諸尊長先語省問，恭敬、禮拜、合掌、起迎，修和敬業；於他有情深心所喜所愛財位不令乏短；及能摧伏自憍慢故；感大丈夫纖長指相。

未四、足跟跌長

即上所說感三相業，總能感得足跟跌長，是前三相所依止故。

未五、手足網縵

由四攝事，攝諸尊長，是故感得手足網縵。

未六、手足細軟

奉施尊長塗身、按摩、沐浴、衣服，是故感得手足細軟。

未七、立手摩膝

修諸善法不生喜足，令諸善法展轉增長，是故感得立手摩膝。

未八、墜泥耶膺

自於正法如實攝受，令得究竟，廣爲他說；及正爲他善作給使；是故感得墜泥耶膺。

未九、身不偻曲

於其正法漸次等顯續索轉故，於身語意種種惡業皆能止息，

於其正法漸次等顯續索轉故者：此中等顯，謂遍開示。攝異門分說：遍開示者，謂無間演說，不作師拳，無所隱覆。（陵本八十三卷十二頁⁶³¹²）又

自覺了法已等相續起，名續索轉。

於疾病者卑屈瞻侍，給施良藥，病力羸頓能正策舉，飲食知量，於諸欲中曾不低下，是故感得身不偻曲。

於諸欲中曾不低下者：謂於諸欲不生貪故，不爲諸欲所制伏故。

未十、勢峰藏密

於被他擯無依有情，以法以正慈悲攝受，修習慚愧，施他衣服，是故感得勢峰藏密。

未十一、身相圓滿如諾瞿陀

於身語意能自防禁，於自攝受及諸飲食皆善知量，施病醫藥，於不平等事業攝受及不平等所受用中皆不隨轉，於界互違能令隨順，是故感得身相圓滿如諾瞿陀。

未十二、身毛上分

由業感得立手摩膝，即能感得身毛上分。

未十三、毛紺青色螺文右旋

自善觀察，親近明智，能思微義，尊所居處能淨修治，敷舉沐浴。唯一住故，依一友故，入微義故，草葉等穢能蠲除故，又能除去客塵垢故，感身毛

孔一一毛生，如紺青色螺文右旋。

唯一住故等者：聞所成地中說：善法可愛生展轉住。謂於善法不放逸者，於現法中乃至能得般涅槃故，於後法中往善趣故，多有所作。（陵本十三卷二十二頁¹¹⁶⁰）即依此義，名唯一住。一種佛教所應知處所建立故，此釋前說自善觀察。依止善友，不依惡友，名依一友，此釋前說親近明智。審諦思惟如其所聞、如所究達諸法道理，名入微義，此釋前說能思微義。草座、葉座及餘敷具，由能修治，名能蠲除草葉等穢及客塵垢。謂由敷數翻舉蠲除彼穢，及由沐浴去彼塵垢故，此釋前說尊所居處能淨修治，敷舉沐浴。

未十四、身皮金色常光一尋

能施悅意發喜飲食、騎乘、衣服、莊嚴具等資身什物，離諸忿恚，是故感得身皮金色、常光一尋。

未十五、身皮細滑塵垢不著

由此業感身諸毛孔一一毛生，當知即此復能感得身皮細滑，塵垢不著。

未十六、於其身上七處皆滿

以其廣多上妙清淨餽饌飲食，惠施大眾皆令充足，由此感得於其身上七處皆滿。

未十七、其身上半如師子王

於諸有情隨所生起如法所作，能爲上首而作助伴，離於我慢，無諸獷悞，能爲有情遮止無利，安立有利，由此感得其身上半如師子王。於一切事稟性勇決，如師子故。

未十八、肩善圓滿膊間充實

即由此業，當知復感肩善圓滿、膊間充實。

未十九、身分洪直

由此業感纖長指相，復即感得身分洪直。

未二十、具四十齒齊平無隙

遠離一切破壞親友離間語言，若諸有情已乖離者，能令和合，由此感得具四十齒皆悉齊平，其齒無隙。

未二十一、其齒鮮白

修欲界慈，思惟法義，由此感得其齒鮮白。

修欲界慈者：謂修慈無量定對治瞋恚，此對治已，出離欲界，是故說言修欲界慈。

未二十二、領如師子

若諸有情有所希冀，隨其所樂，正捨珍財，由此感得領如師子。

未二十三、於諸味中得最上味

視諸有情猶如己子，愛念救護，淨信哀愍，給施醫藥澄淨無穢，由此感得於諸味中得最上味。施法味故，嘗法味故，能淨修治變壞味故。

施法味故等者：此施法味，釋前愛念救護，爲彼說法，令得義利故。此嘗法味，釋前淨信哀愍，令於聖教生淨信故。此能淨修治變壞味，釋前給施

醫藥澄淨無穢，謂以此法究竟能治內心病故。言變壞味者，義顯煩惱令心變壞，為變壞苦之所逼觸故。

未二十四、頂現烏瑟膩沙舌覆面輪

於離殺等五種學處，能自受護，亦勸他受。

於離殺等五種學處等者：聲聞地說：阿羅漢苾芻諸漏永盡，不能習近五種處所。一者、不能故思殺害諸眾生命，二者、不能不與而取，三者、不能行非梵行習姪欲法，四者、不能知而妄語，五者、不能貯蓄受用諸欲資具。（陵本三十四卷二十六頁²⁸¹³）此亦名為永斷五支。此五處所，名離殺等五種學處。受謂攝受，護謂防護。決擇分中說有攝受律儀、防護律儀，差別應知。（陵本五十三卷四頁⁴²¹⁹）

修悲心故，於大法受能正行故，由此感得其頂上現烏瑟膩沙、其舌廣薄普覆面輪。

修悲心故等者：此修悲心，釋前於離殺等五種學處。由修悲心，遠離損害有情諸邪行故。菩薩發心，能為無上菩提根本，亦是大悲之所等流，名大法受。共自他利，名能正行，此釋前說能自受護，亦勸他受。

未二十五、音若頻迦聲如天鼓

常修諦語、愛語、時語，及以法語，由是因緣，得大梵音，言辭哀雅能悅眾意，譬若羯羅頻迦之音，其聲雷震猶如天鼓。

未二十六、其目紺青睫如牛王

普於世間恆常修習慈心悲哀，如父如母，由此感得其目紺青、睫如牛王。

未二十七、毫相光白螺文右旋

於有德者如實讚歎稱揚其美，由此感得眉間毫相其色光白，螺文右旋。

已三、結由淨戒² 午一、總感一切

如是一切三十二種大丈夫相無有差別，當知皆用淨戒為因而能感得。何以故？若諸菩薩毀犯淨戒，尚不能得下賤人身，何況能感大丈夫相。

午二、說攝頂相

當知此中，其頂上現烏瑟膩沙，及以如來無見頂相，合立一種大丈夫相。離此更無別可得故。如是且說能感相似三十二相種種業因廣建立已。

卯二、略說善修² 辰一、別辨相³ 巳一、標

復次，略說在家、出家二分菩薩，所有四種善修事業，當知能感一切相好。

四種善修事業者：謂諸菩薩，於六波羅蜜多決定修作、委悉修作、恆常修作、無罪修作，是名四種善修事業。如分品釋應知。（陵本四十七卷

六頁
3749）

巳二、釋⁴ 午一、決定修作

謂於此中決定修作，能感足下善安住相。

午二、委悉修作

委悉修作，能感足下千輻輪相、立手摩膝、手足網縵、身皮細滑、於其身上七處皆滿、肩善圓滿、髀間充實、身分洪直、其舌廣薄。

午三、恆常修作

恆常修作，感纖長指、足跟跌長、身不偻曲、其身圓滿如諾瞿陀、其齒無隙。

午四、無罪修作² 未一、標

無罪修作，能感餘相。

未二、釋。申一、於諸有情無損加行

當知此中，於諸有情無損加行，由此能感手足細軟、身皮細滑。

申二、於善加行次第應時

於諸善中次第加行、應時加行，由此感得豎泥耶腦。

申三、歡喜淨心現行諸善

深生歡喜，極光淨心現行諸善，由此感得常光一尋、身皮金色、其齒鮮白、眉間白毫。

申四、無依修善覆藏己德

不依稱譽聲頌修善，覆藏己德，由此能感勢峰藏密。

申五、所修善根迴向菩提

所修善根迴向善提，由此感得身毛上分、具四十齒皆悉齊平、於諸味中得最上味、其頂上現烏瑟膩沙。

申六、修善無厭無劣加行

修善無厭無劣加行，由此感得其身上分如師子王、頷如師子。

申七、利諸有情平等瞻視

於諸有情，以利益心平等瞻視，得齒齊平、目紺青色、睫如牛王。

申八、於下劣善不生喜足

於下劣善不生喜足，起勝加行，由此因緣，得大梵音，言辭哀雅能悅衆意，譬若羯羅頻迦之音，其聲雷震猶如天鼓。

巳三、結

如是四種善修事業，能得菩薩三十二種大丈夫相殊勝清淨。

辰二、總建立。³ 巳一、依地辨⁵。 午一、種性地

當知如是三十二種大丈夫相、八十隨好，菩薩若在種性地中，唯有種子依身

而住。

午二、勝解行地

菩薩若在勝解行地，始能修彼能得方便。

午三、淨意樂地

菩薩若在清淨增上意樂地中，乃名爲得。

午四、諸餘上地

菩薩若在諸餘上地，如是相好轉勝清淨。

午五、如來地

若在如來到究竟地，當知相好善淨無上。

巳二、明廢立

如是諸相是有色故，劣中勝品諸有情類易了知故，雖有一切不共佛法皆得名爲大丈夫相，唯立此爲大丈夫相。

巳三、釋得名

又即如是三十二種大丈夫相，由所依性能任持故，由極殊妙令端嚴故，說名隨好。

寅二、料簡福聚² 卯一、略舉能感⁶ 辰一、一毛孔處

又於此中以要言之，一切有情福聚量等爾所福聚，能感如來一毛孔處。

一切有情福聚量等爾所福聚者：感人天生一切有情自體福德因緣，是名一切有情福聚。今說如有情量所有福聚，名彼量等爾所福聚。

辰二、一種隨好

乃至一切所有毛孔隨入福聚爾所福聚，能感如來一種隨好。

一切所有毛孔隨入福聚者：此中毛孔，謂於如來。前說一切有情福聚，能感如來一毛孔處，今即以彼有情福聚，增說乃至如來一切所有毛孔，是名隨入福聚。

辰三、一丈夫相

乃至一切所有隨好隨入福聚，增至百倍爾所福聚，能感如來相中一相。

辰四、眉間白毫

乃至一切所有諸相隨入福聚，除白毫相、烏瑟膩沙，增至千倍爾所福聚，能感如來眉間白毫。

辰五、無見頂相

乃至白毫隨入福聚，增至百千倍爾所福聚，能感如來其頂上現烏瑟膩沙無見頂相。

辰六、大法螺相

乃至白毫隨入福聚，增至俱胝百千倍數爾所福聚，能感如來諸相、隨好所不攝餘大法螺相。由此法螺隨如來欲發大音聲，普能遍告無邊無際諸世界中所化有情。

卯二、總顯圓滿

如是無量福德資糧修證圓滿，能感如來不可思議、無上無等、遍一切種最極圓滿所攝自體。

寅三、釋名無量。³ 卯一、標

又此能感諸相、隨好無量善業，當知略由三因緣故，說名無量。

卯二、釋。³ 辰一、時無量

謂經於三無數大劫，無間修習乃圓證故，名時無量。

辰二、意樂無量

於諸有情無量利益安樂意樂增上緣力所集成故，名爲妙善意樂無量。

辰三、品無量

無量善業差別品類所集成故，名品無量。

卯三、結

故言無量福德資糧修習圓證，能起如來諸相、隨好。

子二、四一切種清淨。³ 丑一、徵

云何如來四一切種清淨？

丑二、列

一者、一切種所依清淨，二者、一切種所緣清淨，三者、一切種心清淨，四者、一切種智清淨。

丑三、釋。⁴ 寅一、所依清淨

云何一切種所依清淨？謂一切煩惱品麤重并諸習氣，於自所依無餘永滅；又於自體，如自所欲取住捨中自在而轉；是名一切種所依清淨。

寅二、所緣清淨

云何一切種所緣清淨？謂於種種若化、若變、若所顯現一切所緣皆自在轉，是名一切種所緣清淨。

若化若變若所顯現者：若化、若變，此說神境智通所緣。若所顯現，此說所餘一切智通所緣應知。

寅三、心清淨

云何一切種心清淨？謂如前說一切心麤重永滅離故，又於心中一切種善根皆積集故，是名一切種心清淨。

寅四、智清淨

云何一切種智清淨？謂如前說一切無明品麤重永滅離故，又遍一切所知境中智無障礙、智自在轉，是名一切種智清淨。

子三、十力⁴ 丑一、徵

云何如來十力？

丑二、列

一者、處非處智力，二者、自業智力，三者、靜慮解脫等持等至智力，四者、根勝劣智力，五者、種種勝解智力，六者、種種界智力，七者、遍趣行智力，八者、宿住隨念智力，九者、死生智力，十者、漏盡智力。

丑三、指

如是十種如來智力，當知廣如十力經說。

丑四、釋² 寅一、別顯² 卯一、釋名如來

當知此中，諸有所言、所說、所宣，一切如實皆無虛妄，故名如來。

卯二、釋其十力¹⁰ 辰一、處非處智力² 巳一、別釋名² 午一、辨處非處² 未一、處

淨不淨果非不平等，如實轉因，是名爲處，亦名建立、亦名爲依、亦名爲起。

淨不淨果非不平等如實轉因者：淨不淨業能感淨不淨果，如是因果非不平等。即以此因爲依處故，如實智生，由是說言如實轉因。若諸如來應正等覺，如實了知，能正宣說，名處智力。

未二、非處

淨不淨果不平等因，與上相違，是名非處。

淨不淨果不平等因等者：若執非因以爲是因，是名不平等因。即以此因爲依處故，顛倒智生，不如實轉，由是說言與上相違。若諸如來應正等覺，於此非處如實了知，能正宣說，名非處智力。

午二、明智力性² 未一、智⁴ 申一、標如實

遠離一切增上慢智，說名如實。

申二、釋離慢

若一切智、若無滯智、若清淨智，當知說名遠離一切增上慢智。

若一切智等者：於一切界、一切事、一切品、一切時智無礙轉，名一切智。暫作意時，遍於一切無礙速疾無滯智轉。不由數數作意思惟，依一作意遍了知故，名無滯智。一切煩惱并諸習氣畢竟斷故，名清淨智。義如菩提品說。（陵本三十八卷一頁³⁰⁹⁹）

申三、指諸句

如是一切智等諸句，當知如前最極無上菩提品記。

申四、釋次第

數之次第最居其首，故名第一。

未二、力

以無上故，

以無上故者：義顯於大眾中正獅子吼，故名無上，此即初義釋名爲力。

與一切種饒益一切有情功能具相應故，畢竟勝伏一切魔怨大威力故，說名爲

力。

與一切種饒益一切有情功能具相應故者：饒益有情有十一相，名一切種。

如戒品饒益有情戒說應知。

巳二、總顯義² 午一、釋眾德⁵ 未一、名大涅槃

攝受如實圓證因故，如其所欲皆能現行自在轉故，說名成就最上涅槃。以無上故，說名爲大。

攝受如實圓證因故等者：決擇分說：若聖弟子將入無餘涅槃界時，所有一切善及無記諸法種子皆被損害。（陵本五十一卷十八頁⁴¹³¹）如來涅槃，當知不爾。一切善法種子不被損害，是名攝受如實圓證之因；及能轉得內緣自在，名如所欲自在而轉；如是說名成就最上涅槃。以無上故，名大涅槃。

未二、名仙尊位

八支聖道所證得故，遠離一切災患畏故，名仙尊位。

未三、名自知

能自了知自所證故，說名自知。

未四、名轉梵輪

既自證已，由哀愍心，廣爲有情等開示故，名轉梵輪。何以故？謂諸如來有是增語，說名爲梵，亦名寂靜、亦名清涼。最初能轉，從此已後餘復爲餘，如是展轉梵所推運，周旋一切有情衆中，故名梵輪。

未五、名師子吼

自顯墮在最上施設無上大師圓滿攝故；能說彼道對治一切餘邪道故；於道怨敵異論現前無怯弱故；爲欲勝伏一切他論，宣揚廣大無上論故；名大衆中正師子吼。

午二、明略攝² 未一、第一義

以要言之，當知此中，顯發、辯了、施設、開示自利行滿，利他行滿，自利利他圓滿不共。

以要言之等者：此中結顯前說三種略義。自利行滿，結顯經說成就最上涅槃。利他行滿，結顯經說能轉梵輪。自利利他圓滿不共，結顯經說於大衆中正師子吼。

未二、第二義

復有異門。此中略義，謂所應得勝方便。此勝方便，一切衆會隨所樂欲，或天或人一切皆從我所獲得此勝方便。如病除愈，當知此顯自知已得大安隱處。如彼疾病除愈方便，當知此顯轉於梵輪。如遮一切邪醫，自稱顯已決定能愈衆疾，當知此顯於大衆中正師子吼。

復有異門等者：此中更顯三種略義，名有異門。究竟自義所應證法，名所應得。能得彼法決定勝道，名勝方便。此勝方便皆由如來現等覺已，能正宣說，令聖弟子一切正士，皆乘此法而得出離，由是說言一切皆從我所獲得。如是總顯前說三種略義。下更分別，如文可悉。此中自知已得大安隱處，即前所說成就最上涅槃應知。

辰二、自業智力²。巳一、別辨業⁷。午一、時分攝。

若有諸業已作、已增、已減，名爲過去。若有諸業非是已作、已增、已減，亦非正作，而是當作，名爲未來。若有諸業非是已作、已增、已減，而是正作、正造、正爲，名爲現在。

午二、品類攝。

如是諸業品類差別復有三種。所謂身業、語業、意業。

午三、分位加行攝。² 未一、分位。

法受分別復有四種，如前廣說。謂有法受得現世樂，後苦異熟，乃至廣說。

未二、加行。

又此諸業現法當來有益無益加行差別，如應當知。

法受分別等者：謂有法受，現在受樂，於當來世受苦異熟；或有法受，現在受苦，於當來世受樂異熟；或有法受，現在受樂，於當來世受樂異熟；或有法受，現在受苦，於當來世受苦異熟；如是名爲四種法受。由此諸

業，或有此世能爲利益，非於他世；或有他世能爲利益，非於此世；或有此世及於他世俱爲利益；或有此世及於他世俱非利益；如是名爲四種加行

差別。義如自他利品中說應知。（陵本三十五卷十九頁²⁸⁹⁰）

午四、方所攝。

若所造業依此方所，是名爲處。

午五、依處攝。

若所造業以有情數、非有情數爲所依事，是名爲事。

六、因緣攝。

若所造業以不善根、或以善根爲因緣起，是名爲因。

午七、過患功德攝。

若所造業感受非愛過失功德相應諸果，是名異熟。

巳二、結略義。

如是略說一切時分、一切品類、一切分位加行差別、一切方所、一切依處、

一切因緣、一切過患及與功德。於此一切種類差別，皆如實知，是名如來自業智力。除此無有若過若增。

如是略說一切時分等者：前說過去、未來、現在，是名一切時分。身語意業，是名一切品類。法受分別，及與諸業加行差別，是名一切分位加行差別。餘易了知。

辰三、靜慮解脫等持等至智力² 巳一、說靜慮等² 午一、別釋種類² 未一、靜慮解脫有四靜慮、有八解脫，即由如是靜慮、解脫，心有堪能，心得自在，隨所樂事皆能成辦。

未二、等持等至³ 申一、標名

若隨彼彼色類差別三摩地相而入定時，當知說名等持、等至。

若隨彼彼色類差別三摩地相等者：謂隨彼彼有色有情差別，定心所起諸所緣相，即此所說三摩地相，由是說名等持、等至。謂如有尋有伺、無尋唯伺、無尋無伺，是此所說等持差別。又如八勝處三摩鉢底及十遍處三摩鉢

底一分，是此所說等至差別。如是一切有色諸定，皆此等持、等至所攝應知。

申二、引教

如說世尊隨此色類三摩地相而入定時，如其定心，大光普照一切梵世妙音說法，但聞其聲，都無所見，乃至廣說。

申三、結義

如是如來隨欲顯示彼彼事義，或共世間、不共世間，隨此色類三摩地相而入定時，速疾能辦。

午二、顯無過增

當知此中，即由靜慮、解脫勢力，心得自在。心自在故，依止於心，隨所樂事一切成辦。齊此名爲修靜慮者一切所作，除此無有若過若增。如來於此靜慮所作一切種類，皆如實知，是故唯說靜慮、解脫、等持、等至。

巳二、說得彼智² 午一、別辨相³ 未一、於未得得² 申一、舉雜染

又若略說此靜慮等有二雜染。一者、爲得所未得中障礙雜染，謂無方便善巧加行，及以諸蓋隨一現行。二者、已得所應得中自地雜染，謂煩惱纏及以睡眠。

申二、例清淨

如是清淨復有四種。與上相違，應知其相。

如是清淨復有四種等者：前二雜染有四差別，如文可知。今說清淨與彼相違，亦有四種，故作是說。

未二、於彼假名

又即如是諸靜慮等種種引發假立名字，隨其色類如應安立，是名建立。

種種引發假立名字者：謂由種種假立名字，能正引發諸靜慮等故。

未三、於彼增進邊際

又即如是諸靜慮等具證得已，後更勝進修習圓滿，得隨所欲、得無艱難、得無梗澀，是名清淨。

午二、結略義

如來於此，如其未得、如其已得，於所得中，若劣、若勝、若彼假名、若彼所有增進邊際，如是一切皆如實知，故說如來普於一切靜慮、解脫、等持、等至，得無上智。

如其未得等者：此中未得，結顯前說障礙雜染。於所得中，若劣，結顯前說自地雜染；若勝，結顯前說四種清淨。餘易可知。

辰四、根勝劣智力

如所成熟修證圓滿，信等五根成軟中上，當知是名諸根勝劣。

如所成熟等者：應可成熟補特伽羅，名所成熟。成熟品說：住聲聞種姓，於聲聞乘應可成熟。住獨覺種姓，於獨覺乘應可成熟。住佛種姓，於無上乘應可成熟。（陵本三十七卷二十頁³⁰⁷⁶）今說如其聲聞、獨覺及佛種姓，信等五根有軟中上三種差別，依此建立諸根勝劣。

辰五、種種勝解智力

若從他信以爲其先，或觀諸法以爲其先，成軟中上愛樂印解，當知是名種種勝解。

辰六、種種界智力

若廣建立種種種性，或諸聲聞所有種性，或諸獨覺所有種性，或諸如來所有種性，或有種種不定種性，或貪等行差別道理，乃至有情八十千行，當知此中名種種界。

辰七、遍趣行智力² 巳一、釋名³ 午一、第一義

若即如是諸趣入門隨順正行，如貪行者修不淨觀，如聲聞地已廣宣說。當知此等名遍趣行。

午二、第二義

復有異門。謂趣一切五趣之行，當知此等名遍趣行。

午三、第三義

復有異門。謂依種種黨類差別，更互相違，各各異見、異欲諍論、互相違背

諸外道類，即諸沙門、或婆羅門所有諸行；或餘一切品類差別此世他世無罪趣行；當知此等名遍趣行。

巳二、指說

如迦羅摩經等廣說。

或餘一切品類差別等者：此說三乘聖道趣涅槃行，名爲此世他世無罪趣行。望前外道沙門、或婆羅門，名餘一切品類差別，此是內法凡聖補特伽羅攝故。顯揚論說：遍趣行智力，謂於一切相乘出離差別中無礙智性。

（顯揚論四卷八頁）與此義同。

辰八、宿住隨念智力² 巳一、標

若於種種有情衆中，謂於東方南西北方，種種名字假設安立品類差別。

若於種種有情衆中等者：諸有情衆有六十二，如意地說。（陵本二卷十八頁169）是名種種。於此有情諸方名字施設有異，是名假設安立品類差別。

隨先過去所有自體八言說句差別類中，隨念六種略所行行，有無量種宿住隨

念。

巳二、釋² 午一、別辨相³ 未一、言說行相² 申一、八言說句² 酉一、徵
何等名爲八言說句？

酉二、列

謂如是名、如是生類、如是種姓、如是飲食、如是領受苦樂差別、如是長壽、如是久住、如是所有壽量邊際。

如是長壽等者：此中三種，皆是壽量差別略行所攝。有情壽量種種非一，由此說言如是長壽。有青年齒或少、或中、或老，住有差別，由此說言如是久住。若阿羅漢、若諸有學，於現法中定般涅槃；若諸異生住最後有；

由此說言如是所有壽量邊際。義如決擇分說。（陵本五十二卷十頁⁴¹⁷⁸）

申二、六種略行² 酉一、徵

何等名爲隨言說句六種略行？

酉二、列

一者、呼召假名，二者、刹帝利等色類差別，三者、父母差別，四者、飲食方軌，五者、興盛衰損，六者、壽量差別。

未二、差別標說⁶ 申一、呼召假名

由諸世間依憑如是八言說句、六種略行，於自於他起言起說：此是我名，此是彼名。

申二、色類差別

我是刹帝利，彼是刹帝利。我是婆羅門、吠舍、戍達羅，彼是婆羅門、吠舍、戍達羅。

申三、父母差別

此是我母，此是彼母。如說其母，父亦如是。

申四、飲食方軌

我食如是色類飲食，所謂酪、漿、羹、飯、糜等。彼食如是色類飲食，乃至廣說。

申五、興盛衰損

我有如是色類興衰差別而轉，彼有如是色類興衰差別而轉。

申六、壽量差別

我住如是色類年齒，所謂或少、或中、或老。彼住如是色類年齒，乃至廣說。

未三、隨念邊際

唯有爾所隨先過去所有自體八言說句差別類中六種略行，過此無有餘言說句及以略行。是故唯於如是品類發起隨念，更無有增。

午二、結略義

即於此中，若言說行所有行相，若言說句所有標說，及即於此隨起憶念，是故說言并相、并說皆能隨念。

若言說行所有行相等者：前說六種略所行行，名言說行所有行相。依言說句起言起說，名言說句所有標說。

辰九、死生智力² 巳一、出能見³ 午一、名天眼

此中靜慮說名天住。眼依彼故，是彼果故，彼攝受故，名爲天眼。

此中靜慮說名天住等者：聲聞地說：言天住者，謂諸靜慮、諸無色住。

（陵本三十四卷二十五頁²⁸⁰⁹）今於此中釋名天眼，唯取靜慮名爲天住，爲

顯此眼依靜慮起，是靜慮果，復爲靜慮所攝受故。

午二、名極淨

是極圓滿、是善清淨靜慮果故，名極清淨。

午三、名超人² 未一、於修得

於其中，所有名字皆不相似，是故說言超過於人。

於其中所有名字等者：謂於人中說名肉眼，彼所行境有明、無障，乃可現前。天眼不爾，有障、無障、若明、若闇、若近、若遠皆可現前，由是說言皆不相似。

未二、於生得

欲界天中亦有生得，名相似轉清淨天眼，人中亦無。

欲界天中亦有生得等者；此說欲界天中亦有天眼，然是生得，非靜慮果，是故名相似轉清淨天眼。爲顯此亦超過於人，是故說言人中亦無。當知是義非此所說，非是如來天眼攝故。

巳二、明所見² 午一、於死生時

諸有情類臨欲終沒，名爲死時；住在中有，名爲生時。

午二、於中有相³ 未一、惡色好色別

趣黑闇者，由二種相，起如是類意生中有，如黑糝光及陰闇夜，故名惡色。趣明白者，由二種相，起如是類意生中有，如晴明夜及婆羅痂斯極鮮白衣，故名好色。

未二、下劣勝妙別

諸惡色者，說名爲劣；諸好色者，說名爲妙。

未三、惡趣善趣別² 申一、總標能往

諸下劣者，名往惡趣；諸勝妙者，名往善趣。

申二、別釋其相² 酉一、惡趣攝² 戌一、辨種種² 亥一、若由此生² 天一、明作業² 地一、由壞戒

所有壞戒及彼等起，說名成就諸身語意三種惡行。

所有壞戒及彼等起等者：所受先壞，是名壞戒。由貪瞋癡爲因緣故，能起身語不善業思，名彼等起。成就十種不善業道，名身語意三種惡行。

地二、由壞見² 玄一、標二種

有二邪見。謂壞見者所成邪見，誹謗一切；及住彼意異品類者所成邪見，誹謗賢聖。如是皆名謗賢聖者。

有二邪見等者：此說邪見業道有二差別。如有一類大乘惡取空者，名壞見者所成邪見。又如外道空見論者，起如是見，立如是論；無有施與、無有愛養、無有祠祀，廣說乃至世間無有真阿羅漢。名住彼意異品類者所成邪見。如是二種差別應知。

玄二、顯等起

由邪見故，計著邪因及以邪果；由此爲緣，造作邪業。造邪業故，所有法受或現受樂，於當來世受苦異熟；或現受苦，於當來世受苦異熟。是故復說起諸邪見業法受因。

起諸邪見業法受因者：謂起邪見、造作邪業及現法受，能爲當來苦異熟因故。

天二、結因緣

彼雖成就其餘所有種種善法，而但由此往於惡趣，是故說言由此因緣。

亥二、若得生已受苦惱等² 天一、明得生緣² 地一、名身壞

名色二種更互乖離，故名身壞。

地二、名極死

一切死中，如是死者最極下劣，故名極死。

一切死中等者：謂善心死、不善心死、無記心死，名一切死。即於此中，不善心死者，將命終時，見亂色相，極重苦受逼迫於身，是故說名最極下

劣。義如意地中說。（陵本一卷十四頁70）

天二、明受諸苦。 地一、標體性

爲欲開示那落迦想，是故說言墮險惡趣。爲欲開示自性體事，是故復須說那落迦。

地二、釋名字

由非法行、不平等行往趣於彼，故名爲險。於此趣中，觸諸苦觸，長時種種猛利無間受諸苦惱平等出現，故名惡趣。墮下分故，大深坑故，難救拔故，甚可悲故，極下賤故，以大綺言常悲怨故，說名爲墮。

地三、明說意

由能發起上品厭離，是故唯說墮那落迦。

以大綺言常悲怨故者：謂由苦所逼惱，常發言音哀吟悲冤，名常悲怨。如是言音不能引義，故名綺言。

戌二、結略義

當知此中，若由此生、若得生已，受諸苦惱；若受苦已，復起所餘自業所作種種衆苦，如是一切由此諸想之所顯示。

若由此生等者：前說邪見、業及法受，名由此生。墮險惡趣，受苦異熟，名得生已，受諸苦惱。於惡趣中，觸諸苦觸，長時種種猛利無間受諸苦惱平等出現，名受苦已，復起所餘自業所作種種衆苦。如是一切黑品因果等相，皆由前說諸差別名之所顯示。

酉二、善趣攝² 戌一、例相違

與上相違，隨其所應一切白品，皆當了知。

戌二、辨差別

此差別者，善行爲先所有諸趣，名爲善趣。受極樂故，名樂世界。

辰十、漏盡智力³ 巳一、出所能治

一切諸漏所有隨眠無餘永斷，逮得能治勝無漏心、勝無漏慧，是其最勝增上心攝、增上慧攝。由漏盡故，說名無漏心、慧解脫。

巳二、明自內證

即此心、慧二種解脫，於最後有，說名內證第六神通，由依見道及依修道內所證故。

巳三、正能覺他² 午一、釋

既自證已，如實了知，隨其所欲能爲他說，是故說言於現法中自證通慧，具足開覺，我生盡等諸句差別。

午二、指

廣說如後攝異門分，應知其相。

我生盡等諸句差別者：謂我生已盡，梵行已立，所作已辦，不受後有，是名諸句差別。如攝異門分有二種釋應知。（陵本八十三卷十七頁⁶³²⁵）

瑜伽師地論科句披尋記卷第四十九

瑜伽師地論科句披尋記卷第五十

彌勒菩薩說

唐三藏沙門玄奘奉詔譯

韓清淨科記

本地分中菩薩地第三持究竟瑜伽處建立品第五之二

寅二、總辨² 卯一、標列² 辰一、喩柁南

如是別釋佛十力已，今當總辯。喩柁南曰：

自性與分別 不共亦平等 作業及次第 差別最爲後

辰二、長行

如是所說如來十力，所有自性應當了知，所有分別應當了知，所有不共應當了知，所有平等應當了知，所有作業應當了知，所有次第應當了知，所有差別應當了知。由是七相，應知如來十力略義。

卯二、隨釋⁷ 辰一、自性³ 巳一、徵

云何如來十力自性？

巳二、釋² 午一、標體性

謂總五根爲其自性。由慧勝故，且說十力慧爲自性。

午二、出最勝² 未一、舉初

所以但言處非處智力，不言信力、不言餘力。

未二、例餘

如處非處智力，如是餘力，當知亦爾。

巳三、結

是名如來十力自性。

謂總五根爲其自性者：決擇分說：問：最後三根何等根分？答：是九根分。所謂意根，信等五根，樂、喜、捨根。（陵本五十七卷七頁⁴⁵⁸⁸）今說如來十力自性，即最後三根中具知根攝，故彼善根，總以五根爲其自性。

辰二、分別⁴ 巳一、徵起

云何如來十力分別？

巳二、略標

謂若略說，由三分別，當知無量。

巳三、列釋³ 午一、由時分

一者、由時分分別。謂於墮在過去、未來及現在世一切所知，隨悟入故。

午二、由品類

二者、由品類分別。謂於一一諸有爲事自相、共相一切行相，隨悟入故。

午三、由相續

三者、由相續分別。謂於十方一切有情界各各差別一切相續一切事義，隨悟入故。

巳四、總結

即由如是三種分別，如來十力當知無量，是名如來十力分別。

辰三、不共

云何如來十力不共？謂唯如來有此十力，不共一切聲聞、獨覺，是名如來十力不共。

辰四、平等³。 巳一、徵

云何如來十力平等？

巳二、釋²。 午一、成就無別

謂此十力，一切如來悉皆平等具足成就，故說平等無有差別。

午二、安住有別

若就如來多所安住，是則如來如是十力展轉差別。謂餘如來多住餘力，其餘如來復住餘力。

巳三、結

是名如來十力平等。

辰五、作業³。 巳一、徵

云何如來十力作業？

巳二、釋¹⁰。 午一、處非處智力

謂如來所有處非處智力，於諸因中如實知因，於諸果中如實知果；及能降伏無因、惡因種種諍論，一切沙門、婆羅門等。

午二、自業智力

如來所有自業智力，於自所作受用果業如實了知；及能降伏施福移轉種種諍論，一切沙門、婆羅門等。

施福移轉者：謂自或他行施作福，能感他自增上果故。

午三、靜慮解脫等持等至智力

如來所有靜慮、解脫、等持、等至智力，能現三種神變，無倒教授所化有情；及能降伏安住種種相違異品怨害諍論，一切沙門、婆羅門等。

午四、根勝劣智力

如來所有根勝劣智力，於諸有情軟中上根部分差別如實了知，及能於彼如應如宜爲說正法。

午五、種種勝解智力

如來所有種種勝解智力，於諸有情軟中上品、淨與不淨勝解差別如實了知；其淨勝解令漸增長，不淨勝解令漸捨離。

午六、種種界智力² 未一、略標所應

如來所有種種界智力，於諸有情劣中妙界部分差別如實了知；

劣中妙界部分差別者：欲、色、無色有情，如次名爲劣中妙界應知。

於諸有情能如其根、如其意樂、如其睡眠，依於彼彼趣入門中，無倒教授，如應安立。

能如其根等者：根有三品，謂軟中上。如其所應無倒教授，名如其根。意樂有六，謂不出離意樂等，如下自說。如其所應無倒教授，名如意樂。睡眠，謂即貪、瞋、癡、慢、尋思諸行。如其所應無倒教授，名如睡眠。

未二、別廣教授² 申一、爲諸聲聞

此中如來爲諸聲聞，依於彼彼趣入門中與正教授，如聲聞地盡一切種無間宣

說、顯發、辯了、施設、開示。

申二、爲諸菩薩² 酉一、徵

云何如來教授一切始業、初業、等持資糧攝受安住欲住其心諸菩薩衆，令心得住？

酉二、釋² 戌一、施設教授³ 亥一、略標

謂諸如來爲無諂曲、恭敬愛重，等持資糧、始業、初業諸菩薩衆，最初施設無倒教授。

亥二、正告⁵ 天一、當正思惟² 地一、於己名³ 玄一、標思惟

如是告言：善男子來！汝當安處遠離臥具獨一無二，於內寂靜如理思惟汝之父母所爲立名，或汝親教軌範師等所爲立名。

玄二、釋行相

如是思惟：我今爲有離六處法自性真實，或內、或外、或兩中間，於此有中，如是名想施設假立言說轉耶？

玄三、出了知

汝既如是正思惟已，當於此法都無所得。

或內或外或兩中間等者：謂六處法，有其內、外、或兩中間施設建立。義如聲聞地於四念住作種種說應知。（陵本二十八卷二十頁²³⁹⁵）彼四念住六處法攝。若離六處法自性真實，當知無有內、外、或兩中間施設可得。今說於彼所爲立名，亦作如是假想分別，是故說言或內、或外、或兩中間。於此所爲立名性實有中，有如是名想施設假立言說轉耶？

唯當如是如實了知，但於客法有客想轉。

但於客法有客想轉者：此顯名義俱無有實，故於彼義名爲客法，及於彼名名爲客想。顯揚頌說：由名於義轉，二更互爲客。下自釋云：以名於義非稱體故，說之爲客。義亦如名無所有故，說之爲客。（顯揚論十六卷五頁）其義應知。

地二、於眼等²。玄一、舉眼³。黃一、標應思惟

汝善男子！若於爾時，於自己名唯有客想已生已得；

唯有客想已生已得者：義顯己名唯假無實故。隨彼假名於義流轉，說名已生。唯有假名施設可得，說名已得。

復應在內如理思惟，於汝眼中所有制立眼名、眼想、眼假施設。

黃二、釋其行相²。宇一、標唯名義

如是思惟：我此眼中唯二可得，謂此制立眼名、眼想、眼假施設；及此唯事，於中假立名想施設；除此無有若過若增。

宇二、釋無自性²。宙一、標俱非

於此眼中所有制立眼名、眼想、眼假施設，且非是眼。此唯有事，於中假立眼名想等，

唯二可得等者：客想、客法，說名唯二。謂此制立眼名、眼想、眼假施設，是名客想。及此唯事，於中假立名想施設，是名客法。雖於此中實有唯事，然彼自性亦非是眼，是故當知彼唯客法。

當知自性亦非是眼。

宙二、釋所以²。洪一、離名無覺故

何以故？非於此中遠離所立眼名、眼想、眼假施設，少有眼覺而能轉故。

洪二、覺必待名故

若有此事，體是真實，稱名所說，不應於中更待眼名，方有如是眼覺而轉。唯應自性不由聽聞，不由分別彼所立名，但於此事有眼覺轉。然無如是不待名言，覺轉可得。是故此中，唯於客法而有其客眼名、眼想、眼假施設。

黃三、出正了知

汝既如是於其內眼如理思惟，復於眼想唯有客想當生當得。

玄二、例餘

如於其眼，如是於耳鼻舌身等，廣說乃至見聞覺知，已得已求，若已作意隨尋隨伺。以要言之，普於一切諸法想中，唯有客想當生當得。

耳鼻舌身等者：此中等言，等取地水火風、色聲香味觸法，及於一切安立

假說自性。如真實義品廣說應知。（陵本三十六卷十頁²⁹⁴⁰）

天二、當正攝受

如是汝於自己身中所有假想，能盡除遣勤加行道當正攝受；廣說乃至一切法中所有假想，能盡除遣勤加行道當正攝受。

天三、當多修習

汝由如是一切所知善觀察覺，普於一切諸法想中起唯客想，於一切法所有一切戲論之想數數除遣；以無分別無相之心，唯取義轉，

唯取義轉者：唯取其事、唯取真如，名唯取義，唯以實義爲所緣故。

於此事中多修習住。

天四、當正安住²。地一、獲勝等持

汝若如是，當依如來妙智清淨等持種性，獲得無倒心一境性。

地二、修正作意

如是汝等若於不淨作意思惟，於此作意勿當捨離。若於慈愍，若於緣性緣

起，若於界差別，若於阿那波那念，若於初靜慮，廣說乃至若於非想非非想處，無量菩薩靜慮、神通、等持、等至作意思惟，於此作意勿當捨離。

於此作意勿當捨離者：此中作意，謂即前說數數除遣一切戲論之想，及以無分別無相之心，唯取義轉應知。

天五、當得出離

汝若如是修此菩薩無倒作意，漸次乃至當得無上正等菩提，究竟出離。

亥三、總結

當知是名一切菩薩遍趣正行。

戌二、遍作義利² 亥一、明共諸佛

過去如來亦爲始業諸菩薩衆，已正施設如是教授；未來如來亦爲始業諸菩薩衆，當正施設如是教授；現在如來亦爲始業諸菩薩衆，現正施設如是教授。

亥二、兼利餘乘

諸聲聞等於此作意勤修習時，亦能速疾得勝通慧。若能於此無倒作意如實通

達，便能獲得諸法現觀。

午七、遍趣行智力

如來所有遍趣行智力，於一切苦能出離行、不出離行如實了知；及令捨離不出離行，能正授與能出離行。

午八、宿住隨念智力

如來所有宿住隨念智力，於其前際本事本生數數念已，爲令所化諸有情類心生厭離、心生淨信，正爲宣說；及能降伏執著常論，一切沙門、婆羅門等。

午九、死生智力

如來所有死生智力，於諸弟子過往遷謝當所受生，能正記別；及能降伏執著斷論，一切沙門、婆羅門等。

午十、漏盡智力

如來所有漏盡智力，於自解脫無惑無疑；及能降伏於阿羅漢起增上慢，一切沙門、婆羅門等。

巳三、結

是名如來十力作業。

辰六、次第² 巳一、徵

云何如來十力次第？

巳二、釋² 午一、總標

謂諸如來，於其無上正等菩提初證得時，即便頓得一切十力；頓證得已，後時次第方現在前。

午二、別顯³ 未一、初門² 申一、辨⁴ 酉一、處非處智力

謂諸如來初成佛時，先起處非處智力。觀察諸法，建立一切無倒因果。

酉二、自業智力

既觀察已，次起自業智力。若有希求即於欲界同分界中可愛殊勝異熟果者，方便爲說令其遠離諸不善業，令其現行所有善業。

酉三、靜慮解脫等持等至智力

次起靜慮、解脫、等持、等至智力。若諸有情希求世間離欲法者，與其教授，令彼趣向世間離欲，令彼獲得如實之道。

酉四、所餘諸力² 戌一、標

次起所餘如來十力。若諸有情希求出世離欲法者，如應爲說趣出世間離欲之道。

戌二、釋⁶ 亥一、根勝劣智力

謂於此中，先起根勝劣智力，如實觀察希求出世離欲者根。

亥二、種種勝解智力

次起種種勝解智力，如實觀察彼根爲先所有意樂。

亥三、種種界智力

次起種種界智力，如實觀察意樂爲先所有隨眠。

亥四、遍趣行智力

如是了知彼根、意樂及隨眠已，次起遍趣行智力，如其所應，令於所緣趣入

門中而得趣入。

亥五、宿住隨念及死生智力

次起宿住隨念智力及死生智力，彼由如應所緣趣入門加行攝住心已，淨修行已，爲說中道，令其遠離薩迦耶見以爲根本常斷邊執。

爲說中道等者：此中常斷邊執，皆以薩迦耶見爲其根本。由起宿住隨念智力，爲彼宣說能治常邊邪執處中之行，令離常執。由起死生智力，爲彼宣說能治斷邊邪執處中之行，令離斷執。如是應知。

亥六、漏盡智力

爲令永斷一切煩惱，從此後起漏盡智力。若有如是正修方便奢摩他力之所任持，雖未永斷一切煩惱，而由獲得不現行故，起不作作增上慢者，令其捨離此增上慢。

起不作作增上慢者者：於所應作，不作謂作，名不作作。即由此義不如實故，說名增上慢者。如有外道，於其自身發起不正思惟顛倒，自謂是阿羅

漢，其類應知。

申二、結

是名十力一門次第。

未二、第二門³。申一、標

復有異門十力次第。

申二、釋²。酉一、辨初四⁴。戌一、處非處智力

謂諸如來，於其無上正等菩提初證得時，最初發起處非處智力令現在前，普於一切緣生法中，觀察最勝妙法住智。

戌二、自業智力

即依如是妙法住智，次起自業智力，觀在家分，由彼彼業種種差別，依在家分曾當現時修證差別。

戌三、靜慮解脫等持等至智力²。亥一、觀出離道

如是觀察在家分已，次起靜慮、解脫、等持、等至智力，觀出家分。謂於如

是出家分中，爲有能說出苦離苦正道者耶？爲無有耶？

亥二、觀照世間

如是觀已，正知都無。

正知都無者：謂出家分，於出離苦不能如實了知故。

觀諸世間無有救護，無所歸依。由大悲故，以其佛眼如實觀照一切世間。

戌四、根勝劣智力

既觀照已，次起根勝劣智力，現前了知住在世間種種有情，生在世間、長在世間，或有鈍根、或有中根、或有利根。現前知己，便於說法其心趣入。

酉二、例餘六

次後如前一切所餘種種勝解智力等事，次第應知。

申三、結

是第二門十力次第。

未三、第三門³。申一、標

復有異門十力次第。

申二、釋²。酉一、辨初三³。戌一、處非處智力

謂諸如來，於其無上正等菩提初證得時，最初發起處非處智力令現在前，觀察一切緣生法界。

戌二、自業智力

次起自業智力，即於如是緣生法中，觀察假立有情名想諸有情界，如有情自造如是色類諸業，還受如是色類諸果。

戌三、靜慮解脫等持等至智力

如實觀察如是法界有情界已，次起靜慮、解脫、等持、等至智力，即爲如是諸有情類解脫苦故，示現三種無倒神變而教授之。

酉二、例餘七

既教授已，次起餘力，如前次第知根等已，於其正道令趣入已，然後方便令彼有情解脫衆苦。

申三、結

是第三門十力次第。

辰七、差別⁴ 巳一、徵

云何如來十力差別？

巳二、標

謂此十力展轉相望，亦有差別，亦無差別。

亦有差別亦無差別者：謂此十力，如其次第前後相望。若由此義，說有差別。復由他義，說無差別。如下自釋，一一可知。

巳三、釋² 午一、總徵差別

處非處智力等與自業智力等，有何差別？

午二、展轉別辨⁹ 未一、第一智力與第二智力² 申一、處非處智力

若正了知善不善業，能感所有愛非愛果，當知此由處非處智力故。

申二、自業智力

若正了知諸有能造善不善業，即彼能受愛非愛果，而非所餘，當知此由自業智力故。

未二、第二智力與第三智力² 申一、自業智力

若正了知諸有能修靜慮、解脫、等持、等至，即彼能入靜慮等定，而非所餘，當知此由自業智力故。

申二、靜慮解脫等持等至智力

若正了知即依如是靜慮等定，現三神變，無倒教授所化有情，當知此由靜慮、解脫、等持、等至智力故。

未三、第三智力與第四智力² 申一、靜慮解脫等持等至智力

若正照取信等俱生相應之心，當知此由靜慮、解脫、等持、等至智力故。

申二、根勝劣智力

若正分別即彼諸根軟中上品種種差別，當知此由根勝劣智力故。

未四、第四智力與第五智力² 申一、根勝劣智力

若正照取諸根爲先，彼彼法中種種意樂，當知此由根勝劣智力故。

申二、種種勝解智力² 酉一、標彼相

若正分別即彼意樂種種差別，當知此由種種勝解智力故。

酉二、釋差別² 戌一、舉六意樂

即彼意樂，當知分別略有六種。

戌二、列釋一一⁶ 亥一、不出離意樂

一者、不出離意樂。謂於各別大自在天、那羅延天、梵世間等起信解者所有意樂。

亥二、出離意樂

二者、出離意樂。謂於三乘起信解者所有意樂。

亥三、遠清淨意樂

三者、遠清淨意樂。謂安住下品、中品成熟者所有意樂。

亥四、近清淨意樂

四者、近清淨意樂。謂安住上品成熟者所有意樂。

亥五、現得涅槃意樂

五者、即於現法得涅槃意樂。謂由聲聞乘所得涅槃起信解者所有意樂。

即於現法得涅槃意樂者：謂於涅槃深心欣樂，願於現法速證得故。

亥六、當得涅槃意樂

六者、於當來世得涅槃意樂。謂由大乘所得涅槃起信解者所有意樂。

於當來世得涅槃意樂者：謂於涅槃不深欣樂，不願速疾般涅槃故。

未五、第五智力與第六智力² 申一、種種勝解智力

若正照取勝解所起相似種子，當知此由種種勝解智力故。

申二、種種界智力² 酉一、標彼相

若正照取即彼種子差別分別無量品類，當知此由種種界智力故。

酉二、釋差別² 戌一、舉類

又即彼界，當知分別略有四種。

戌二、列釋

一者、本性住種子。二者、先習起種子。三者、可修治種子，謂有般涅槃法者所有種子。四者、不可修治種子，謂無般涅槃法者所有種子。

未六、第六智力與第七智力² 申一、種種界智力

若正了知如界種類行跡趣入，當知此由種種界智力故。

申二、遍趣行智力

若正分別即彼行跡一切品類，如是行跡能令離染，如是行跡能令畢竟清淨，如是行跡能令不畢竟清淨，當知此由遍趣行智力故。

未七、第七智力與第八智力² 申一、遍趣行智力

若如實知前際隨念一切趣因前際俱行，當知此由遍趣行智力故。

申二、宿住隨念智力

若正了知如前分別種種隨順八言說句、六種略行，當知此由宿住隨念智力故。

未八、第八智力與第九智力² 申一、宿住隨念智力

若正了知依於前際有情死生，當知此由宿住隨念智力故。

申二、死生智力

若正觀見後際種種有情死生，當知此由死生智力故。

未九、第九智力與第十智力² 申一、死生智力

若正了知於自事義未得究竟，有情後際受生相續，當知此由死生智力故。

申二、漏盡智力

若正了知於自事義已得究竟，心善解脫，於現法中證得涅槃，當知此由漏盡智力故。

巳四、結

當知是名如來十力展轉相望，亦有差別，亦無差別。

子四、四無所畏³ 丑一、指經說

如來所有四無畏文，如契經說應知其相。

丑二、略釋義³ 寅一、標列四處² 卯一、標

謂諸如來，於其四處，在大眾中而自稱歎。

卯二、列⁴ 辰一、現正等覺

謂所知障永解脫故，於一切種一切法中現等正覺，不共聲聞，是第一處。

辰二、證得漏盡

諸煩惱障永解脫故，證得漏盡共諸聲聞，是第二處。

辰三、說出離道

爲求解脫諸有情類超過眾苦說出離道，是第三處。

辰四、說諸障法

即於能出道得爲礙，說諸障法應當遠離，是第四處。

寅二、釋名無畏

如來既於如是四處，如其實義自稱歎已。次後他於自所稱歎前之二處，所有相違身語意業而興謗難；

所有相違身語意業者：謂前二處能爲對治身語意業現行過失，名彼相違。

由諸如來解脫所知、煩惱障故，證得於一切種鄙惡所作覆藏永斷，名三不護不共功德。又於動轉、或於瞻視、或於言論、或於安住，似有煩惱所起作業多不現行，名永害習氣不共功德。如是等名彼能治應知。

復於後二自稱歎處，所有相違前後乖反墮非理相而興謗難。

所有相違前後乖反墮非理相者：謂後二處能爲對治前後乖反墮非理相，名彼相違。如於是道執爲非道，及於是障執爲非障，是名前後乖反墮非理相。

謂於世間有眼見者、無眼見者、有他心智者、無他心智者，

謂於世間有眼見者等者：謂諸世間，依靜慮起天眼智通、他心智通，是名世間有眼見者、或有他心智者。與此相違，說名無眼見者、無他心智者。如是一切，皆說彼謗難者應知。

如來於此自稱歎處能爲對治諸謗難中，都不見有如實因相。由是因緣，於此四處能自了知，坦然無畏，心無怯劣，無所疑慮，都無驚懼。

如來於此自稱歎處等者：前說初二自稱歎處相違身語意業，後二自稱歎處相違前後乖反墮非理相，今於此中名能對治，與彼所治正相違故。如來於此諸謗難中，能正見彼無有是處，名不見有如實因相。

寅三、顯唯四種

又佛大師唯有爾所正應稱歎，謂自利行及利他行俱善圓滿。當知此中，前二稱歎自利行滿，後二稱歎利他行滿。

丑三、明所爲。³ 寅一、爲大乘

此中如來，若自稱歎於一切法現等覺故成正等覺，當知正爲等趣大乘諸菩薩故。

寅二、爲餘乘

若自稱歎一切漏盡，當知正爲等趣聲聞及獨覺乘諸有情故。

寅三、爲諸乘。³ 卯一、標無別

若復稱歎能出離道及諸障法，當知俱爲等趣諸乘諸有情故。

卯二、指經說

如是如來所說經句，謂我爲諸菩薩、聲聞說出離道，乃至廣說。

卯三、顯結集

諸結集者，於所結集聲聞藏中，除菩薩言；於所結集菩薩藏中，但唯誦此菩薩之言。

子五、三念住。³ 丑一、指經說

如來所有三念住文，如契經說應知其相。

丑二、略顯義

謂諸如來於其長夜有如是欲：如何當令諸有情類，於我善說法毗奈耶無倒行中，如實隨住。如是長夜欲樂法主化御衆時，若所希欲或遂不遂，不生雜染。由三念住略所顯故。

丑三、明建立。³ 寅一、標

此三念住，復由三衆差別建立。

寅二、徵

云何三衆？

寅三、列

若彼一切一向正行，是第一衆；若彼一切一向邪行，是第二衆；若彼衆中一分正行、一分邪行，是第三衆。

子六、三不護³。丑一、指經說

如來所有三不護文，如契經說應知其相。

丑二、顯要義

謂諸如來以要言之，於一切種鄙惡所作覆藏永斷，由三不護之所顯示。

於一切種鄙惡所作覆藏永斷者：煩惱所起身語意業，名一切種鄙惡所作。

作是業已，不欲他知，故有覆藏，如來於此皆悉永斷。

丑三、簡不共²。寅一、簡有鄙惡

諸阿羅漢由忘念故，於時時間片有無記鄙惡所作，如來於此一切一切皆無所

有。

如來於此一切一切皆無所有者：謂諸如來，於此一切無記鄙惡所作，於一切時皆無所有故。

寅二、釋無覆藏

是故如來於諸弟子，如所立要，即如自性切切誠勗，顯顯訶擯，時復現行率爾敦逼，於諸弟子無所防慮。所謂勿彼共住多時，知我所行三業不淨，因於前事意懷不悅，由斯不順乃事乖違，或面譏我，或向他說。

於諸弟子如所立要等者：爲令弟子於諸善品速疾受學，於諸惡品速疾除斷，如自所言即如是作故。

子七、大悲²。丑一、指前說

當知如來所有大悲一切種相，皆悉如前供養親近無量品說。

丑二、顯無上

當知如是如來大悲無量無上。

子八、無忘失法² 丑一、徵

云何如來無忘失法？

丑二、釋² 寅一、標略義

謂諸如來常隨記念，若事、若處、若如、若時有所爲作，如來即於此事、此處、此如、此時皆正隨念，是名如來無忘失法。

若事若處若如若時者：事謂事業，處謂處所，如謂方便，時謂時分。如下自釋應知。

寅二、釋差別

所謂如來普於一切所作事業，普於一切方處差別，普於一切所作方便，普於一切時分差別，念無忘失，常住正念，當知是名無忘失法。

子九、永害習氣² 丑一、徵

云何如來永害習氣？

丑二、釋² 寅一、標略義

謂諸如來，或於動轉、或於瞻視、或於言論、或於安住，似有煩惱所起作業多不現行，是名如來永害習氣。

或於動轉等者：謂如若往、若還、若屈、若伸，是名動轉。若覩、若瞻，是名瞻視。若爲說法及相談論，是名言論。若處靜室，住諸靜慮，是名安住。

寅二、簡無學

諸阿羅漢雖斷煩惱，而於動轉、瞻視、言論及安住中，而有種種似有煩惱所起作業。

子十、一切種妙智² 丑一、徵

云何如來一切種妙智？

丑二、釋² 寅一、舉要義³ 卯一、標

謂諸如來以要言之，於三聚法現等正覺。

卯二、徵

何等爲三？

卯三、列

一者、能引有義聚法，二者、能引無義聚法，三者、非能引有義聚法非能引無義聚法。

能引有義聚法等者：諸有情類，略有三聚。一、正性聚，二、邪性聚，三、不定聚。若彼有情正性聚定，當知此由能引有義聚法。邪性聚定，當知此由能引無義聚法。不定聚定，當知此由非能引有義聚法、非能引無義聚法。

寅二、釋得名。³ 卯一、如來一切種智

當知此中，若諸如來或於能引無義聚法，或於非能引有義聚法非能引無義聚法，總於如是一切法中無顛倒智，是名如來一切種智。

卯二、如來妙智

若諸如來，於其能引有義聚法一切法中無顛倒智，當知是名如來妙智。

卯三、一切種妙智

即於此中，若一切種智、若妙智，總合爲一，名一切種妙智。

癸二、總辨² 子一、結前一切

如是一切，總名如來百四十種不共佛法。

子二、更廣分別⁴ 丑一、證得³ 寅一、得不共法² 卯一、先得相好

即於此中，諸相、隨好，在菩薩位最後有中，皆已證得極善清淨。

卯二、頓得餘法

若時菩薩坐菩提座，住最後有，於菩薩道菩提資糧極善圓滿，爾時無師修三十七菩提分法，得一剎那名無障礙智三摩地，是其菩薩學道所攝金剛喻定。

得一剎那名無障礙智三摩地者：最後學位，名一剎那。於爾所時，喻如金剛三摩地生。由此生故，遍一切種不染無明無餘永斷，於所知境智無礙轉，名無障礙智三摩地。

從此無間第二剎那，頓得其餘不共佛法。謂如來十力爲初，一切種妙智爲

後，皆極清淨，悉爲無上。

寅二、入如來地

由得此故，普於一切所知境界，無滯無障、最極清淨無垢智轉。依暫發悟思惟圓滿、意轉圓滿，超過一切菩薩行、菩薩地，證入一切如來行、如來地。

無滯無障等者：謂由所知障斷，說有無滯無障智轉。及由煩惱障斷，說有最極清淨無垢智轉。如是差別應知。暫作意時，遍於一切智無礙轉，名暫發悟思惟圓滿。不由數數作意思惟，依一作意遍了知故，由是說言意轉圓滿。當知此即釋前名無滯智。

寅三、得勝轉依² 卯一、顯自

一切在肉所知障品所有麤重無餘斷故，得勝轉依。

一切在肉所知障品等者：住品中說：一切所知障品所有麤重，亦有三種。一者、在皮麤重，二者、在膚麤重，三者、在肉麤重。當知此中，在皮麤重，極歡喜住皆悉已斷；在膚麤重，無加行無功用無相住皆悉已斷；

在肉麤重，如來住中皆悉已斷，得一切障極清淨智。（陵本四十八卷二十一頁³⁸⁸⁴）今說在肉所知障斷，如彼應知。

如是轉依最爲無上。

卯二、簡餘

其餘一切乃至最上成滿住中菩薩轉依，當知有上。

丑二、差別³ 寅一、問

問：一切安住到究竟地菩薩智等、如來智等，云何應知此二差別？

菩薩智等如來智等者：此中等言，等取若身、若心應知。

寅二、答³ 卯一、妙智別⁵ 辰一、微隔無隔喻² 巳一、菩薩

答：如明眼人隔於輕縠觀衆色像，一切安住到究竟地菩薩妙智於一切境，當知亦爾。

巳二、如來

如明眼人無所障隔觀衆色像，如來妙智於一切境，當知亦爾。

辰二、未淨已淨喻² 巳一、菩薩

如畫事業圓布衆綵，唯後妙色未淨修治，到究竟地菩薩妙智，當知亦爾。
巳二、如來

如畫事業圓布衆綵，最後妙色已淨修治，如來妙智，當知亦爾。

辰三、微闇離闇喻² 巳一、菩薩

如明眼人於微闇中覩見衆色，到究竟地菩薩妙智，當知亦爾。

巳二、如來

如明眼人離一切闇覩見衆色，如來妙智，當知亦爾。

辰四、遠覩近覩喻² 巳一、菩薩

如明眼人遠覩衆色，到究竟地菩薩妙智，當知亦爾。

巳二、如來

如明眼人近覩衆色，如來妙智，當知亦爾。

辰五、輕翳極淨喻² 巳一、菩薩

如輕翳眼觀視衆色，到究竟地菩薩妙智，當知亦爾。

巳二、如來

如極淨眼觀視衆色，如來妙智，當知亦爾。

卯二、身別² 辰一、菩薩

如處胎身，到究竟地諸菩薩身，當知亦爾。

辰二、如來

如出胎身，諸如來身，當知亦爾。

卯三、心別² 辰一、心行² 巳一、菩薩

如阿羅漢夢中心行，到究竟地菩薩心行，當知亦爾。

巳二、如來

如阿羅漢覺時心行，如來心行，當知亦爾。

如阿羅漢夢中心行者：謂阿羅漢身中所有諸法，於一切時清淨而轉，乃至
睡夢亦常現前故。

辰二、智體² 巳一、菩薩

如味燈體，到究竟地菩薩智體，當知亦爾。

巳二、如來

如明燈體，如來智體，當知亦爾。

寅三、結

是故當知，一切安住到究竟地諸菩薩衆，與諸如來妙智身心有大差別。

丑三、作事³ 寅一、標

如是如來證菩提已，遍於十方一切佛土，普能施作一切佛事。

寅二、徵

云何名爲一切佛事？

寅三、釋² 卯一、略十種³ 辰一、標

謂諸如來如來事業、如來所作，略有十種。如是一一如來事業、如來所作，能成無量利有情事。此外無有若過若增。

辰二、徵

何等爲十？

辰三、釋¹⁰ 巳一、第一作事

謂諸如來最初自現大丈夫身，欲令有情心發淨信。大丈夫身於生淨信爲最勝故，是名如來第一作事。如是作事，諸相、隨好所能成辦。

巳二、第二作事

又諸如來普爲一切有情之類，起一切種教授加行，是名如來第二作事。如是作事，四一切種清淨所能成辦。

起一切種教授加行者：謂由三種神變教授，能攝諸相圓滿教授。義如聲聞地說。（陵本二十七卷二十二頁²³²¹）名一切種教授加行。

巳三、第三作事² 午一、標

又諸如來能作一切利有情事，能斷一切所生疑惑，是名如來第三作事。如是作事，如來十力所能成辦。

午二、釋² 未一、能辦義利

由前所說如來十力，於能成辦一切有情一切義利有堪能故。

未二、能釋問難

又於如來所證十力所興問難，唯有如來能知、能見、能解、能了，唯有如來於彼問難能正答故。

於能成辦一切有情一切義利有堪能故等者：此中二義，謂於一切有情義利有堪能故，及於所證所興問難能正答故，如前十力作業廣顯應知。

巳四、第四作事

又諸如來普能降伏一切他論，普能成立一切自論，是名如來第四作事。如是作事，四無所畏所能成辦。

巳五、第五作事

又諸如來所化有情，於佛教敕若正安住、不正安住，如來於彼心無雜染，是名如來第五作事。如是作事，三種念住所能成辦。

若正安住不正安住者：若住一向正行，名正安住。若住一向邪行，名不正安住。若住一分正行、一分邪行，名正安住及不正安住。如是總攝三眾應知。

巳六、第六作事

又諸如來如自所言，即如是作，是名如來第六作事。如是作事，三種不護所能成辦。

巳七、第七作事

又諸如來常以佛眼，於晝夜分遍觀世間，是名如來第七作事。如是作事，如來大悲所能成辦。

巳八、第八作事

又諸如來頓於一切一切作事皆無退捨，是名如來第八作事。如是作事，無忘失法所能成辦。

頓於一切一切作事者：前說如來無忘失法，於四一切念無忘失，常住正

念，由是此說一切一切。

巳九、第九作事

又諸如來所行儀軌，如實隨轉，無越作用，是名如來第九作事。如是作事，永害習氣所能成辦。

巳十、第十作事

又諸如來於其能引無義聚法，於不能引有義聚法、亦不能引無義聚法，揀擇捨離；於其能引有義聚法，爲衆宣說、開示、顯發；是名如來第十作事。如是作事，一切種妙智所能成辦。

卯二、廣無盡

如是如來由前所說百四十種不共佛法，能作如來一切所作一切佛事。如是佛事若廣分別不易可數，乃至俱胝那庾多百千大劫說不能盡。

丑四、名字² 寅一、建立³ 卯一、標

如是所說諸如來住、諸如來地，名爲建立。

卯二、徵

何以故？

卯三、釋

依此住此希求品類諸菩薩衆，於菩薩學能正修學，亦依住此而有所證，即依住此普能成辦一切有情一切義利，是故說此名爲建立。

依此住此希求品類諸菩薩衆者：謂於無上菩提已發正願，是名希求品類諸菩薩衆。從是以後，即以大菩提願爲依爲住，是名依此住此。由大菩提如來住攝，依如來住而說此言。

寅二、不共² 卯一、唯簡二乘

又此一切所說佛法，於利他事最爲隨順，一切如來是利他事之所顯現，聲聞、獨覺則不如是，是故說名不共佛法。

卯二、簡餘一切² 辰一、釋名² 巳一、簡² 午一、簡二乘

又於如是諸佛法中，自有佛法，聲聞、獨覺一切一切皆所不得。所謂大悲、

無忘失法、永害習氣、一切種妙智。

午二、簡菩薩

自有佛法雖分似得，而一切種皆不圓滿。如來於彼一切一切悉皆證得，於一切種無不圓滿，最極超過、最極殊妙。

巳二、結

是故皆說名爲不共。

辰二、顯義

當知此中，獨一有義是不共義。

自有佛法雖分似得等者：謂餘下住諸菩薩眾，於諸佛法自體相似、受用相似，名分似得。攝異門分說：法所化者，從法身路而得成立，相似法故。法等分者，受用無漏法之財寶，相似法故。（陵本八十四卷五頁⁶³⁶⁵）其義應知。

己二、名菩薩地² 庚一、標總義

如是圓滿顯示一切菩薩學道及學道果，名菩薩地。具說一切菩薩學道及學道果，一切種教實依處故。

庚二、出異名

又此菩薩地，亦名菩薩藏摩怛理迦，亦名攝大乘，亦名開示壞不壞路，亦名無障智淨根本。

亦名開示壞不壞路者：如有一類大乘惡取空者，謂一切種皆無所有，於實有事起損減執，於佛所說法毗奈耶甚爲失壞。義如真實義品中說。（陵本三十六卷十五頁²⁹⁷²）若善取空，應知不壞此菩薩地，廣顯彼差別義，是名開示壞不壞路。

己三、廣讚福聚³ 庚一、總標義

若諸所有天人世間，或天、或人，若諸沙門、婆羅門等，於此所說菩薩地中，起堅信解、樂聞受持、精勤修學、廣爲他說，下至書持、供養恭敬、深心愛重所得福聚；以要言之，如薄伽梵於菩薩藏所攝一切微妙經典樂聞等

業，宣說、顯了、分別、施設、開示、稱讚所獲福聚，等無有異。

庚二、釋所以²。辛一、明藏攝。

何以故？此菩薩地顯示一切菩薩藏中，略標、廣釋諸門攝故。

辛二、明法住。

於此地中，能廣開示法毗奈耶，乃至衆多所化有情，於此正法受持讀誦、法隨法行，安住增長廣大勝進；於爾所時，像似正法不得興盛，正法不滅。若於爾時，像似正法當得興盛，即於爾時，能引實義所有正法當速滅沒。

庚三、結無量。

是故於此菩薩地中，起堅信解、樂聞受持，乃至廣說所得福聚無量無邊。

本地分中菩薩地第四持次第瑜伽處發正等菩提心品

戊二、地義次第²。己一、結前生後。

如是已說菩薩地義。云何應知此中次第？

己二、廣辨一一²。庚一、辨³。辛一、初持攝²。壬一、種性發心持。

謂諸菩薩要先安住菩薩種性，乃能正發阿耨多羅三藐三菩提心。

壬二、行加行持³。癸一、所學處。

既發心已，方正修行自他利行；於自他利正修行時，得無雜染方便；無雜染故，得無厭倦方便；無厭倦故，得諸善根增長方便；於諸善根得增長已，能證無上正等菩提。

得無雜染方便等者：以真實義爲所緣境，名無雜染方便。此即真實義品所攝。善修定心，令心調柔，能得三種神變教授，名無厭倦方便。此即威力品攝。能熟自他，名諸善根增長方便。此即成熟品攝。

癸二、如是學。

又於如自他利加行無雜染方便、無厭倦方便、善根增長方便，得大菩提中將修行時，先於甚深廣大正法安立信解；立信解已，訪求正法；求正法已，廣爲他說，亦於正行自能成辦。於成辦時，若由此、於此、爲此應行，即由此、於此、爲此而行。

安立信解至由此於此爲此而行者：當知此即力種姓品所攝。言由此、於此、爲此應行者，謂由從他得正教授，或由施他無倒教授，能令智力種性漸得清淨、漸得增長，是名由此應行。於所遮止開許法中，善能教誡所攝徒眾，令不現行、或現行故，是名於此應行。爲於有情普能攝受、調伏、成熟，應行方便所攝身語意業，是名爲此應行。餘文易了，如應當知。

癸三、能修學³。子一、六度四攝供三寶等

由此、於此、爲此行時，如令福德、智慧增長所應行者，即如是行。福德、智慧既增長已，於不捨離生死方便能正修行。

如令福德智慧增長等者：當知此即施品乃至供養親近無量品所攝。由彼一切，能爲福德、智慧之因，故令福德、智慧增長。由此能感福果、智果，能有利利益安樂。雖處生死，能令不空，有大義利，名不捨離生死方便能正修行。

子二、菩提分法¹⁴ 丑一、慚愧

即於此中正修行時，能行生死無雜染行。

丑二、堅力持性

即於此中正修行時，能於自樂行無著行。

丑三、心無厭倦

即於此中正修行時，能於無量生死大苦能正修行無厭倦行。

丑四、善知諸論

由於生死無厭倦故，能正訪求種種異論，於一切論得無所畏。

丑五、善知世間

善知論已，復能了知所應爲說、所可宣說、應如是說，由此智故善知世間。

丑六、修正四依

如是菩薩善知諸論及世間已，復能如理訪求正法。

丑七、修無礙解

既訪求已，堪能善斷一切有情一切疑惑。

丑八、菩提資糧

如是堪能斷他疑惑，令自福德展轉增長，福德資糧漸得圓滿；令自智慧亦轉增長，智慧資糧漸得圓滿。

丑九、修菩提分

二種資糧既圓滿已，於諦行相、菩提分法無倒修中，能勤修行。

丑十、修習止觀

於修方便能正了知。

丑十一、方便善巧

即持如是正勤所修，迴向大乘般涅槃果，不求聲聞及獨覺乘般涅槃果。

丑十二、妙陀羅尼

既得如是方便善巧，能於一切菩薩語言聽聞受持。依修力故，於昔未聞所有諸法一切種相皆能辦了，於陀羅尼無礙辯才皆得圓滿。

丑十三、三三摩地

爲欲永斷一切障故，精勤修習三解脫門。

丑十四、法唄陀南

即於此中正修行時，爲斷自他一切顛倒增上慢故，勤修正行，如是能於一切種相正行圓滿。

能行生死無雜染行乃至一切種相正行圓滿者：當知此即菩提分品所攝。由具慚愧故，說能行生死無雜染行。由堅力持故，說能於自樂行無著行。謂能禁染汙心性，不隨煩惱自在轉故。言一切論得無所畏者，此即菩薩善知諸論，於彼新新後後法義殊勝差別獲得淨信，故得無畏。言能了知所應爲說等者，於諸有情世間流轉差別如實了知，名能了知所應爲說；於器世間流轉差別如實了知，名能了知所可宣說；於八種相觀世間義及諸世間所有勝義，名能了知應如是說；是名善知世間。菩提分品廣顯其義應知。

（陵本四十四卷十七頁³⁵⁹⁷）言能如理訪求正法者，此顯菩薩修正四依，於正法中依四正依，精勤發起聞思修習正加行故。言能善斷一切有情一切疑

惑者，此顯菩薩四無礙解，由是獲得無量最勝善巧，能善爲他無倒開示故。言修方便能正了知者，此顯菩薩修習止觀，名修方便應知。言迴向大乘般涅槃果者，此顯菩薩方便善巧，能熟自他，故名迴向大乘般涅槃果。言於一切種相正行圓滿者，此顯四種法嗹陀南。如實了知一切諸行皆是無常，一切諸行皆悉是苦，一切諸法皆無有我，及與涅槃其體寂靜，名於一切種相正行圓滿。餘文易了，如應當知。菩提分攝，故不繁述。

子三、菩薩功德² 丑一、標

如是正行得圓滿已，於一切有情及聲聞、獨覺皆爲殊勝。所謂正行功德殊勝，及可稱讚功德殊勝。

丑二、釋² 寅一、正行功德殊勝² 卯一、辨³ 辰一、希奇不希奇

當知此中，正行功德殊勝菩薩，爲利自他勤修正行，用利他事以爲自事，聲聞、獨覺則不如是。

辰二、平等心饒益

由諸菩薩用利他事爲自事故，於一切有情起如自己平等之心；由起如是平等心故，於諸有情常施恩惠，不望其報。

辰三、不虛方便行

菩薩如是勤修行時，常於有情發起希望，欲令彼得利益安樂；由是利益安樂意樂，常能起作不虛加行。

卯二、結

當知是名展轉引發正行功德殊勝。

爲利自他勤修正行等者：此即功德品中第一嗹陀南攝。用利他事以爲自事等者，此顯初句希奇不希奇。於一切有情至不望其報者，此顯第二句平等心饒益。常能起作不虛加行者，此顯第四句不虛方便行。

寅二、稱讚功德殊勝² 卯一、辨³ 辰一、受記等⁴ 巳一、蒙佛授記

當知此中，稱讚功德殊勝菩薩，於諸佛所獲得授記，非諸聲聞，亦非獨覺。

巳二、墮決定中

得授記已，便能安住不退轉地。

巳三、所作定常

安住此中，能於一切決定所作、恆常所作，獲得堅固無忘失法。

巳四、施設最勝

如是堅固無忘失法，諸佛菩薩施設，在於一切有情最上施設。

於諸佛所獲得授記等者：此即功德品中第三嘔陀南攝。四句差別，如文次

第易可了知。

辰二、無顛倒等⁴ 巳一、加行無退

普於一切所應作事能無退失，於未得退亦無退失。

巳二、勝進增長

無退失時，恆常無間，一切善法運運增長，如明分月。

巳三、名真非似

由諸善法轉增長故，菩薩爾時得名真實，不名相似。

巳四、善知調伏

由得真實菩薩名故，於一切種一切有情調伏方便，如實了知。

普於一切所應作事等者：此即功德品中第二嘔陀南攝。如其次第尋文可知。

辰三、諸施設等⁵ 巳一、施設建立² 午一、標一切善修

如實知故，一切安立皆得善巧。

午二、釋由尋思等

從此尋求、於此尋求、由此尋求，既尋求已，由此究竟皆正安立，如是名爲一切安立皆得善巧。

巳二、五種無量² 午一、教授善巧

於諸安立得善巧故，復於教授能得善巧。

午二、獲彼等持

於其教授得善巧故，復能獲得無量所緣三摩地王。

巳三、說法果利

獲得如是三摩地已，能不唐捐宣說正法種種行相，說正法時皆有勝果。

巳四、大乘性攝

能於大乘究竟出離，以依大性而出離故，能攝大乘。

巳五、菩薩名號

由此復於彼彼大乘出離位中，得彼彼名。一切菩薩同共此名，一切世間諸佛菩薩皆共安立、皆共稱歎。

卯二、結

當知是名所可稱讚功德殊勝。

一切安立皆得善巧等者：此即功德品中第四、第五唵陀南攝。此中一切安立皆得善巧，顯彼第四唵陀南中前三句義。四尋思中，若名尋思，是名從此尋求；若事尋思，是名於此尋求；若自性、差別假立尋思，是名由此尋求。由此四種尋思，得如實智，是名由此究竟。言於教授能得善巧等者，

此顯於五無量，能起一切善巧作用故。言於彼彼大乘出離位中，得彼彼名等者，此即第五唵陀南中，菩薩十應知建立諸名號。餘文易了，隨應當知唵陀南攝。

辛二、次相等攝。 壬一、相

由得如是殊勝名故，當知獲得諸菩薩相，諸相所相，成就其相。

壬二、分

如是正行一切種相，在家、出家二分菩薩所能成辦。

壬三、增上意樂

於二分中能成辦已，正行堅固，於諸善品獲得一向增上意樂。如是意樂，或在家品所應攝受，或出家品所應攝受。

壬四、住

或於善品能正安立，乃至安住。

或於善品能正安立乃至安住者：此顯住品應知。於其勝解行住，名正安

立。從此已上，所餘諸住，名正安住。

壬五、生

從此已上，故作意思受諸有生，於彼生處常得值遇諸佛菩薩。

壬六、攝受

及能起作一切有情諸饒益事。

起作一切有情諸饒益事者：此顯攝受品應知。

壬七、地

恆常無間，蒙佛菩薩無倒教授，任持善品，領受殊勝證得分位。由領受故，於可稱讚攝受殊勝證得分位，能正安處，如己舍宅。

恆常無間蒙佛菩薩無倒教授等者：此顯地品應知。

壬八、行

住此位已，能於後後殊勝分位，一切種相覺慧昇進，漸次乃至到於究竟，能於後後殊勝分位一切種相覺慧昇進等者；此顯行品應知。

於其中間不生喜足。

辛三、後建立攝

如是昇進，證得究竟，從此不求其餘上地。已到究竟極邊際故，名得無上。

庚二、結

是名菩薩地義次第。

如是昇進證得究竟等者：此顯建立品應知。

本地分中有餘依地第十六

丙十三、有餘依地² 丁一、結前生後

如是已說菩薩地。云何有餘依地？

丁二、正辨地相³ 戊一、標

當知此地有三種相。

戊二、列

一者、地施設安立，二者、寂靜施設安立，三者、依施設安立。

戊三、釋。³ 己一、地施設安立。³ 庚一、徵

云何地施設安立？

庚二、釋

謂有餘依地，除五地一分，謂無心地、修所成地、聲聞地、獨覺地、菩薩地。除一地全，謂無餘依地。所餘諸地，名有餘依地。

庚三、結

是名地施設安立。

除五地一分等者：謂除五地中無餘依涅槃所攝一分，取餘一分施設安立有餘依地。如於無心地中，有二建立。謂若阿賴耶識永滅，名無心地，此即無餘依攝。若所餘位諸轉識滅，名無心地，此即有餘依攝。義如有心無心地說應知。（陵本十三卷十四頁¹¹²⁴）今除無心地中無餘依攝一分，取彼有餘依攝一分，名有餘依地施設安立。如說無心地，如是修所成地、聲聞

地、獨覺地、菩薩地，隨應當知。

己二、寂靜施設安立。⁵ 庚一、徵

云何寂靜施設安立？

庚二、標

謂由四種寂靜，施設安立有餘依地。

庚三、列

一、由苦寂靜故；二、由煩惱寂靜故；三、由不損惱有情寂靜故；四、由捨寂靜故。

庚四、釋⁴ 辛一、苦寂靜

云何苦寂靜？謂阿羅漢苾芻諸漏永盡，所有當來後有衆苦皆悉永斷，已得遍知。如多羅樹斷截根頂，不復現前。由得當來不生法故，是名苦寂靜。

辛二、煩惱寂靜

云何煩惱寂靜？謂阿羅漢苾芻貪欲永斷、瞋恚永斷、愚癡永斷，一切煩惱皆

悉永斷。由得畢竟不生法故，是名煩惱寂靜。

辛三、不損惱有情寂靜

云何不損惱有情寂靜？謂阿羅漢苾芻貪欲永盡、瞋恚永盡、愚癡永盡，一切煩惱皆悉永盡，不造諸惡，修習諸善，是名不損惱有情寂靜。

辛四、捨寂靜⁴ 壬一、徵

云何捨寂靜？

壬二、標

謂阿羅漢苾芻諸漏永盡，於六恆住，恆常無間多分安住。

壬三、釋

謂眼見色已，不喜不憂，安住上捨，正念正知。如是耳聞聲已、鼻嗅香已、舌嘗味已、身覺觸已、意了法已，不喜不憂，安住上捨，正念正知。

壬四、結

是名捨寂靜。

庚五、結

即依如是四種寂靜，說有餘依地最極寂靜、最極清涼，是名寂靜施設安立。

己三、依施設安立⁶ 庚一、徵

云何依施設安立？

庚二、標

謂有八種依。

庚三、列

一、施設依，二、攝受依，三、任持依，四、流轉依，五、障礙依，六、苦惱依，七、適悅依，八、後邊依。

庚四、釋⁸ 辛一、施設依² 壬一、徵

云何施設依？

壬二、釋² 癸一、出依事

謂五取蘊。

癸二、明施設²。子一、補特伽羅想

由依此故，施設我及有情、命者、生者、能養育者、補特伽羅、意生、儒童等，諸想等想假用言說。

子二、八言說句想

及依此故，施設如是名字、如是生類、如是種性、如是飲食、如是領受苦樂、如是長壽、如是久住、如是壽量邊際等，諸想等想假用言說。

諸想等想假用言說者：謂我及有情乃至儒童等，如是一切爲便言說，爲順世間，是名假用言說。即此言說，想爲其因。由構了相，是名爲想。構畫種種諸法像類，是名等想。

辛二、攝受依²。壬一、徵

云何攝受依？

壬二、釋²。癸一、出依事

謂七攝受事。即自己父母、妻子、奴婢、作使、僮僕、朋友、眷屬，七攝受

事。如前意地已廣分別。

癸二、明攝受

依此了知諸有情類有所攝受。

如前意地已廣分別者：意地中說七攝受事。一、自父母事，二、妻子事，三、奴婢僕使事，四、朋友官僚兄弟眷屬事，五、田宅邸肆事，六、福業事及方便作業事，七、庫藏事。（陵本二卷十七頁¹⁶⁵）今於此中，唯舉前四，略無後三。總指前說，名爲七攝受事，然於文中應置等言。

辛三、任持依²。壬一、徵

云何任持依？

壬二、釋²。癸一、出依事

謂四種食。即段食、觸食、意思食、識食。

癸二、明任持

由依此故，已生有情任立支持；又能攝養諸求有者。

已生有情任立支持等者：此顯四種能爲食義，由資益義是食義故。由能長養諸根大種，故令已生有情任立支持。能令當來後有生起，名能攝養諸求有者。

辛四、流轉依² 壬一、徵

云何流轉依？

壬二、釋² 癸一、出依事

謂四種識住及十二緣起。即色趣識住、受趣識住、想趣識住、行趣識住；及無明緣行、行緣識，廣說乃至生緣老死。

癸二、明流轉

由依此故，諸有情類，於五趣生死隨順流轉。

色趣識住等者：趣謂趣求，趣求色故。緣色爲境，令識安住，是名色趣識住。如是趣求受、想、行故，緣受、想、行爲境，令識安住，是名受、想、行趣識住。

辛五、障礙依² 壬一、徵

云何障礙依？

壬二、釋² 癸一、出依事

謂諸天魔。

癸二、明障礙

隨有彼彼修善法處，即往其前，爲作障礙。

辛六、苦惱依² 壬一、徵

云何苦惱依？

壬二、釋² 癸一、出依事

謂一切欲界皆名苦惱依。

癸二、明苦惱

由依此故，令諸有情領受憂苦。

辛七、適悅依² 壬一、徵

云何適悅依？

壬二、釋² 癸一、出依事

謂靜慮、等至樂名適悅依。

癸二、明適悅

由依此故，諸有情類若即於此現入彼定，若生於彼，長夜領受靜慮、等至所有適悅。

辛八、後邊依² 壬一、徵

云何後邊依？

壬二、釋² 癸一、出依事

謂阿羅漢相續諸蘊。

癸二、明後邊

由依此故，說諸阿羅漢住持最後身。

庚五、料簡² 辛一、問

問：阿羅漢苾芻諸漏永盡，住有餘依地，當言與幾種依共相應耶？

辛二、答

答：當言與一種依一向相應，謂後邊依；與六攝受事不共相應；

與六攝受事不共相應者：七攝受事中，除其第六福業事及方便作業事，所餘名六攝受事應知。

與流轉依、與障礙依，一向全不相應；與所餘依，非相應非不相應。

庚六、結

是名依施設安立。

與所餘依非相應非不相應者：謂施設依、任持依、苦惱依、適悅依，名所餘依。由彼一切，於有餘依不定繫屬，名非相應；然或可得，亦名非不相應。

本地分中無餘依地第十七

丙十四、無餘依地²。丁一、結前生後如是已說有餘依地。云何無餘依地？

丁二、正辨地相³。戊一、標

當知此地亦有三相。

戊二、列

一者、地施設安立，二者、寂滅施設安立，三者、寂滅異門安立。

戊三、釋³。己一、地施設安立²。庚一、徵

云何地施設安立？

庚二、釋

謂先所除五地一分，當知即此無餘依地所攝。謂無心地、修所成地、聲聞地、獨覺地、菩薩地。

己二、寂滅施設安立⁵。庚一、徵

云何寂滅施設安立？

庚二、標

謂由二種寂滅，施設安立如是無餘依地。

庚三、列

一、由寂靜寂滅故；二、由無損惱寂滅故。

庚四、釋²。辛一、寂靜寂滅⁴。壬一、徵

云何寂靜寂滅？

壬二、標

謂先於有餘依地，獲得觸證四種寂靜；今無餘依涅槃界中，亦有最勝四種寂靜。

壬三、列

一、數教寂靜，

數教寂靜者：謂數不能數故，一切言教不可說故。

二、一切依寂靜，

一切依寂靜者：謂八種依，名一切依。有餘依中，或與相應、或不相應。今此一切都不相應，故名寂靜。

三、依依苦寂靜，

依依苦寂靜者：有餘依中，由有所依身故，與苦惱依非不相應。今此不爾，是名依及依苦寂靜。

四、依依苦生疑慮寂靜。

依依苦生疑慮寂靜者：依謂所依。依所生苦，是名依苦。此二寂靜，義如前說。般涅槃時，已得轉依諸淨行者，轉捨一切染汙法種子所依。於一切善、無記法種子，轉令緣闕，轉得內緣自在。義如意地中說。（陵本二卷二頁115）是名依依苦生疑慮寂靜。於現法中，彼果心苦永不行故。

壬四、證

如說：

由無下劣心 能忍受勤苦 彼所趣解脫 譬如燈盡滅

如說由無下劣心等者：今引此頌，意取後二句證寂靜寂滅應知。

辛二、無損惱寂滅。³ 壬一、徵

云何無損惱寂滅？

壬二、釋。³ 癸一、標義

謂與一切依不相應，違背一切煩惱諸苦流轉，生起轉依所顯真無漏界。

癸二、教證。² 子一、證離苦

如說：苾芻永寂滅，名真安樂住。

子二、證轉依

又如說言：實有無生、無起、無作、無爲、無等生起；亦有有生、有起、有作、有爲、有等生起。

實有無生無起等者：集論中說：何故此滅復名無生？離續生故。何故此滅復名無起？永離此後漸生起故。何故此滅復名無作？不作現在諸業煩惱所依處故。（集論五卷十五頁）又云：何故此滅復名無爲？離三相故。

（集論五卷十四頁）此說無生、無起、無作、無爲，皆應準釋。胎、卵二生託生以後，身分圓滿，仍未出時，名等生起。義如有尋有伺地說。（陵本十卷二頁⁷³⁰）今謂此滅，說名無等生起。如是一切，由第一義說名實有，簡彼有生、有起、有作、有爲、有等生起，而安立故。彼唯世俗，說名有故。

若當無有無生、無起、無作、無爲、無等生起；我終不說有生、有起、有作、有爲、有等生起、有永出離。由實有無生、無起、無作、無爲、無等生起；是故我說有生、有起、有作、有爲、有等生起、有永出離。

若當無有無生無起等者：此中義顯，若於未來當入涅槃，即於現法不說有永出離。由現法中入般涅槃，是故亦說有永出離。由是證知有此寂滅。

癸三、顯意² 子一、標寂滅

世尊依此密意說言甚深、廣大、無量、無數，是謂寂滅。

子二、釋經名⁴ 丑一、甚深

由於此中所具功德難了知故，名爲甚深。

丑二、廣大

極寬博故，名爲廣大。

丑三、無量

無窮盡故，名爲無量。

丑四、無數³ 寅一、總標

數不能數，無二說故，名爲無數。

由於此中所具功德等者：謂此涅槃所具功德，唯內所證，不可思議，名難了知。又佛菩薩無住涅槃攝所有滅，以常安住一切有情利樂事故，名極寬博，及無窮盡。一切戲論不能說故，名無二說。由是說言甚深、廣大、無量、無數。

寅二、別釋

云何此中數不能數？謂有非有不可說故，即色離色不可說故，即受離受不可

說故，即想離想不可說故，即行離行不可說故，即識離識不可說故。

寅三、顯義

所以者何？由此清淨真如所顯，一向無垢。

壬三、結

是名無損惱寂滅。

庚五、結

如是二種，總說爲一寂滅施設安立。

己三、寂滅異門施設安立⁴ 庚一、徵

云何寂滅異門施設安立？

庚二、標

當知此中，寂滅異門有無量種。

庚三、列² 辛一、別舉

謂名爲常，亦名爲恆，亦名久住，亦名無變，亦名有法，

謂名爲常至亦名有法者：當知此翻諸行五無常性而得此名。云何爲五？謂無常性、無恆性、非久住性、不可保性、變壞法性。義如攝事分說。（陵本八十六卷一頁⁶⁴⁸⁵）與彼相違，如其次第，應知名常，乃至亦名有法。

亦名舍宅，亦名洲渚，亦名救護，亦名歸依，亦名所趣，亦名安隱，亦名淡泊，亦名善事，亦名吉祥，亦名無轉，亦名無垢，亦名難見，亦名甘露，亦名無憂，亦名無沒，亦名無熾，亦名無熱，亦名無病，亦名無動，亦名涅槃，

亦名舍宅至亦名涅槃者：此中諸名，多分與集論同，少分有異，然義可知，如彼應釋。如集論說：何故此滅復名舍宅？無罪喜樂所依事故。何故此滅復名洲渚？三界隔絕故。何故此滅復名弘濟？能遮一切大苦災橫故。（此名救護，名別義同。）何故此滅復名歸依？無有虛妄，意樂方便所依處故。何故此滅名勝歸趣？能爲歸趣一切最勝聖性所依處故。（此名所趣，名別義同。）何故此滅復名安隱？離怖畏住所依處故。何故此滅復名

清涼？諸利益事所依處故。（此名淡泊，名別義同。）何故此滅復名樂事？第一義樂事故。（此名善事，名別義同。由勝義樂說名勝義善故。）何故此滅名趣吉祥？爲證得彼，易修方便所依處故。何故此滅復名不轉？永離諸趣差別轉故。何故此滅復名無漏？永離一切煩惱魔故。（此名無垢，名別義同。）何故此滅復名難見？超過肉眼、天眼境故。何故此滅復名甘露？離蘊魔故。何故名寂靜？於現法中，彼果心苦永不行故。（此名無憂，名別義同。憂寂靜故。）何故此滅名不卑屈？離三愛故。（此名無沒，名別義同。不沒三愛中故。）何故此滅名無熾然？永離一切愁歎憂苦諸惱亂故。何故此滅名無熱惱？永離一切煩惱熱故。何故此滅復名不動？永離一切散動故。何故此滅復名涅槃？無相寂滅大安樂住所依處故。（集論五卷十四頁）

亦名永絕一切戲論。

亦名永絕一切戲論者：謂異不異、死後當有或當無等一切戲論不能說故。

辛二、略攝

如是等類，應知說名寂滅異門。

庚四、結

是名寂滅異門施設安立。

瑜伽師地論科句披尋記卷第五十